

বিষ্ণুপ্ৰিয়া মণিপুৰীৰ দুই শতাব্দী



লেখক :—

ডঃ কালীপ্ৰসাদ সিংহ
আসাম বিশ্ববিদ্যালয়, শিলচৰ
২০০২

মূল্য : ১০০ টকা

BISHNUPRIYA MANIPURIR DUI SATABDI

by

Prof. K. P. SINHA

Assam University

Published by : **DEBJANI SINHA**
Divyasram Samskriti Kendra
Kachudharam, Chincoorie
Silchar - 799007

First Published : June, 2002*

Price : Rs. 100.00

Printed at : Shrichaitanya Press
Hospital Road, Silchar - 1.

৭৪
- 10/02/03

কবিতা

বিষ্ণুপ্রিয়া মণিপুরীর দুই শতাব্দী

শ্রী কালীপ্রসাদ সিংহ

অধ্যাপক, আসাম বিশ্ববিদ্যালয়

ভূমিকা

১৯৯২ কি ৯৩ ইংরাজীর কথা। মি উবাকা ত্রিপুরা বিশ্ববিদ্যালয়ের অধ্যাপকগো। মোর বন্ধু দেবকুমার সিংহর ঘরে ধর্মনগরর শ্রী সুন্দর মুখার্জির লগে সামাজিক বিষয়ে আলাপ আলোচনা চলেছে। হাদিত সুন্দর গিরকে মোরে ‘সুরমা রেলি মণিপুরী এছোছিয়েশন’ সম্বন্ধে প্রশ্ন আহান আ’ঙ করলো। মি মাতলু, “এ ব্যাপারে মি হবা করে হার নাপাছু”। সুন্দর গিরকে টিপ্পনী করলো, “আপনার সাদে মানুরেউ এতা হার নাপাছি বুললেতে আর কারাঙতে আ’ঙকরতাঙগা ! বারো এসাদে অ’ইলেতে আমার পরবর্তী জেনারেশনেউ এতা সম্বন্ধে কিত্তাউ হার নাপেয়া থাইতাইনাই।” সুন্দর গিরকর টিপ্পনীহানে মোরে বিরাট ধাক্কা আহান দিলো। মি হারপেইলু, হুদ্রা প্রশ্ন এহান নাগই, আমার সমাজ সম্পর্কে এসাদে আরতাউ অনেক প্রশ্ন আছে, যেতার উত্তর সমাজে হারপানি মনেইতারা এবং ভবিষ্যতেউ হারপানি মনেইতাই। এহানৌ হারপেইলু যে, প্রশ্ন এতার উত্তর দেনার দায়িত্বহান আমারহান; এতার উত্তর আমি নাদিয়া গেলগা পরবর্তী প্রজন্মরাঙ আমি দোষী সাব্যস্ত অ’ইতাঙাই।

মি লগে লগে ঠিক করলু যে, মণিপুরে বসবাস করানির সময়র আমার সামাজিক ইতিহাস উতা হারপানি আমরাঙ এবাকা কঠিন অ’ইলেউ, মণিপুরেঙ আহানির পিছ এহানর ইতিহাসহান হারপানিতে অমাটিক কঠিন নাইব ! খানি কঠিন অ’ইলেউ, যেহানি আমি বর্তমানে হারপানি পারিয়ার, অন্ততঃ উহানি থদিয়া গেলগাউ ভবিষ্যৎ প্রজন্মরাঙ আমি অমাটিক দোষী সাব্যস্ত না’ইতাঙাই।

কামহান আ’তে লইলু। ডক্টরেট ডিগ্রি করানির সময়ত মোর উপদেষ্টা বিশ্ববিখ্যাত ডঃ সুনীতি কুমার চট্টোপাধ্যায় গিরকে মোরে পইলা দেছিল পরামর্শহান— “সমাজে যেপেই যতো বয়স্ক মানু বা পণ্ডিত আছি তানু হাবির লগে দেখা করিয়া সমাজ এহান সম্পর্কে তানু যেতা যেতা হারপাছি বা হুনেছি, উতা হাবি সংগ্রহ কর।” গিরকর পরামর্শ অনুসারে ঔ সময়ত মি সমগ্র সমাজহান বুলে বুলে বিষয় এতা সংগ্রহ করেছিলু। কিন্তু ঐ সময়ত মি ভাষা কৃষ্টি বিষয়েই মতামত বারো কিংবদন্তী সংগ্রহ করেছিলু ; অন্যান্য ব্যাপারে অমাটিক দৃষ্টি নাদেছিলু। এবাকা মি বিষ্ণুপ্রিয়া মণিপুরী সম্পর্কে হাবি ধরণর প্রশ্ন আ’তে লয়া নুৱা উদ্যমে বা-রো Field-Work এ নিকুললু এবং যে যে গিরিগিথানীরাঙতো প্রশ্ন এতার উত্তর পানার সম্ভাবনা আছে, উতা কুনোগোরেউ বাদ নাদিয়া হাবিরাঙতো এ সমাজ সম্পর্কে প্রচলিত মতামত বারো কিংবদন্তী সংগ্রহ করলু। লগে ডক্টরেট ডিগ্রি করানির সময়ত সংগ্রহ করেছিলু বস্তু উতাউ খানি কামে লাগেয়া এ গ্রন্থ এহান খাড়া করলু।

এ গ্রন্থত মোর নিজর মত বা যুক্তির কথা নিতান্তই কম। সমাজর গিরিগিথানী-রাঙতো মি যেতা যেতা পাছু, উতাই মি এ গ্রন্থত যথায়থভাবে পুল করিয়া থদেছুতা। Matter এতা হাবির সমন্বয় করিয়া, বা যুক্তি বিচারলো এতা আংশিকভাবে গ্রহণ বারো বর্জন করিয়া

সুষ্ঠুভাবে গ্রন্থ আহান করানির হয়তো প্রয়োজন আছিল ; কিন্তু কাম উহান না করলুতা কারণ দুহানলো। কারণ আহান অ'ইলতাই, সমাজর গিরিগিথানীরাঙতো যেতা Matter পেইলু, এতা যেসাদে পাছু উসাদে থদিলে পরবর্তী গবেষক উতাই তানুর নিজর নিজর যুক্তি বা চিন্তাধারা কামে লাগেয়া নিজর নিজর মতবাদ নিকাল পাৱতাই ; মোর কথালো বা মোর ব্যাখ্যালো বিষয় উতা অভিব্যক্ত করলে ভাবী গবেষকে স্বাধীন চিন্তার সুযোগ নাপেই তাই-এহান খাল করিয়া সংগ্রহ করেছু বিষয় উতা যথাযথভাবে থদেছুতা। দ্বিতীয় কারণহান অ'ইলতাই ব্যক্তিগতহান। নিয়মমাফিক শিক্ষা লমনির পিছেত্ত অ'করিয়া সারা জীবন এহান ইমে ইকরতে আছু ; আজি মোর ৬৭ বছর অ'ইলতা পেয়া মোর আ'ত এহান সুপ জিরানির অবসর আহান নাপাছে। এসাদে করে ডাঙর ডাঙর গ্রন্থ ২০ হানর চুৱা প্রকাশ করলু, হুকাঙ গ্রন্থ ২৫/৩০ হানর চুৱা, এবং আরতাউ ১৪/১৫ হান গ্রন্থ অপকাশিত অবস্থাত আছে ; আরাকৌ তিন-চারিহান গ্রন্থর কাম চলের। উহানে বর্তমানে দেহগোই, আ'তহানে বারো মনহানে তিলয়া প্রতিবাদ করানি অ'করলা। গতিকে তানুরে খানি অবসর দেনারকা পরিশ্রমর পরিমাণহান কমেয়া, ইমে যে কথা যেসাদে পাছু, উসাদে থদিলুতা। এ দ্বিতীয় কারণে কোনো কোনো Matter বাংলা ভাষালো লিখা করপেখেত্ত বা প্রকাশিত প্রবন্ধত্ত পাছু উতাউ অনুবাদ না করিয়া ইমে বাংলালোই থদেছু। যে যে গিরিগিথানির করপেখ বা প্রকাশিত প্রবন্ধ এ গ্রন্থত তুলেদেছু, তানু হাবির নাঙ যথাস্থানে দিয়া তানুর স্বীকৃতি দেছু।

বি. ম. এতা যদিও মণিপুর বেলেয়া আসাম-ত্রিপুরা-বাংলাদেশে আশ্রয় নেনা অ'করেছিতা ১৮শ শতকর ৪র্থ পাদত্ত পুরি, তথাপি অধিকাংশ মানুষেই আহেছিতা ১৯শ শতকর ১ম-৩য় দশকর ভিতরে। গতিকে বিংশ শতক লমইতেগা মণিপুরর বাহিরে তানুর অবস্থান দুই শতাব্দীর কাছাকাছি অ'রগা। এ গ্রন্থত প্রধানভাবে পেইতাঙাইতা এ দুই শতাব্দীর বি.ম.সমাজ সম্পর্কে তথ্য। ও কারণে গ্রন্থহানর নাঙহানাত 'দুই শতাব্দী' কথা এহান যৌকরেছিতা।

মোর গ্রন্থ এহানে এ সমাজ সম্পর্কে যেতা যেতা প্রশ্ন উঠের উতার মীমাংসা আংশিকভাবেউ যদি করে দেনা পাৱের এবং ভাবী গবেষকর চিন্তার খুরাক যুগানি পাৱের, উহান অ'ইলে মোর পরিশ্রম সার্থক অ'ইতই।

কালীপ্রসাদ

সূচীপত্র

	বিষয়	পৃষ্ঠা
১।	বিষ্ণুপ্রিয়া মণিপুরী জনগোষ্ঠী	১ - ২
২।	মণিপুরর বাহিরে বিষ্ণুপ্রিয়া মণিপুরীর বসতি মণিপুরর বাহিরে বসতি সম্বন্ধে জনমত	৩ - ৮
৩।	বিষ্ণুপ্রিয়া মণিপুরীর রাজবংশ রাজবংশ সম্বন্ধে জনমত	৯ - ১৩
৪।	বিষ্ণুপ্রিয়া মণিপুরীর ব্রাহ্মণ পরিবার বারো গদিপ্রথা ব্রাহ্মণ পরিবার সম্পর্কে জনমত	১৪ - ১৫
৫।	সৈৎনামী ডোমর দলাদলি সৈৎনামী ডোম সম্পর্কে জনমত সৈৎনামী ডোমর মিলন সম্পর্কে জনমত	১৬ - ২২
৬।	সামাজিক সংস্থা নিখিল বিষ্ণুপ্রিয়া মণিপুরী মহাসভা মহাসভার আদিযুগ সম্পর্কে জনমত বিষ্ণুপ্রিয়া মণিপুরী সাহিত্য-সভা বিষ্ণুপ্রিয়া মণিপুরী স্টুডেন্টছ যুনিয়ন শ্রীশ্রী রাধামাধব মন্দির, রাধাকুণ্ড	২৩ - ২৫ ২৬ - ৩২ ৩৩ - ৩৪ ৩৫ - ৩৭ ৩৮ - ৪৩
৭।	বিষ্ণুপ্রিয়া মণিপুরীর জাতীয় চেতনা	৪৪ - ৪৬
৮।	ভানুবিলর কৃষক আন্দোলন	৪৭ - ৫০
৯।	বিষ্ণুপ্রিয়া মণিপুরী ভাষা-আন্দোলন	৫১ - ৬৪
১০।	বিষ্ণুপ্রিয়া মণিপুরী সমাজে শিক্ষা	৬৫ - ৬৭
১১।	বিষ্ণুপ্রিয়া মণিপুরী পত্রিকার ইতিহাস	৬৮ - ৭৪
১২।	বিষ্ণুপ্রিয়া মণিপুরী সংস্কৃতি	৭৫ - ৭৮
১৩।	বহিষ্ঠিশ্বে মণিপুরী নৃত্য	৭৯ - ৮২
১৪।	বিষ্ণুপ্রিয়া মণিপুরী মঞ্চ-সঙ্গীত	৮৩ - ৮৪
১৫।	বিষ্ণুপ্রিয়া মণিপুরী সমাজে নাট্যাভিনয়	৮৫ - ৮৮
১৬।	বিষ্ণুপ্রিয়া মণিপুরী শহীদ	৮৮
১৭।	পরিশিষ্ট	৮৯-১০১

১। বিষ্ণুপ্রিয়া মণিপুরী জনগোষ্ঠী

বিষ্ণুপ্রিয়া মণিপুরী এতা মণিপুরৰ পশ্চিম দিকেত্ত আয়া মণিপুৰে হমাছিহাতা— এ বিষয়ে আমাৰতা কুনো মতভেদ নেই ; মতভেদ আছেতা হুদা কুন সময়ত কিসাদে করে তানু মণিপুৰে আয়া হমাছি—এ বিষয়ে।

এ জাতৰ প্ৰাচীন ভাষাহান আছিলতা প্ৰাচীন ভাৰতীয় আৰ্যভাষা বা সংস্কৃত। ঔ আৰ্যভাষা উহান বিবৰ্তনৰ মাধ্যমে পৰবৰ্তীকালে আধুনিক ভাৰতীয় আৰ্যভাষাত পৰিণত অ'ইলতা খ্ৰীষ্টীয় ১২শ/১৩শ শতাব্দীত। ঔ আধুনিক ভাৰতীয় আৰ্যভাষাৰ লগে মেইতেই ভাষাৰ মিলনে মণিপুরৰ বুকৈ বিষ্ণুপ্রিয়া মণিপুরী ভাষাৰ উৎপত্তি অ'ছেতা ১৪শ/১৫শ শতাব্দীত। ১৮শ শতাব্দীৰ চতুৰ্থ পাদত্ত অ'কৰিয়া ঊনবিংশ শতাব্দীৰ প্ৰথম পাদ পৰ্যন্ত— এ সময় এহানাত মণিপুরৰ ৰাজপৰিবাৰৰ অন্তৰ্দ্ধন্দ বারো বহিঃশত্ৰুৰ, বিশেষ কৰিয়া ব্ৰহ্মদেশৰ, আক্ৰমণৰ ফলে জাত এহানৰ প্ৰায় তিন চতুৰ্থাংশ মানু মণিপুৰ বেলেয়া বাহিৰে আহেছি। এ বাহিৰে আহেছি বিষ্ণুপ্রিয়া এতাই তানুৰ ভাষাকৃষ্টি জিংতা কৰিয়া থয়া এবাকা বহিৰ্বিশ্বে জাত আহান হিসাবে উবা অ'নিৰ প্ৰচেষ্টাত আছি। বৰ্তমান গ্ৰন্থত আমি এ বিষ্ণুপ্রিয়া মণিপুরী (১) জনগোষ্ঠী, তানুৰ (২) সংস্কৃতি বারো শিক্ষা এবং (৩) তানুৰ জাতীয় চেতনাৰ জাগৃতি এবং অগ্ৰগতি সম্বন্ধে আলোচনা আহানি কৰিক। মণিপুৰে আছি বিষ্ণুপ্রিয়া উতা মেইতেইৰ লগে মিলিয়া তানুৰ লগে একাকার অ'ছি ; ঔ কাৰণে তানুৰ সম্বন্ধে কুনো কিছু মাতাত নাযিয়ারগা।

জনসংখ্যা : ভাৰতৰ জাতীয় লোকগণনাত বিষ্ণুপ্রিয়া মণিপুরীৰ জনসংখ্যা সম্বন্ধে সঠিক কুনো খবৰ নাপেয়ার। বি.ম. কুনো কুনো সংস্থাত্তৌ বেসৰকাৰীভাবে লোকগণনা আহানি কৰানি অ'ছিল ; উতাত্তৌ সঠিক কুনো চিত্ৰ ফুটিয়া না উঠেৰ। ১৯৬৫-৬৬ ইংৰাজীত গবেষণা কৰানিৰ সময়ত মি বিষ্ণুপ্রিয়া ভাষাভাষীৰ পৰিবাৰ গণনা আহান করেছিল। ঔ পৰিসংখ্যান উহান তলে দেনা অ'ইল—

ফামৰ নাঙ

নরসিংপুৰ (রাহালটিলা সহ)

মেহেৰপুৰ

জিৰিবাম-লেইসাবীথল

বিক্ৰমপুৰ

যাত্ৰাপুৰ

গড়েৰবন্দ

ৰাতাবাড়ী

শিংলা

পৰিবাৰ সংখ্যা

৪৯৩

৬১৪

৩০০ (আনুমানিক)

৪৮২

৪৯৫

১৫৭

২৪৯

১১১০

প্ৰতাপগড়	১২৯৮
লোৰাইৰপুৰা-নূৰখা-দামছড়া	৬০০ (আনুমানিক)
ধৰ্মনগৰ-শনিছড়া	৬৫৯
কৈলাসহৰ	৩৪৫
আ'ওঁ	৫০৫
ফটিকৰায়-নিবেদী	১০২
ৰাতাছড়া	৪১০
কমলপুৰ-হালহালি-লুংমা	৫৬৪
কল্যাণপুৰ	৪০
বিশালগড়-ৰাঙাপানি	১১৬
পূৰ্ব পাকিস্তান/বাংলাদেশ	৮২৫ (আনুমানিক)
শিলচৰ-গেহাটি শহৰ	১৫০ (আনুমানিক)
সৰ্বমোট পৰিবার সংখ্যা	৯৫১৪

প্ৰতি পৰিবাৰে ৮ গোট কৰে সদস্য ধৰিলে ঔ সময়ৰ বি.ম. জনসংখ্যা অ'ৰতা
 $৯৫১৪ \times ৮ = ৭৬১১২$; ধৰিক, ৭৭০০০ ; বৰ্তমানে দেড়লক্ষৰ কমে নাইব— মণিপুৰে
 মেইতেই গোষ্ঠীত হমাছি উতা বাদ দিয়া।

২। মণিপুরর বাহিরে বিষ্ণুপ্রিয়া মণিপুরীর বসতি

বিষ্ণুপ্রিয়া মণিপুরী এতা আগে শতশত বছর ধরিয়া মণিপুৰে আছিলাতা। তানু বিশেষ করিয়া কেন্দ্রীভূত আছিলাতা লোকটাকর পশ্চিম পারে বিষ্ণুপুর-নিংথৌখোঙ অঞ্চলে এবং পূর্ব দিকর খাঙাবোক-হেইরোক অঞ্চলে। বিষ্ণুপ্রিয়া এতা আৰ্য্যভাষাভাষী ; তানু পশ্চিমদিকেত্ত মণিপুৰে আহেছিতা। কিন্তু তানু কুন সময়ত কিসাদে মণিপুৰে আহেছি, এ সম্বন্ধে ঐতিহাসিকর ভিতরে মতভেদ আছে। এ সম্বন্ধে আমি কিন্তাউ মাতাত নাযিয়ারগা। কিন্তু আসাম-ত্রিপুরা-বাংলাদেশে যে বিষ্ণুপ্রিয়া আছি, এতা যে মণিপুৰেত্ত আহেছিতা— এ বিষয়ে সন্দেহর বিন্দুমাত্র কারণ নেই। বিষ্ণুপ্রিয়া মণিপুরীর ভাষা এবং কৃষ্টি হাবিতাউ মণিপুৰর বুকগোত সৃষ্ট অ'ছেতা ; উহানলো আমি নিজরে 'মণিপুরী জাতি' বুলিয়া, নিজর ভাষারে 'মণিপুরী ভাষা' বুলিয়া এবং নিজর কৃষ্টিরে 'মণিপুরী কৃষ্টি' বুলিয়া গৌরববোধ করিয়ারতা।

এহানৌ নিশ্চিত যে, বিষ্ণুপ্রিয়া এতা মণিপুৰ পরিত্যাগ করিয়া আহেছিতা ১৮শ শতকর দ্বিতীয়ার্ধত্ত অ'করিয়া উনবিংশ শতকর তৃতীয় দশকর ভিতরে। এ বিষয়ে লিখিত কুনো ঐতিহাসিক তথ্য নাপানিয়ে এ সম্বন্ধে যথার্থ তথ্য পানারকা আমি সমাজর অনেক বিজ্ঞ বারো বয়স্ক গিরিগিথানীর সাক্ষাৎকার লইলাঙ। ঐ সাক্ষাৎকার অনুসারে মণিপুৰেত্ত বিষ্ণুপ্রিয়া সম্প্রদায় এহান আহেছিতা প্রধানতঃ তিনহান যুগে— (১) ১৮শ শতকর দ্বিতীয়ার্ধত রাজনৈতিক কারণে এবং বহিঃশত্রুর আক্রমণে, (২) ১৯শ শতকর ১ম বারো দ্বিতীয় দশকে ঔরার দারা বা ব্রহ্মদেশীয় মানুরে মণিপুৰ আক্রমণর ফলে এবং (৩) ১৯শ শতকর ২য় বারো ৩য় দশকে মণিপুৰর রাজপরিবারে অন্তর্দন্দর ফলে। এতা বিষয়ে আমি সমাজেত্ত যেতা তথ্য পেইলাঙ উতা যথাযথভাবে তুলে দিলাঙ। এতান্ত আমার মণিপুৰ পরিত্যাগ এবং মণিপুৰর বাহিরে বসতি স্থাপনর ইতিহাস আহান হঙকরে পারতাঙাই।

মণিপুরর বাহিরে বিষ্ণুপ্রিয়া মণিপুরীর বসতি সম্বন্ধে জনমত

বলানন্দ সিংহ, কৈলাসহর, ১৯৯৬ ইং

- ১। বিষ্ণুপ্রিয়া পইলা বসতি করেছিলা সুনামগঞ্জর পারুৱা-চণ্ডীপুরে, উতার পিছে ছিলটর মাছিমপুরে ; উতার পিছে হবিগঞ্জর বীজগাওত।
- ২। ত্রিপুরাত বিষ্ণুপ্রিয়াই পইলা বসতি করেছিলা বিশালগড়-রাঙাপানিত।
- ৩। কল্যাণপুর, আ'উর, ফটিকরায় বারো রাতাছড়ার মানু আহেছিলা বীজগাওত।
- ৪। কমলপুরর মানু আহেছিলা ভানুগাছেত।
- ৫। কৈলাসহরর মানু আহেছিলা প্রধানতঃ পারুৱা-চণ্ডীপুরেত। শিংলাঙৌ কতোগো আহেছি।
- ৬। পারুৱাত অনেকগো বিষ্ণুপ্রিয়া সমসন নগরে গেছিলাগা ; অনেকগো মৈমনসিং-সুনামগঞ্জর বর্ডারে দুর্গাপুর অঞ্চলেউ গেছিলাগা। উতার অনেকগো বাঙালী সমাজে হমেইলাগা বারো বাকি উতা হবিগঞ্জর বালীগাওত গিয়া থাইলাগা।
- ৭। বিশালগড়ে আয়া আমার মানু উতাই উচ গাছে কায়া চারিয়বারাদে সমতলভূমিত ঝোপরাগো মাহেই দেহিয়া উতা জ্বালাদিয়া জমি হঙকরলা।
- ৮। বিশালগড়ে যিতেগা জিরাছিলা ফাম উহান জিরানিয়া।

(২) সেনাপতি সিংহ বারো রসমোহন সিংহ : বাংলাদেশ

(প্রকাশিত প্রবন্ধত সংগ্রহ)

পামহেইবার আমলেই ১৭২৫ খৃষ্টাব্দ ১৭৪৯ খৃষ্টাব্দ পেয়া ব্রহ্মদেশর লগে বারে বারে যুদ্ধ অ'ইল। ঐ সময়ত মণিপুরর অনেক অধিবাসী দেশত্যাগ করিয়া গেলাগা। ১৭৫৮ খৃষ্টাব্দত পাম-হেইবার মৃত্যুর পরে ভ্রাতৃকলহর সুযোগে-ব্রহ্মরাজে মণিপুর আক্রমণ করিয়া রাজধানী দখল করলো। ঐ সময়তৌ অনেকে দেশত্যাগ করলা। ১৭৬৪-৬৫ খৃষ্টাব্দত ভাগ্যচন্দ্র মহারাজ ব্রহ্মরাজ আলুতপায়ার আক্রমণে যুদ্ধত পরাজিত অয়া কাছাড়ে আশ্রয় নেছিলগা। উবাকাউ তার লগে অনেক মণিপুরবাসী আহেছিলা। পিছে ভাগ্যচন্দ্র মহারাজ মণিপুরে ফিরলেউ, তানু না ফিরিয়া উপেই বসবাস করিয়া থাইলা। ১৮১২ খৃষ্টাব্দত অ'করিয়া বারো মণিপুরর রাজসিংহাসনলো অন্তর্দ্বন্দ্ব অ'ইল সময় উহানাতেী ব্রহ্মদেশর পুনঃ পুনঃ আক্রমণে বহু সংখ্যক মণিপুরবাসী মণিপুর বেলেয়া কাছাড়ে গেলাগা।

১৮১৯ খৃষ্টাব্দত ব্রহ্মদেশর হাবিত্ত ডাঙর আক্রমণহান অ'ইল মণিপুরর গজে। ঐ

সময়তেই মণিপুরবাসীর ডাঙর অংশ আহান দেশত্যাগ করিয়া বিভিন্ন দিকেদে ছড়িয়া পড়ল। উতার অংশ আহান নেত্রকোণার সুসং-দুর্গাপুর অ'য়া বাংলাদেশে হুমাছি। মণিপুরেত্ত আহানির সময়ত পথে অনেকগো মৃত্যুমুখে পড়েছি।

মণিপুর বেলেয়া গেলাগা উতার ভিতরে মেইতেই, বিষ্ণুপ্রিয়া, পাঙাল-এতা হাবিও আছিল। উতা উত্তর আসাম, কাছাড়, ত্রিপুরা, বাংলাদেশ ইত্যাদি বিভিন্ন ফামে গিয়া থাইলাগা। বাংলাদেশে থাইলাগা উতার অধিকাংশই মৌলবীবাজার-কমলগঞ্জ এলাকাত থাইলাগা। উতার বাহিরে ঢাকা, ময়মনসিংহ, শ্রীহট্ট ইত্যাদি ফামেউ আছিল।

(৩) রণজিৎ সিংহ : বাংলাদেশ

বাংলাদেশর বৃহৎ ছিলেট জেলাত অধিকাংশ বিষ্ণুপ্রিয়া বসবাস করিয়া আছি। লোকসংখ্যা প্রায় ৫০ হাজার। উতার প্রায় শতকরা ৭৫ ভাগ আছিতা মৌলবী বাজার জেলার কমলগঞ্জ উপজিলাত। বিষ্ণুপ্রিয়া বসবাস করিয়া আছি অন্যান্য ফাম অ'ইলতাই— হবিগঞ্জ জিলার চুনারঘাট উপজিলা, সুনামগঞ্জ জিলার কোম্পানীগঞ্জ উপজিলা, ছিলেট সদর জিলার উপকণ্ঠর মাছিমপুর, মৌলভীবাজারর কুলাউড়া উপজিলা ইত্যাদি স্থান।

(৪) চন্দ্র মোহন রাজকুমার : রাজ নগর (১৯৯৭ ইং)

মণিপুরেত্ত আয়া কাছাড় ত্রিপুরাত থাইলা বিষ্ণুপ্রিয়া উতার গজে লুসেই বারো কুকিয়ে অনেক অত্যাচার করলা। তানু ঘন ঘন আক্রমণ করিয়া অনেক বিষ্ণুপ্রিয়ারে মারলা ; অনেকগোরে তালকরিয়া খেদেদিল।

বাজারিছড়া বারো কাটাবাড়িত আছিল। বিষ্ণুপ্রিয়া উতার গজে আক্রমণ করিয়া লুসেয়ে অনেক বিষ্ণুপ্রিয়ারে মূর তুপ করিয়া মারলা। উবাকাত কাটাবাড়ি নাঙ এহান অ'ইলতা।

অনেকগো বিষ্ণুপ্রিয়া গোরালপাড়াতে গিয়া ক্রমে নিশ্চিহ্ন অ'ইলা।

(৫) মণীন্দ্র সিংহ : রাজনগর

(ক) গম্ভীর সিংহ হাইলাকান্দির সরসপুরে পলায়ন করিয়া আহেছিল ; তার লগে বিষ্ণুপ্রিয়া গুলি আহেছিল। এর পিছে মণিপুরে ঔরার ভাগনে লোকটাকর পশ্চিমে লাংতেইগো লকেইর ২৫০ পরিবার মরলা। উতার ভিতরে গিরকধর আকখুলাগো বারো তার মালক জিহতা অ'ছিল।

চিকরা লকেইর তাম্রধ্বজে সেলপুং বারেইলো আরো নিংখৌখোঙে হাবি পুলইলাহ। তাম্রধ্বজে মাতলো, “সাতগো হবা মইষ বাছিয়া লই, বারো মোরে রাজাগো করিয়া দলেই আহানাত লই ; আমি মণিপুর এরাতিয়া যিকগা।” কমলাকান্তই (লাঙচিঙপা) পথ চিনে ; তা লখগো চিন করিয়া হাবিরে পিঠিত লয়া সাল'ইল।

পথে লুসেইয়ে থেত্‌করলা। ঔ লুসেইর রাজ পরিবারর লগে তাশ্রমজর পরিচয় আছে। উপেই মইষ আগো দিয়া তানু উতারাঙতো ছাড়া পেয়া আগুরেইলা। এসাদে করে সাতগো পুঞ্জিত সাতগো মইষ উপহার দিয়া তানু আগুরেয়া জিরিবামর পথেদে কাছাড়েদে হমেইলা।

মণিপুৰেত্ত জিরিবাম অ'য়া আহেছি বিষ্ণুপ্রিয়া উতা শতকরা ৭৫ ভাগ। ঔ বিষ্ণুপ্রিয়া উতা আগরতলা পেয়া গেছিগা।

অনেকগো বিষ্ণুপ্রিয়া কোহিমা অ'য়া যোড়হাট, শিবসাগর, দরঙ্গ, গৌহাটী পেয়া গেছিগা।

টিটাবরর কাদাত গাঙ আহান বিষ্ণুপ্রিয়া আছিল। তানু এবাকা অসমীয়া অ'লছি।

রাজনগরে বসতি স্থাপন করেছিলা ১৮০১ খৃষ্টাব্দত।

(৬) নিশিকান্ত সিংহর (পয়লাপুল) সংগ্রহ, ১৯৯৭ ইং

অভিরাম বারো বলভদ্র বুলিয়া মণিপুৰে রাজকুমার দুগো আছিল। তানুর বনক আগো আছিলি; উগোর নাঙ ভানুমতী।

অভিরাম জেঠাগো। তা সিংহাসনে বহানির পিছে খুলা বেয়ক বলভদ্রই বাংলাদেশর মুসলমান রাজার লগে যুক্ত অ'য়া মণিপুৰ আক্রমণর চক্রান্ত করলো। চুক্তি আছিলতাই, যুদ্ধত জয় করলে বলভদ্রই বনক ভানুমতীরে মুসলমান রাজা উগোরাঙ দেনা। বলভদ্রই মুসলমান রাজার সঙ্গে যুক্ত অ'য়া আক্রমণ করলো উবাকা অভিরামে হাবিতা হারপেয়া ভানুমতীরে আত্মগোপন করানির পরামর্শ দিলো। যুদ্ধত অভিরাম হারিয়া পলায়ন করলো। ভানুমতী বারো সঙ্গী সাথী দল আহানলো পশ্চিমেদে গেলীগা এবং আগরতলার উত্তর পশ্চিমে অঞ্চল আগোত গিয়া বসতি করলোগা। ভানুমতীর নাঙর লগে যোগ থয়া ফাম উহানোর নাঙ থইলাতা ভানুগাছ। এ ঘটনা এহান ঘটেছিলতা ব্রহ্মরাজাই মণিপুৰ আক্রমণর আগে অর্থাৎ ঊনবিংশ শতকর প্রথম দশকে অথবা অষ্টাদশ শতকর শেষভাগে।

(৭) মুক্তাসিঙ : রাঙাপানি (৬.১১.৬৬)

১। আমি মণিপুৰেত্ত ঔরার বাগনে আহেছিলা। আমার আপাবপা উতা মণিপুৰেত্ত আয়া পইলা খণ্ডে থাইলা ; খণ্ডেত্ত খাদালা-মাদালাত আছিল। উপেইত্ত রাঙামাটিত গেলাগা ; রাঙামাটিত্ত এরে রাঙাপানিত আহেছিলা। পইলা এপেই আহেছি উতার মাজে জীবানন্দ বুলিয়া আগো আছিল ; তার পুতক গুণমনি আনুমানিক ৭৫ বছর বয়সে মরিল উবাকা মোর বয়স ১০ বছরর চুরা আছিল। মোর ৭৫স এবাকা ৭৫। মোর বপাক উগো বীজগাঁওত জরম অ'ছে ; তার বাপক উগো মণিপুৰেত্ত আহেছেগো। মোর বাপক ২৫ বছর আগে ৮৫ বছর বয়সে মরিল ; তার ৫-৬ বছর বয়সে বপাক উগো মরেছেগো।

২। বিষ্ণুপ্রিয়া এতা মণিপুরেত্ত আহিতে মণিপুরর কাদাত কালছা বুলিয়া ঘাট আহানর পারে জিরাছিল। ; উহানাত্ত তানুরে কালিছা বুলতারা। উপেই তানু রাজার নিঙোল আগো বিয়া দেছিল।

৩। মণিপুরেত্ত আহিতে পথে বন-মইষ খললো রাধিয়া খাছি। অনেকগোই পথে শৌ বেলেয়া আহেছিল।, উতা বারো কুনোতাই পেয়া আনেদেছি।

(৮) সোনা সিংহ, সিঙ্গারী, ১৯৯৭ ইং

মণিপুরেত্ত আহিলা উতার অনেকগো ত্রিপুরাত গেলাগা। কাছাড়ে থাইলা উতার ভিতরে লেশ্পা, কৈরেঙখুল্লাকপা বারো রাজালকেয়ে মিয়াম। মণিপুরে শান্তি আহানির পিছে অনেকে জিরানি মনেইলা, কিন্তু কাছাড়ে হবা হবা ফাম পানাই দেশে না ফিরিয়া এপেই বসবাস করিয়া থাইলা।

বিষ্ণুপ্রিয়া দল আহান কাবু ভেলিত আছি ; তবে তানু আমার ভাষা না টটরতারা। অনেকগো বিষ্ণুপ্রিয়া লুসেইত হমেয়া লুসেই অ'লইলা।

১৭৬৩ খৃষ্টাব্দত ব্রহ্মরাজার আক্রমণে রাজা জয় সিংহ (ভাগ্যচন্দ্র) কাছাড়ে পলায়ন করিয়া আহেছিল উবাকা তার লগে অনেক বিষ্ণুপ্রিয়া আহেছিল।

১৯২৪ খৃষ্টাব্দত গম্ভীর সিঙর আমলে ঔরার বাগনে আরতাউ অনেকগো বিষ্ণুপ্রিয়া কাছাড়ে আহেছিল।

(৯) ভুবন সিংহ : কলকলিয়া (১.১১.৬৬)

১। বিষ্ণুপ্রিয়া এতা মণিপুরেত্ত আয়া জিরানিয়াত জিরেয়া বুড়িগঙ্গার পারগো ধরে ধরে আয়া ছড়াপারে পড়লাহা। উপেই লারং (আরগাজা) আকজারর গজে কায়া চারিয়বারাদে চেইতে ডাঙর সমতল আউর আগো দেখলা। উগোর গাছগাছরা উতাত জি লাগাদিয়া উপেই তানু ঘরবাড়ী করিয়া থাইলা। ঔ ফাম উহান তাখেন (গোপীনগর-কলকলিয়া)। পইলা আহেছি গিরিগথানী উতাই রুৱাছি কাথলিয়া বট উজার এবাকাউ আছে। বুজনে উজাররে তুলসীজারর সামে পূজা করলা বারো কুনোগোরে উজারিত কানা নাদলা।

২। মণিপুরর টোপুল গাঙেত্ত আকতা আহেছি উতারে এবাকাউ টোপুল বুলিয়া গালেইতারা, খজুমানেত্ত আহেছি উতারে খইচুপাল বুলিয়া গালেইতারা— তানুর গালি মিয়াম লাকতি।

(১০) সেজমালা দেবী : কলকলিয়া (১.১১.৬৬)

মণিপুরেত্ত ঔরার বাগনে আয়া বিষ্ণুপ্রিয়াই পইলা জিরানিখলাত (জিরানিয়াত) ঘরবাড়ী করিয়া আছিল। উপেইতো পুরানা গাঙে (বর্তমানে ছড়াপার বা গোপীনগরে আয়া থাইলাহা।

কতোগো রাঙাপানিত গেছিগা। পইলা করেছি লাম উতার মাজে আহানরে বাজির কোণগো বুলতারা।

(১১) লালবাবু সিংহ : কমলপুর (অক্টোবর, ৬৬ ইং)

১। প্রথম ব্রহ্মযুদ্ধত মাদই গাঙ এতা আগে দাবদিয়া আয়া ছিলট পেয়া গেলাগা। পিছেকার ব্রহ্মযুদ্ধত রাজার গাঙর মানু আয়া ঢাকা লালয়া রঙপুর পেয়া গেলাগা।

২। মণিপুরেত্ত বিষ্ণুপ্রিয়া আহেছিতা প্রায় আড়াইশ বছর আগে ; কমলপুরে আহেছিতা প্রায় দেড়শ বছর আগে।

(১২) পণ্ডিত মোহন সিংহ, কলকলিয়া (১.১১.৬৬)

ঔরার বাগনে বিষ্ণুপ্রিয়া আয়া পইলা জিরানিখলাত থায়া পিছে ছড়াপারে আয়া থাইলা। উতার পিছে আরাক আকতা চণ্ডীপুর বারো বালিগাঁওত আহিলা। শিংলা, প্রতাপগড় বারো কাছাড়র মানু উতা এবেদেত্ত গেছিগাতা। মোর বাপক গুণমণির বাপক রতন সিং উগো এপেই জরম অ'ছেগো ; তার বাপক উগো মণিপুরেত্ত আহেছেগো।

মাদই গাঙর মানু এতা পিছে আহেছিতা। এ মাদই গাঙ এতা মিয়াম সাউকারিয়াতা ; খাঙকরতে খঙিকরতে নুরারিয়া তানু পিছে আহেছিতা— মণিপুরর লোরাইত্ত।

৩। বিষ্ণুপ্ৰিয়া মণিপুৰী ৰাজবংশ :

বিষ্ণুপ্ৰিয়া মণিপুৰীৰ ভিতৰে বৰ্তমানে যে যে ৰাজবংশ পেয়াৰ, উতা অ'ইলাতাই— (১) কালারাজা বা পুৰাণা ৰাজা, (২) নুৱা ৰাজা, (৩) কৈৱেঙখুল্লাকপা বাৰো (৪) লেম্পা ৰাজা। এতাৰ ভিতৰে মণিপুৰে ৰাজা পালছিল। বুলিয়া নিশ্চিতভাবে তথা পেয়াৰতাই একমাত্ৰ পুৰাণা ৰাজা বা কাল ৰাজা সম্পৰ্কে। এ কাল ৰাজা ৰাজা পালছিলতা মণিপুৰৰ বিষ্ণুপুৰ-নিংথৌখোঙ অঞ্চলে এবং এ ৰাজবংশৰ সৰ্বশেষ ৰাজাগো মাচুসেনা ৰাজ কুমাৰ। বৰ্তমানে আমাৰ সমাজে কাল ৰাজা বুলিয়া যে ৰাজবংশ আছি, এতা ঔ ৰাজপৰিবাৰৰ বংশ।

নুৱা ৰাজা সম্বন্ধে যে কিংবদন্তী খানি পেয়াৰ, উতা সত্য অ'ইলে নুৱা ৰাজাউ সময় আহনাত মণিপুৰে ৰাজা পাল'ছিল।

কৈৱেঙখুল্লাকপা এতা তানুৰ পূৰ্ব পুৰুষ ধনপতি ৰাজ কুমাৰৰ বংশাবলী। ঔ ধনপতি ৰাজকুমাৰ ঔগো ৰাঙামটিৰ ৰাজপুত্ৰগো। তা মণিপুৰে আয়া ৰাজকীয় সন্মান পেইলেউ ৰাজা না পালছে, তথাপি তাৰ পূৰ্ববৰ্তী ৰাজশক্তি উহানৰ দৰুণ তাৰ বংশৰেউ ৰাজকুমাৰ বুলিয়া স্বীকাৰ কৰানি অ'ছে।

লেম্পা ৰাজা এতাউ মণিপুৰে ৰাজা পালছিলাতা নাগই, তবে তানুৰ পূৰ্বপুৰুষ তাম্ৰধ্বজ মণিপুৰে শক্তিশালী ৰাজানুগামী নেতা আগো আছিল। তাৰ বংশাবলী কাছাড়ৰ ৰাজনগৰে বাস কৰতারা। মণিপুৰৰ গম্ভীৰ সিং মহাৰাজা মণিপুৰৰ গৃহযুদ্ধৰ সময়ত কাছাড়ে আশ্ৰয় নেছিলগা সময় উহানাত তাম্ৰধ্বজৰে সৰসপুৰে ৰাজাগো বুলিয়া অভিষেক কৰেছিল। উহানাত অ'কৰিয়া তাৰ বংশাবলীৰে সমাজে ৰাজকুমাৰৰ সন্মান দিয়া আহিতারা। তবে হুনলাঙতা, তানু পইলাদে নাঙৰ লঙে 'গিৰি' ইকৰলা উনি ; পৰবৰ্তীকালে তানু 'ৰাজকুমাৰ' ইকৰানি অ'কৰলাতা।

বিষ্ণুপ্ৰিয়া সমাজৰ এ ৰাজবংশ এতা সম্বন্ধে মি সমাজৰ বিজ্ঞ বাৰো বয়স্ক মানুৰাঙতো যে যে তথা সংগ্ৰহ কৰেছ, উতা হাবি মি যথাযথভাবে তুলিয়া ধৰেদিলা ; এতাউই এ বিষয়ে যথার্থ ধাৰণা আহান নেনা সম্ভব অ'ইতই।

বি.ম. রাজবংশ সম্বন্ধে জনমত

(১) সোনা সিংহ : সিন্ধারী (১৯৯৬ ইং)

ভাগ্যচন্দ্র মহারাজই আকখুরুম শত্রুর (তার আত্মীয় সেনডুংবার ?) ভয়ে আতঙ্কিত অ'ছিল উবাকা নিংখৌখোঙর পুখ্রাম্বা নাঙর বন্ধু আগোই গোপনে তারে নিয়া তার কাদার অত্যন্ত গরীব পরিবার আহানাত খদিলোগা। ঔ ঘর উগোর নিঙোল আগোই ভাগ্যচন্দ্রর সেবা শুশ্রূষা করলো ; উগোর লগে ভাগ্যচন্দ্রর প্রণয় সম্পর্ক ঘটানিয়ে নিঙোল উগো গর্ভবতী অইলী। এবেদে ভাগ্যচন্দ্র মহারাজ গোপনে কামরূপে গেলগা এবং কামরূপর রাজার সহায়তায় পিছেদে তা মণিপুর রাজ্যর পুনরুদ্ধার করলো। ইত্যবসরে নিংখৌখোঙর নিঙোল উগোরাঙ মুনিশৌ আগো জরম অ'ইল। ভাগ্যচন্দ্র মণিপুর্বে আহানির পিছে পুখ্রাম্বাই তারাঙ গিয়া শৌ উগোর জন্মবৃত্তান্ত দিলোগা। ভাগ্যচন্দ্রই শৌ উগোরে তার শৌগো বুলিয়া স্বীকার করিয়া তারে ঔ অঞ্চল উগোর রাজাগো বুলিয়া ঘোষণা করলো। উগোই কালারাজা বা কীর্তিধ্বজ। তা ভাগ্যচন্দ্রর পুতোক অ'ইলেউ মৌদগল্য গোত্রর পুখ্রাম্বাই তারে পোষ্যপুত্রগো করে লছিল বুলিয়া তার গোত্রগৌ মৌদগল্য বুলিয়া গ্রহণ করানি অইল। ত্রিপুরার রাজাই মণিপুরর রাজকন্যা আগো রিয়া করেছিল। ঔ রাজকন্যা উগোর লগে অনেক মানু গেছিলগা ; উতা ভানুগাছে পড়ল।

কাছাড়র রাজা কৃষ্ণচন্দ্র মরানির পিছে তার খুলা বেয়ক গোবিন্দ চন্দ্রই কৃষ্ণচন্দ্রর রাণী ইন্দু প্রভারে গ্রহণ করানির চেষ্টা করলো। ইন্দুপ্রভা মণিপুরর রাজকন্যাগো। গোবিন্দচন্দ্রই ইন্দুপ্রভার প্রতি আকৃষ্ট অ'নার খবর উহান পেয়া মণিপুরর মারজিতে আয়া গোবিন্দচন্দ্ররে হত্যা করলো। উতার পিছে কাছাড় দখল করিয়া মারজিৎ সরসপুর্বে থাইল, বারো চৌরজিৎ বদরপুর্বে থাইল।

মহারাজ মারজিৎ বারো চৌরজিৎ মণিপুর্বে পলায়ন করিয়া কাছাড়ে থাইলাহা সময় উহানাত লেম্পা কুশধ্বজ গিরকে তানুর মিয়াম আদর যত্ন করলো। উহানে মারজিৎ মহারাজে তারে সরসপুর্ ছাতাচূড়া অঞ্চলে রাজাগো করে পাল করেদিলো।

আগে কাছাড় এগো মণিপুরর অধিকারে আছিল। গম্ভীর সিঙর বেয়ক মারজিতর অধিকারে আছিলতা হাইলাকান্দি-প্রতাপগড় অঞ্চল, বারো চৌরজিতর অধিকারে আছিলতা শিলচর-বদরপুর্ অঞ্চল।

(২) নন্দকিশোর মুখার্জি : চেংকুড়ি

ব্রহ্মার আক্রমণর সময়ত কালারাজা দেশ বেলেয়া গেছিলগা। ঔ সময়ত কৃষ্ণচন্দ্র বুলিয়া তার বংশর আগোই রাজাহান চালেইলো। ইংরেজ আমলে ব্রহ্মযুদ্ধ লময়া দেশহান শান্ত অ'ইল আরো কালারাজা দেশে ফিরিল। উবাকা দেশহান দ্বিভাগ করিয়া কালারাজা (পুন্না রাজা) বারো কৃষ্ণচন্দ্রই দ্বিয়োহান রাজ্য শাসন করল। এ কৃষ্ণচন্দ্র রাজা এগো

নুরারাজাগো।

(৩) বিনোদ বিহারী রাজকুমার : কাটাখাল (৩১/১০/৭৪ ইং)

ব্রহ্মদেশে মণিপুর আক্রমণ করলা উবাকা বিষ্ণুপ্রিয়া রাজা কুলধ্বজ প্রতাপগড়ে (?) পালিয়া থাইলগা। উবাকা খুমোলর সিংহাসনহান খালি থাইল আরো মেইতেই রাজা চূড়াচানে ইমে কুলধ্বজর বংশর সেনাচাউবা বুলিয়া আগোরে ঔ সিংহাসনে বহাদিলো। উগোই নুরারাজা (পুত্রমবম)। ব্রহ্মযুদ্ধ লমইল আরো কুলধ্বজ বা-রো দেশে ফিরিয়া রাজত্ব করলো। তার পুতক মাচুসেনাই বিষ্ণুপ্রিয়ার শেষ রাজাগো। কীর্তিধ্বজর ছয়গো জিপুত : নরধ্বজ, কালমাধব, অভিনধ্বজ (রাজা), বংবিতল (সেনাপতি), সঙ্গইতার (সুবেদার), বারো তলেতলতম্বা। উতার মাজে নরধ্বজ নিম্পুত্রক ; কালমাধবর দুগো জিপুত— নিংথৌবা বারো ব্রজমণি ; অভিনধ্বজর চারিগো জিপুত ; বংবিতল পিম্পুত্রক (?) ; সঙ্গইতার সুবেদারর চারিগো জিপুত ; তলেতলতম্বার ছয়গো জিপুত— কীর্তিরত্ন, কোমলধ্বজ ইত্যাদি (?)। কীর্তিরত্নর দুগো জিপুত— গুণধ্বজ বারো কুলধ্বজ। সঙ্গইতার সুবেদারর বংশ পাতিয়ালাত আছি ; গুণধ্বজর বংশ কাটাখালে এবং কুলধ্বজর বংশ সিঙ্গারীত আছি। এতার মাজে রাজা পালছিলাতা অভিনধ্বজ বারো কুলধ্বজ। গতিকে কালারাজার বংশর রাজার পুরোলহান এসাদে - কীর্তিধ্বজ (কালারাজা) > অভিনধ্বজ > কুলধ্বজ > মাচুসেনা। প্রকারান্তরে পাছি আরাক পুরোল আহান অ'ইলতাই— কৃষ্ণদাস বা পুঞ্জিবা > কীর্তিধ্বজ > অভিনধ্বজ (কামান নিংথৌ) > পুলিন্দ্র > চাউবা খোংজাই > কুলধ্বজ > মাচুসেনা।

(৪) চন্দ্রমোহন রাজকুমার : রাজনগর (১৯৯৭ ইং)

বিষ্ণুপুরর দাসরাজার বিধবা গৃহিণী কেশরীর গর্ভে মহারাজ ভাগ্যচন্দ্রর ঔরসে কালারাজার জন্ম অ'ছেতা।

গম্ভীর সিঙর আমলে কাছাড়, হাইলাকান্দি পেয়া মণিপুর রাজার অধীনে আছিল। সরসপুর অঞ্চল আছিলতা মারজিতর অধীনে, বদরপুর অঞ্চল আছিলতা চৌরজিতর অধীনে, বারো মাছুঘাট অঞ্চল আছিলতা গম্ভীরসিঙর অধীনে।

কাছাড়ী রাজা কৃষ্ণচন্দ্রর গৃহিণী আছিলিতা ইন্দুপ্রভা, বারো খুলা বেয়ক আছিলতা গোবিন্দ্র চন্দ্র। খাসপুরর পিছে কাছাড়ী রাজাই বদরপুরর হৌপারর রাজাটিলাত দুর্গ করিয়া আছিল।

সরসপুরে মারজিতে তাম্রধ্বজর পুতোক কুশধ্বজরে মেয়াঙ লেইপাকর রাজাগো বুলিয়া অভিষেক করেছিল। ঔ কুশধ্বজ পিছেদে প্রতাপগড়র রাজার গাওত থাইলগা। উপেই এবাকাউ বিষ্ণুমন্দির আছে। পিছেদে তার বংশাবলী শিংলা, ধর্মনগর, কৈলাসহর বারো কাছাড়র রাজনগরে থাইলাগা।

(৫) মণীন্দ্র সিংহ : রাজনগর

তাম্রধ্বজৰ লগে বিষ্ণুপ্রিয়া দল আহান কাছাড়ে আহানিৰ পিছে গম্ভীৰ সিঙে তাম্রধ্বজৰে ডাকলো। তাৰ বীৰত্ব দেহিয়া গম্ভীৰ সিঙে তাৰে রাজাগো পালকৰানিৰ প্ৰস্তাব দিলো। কিন্তু তাম্রধ্বজই রাজা পালনি না মনেইলো। গম্ভীৰ সিঙে বাৰে বাৰে মাতলো আৰো তাম্রধ্বজই তাৰ জেঠা বেয়কৰ পুতোক কুশধ্বজৰে রাজা পাল কৰানিৰকা অনুৰোধ কৰলো। কুশধ্বজ মণিপুৰে থাইতে বিবাহ কৰেছিল, কিন্তু তাৰ গৃহিণী তিনগো শৌ থয়া পরলোকে গেছিলীগা। ঔ শৌ তিনোগো অ'ইলাতাই চমেইগিৰি, আতোলগিৰি বাৰো সৌগিৰি।

কুশধ্বজৰ অভিষেকৰ আগে গম্ভীৰ সিঙে ঝাপিৰবন্দৰ ইমাসেনাৰ (য়াইমাসেনাৰ বাপকৰ পিয়নক) লগে তাৰে বিয়া দিলো। উত্তৰ পিছে গম্ভীৰ সিঙৰ গুৰু রাজগোপাল মিশ্ৰ, মাদই গাঙৰ তিলেশ্বৰ শৰ্মা (ধৰ্মনগৰ) বাৰো নিমাই চান ঠাকুৰ — এ তিনগো ব্ৰাহ্মণলো পাথারকান্দি বাজাৰৰ উত্তৰ দিকে দুই বিঘা জমিৰ গজে তাৰে অভিষেক কৰলো।

নিমাইচান ঠাকুৰৰে সৰ্বানন্দৰ প্ৰপৌত্ৰ বুলিয়া পরিচয় পেয়া গম্ভীৰ সিঙে তাৰে কুলপুৰোহিতৰ বংশগো বুলিয়া তাৰ বাঙেদে দক্ষিণ ফালুত বহেইলো ; পশ্চিমে রাজগোপাল (মাধবেন্দ্ৰ পুৰীৰ ফামে) বাৰো তিলেশ্বৰৰে রাজাৰ গাঙে পশ্চিমৰ ফালুত, মাদই গাঙে দক্ষিণ ফালুত। নিমাইচান মাদইগাঙে পশ্চিম ফালুত, রাজাৰ গাঙে দক্ষিণ ফালুত। এ সময়েত্ত দক্ষিণ ফালুত ঘাগৰাৰ পুৰোহিতৰ স্থানহান দিলাতা।

কালারাজা এগো ভাগ্যচন্দ্রৰ পুতোক বুলিয়া গম্ভীৰ সিঙে তাৰে নিংখৌখোঙে রাজা পাল কৰলো।

(৬) বাবু সিংহ : সিঙ্গারী

১। কালারাজাৰ তিন বেইবুনিৰ মাজে জেঠা উগো বৈষ্ণবগো অ'ইল ; যেইমাপা উগো রাজাগো অ'ইল। পিছে খুলা উগোই কুকিৰ লগে তিলয়া তানুৰেলো রাজ্যজয় কৰলো। উগো নুৱারাজা বা আনৌবা ; জেঠা উগো পুখ্ৰামবাম বা পুৰাণা রাজা।

(৭) চূড়া সিং, কচুধৰম (অক্টোবৰ, ১৯৬৭ ইং)

১। রাজাৰ জিপুতৰ গুষ্টি চাৰিহান আছি — (ক) পুৱারাজা, পুখ্ৰামবাম বা আৰিবাম, (খ) নুৱা রাজা, লাইশ্ৰাম বা আনৌবাম, (গ) লেম্পা রাজা বাৰো (ঘ) কৈৱেঙখুল্লাকপা।

২। লেম্পা রাজা : মণিপুৰ রাজ্যৰতা কুশধ্বজ বুলিয়া কেইরুঙপা আগো আছিল। ঔৱাৰ বাগনে মণিপুৰৰ রাজপৰিবারৰ চৌৱজিৎ, মারজিৎ বাৰো গম্ভীৰ সিঙ এতা মণিপুৰ বেলেয়া কাছাড়ে আয়া কাছাড়ী রাজা গোবিন্দচন্দ্রৰ আশ্রয়ে থাইলাহা। গোবিন্দচন্দ্র রাজাই গম্ভীৰ সিঙৰ বনকৰে বিয়া কৰেছিল। চৌৱজিৎ গাছিয়ে গোবিন্দচন্দ্রৰাঙ তানুৰ ফাম আকেইহান চেইলা আৰো গোবিন্দচন্দ্রই গম্ভীৰসিঙৰে বিক্রমপুৰে, মারজিতৰে হাইলাকান্দি বাৰো

চৌরজিতের রাজনগরে রাজত্ব করানিরকা দিলো। গুৱাই তিলাইনেঙ ফিরিয়া গেলাগা। পিছে চৌরজিৎ নবদ্বীপে গেলগা ; মারজিৎ বারো গস্তীর সিং মণিপুরে ফিরিয়া গেলাগা। রাজা গোবিন্দচন্দ্রের মৃত্যুর পিছে ইংরেজ সরকারে মণিপুর রাজার পরামর্শক্রমে সরসপুরর কুশধ্বজর লগে আলাপ করলো। ঐ সময়ত কুশধ্বজে ইংরেজ সরকাররাঙ বারো হাল জমি চেইলো আরো তারে পাথারকান্দিত বারো হাল জমি দিয়া তারে রাজপদে অভিষিক্ত করানি অ'ইল। তার বংশধর রাজনগর, কাটাখাল বারো পাথারকান্দিত আছি। তানু আগে হাবিয়ে নাঙর লগে 'গিরি' ইকরলাগো।

৩। আমার মানুরে মণিপুরে রাজা পাল নাছি। আমার মানুর একমাত্র রাজাগো কালারাজা। কালারাজা এগো ভাগ্যচন্দ্রর মারুপগো। কালারাজারতা শৌ নেই।

৪। মণিপুর রাজারতা মেইমু চাঙখলপা বুলিয়া শেকপিলধারী আগো আছিল। কালারাজার পিছে তারে রাজাগো বুলিয়া স্বীকার করানি অ'ইল। কুশধ্বজর তিন বেইবুনি— কুশধ্বজ, নীলধ্বজ বারো হরেন্দ্র। হরেন্দ্রর বংশ আছিতা নরসিংপুরে ; বারো কুশধ্বজর বংশ আছিতা প্রতাপগড়ে। রাজনগরর রাজপরিবার উতা কারো মতে নীলধ্বজর বংশ, কারো মতে কুশধ্বজর বংশ।

৪। বিষ্ণুপ্রিয়া মণিপুরী ব্রাহ্মণ পরিবার বারো গদিপ্রথা

(ক) হাঞ্জাবাম পরিবার : রামাউৎ সম্প্রদায়ৰ পৰম বৈষ্ণৱ সন্তদাস বাবাজী বৈষ্ণৱ ধৰ্ম প্ৰচাৰে ভাৰতবৰ্ষৰ অনেক অঞ্চল পৰিভ্ৰমণ কৰিয়া বঙ্গদেশৰ ৰাঢ় অঞ্চলে আহিল ; উপেই কনৌজাগত কুলীন ভৰদ্বাজ গৌত্ৰীয় ব্ৰাহ্মণ শ্ৰী গোবিন্দদেব ঠাকুৰৰ লগে তৰ বন্ধুত্ব অ'ইল। উতাৰ পিছে তা মণিপুৰে যিহেঁগা তৰ বন্ধুপুত্ৰ সৰ্বানন্দ মুখোপাধ্যায়ৰে ধৰ্মপ্ৰচাৰৰ সহায়কগো কৰে নিয়া গেলগা। মণিপুৰে সন্তদাস বাবাজীৰ নিষ্ঠা বারো জ্ঞানগৰ্ভ ধৰ্মালোচনাত সন্তুষ্ট অয়া মণিপুৰাধিপতি গৰীব নোৱাজে অনেক প্ৰজাৰ লগে তাৰাঙতো বৈষ্ণৱ ধৰ্মত দীক্ষা নিলোগা। তানুৰে দীক্ষা দেনাৰ সময়ত সৰ্বানন্দ মুখোপাধ্যায়ে 'তন্ত্ৰ ধাৰ' ৰূপে কাম কৰেছিল। নুৱা ধৰ্মত দীক্ষাৰ সময়ত মণিপুৰবাসী প্ৰজাই তানুৰ প্ৰথা অনুযায়ী নুৱা পুখুৰি আগোত হিনেয়া দীক্ষা লইলা। এ প্ৰথা এহানৰে 'নোংত্ৰাং লুপ্পা' বুলতাৰা। বিষ্ণুপ্ৰিয়াই আগেভাই বৈষ্ণৱ ধৰ্ম লছি বুলিয়া এ দীক্ষা লনা নাকৰলা এবং 'নোংত্ৰাং লুপ্পা' প্ৰথাউ পালন নাকৰলা। উবাকান্ত তানু মেইতেইৱাঙ হীনপ্ৰতিপন্ন অ'য়া বিষ্ণুপুৰ অঞ্চলে তঙাল অ'য়া থানা অ'কৰলা।

সৰ্বানন্দ ঠাকুৰ শাস্ত্ৰজ্ঞ বারো ব্ৰাহ্মণশ্ৰেষ্ঠ বুলিয়া গৰীব নোৱাজে তাৰে প্ৰধান পণ্ডিতৰূপে গ্ৰহণ কৰলো এবং তাৰে 'বামন হাঞ্জবা' উপাধি দিলো। গৰীব নোৱাজৰ মৃত্যুৰ পিছে তাৰ পুতোক শ্যামসাইৰ ৰাজত্বকালে সৰ্বানন্দ ঠাকুৰৰ পুতোক মণিচন্দ্ৰ ঠাকুৰে ৰাজ পণ্ডিতগো অ'ইল। শ্যামসাইৰ পিছে তাৰ পুতোক ভাগ্যচন্দ্ৰৰ ৰাজত্বকালে মণিচন্দ্ৰ ঠাকুৰৰ পুতোক নিমাইচাঁদ ঠাকুৰে সভাপণ্ডিতৰ পদ পেইলো।

ভাগ্যচন্দ্ৰ মহাৰাজৰ ৰাজত্বকালে শ্ৰীচৈতন্য মহাপ্ৰভুৰ ভক্ত শ্ৰীলনৰোত্তম ঠাকুৰৰ শিষ্য গঙ্গানারায়ণ চক্ৰবৰ্তীয়ে মণিপুৰে গিয়া গোড়ীয় বৈষ্ণৱ ধৰ্ম প্ৰচাৰ কৰলো। উবাকা মহাৰাজ ভাগ্যচন্দ্ৰই মেইতেই সমাজ সহ এ নুৱা ধৰ্মত দীক্ষা লইলো।

এবেদে বিষ্ণুপ্ৰিয়া এতা মেইতেই সমাজেত্ত আলাদা অ'য়া থানাই মহাৰাজ ভাগ্যচন্দ্ৰ মিয়াম দুঃখিত অ'য়া বিষ্ণুপ্ৰিয়া এতাৰে নুৱা ধৰ্মত দীক্ষা নিয়া মেইতেইৰ লগে সমাজভুক্ত অ'নাৰকা আবেদন জানাইলো। ৰাজাৰ আবেদনে বিষ্ণুপ্ৰিয়াই দীক্ষা নিলাগা, কিন্তু গৰীব নোৱাজৰ সময়ত তানু পতিত আছি বুলিয়া কুনো ব্ৰাহ্মণে তানুৰে যজ্ঞানি নাকৰলা। উবাকা ৰাজাৰ অনুরোধে নিমাইচাঁদ ঠাকুৰে তানু যজিয়া তানুৰ পৌৰোহিত্য লইলো।

এ সময়ত ব্ৰহ্মদেশৰ আক্ৰমণে মণিপুৰৰ অনেক মেইতেই বারো বিষ্ণুপ্ৰিয়া মণিপুৰ বেলেয়া কাছাড়, শ্ৰীহট্ট বারো ত্ৰিপুৰাত আশ্ৰয় লইলাগা। উবাকা মহাৰাজাৰ অনুমতিলো নিমাইচাঁদ ঠাকুৰে তাৰ চাৰিগো জিপুতৰ লগে গিয়া কাছাড়, ত্ৰিপুৰা বারো শ্ৰীহট্টৰ বিষ্ণুপ্ৰিয়া

সমাজৰ পৌৰোহিত্যৰ দায়িত্ব নিয়া ঘাগড়াপাৰে থাইল। লগে তাৰ পুতোক আগো থইলো ; আৰাক পুতোক আগোৱে শ্ৰীহট্টৰ বালিগাঁওত পাঠুৱাদিলো। ঐ সময়ত বিষ্ণুপ্ৰিয়া সমাজৰ ছাবি শৌচাশৌচৰ কাম কৰলাতা নিমাইচাঁদ ঠাকুৰ বাৰো তাৰ বংশাবলীয়ে। কুনো ব্যাপাৰে সন্দেহ উঠলে সিদ্ধান্ত দিলাতাউ তানু।

(খ) **পুৰিতগো লকেই :** নিমাইচাঁদ ঠাকুৰে মহাৰাজ ভাগ্যচন্দ্ৰৰ আদেশে আসামে গিয়া শ্ৰীমন্তাগবত গ্ৰন্থ আহান আনানিৰ সময়ত পথে নাগাৰ আতে অনাথ শৌ দুগোৱে পাছিল। উগি আসলে আসামৰ তাৰ বন্ধু আগোৱ জিপুত ; তানুৰ নাঙ আছিলতা দেবোৱাম বাৰো আতাৰাম। নিমাইচাঁদ ঠাকুৰে তানুৱে ৰূপাৰ বিনিময়ে ছুটেয়া মণিপুৰে নিয়া ৰাজাৰ অনুমতিলো পোষ্যপুত্ৰৰূপে গ্ৰহণ কৰলো। কাছাড়ে আহানিৰ সময়ত তা শৌ দ্বিয়োগিৱেউ আনেছিল। নয়-দশ বছৰ পিছে শৌ উগিৰ আসল বাপক উগো তানুৱে বিছাৰতে মণিপুৰ অ'য়া কাছাড়ৰ ঘাগড়াপাৰে আহিল ; কিন্তু শৌ উগিৰ কথাবাতাত অসম্ভষ্ট অ'য়া তানুৱে নানিয়া বেলেয়া গেলগা। নিমাইচাঁদ ঠাকুৰেউ শৌ উগিৰ ব্যবহাৰে অসম্ভষ্ট অ'য়া তানুৱে দুৱেইৰ শিংলা অঞ্চলে পাঠুৱা দিলো। শিংলা, প্ৰতাপগড় বাৰো ত্ৰিপুৱাত তানুৰ বংশ উতা আছি ; তানুৱে 'পুৰিতগো লকেই' বুলতাৱা।

(গ) **চেংকুড়ি বাৰো নৱসিংপুৰৰ ব্ৰাহ্মণ পৰিবাৰ :** সৰ্বানন্দ ঠাকুৰৰ ছয়গো জিপুত। উতাৰ ভিতৰে প্ৰথম মণিচন্দ্ৰ ঠাকুৰৰ পুতোক নিমাইচাঁদ ঠাকুৰ। সৰ্বানন্দ ঠাকুৰৰ দ্বিতীয় পুতোক ব্ৰজবল্লভ বাৰো তৃতীয় পুতোক অভিৰামৰ বংশধৰ উতা নৱসিংপুৰ বাৰো চেংকুড়িত আছি।

সৰ্বানন্দ ঠাকুৰৰ তৃতীয় পুতোক অভিৰাম ঠাকুৰৰ নাতিয়ক তেজৰাজ ঠাকুৰৰ বংশধৰ অ'ইলাতাই চেংকুড়িৰ ব্ৰাহ্মণ পৰিবাৰ এতা ; বাৰো সৰ্বানন্দ ঠাকুৰৰ দ্বিতীয় পুতোক ব্ৰজবল্লভ ঠাকুৰৰ নাতিয়ক ৰূপলাল ঠাকুৰৰ বংশধৰ আছিতাই নৱসিংপুৰে।

শ্ৰী বিনোদবিহাৰী বিদ্যালঙ্কাৰ গিৰকৰ মতে চেংকুড়িৰ বৰ্তমান ব্ৰাহ্মণ-পৰিবাৰ এহান আহেছেতা ঘাগড়াপাৰৰ বংশৰ শ্ৰীকুঞ্জেশ্বৰ মুখোপাধ্যায়ৰ পালিত পুত্ৰ জিতৰাজ মুখোপাধ্যায়ৰাঙতো। এ জিতৰাজ মুখোপাধ্যায় অ'ইলতাই বিষ্ণুপুৰৰ খুমোলৰাজ কৃষ্ণচন্দ্ৰৰ পুৰোহিত তেজৰাজ মুখোপাধ্যায়ৰ পুতোক।

সৰ্বানন্দ-নিমাইচাঁদ ঠাকুৰৰ বংশ উতা বিষ্ণুপ্ৰিয়া সমাজে ব্ৰাহ্মণশ্ৰেষ্ঠ বুলিয়া স্বীকৃতি পাছি। তানুৰ প্ৰতি সন্মান প্ৰদৰ্শন স্বৰূপ সভাসমিতিত তানুৰ বহানিৰকা গদি আকেইগো বা সন্মানিত আসন দেনাৰ ৰীতি আছে। বৰাক অঞ্চলে ঘাগড়াপাৰৰ ব্ৰাহ্মণ পৰিবাৰেই বিশেষ কৰিয়া এ গদিৰ দাবীদাৰ।

৫। সৈৎনামী-ডোমৰ দলাদলি

সময় আহানাত বি.ম. সমাজে সৈৎনামী-ডোম বুলিয়া প্রচণ্ড দলাদলি আহানৰ সৃষ্টি অ'ছিল। এ পৰ্যন্ত এসাদে দলাদলি বি.ম. সমাজে আৰ না দেহেছি। দ্বিয়ো দলৰ ভিতৰে আকতাবে 'সৈৎনামী' বুললা, আৰাক আকতাবে 'ডোম' বুললা। দ্বিয়ো দলেউ আকতাবে আকতাই না ছকইলা ; ছকইলে 'মাঙাইলাঙ' বুলিয়া হিনেইলা ; এমনকি, ছেয়াগো ছকইলে পেয়া হিনেইলা। আগোৰ ঘৰে আগোই না হমেইলা, দল আহানৰ জিগো পৰ্যন্ত আৰাক দল আহানে না ছকইলা। ইসালপা, ডাকুলা ইত্যাদি যে দ্বিয়ো দলৰতা তঙাল তঙাল অ'য়া আছিল। — উহান সম্বন্ধে আৰ মাঠানিৰো দৰকাৰ নেই।

এ দলাদলি এহান কিসাদে উৎপন্ন অ'ছিল ; কিসাদে এহানৰ মীমাংসা অ'ইল — এ সম্বন্ধে বুজন গিরিগিথানীৰ মত খানি ছনিক :

সৈৎনামী-ডোম সম্বন্ধে জনমত

(১) গোবিন্দবল্লভ মুখোপাধ্যায় (?) শ্রীধৰপুৰ

১। ভিতৰখোলৰ মানু এতা আগে মেঞ্জিবৰীৰ উপেই আছিলাত। আকখুৰুম সৎনামী সাধু আগোই আয়া ও গাঙৰ মানু কতোগোৱে দীক্ষা দিলো। তা গৃহস্থ বৈষ্ণবগো বুলিয়া দীক্ষা দেনাৰ পিছে বুৰাল মাছলো উৎসব কৰলা। ও বুৰাল উগোৱ মূৰগো আছিল উগো বিয়ানে চেইতে গুৰুৰ মূৰগো অ'ছে। উপেইতো তানুৱে জাত বেললা আৰো তানু ভিতৰখোলে গিয়া থাইলাগা। মন্ত্ৰেই ঠাকুৱে তানুৰ ঘৰ শেঙকৰলো আৰো তাৰেউ সমাজেত্ত বেললা। ২০-২৫ বছৰ পিছে ৰাজেশ্বৰ (বাবাই) এইগাই তানুৱে দীক্ষা দিয়া তুললো। শিংলার ৫গো পণ্ডিতে বাবাই এইগাৱে সমর্থন কৰলা। মেইতেয়েউ সমর্থন জানেইলা, কিন্তু পুৱিতগোৱ (বট ঠাকুৱৰ) দলে নাকৰলা। এহানাত সমাজে বিৰাট দলাদলি আৰম্ভ অ'ইল। ও সময়ত মেহেৰপুৱৰ ডোমৰ শ্রাদ্ধ আহানাত বিষ্ণুপ্রিয়া কতোগো গেছিলগা। তানু ফিৰিয়া আইতে “আমিয়ো ডোমৰ শ্রাদ্ধ খেইলাঙ ; তুমাৰ ঘাগৰাতে কিতা !” বুললা আৰো তানুৱে ডোম বুলিয়া মাতলা ; এতা ঘাগৰাৱে নাকৰলা উতা।

২। সৈৎনামী উতা সমাজেত্ত বৰ্জিত অ'ইলা পিছে অনেকগো বড়খলাত গি. বৰ্মন অ'ইলাগা, অনেকগো লক্ষ্মীপুৱে গিয়া ধিয়ান অ'ইলাগা।

৩। দ্বিয়ো দলৰে তিলকৱানিৰকা প্রতাপগড়ৰ মুণ্ডমালাত সভা বহিলা। ও সভাত একৱকম তিলনিৰ সিদ্ধান্ত অ'ইল ; পিছে মেহেৰপুৱে তিলইলা।

(২) সোনা সিংহ : সিঙ্গারী (১৯৬৫ ইং)

১। বরকলেই গাঙৰ কতোগোই বাঙালী গু'ৰু আগোৱাওতো প্ৰসাদ খাছিল। বুলিয়া তানুৱে সমাজেত্ত বেললা। উতা ভিতৰখোলে গিয়া থাইলাগা। ঘাঘৰাৰ এইগাই তানুৱে তুললো।

(৩) ধনঞ্জয় সিংহ : নিত্যানন্দপুৰ (৯/৩/৬৬ ইং)

১। পাথারকান্দিত কাদাৰ মিয়াঙ (সম্ভবতঃ অহিন্দু) যোগী আগোই ভেলকিবাঙীলো বিষ্ণুপ্রিয়া কতোগোৱে মুক্ত কৰিয়া দীক্ষা দিলো। তানু গুৰু দামাৰ ৰকত শৰাত কৰ্মত যৌকৰলা। তানুৰ কাম উতা দেহিয়া তানুৱে সমাজে বৰ্জন কৰলা আৰো তানু আচাৰভ্ৰষ্ট অ'য়া ভিতৰখোলে থাইলাগা। পিছে ঘাঘৰাৰ এইগাই তানুৱে লেইমুঙ দিয়া তুললো।

(৪) অমৰ চান্দ সিংহ : নিত্যানন্দপুৰ (৯/৩/৬৬ ইং)

১। মেঞ্জিবাৰিৰ বিষ্ণুপ্রিয়া কতোগোই মিয়াঙ গু'ৰু আগোৱাওতো দীক্ষা নেছিল। উতাৱে সমাজে বৰ্জন কৰলা আৰো তানু ভিতৰখোলে গিয়া থাইলাগা।

(৫) কালচান্দ সিংহ : গান্ধীনগৰ (২২/২/৬৬ ইং)

চিপৰসান্দনৰ কাদাৰ মুসলমান আগোই ভান্দাৰ উপেই আশ্রম আগো কৰিয়া বিষ্ণুপ্রিয়া কতোগোৱে দীক্ষা দেছিল। উতাই বোৱাল মাছলো উৎসব আহান কৰিয়া বোৱালৰ মূৰ উগো টাঙিয়া থছিল। উপেই মুসলমান সাধু উগোই ভেলকিলো বোৱালৰ মূৰ উগোত হিঙ উঠা দিলো। উহানাত পুৰি মানু উতাই গুৰু খেইলা বুলিয়া ৰটেয়া তানুৱে সমাজেত্ত বহিষ্কাৰ কৰলা আৰো তানু ভিতৰখোলে গিয়া থাইলাগা।

(৬) নীলেশ্বৰ মুখাৰ্জি : মশাউলি (১৯/১০/৬৬ ইং)

প্ৰতাপগড়ে ভৌতিক শক্তিলো মিয়াঙ আগোই বিষ্ণুপ্রিয়া কতোগোৱে ধৰ্মান্তৰিত কৰেছিল আৰো উতাৱে সমাজেত্ত বহিষ্কাৰ কৰলা। উতা গিয়া ভিতৰখোলে থাইলাগা— ১২০৮-১২১০ শতকৰ সময় উহানাত। উতা বামন নেয়'নিযে আচাৰভ্ৰষ্ট অ'য়া থাইলা। আকখুৰুম খালপাৰৰ বামন আগোই উতাৱে যজেইতেগা সমাজে দলাদলিৰ সৃষ্টি অ'ইল উলাকা বাবাই এইগাৰ বপাক যোগেশ্বৰ এইগাই বামন উগোৱে ভিতৰখোলৰ মানুৱে যজানিৰকা ৰায় দিলো। পিছেদে বাবাই এইগাই ভিতৰখোলৰ মানু উতা হাবৰে সমাজভুক্ত কৰলোগা। উতান্ত সমাজে বিৰাট দলাদলি অ'ইলতা। ওঁ অবস্থাত ভিতৰখোলৰ অনেকগো মানু মণিপুৰে মিৰিয়া গেলগা।

(৭) পুতুল দেবী : নূৰখা (১৯৬৬ ইং)

ভিতৰখোলৰ মুনি আগোই মুসলমানৰ ঘৰে ভাত খাছিল। উগোই নিজৰে নিজে 'মাঙাইলু' বুলিয়া তঙাল তঙাল অয়া থাইল। তা মানু কতোগোৱে ভাত খোৱাছে, উবাকা মাছৰ মূৰ উগো গুৱৰ মূৰগো অ'ছে।

(৮) বাবু সিংহ : সিন্ধাৰী (৫/৬/৬৬ ইং)

১। বিষ্ণুপ্রিয়া আগোই মিয়াঙৰাঙতো ধৰ্ম লয়া বদৰপুৰৰ কাদাত আছিল। পিছে তা ভিতৰ খোলে গেলগা। ঘাঘৰাৰ বাবাই এইগাই (ৰাজেশ্বৰ মুখাৰ্জিয়ে) উতাৰে তুললো। উতা সৈৎনামী।

(৯) নীলমণি সিংহ : নৱসিংপুৰ (২/৬/৬৬ ইং)

১। মিয়াঙ আগোই ইন্দ্ৰজাললো প্ৰতাপগড়ৰ উবাৰাৰ বিষ্ণুপ্রিয়া কতোগোৱে ধৰ্ম দীক্ষা দিয়া তানুৱে অখাদ্য (গোমাংস ?) খোৱাছিল। উতাৰে সমাজে গ্ৰহণ নাকৰলা ; তানু ভিতৰখোলে গিয়া থাইলাগা। ঘাঘৰাৰ বাবাই এইগাই (ৰাজেশ্বৰ মুখাৰ্জিয়ে) তানুৱে তুলানিৰকা উৎসব আহান কৰলো।

(১০) মণীন্দ্র সিংহ : নিত্যানন্দপুৰ (১০/৩/৬৬ ইং)

১। পাথৰকান্দিৰ কাদাৰ মেঞ্জিবাৰিত মুসলমান পীৰ আগোই বিষ্ণুপ্রিয়া কতোগোৱে ভেলকিলো বুলেয়া গোমাংস খোৱাছিল। উতাৰে সমাজেও বহিষ্কাৰ কৰলা আৰো তানু গিয়া ভিতৰখোলে থাইলাগা। তানু বা-ৰো সমাজে হমানি মনেইলা আৰো ঘাঘৰাৰ বাবাই এইগাই তানুৱে তুললো।

(১১) গোসাই সিংহ : শ্ৰীধৰপুৰ (ডিছেম্বৰ, ১৯৯৪ ইং)

বদৰপুৰে আশ্ৰম আহান আছিলতা ; উহানৰ মত উহানৰে 'সইত্ত (সত্য) নাম' বুললা। ঔ আশ্ৰম উহানৰ বাঙালী ঔতাৰাঙতো বিষ্ণুপ্রিয়া কতোগোই দীক্ষা নেছিলগা, উতাৰে সৈৎনামী বুললাতা বুলিয়া হুনলাঙ।

আৱাক আকতাই মাতলাতা ; বিষ্ণুপ্ৰিয়াই আশ্ৰম উগোত্ত দীক্ষা নেছিগাতা নাগই। আশ্ৰম উহানাত প্ৰতি বছৰ সাত দিন ব্যাপী মহাৰুদ্ৰযজ্ঞ অ'ৰ। শতক বছৰ এসাদে যজ্ঞ অ'ৰ সময়ত বিষ্ণুপ্রিয়া কতোগো উপেই গেছিলগা ; উতাৰে 'সৈন্তনামী' বা 'সৈৎনামী' বুলতাৱাতা।

(১২) মণীন্দ্র সিংহ : ৰাজনগৰ (৩০.১২.৯৪ ইং)

চাউবা এইগাৰ পুতোক কুঞ্জেশ্বৰ শৰ্মা, তাৰ পুতোক বাবাই এইগাৰ আমলে ভিতৰখোলৰ বিষ্ণুপ্রিয়া গাঙ আহান সৈদ বংশৰ মুসলমান পীৰ আগোৰ বশীভূত অ'ছিল। কতোগোই মুসলমান ধৰ্মো গ্ৰহণ কৰেছিল। উহানে গাঙ উহানৰ প্ৰায় ৭০০ পৰিবারৰে জাতিচ্যুত কৰানি আছিল। উপেই আনেক পৰিবার সমাজে স্থান না পানিয়ে মণিপুৰে ফিৰিয়া গেলাগা। ঔ সময়ত বিষ্ণুপ্রিয়া বৈষ্ণৱ আগো সৈদ ধৰ্ম উহান নাকৰিয়া বদৰপুৰৰ মেদৰ বিলৰ দক্ষিণে চাডাল গাঙ আহানত আখড়া আহান কৰিয়া থাইলাগা।

(১৩) নন্দকিশোৰ মুখার্জি : চেংকুড়ি

ভিতৰখোলৰ বাঙালী আকতা 'সৈদ নাম' বুলিয়া মুসলমান ধৰ্ম লছিল। উতাৰ লগে আকখুকম বিষ্ণুপ্রিয়া কতোগোই পাংকট আহানাত বয়া থাছিল। — মাংসো থাছিলাতানেই কিতানেই ! উতাৰে সৈদনামী বুলতারাতি। উতাৰে সমাজেত্ত বেললা আরো অনেকগো মণিপুৰে গেলাগা।

(১৪) ছনাবাপু সিংহ : নয়াগ্ৰাম

ভিতৰখোলৰ বিষ্ণুপ্রিয়া আকতাই বছৰকাৰ আপোকপা হমাদেনাৰ সময়ত আস্তা বুৰাল আগোলো লোক বেলাছিল। উবাকা যাদুৰালা আগোই যাদু দেহাউৰি বুলিয়া মাছ উগো পৰ্দা আহানলো গুড়িয়া থইলো। খানি পিছে পৰ্দা উহান সেচেয়া চেইতে বুৰালৰ মূৰ উগো তুপয়া গুৰুৰ মূৰগো অ'ছে। উবাকান্ত উতাৰে জাত মাঙকৰিয়া সমাজেত্ত বেললাতি।

(১৫) প্ৰাণগোপাল মুখার্জি : ঘাঘৰাপাৰ (১১/৮/৯৬ ইং)

মোৰ ববাক তিলোত্তমাই মাতলোতা ভিতৰখোলৰ কাদাৰ 'সৈয়দ' — নাঙৰ মুসলমান পীৰ আগোই বিষ্ণুপ্রিয়া এতাৰে মুসলমান হঙকৰানিৰ চেষ্টা কৰলো ; উবাকা তাৰ প্ৰভাবে বিষ্ণুপ্রিয়া এতা কতোগো নমাজ পেয়াউ কৰানি অ'কৰলা উনি। উতাৰে সমাজেত্ত বৰ্জন কৰানি অ'ইল। উতাই সৈৎনামী।

(১৬) গোসাই সিংহ : শ্ৰীধৰপুৰ

১৩৫০ সালে ঘাগৰাৰ ৰাজেশ্বৰ (বাবাই) এইগাই বাৰো মালোক তিলোত্তমাই কাছাড়ৰ বিশিষ্ট নেতৃবৰ্গ — যেমন, নেত্ৰ সিং, জগৎ সিং, কালিদাস ইত্যাদি গিৰিগিথানীৰে ঘাঘৰাত জাহিয়া তানুৰাঙ ভিতৰখোলৰ মানু এতাৰে বা-ৰো জাতে তুলানিব প্ৰস্তাব থইলা। তানুৰ সন্মতি পেয়া বাবাই এইগাই ভিতৰখোলৰ মানু এতাৰে জাতে তুললো। পইলা তা মুখা মুখা মানু কতোগোৰে ঘাঘৰাপাৰে আনিয়া, নাপিতলো তানুৰ মূৰ খুৰুৱেয়া, নুৰা কৰে নুকুন দিয়া তুললো ; পিছে ভিতৰখোলে গিয়া হাবিৰে নুৰা কৰে নুকুন দিয়া তুললো।

সমাজেৰ অনেকে বাবাই এইগাৰ কাম এহানৰ বিৰুদ্ধে আপত্তি তুললা ; বিশেষ

কৰে ঝাপিৰবন্দ, লোৱাৰপুৰা, শিংলা, প্ৰতাপগড় অঞ্চলৰ মানুহে এহানৰ প্ৰচণ্ড বিৰোধিতা কৰলা এবং ঘাঘৰাৰ পক্ষৰ মানু উতাৰে 'সৈৎনামী' নাঙ দিয়া তানুৰে 'মাঙ' - বুলিয়া ঘোষণা কৰলা।

যেতাই ঘাঘৰাৰে সমৰ্থন নাকৰলা, উতাৰ ভিতৰে সিঙ্গাৰীৰ ৰামো এইগা (বাবাহালৰ বাপক) বাৰো আৰাক কতোগোই ডোমৰ শ্ৰাদ্ধ আহনাত গিয়া চিড়া-কলা খেইলাগা বুলিয়া ঘাঘৰাৰ পক্ষৰ উতাই তানুৰে 'ডোম' বুলিয়া মাতলা।

(১৭) হুনাবাপু সিংহ : নয়াগ্ৰাম

ভিতৰখোলৰ মানুহে ঘাঘৰাত গিয়া তানুৰে জাতে কাকৰানিৰকা হেইচা কৰলা উবাকা নিমাই ঠাকুৰে (বাবাইৰ বাপক) তানুৰে তুলে নুৱাৰতই বুলিয়া মাতলো এবং তানুৰে মণিপুৰে যানার পৰামৰ্শ দিলো।

নিমাই ঠাকুৰ মৱানিৰ পিছে তাৰ পুতোক বাবাই এইগাই ভিতৰখোলৰ মানু এতাৰে তুললোতা। উবাকা বাবাই এইগাৰ বয়স ৩০-৩৫ অ'ইতই।

ঔ সময়ত চন্দ্ৰপুৰৰ গোকুল দাস বুলিয়া ডোম আগো মৱিল আৰো তাৰ পুতোক হাৰাধন দাসে বাবাহাল এইগাৰ বাপক ৰামো এইগা বাৰো বাগাডৰৰ ৰতন সিঙৰে বাপকৰ শ্ৰাদ্ধত যানারকা অনুৰোধ কৰলো। ৰামো এইগা, ৰতন সিং বাৰো তানুৰ লগে যেতা শ্ৰাদ্ধ উহনাত গেছিলগা, উতাৰে 'ডোম' বুললোতা।

(১৮) মণীন্দ্র সিংহ : ৰাজনগৰ

বাবাই এইগাই ভিতৰখোলৰ মানুহে জাতে তুলতে ঝাপিৰবন্দ, শিংলা, প্ৰতাপগড়ে বাৰো লোৱাইপোৱাৰ মানুহে বিৰোধিতা কৰলা। বিক্ৰমপুৰ, যাত্ৰাপুৰ, মেহেৰপুৰ বাৰো নৱসিংপুৰৰ মানুৰ ভিতৰেউ অৰ্ধেক ঘাঘৰাৰ পক্ষ, অৰ্ধেক বিৰুদ্ধে। ঘাঘৰাৰ পক্ষৰ উতাৰে 'সৈৎনামী' বুললা, বাৰো বিৰোধী উতাৰে 'ডোম' বুললা।

ভকতপুৰৰ পিঠিত হাৰাধন দাস বুলিয়া নুঙেইপা ডোম আগো আছিলতা। তাৰ বাপকৰ শ্ৰাদ্ধৰ সময়ত ঘাঘৰাবিৰোধী কতোগোই গিয়া চিড়া-কাপক খাছিলগাতা। উহনাত্ত তানুৰে 'ডোম' নাঙ দিলোতা।

(১৯) শ্ৰীমতী হনামানু দেবী, কচুধৰম, ১৯৭৭ ইং

বাবাই এইগাই তা সৈৎনামীৰে তুললো উহানৰ অনুমোদন লনাকৰা আকখুৰুম ঘাঘৰাপাৰে সমাজৰ পণ্ডিত, বামন বাৰো বুজনৰে বান্দাৰা আহনাত নিমন্ত্ৰণ কৰেছিল। ঔ বান্দাৰাত ভাত বিলেইলা আৰো খানার আগে বাবাই এইগাই মাতলো— “পতিত মানু আকতাৰে তুলানি উহান থক নেইহান বুলিয়া মাততাৰা উতাতে ঘাস খৌৱাতা। হানতে,

আছেছে এতার ভিতরে ভাতখৌরা উতাই ভাত খেই, ঘাসখৌরা উতাই নাখেয়ো।” উবাকা তার মত উহান নাকরতারা উতাই ভাত নাখেয়া গেলাগা। উতাই চেংকুড়ির বামনগোরে খাদিগো দিলাতা।

(২০) ছনাবাপু সিংহ, নুরাগাঙ, ১৯৯৫ ইং

সৈৎনামী আগেই আকখুরুম ভিতরখোলেভ ঘাঘরাপারর এইগারাঙ আহেছিল উবাকা নুরায়া অ'য়া মরে পড়েছিলগা। উগোর মৃতদেহগো বামনগোর উঠানে থছি, কিন্তু উগো দাহ করানির মানু নেই। বাবাই এইগাউ উবাকা ঘরে নেই। উবাকা ঔ গাঙর নেত্র পণ্ডিতে তার পুতোক অনন্তরে ক্রিয়া ধরুরেয়া মৃতদেহ উগো সংস্কারর বন্দেবস্ত করলো। পিছেদে অন্যতায়ৌ আ'য়া মৃতদাহকর্মত যোগ দেছিল। মৃতগোর অষ্টিহান পহুরিগোত গাতেয়া থদিল। পিছে মৃতগোর নিজর মানু আয়া ক্রিয়াহান নিলাগা।

ঔ দাহ কর্মত ডাকুলাগো অ'ছিলতা লালবাবু, ইসালপাগো কামেশ্বর, দুরারগো প্রফুল্ল। নেত্র পণ্ডিতে উতারে ভিতরখোলে নিয়া শ্রাদ্ধর দিনে পালা দিলোগা। উতা শ্রাদ্ধত ফিরানির পিছে সমাজর অনেকে তানুরে বর্জন করলা।

সৈদ্নামী-ডোমৰ মিলন সম্বন্ধে জনমত

(১) মণীন্দ্র সিংহ (রাজনগর) : জগৎসিং পণ্ডিত (সিঙ্গারী), আঠিয়া বুড়া মুক্তিয়ার (ভকতপুর), নীলকান্ত (ভকতপুরৰ কুঞ্জেশ্বৰৰ বাপক), হলধৰ (সিঙ্গারী), ভাগ্যসিং (বারোপুৰা), নেত্রসিং (ঘাঘরাপাৰ)— এতাৰ পৰামৰ্শলো বাবাই এইগাই ভিতৰখোলৰ মানুৰে জাতে তুললোতা।

পূৰ্ব সিঙ্গারীৰ সঙা লকেইৰ দামোদৰৰ শ্রাদ্ধত দ্বিয়ো দলৰ মিলন অ'ইলতা। ঝাপিৰবন্দেত্ত লোৱাইৰপুৰা পেয়া ঘাঘৰাৰ বিৰোধী অ'নাই তানুৰ পুৰোহিত আগো লেপকৰানিৰকা প্রতাপগড়ৰ মুণ্ডমালাত সভা আহান বহেছিল। ঔ সভাত উপস্থিত অ'ছিলাতা— ধনো পণ্ডিত (নরসিংপুৰ), সেবাদাস পণ্ডিত (বিক্রমপুৰ), নেত্র সিং (ঘাঘরা), ভুবন সিং (কাটাখাল) ইত্যাদি। উদিন ঘাঘৰাৰ পক্ষৰ মানুৰ আপত্তি সত্ত্বেউ ঘাঘরা বিৰোধী উতাই চেংকুড়িৰ জিতৰাজ শৰ্মাৰে তানুৰ পুৰোহিতগো হঙকৰলা।

(২) ছনাবাপু সিংহ (নয়াগ্রাম) : ভকতপুরৰ মুহিৰ কীৰ্তনৰ সময়ত দ্বিয়ো দলৰ মিলন কৰানিৰ চেষ্টা আহান অ'ইল। ঔ উদ্দেশ্যে ডাহেছিল। সভাত নীলকান্তই (কুঞ্জেশ্বৰৰ বাপক) 'ঘাঘরা ভাল' বুলিয়া জয়ধ্বনি দিলো আরো হাবিয়ে আ'ততালি দিয়া য়াকৰলা।

গৰিলা মুহিয়ে 'দ্বিয়ো দল না তিলইলে পিতৃকৰ্ম নাকৰতৌ' বুলিয়া হাবিৰে জানেইলো আরো হাবিয়ে তিলয়া দ্বিয়োতাৰ মিলন কৰলা। এহান ৪০/৫০ বছৰ আগেকাৰ কথাহান (১৯৩০-৪০ ইং ?)

(৩) গোসাই সিংহ (ঘাঘরাপাৰ) : দলাদলি এহান সৃষ্টি অ'নাৰ প্ৰায় ২০ বছৰ পিছে— ১৩৭০ সনৰ মাপা উহানাত— সিঙ্গারীত পাউৰি মিলনৰ সভা আহান ডাহেছিলাতা। ঔ সভাত শিংলা-প্রতাপগড়ৰ মানুৰে ঘাঘৰাৰ মতহান য়াকৰলা আরো দ্বিয়ো দলৰ মিলন অ'ইল।

(৪) নন্দকিশোর মুখার্জি (চেংকুড়ি) : শনিছড়ার মহাসভাত মি সভাপতিগো অ'ছিল। ঔ সভাত সৈদ্নামীৰে তুলানিৰ প্ৰস্তাব অ'ইল। প্রতাপগড়ৰ মুণ্ডমালাত দ্বিয়ো দলৰ মিলনৰকা সভা আহান ডাহানি অ'ছিল ; কিন্তু মিলন নাইল। ঘাঘৰাৰে নাকৰলা উতাউ মোৰ বাপক জিতৰাজৰে পুৰোহিতগো বুলিয়া লেপকৰলা।

(৫) প্রাণগোপাল মুখার্জি (ঘাঘরাপাৰ, ১১/৮/৯৬ ইং) : মোৰ ববাক তিলোত্তমা গিথানকে ভিতৰখোলৰ মানু এতাৰ হিন এহান দেহিয়া পুতোক বাবাইৰে সমাজৰ পণ্ডিত হাবিৰ লগে আলোচনা কৰিয়া তানুৰে জাতে তুলানিৰ চেষ্টা আহান কৰানিৰকা পৰামৰ্শ দিলো। উবাকা বাবাই এইগাই ঔ সময়ৰ নাঙ কৰা পণ্ডিত উতা হাবিৰে ডাহিয়া তানুৰ পৰামৰ্শলো ভিতৰখোলৰ মানু এতাৰে জাতে তুললোতা।

৬। সামাজিক সংস্থা

(ক) বিষ্ণুপ্রিয়া মণিপুরী মহাসভা : আদি পৰ্ব

(মি অত্যন্ত দুঃখিত যে, মহাসভা বারো ভাষা আন্দোলনৰ ইতিহাসহান বিস্তৃতভাবে ইকৰানিৰ ইচ্ছা থানা সত্বেউ নুৱাৰলু। প্রকাশিত প্রবন্ধ বারো কাগজপত্ৰত যেহানি পেইলু উত্ৰ লগে ব্যক্তিগত অভিজ্ঞতাত যেহানি হাৰপাছু, উহানি যথাসম্ভব ইকৰলু; উত্ৰ গজে যেতা যেতা মোৰ জিজ্ঞাসা আছে, উহানি পৰিষ্কাৰ কৰানিৰকা মহাসভাৰ প্ৰাক্তন সম্পাদক মণিকান্ত সিংহ (ভকতপুৰ) বারো তৎকালীন সম্পাদক মঙ্গলবাবু সিংহ গিরকৰ লগ ধৰলুতা কমপক্ষেউ তিন বছৰ (১৯৯৭-৯৯), কিন্তু মণিকান্ত গিরকৰ খাটিহানাত আছে ট্ৰাক উগো লামুৱানি নুৱাৰলু, বারো মঙ্গলবাবু গিরকৌ অত্যন্ত কৰ্মব্যস্ত মানুগো অ'নাই মোৰে ঘণ্টা আহানৌ সময় দেনা নুৱাৰলো। লম্বইতেগা বৰ্তমান সম্পাদক কৃষ্ণবল্লভ গিরকৰাঙ গেলুগা। তাৰ পৰামৰ্শে শিংলার গোপীনাথ গিরকৰাঙ গাড়ী ভাড়া কৰিয়া গেলুগা, কিন্তু দুই-তিন বার কথা দিয়াউ মোৰে তাৰাঙ আছে রত্ন উহানি নাদলো। বিষ্ণুপ্ৰিয়াৰ অনিষ্টকাৰী সমাজদ্রোহী মোৰাঙ ঔ বন্ধ উহানি দিলে সমাজৰ অনিষ্ট অইতে পারে বুলিয়া শাত, সমাজৰ সেবায়ী এতা হাবিয়ে কুনো তথ্য আহানি নাদলা। গতিকে যেহানি পাছু উহানিলোই অসম্পূৰ্ণ ইতিহাস আহানি দিলু। মোৰ এ অসামৰ্থ্যৰকা অবশ্যই মি নিজে দয়ী। পৰবৰ্তী প্ৰজন্মত বিবেকী মানু আগো দুগো নিকুললে মোৰ এ বাৰ্থতাৰ মূল্যায়ন কৰতাই।)

১৯৩১ ইংৰাজীৰ ভাৰতীয় লোকগণনাত মণিপুরী (মেইতেই বারো বিষ্ণুপ্ৰিয়া) এতা হাবিয়ে Tribal Group- অৰ ভিতৰে ধৰানি অ'ছিল। ঔ মৰ্মে 'Assam Franchise Committee'-ৰ ছেক্ৰেটাৰীয়ে ১৯৩২ ইংৰাজীৰ ২১ মাৰ্চে বিজ্ঞপ্তি আহান জাৰি কৰিয়া জানেইলো যে, মণিপুরী এতাৰে Tribal বুলিয়াই গণ্য কৰানি লাগতই। এ বিজ্ঞপ্তি এহানে কাছাড়ে বিৰাট আলোড়ন আহানৰ সৃষ্টি কৰলো এবং লগে লগে সুৰমা উপত্যকাৰ মেইতেই এবং বিষ্ণুপ্ৰিয়া— এ দ্বিযো সম্প্ৰদায়ে আকসাটে এহানৰ বিৰুদ্ধে প্ৰতিবাদ জানানিৰকা ১৯৩২ ইংৰাজীৰ ১২ জুন তাৰিখে 'সুৰমা ভেলি মণিপুরী সম্মেলন' নাঙৰ সম্মেলন আহান ডাহিয়া শিলচৰৰ তাৰাপুৰে তিলইলা। সভাত সভাপতিৰ আসনে বহেছিলতা ক্ষেলেন্দ্র সিংহ গিরক। ঔ সভাত সরকারে মণিপুরীৰে Tribal হিসাবে গ্ৰহণ কৰেছে উহানৰ বিৰুদ্ধে প্ৰতিবাদ জানেয়া অবিলম্বে মণিপুরী এতাৰে বৰ্ণহিন্দু বুলিয়া ঘোষণা কৰানিৰ দাবী জানানি অ'ইল। ঔ দাবীৰ সমৰ্থনে মহেন্দ্ৰ কুমাৰ সিংহ বিএ বিটি গিরকে প্ৰস্তুত কৰা ঐতিহাসিক তথ্যউ সংযোজিত কৰানি অ'ইল।

ঔ দিনৰ সভা আৰম্ভ অ'ৰ পইলাদে মেইতেই প্ৰতিনিধি উতাই সম্মেলনৰ নাঙহানৰ 'মণিপুরী' শব্দ উগোৰ পৰিবৰ্তে 'মেইতেই' শব্দ দিয়া সম্মেলন উত্ৰনৰে 'Surma Valley Meitei Conference' নাঙ দেনাৰ প্ৰস্তাব দিলা। উপস্থিত বিষ্ণুপ্ৰিয়া প্ৰতিনিধিয়ে এ প্ৰস্তাবৰ বিৰুদ্ধে তীব্ৰ প্ৰতিবাদ জানেইলা এবং মেইতেইৰ তীব্ৰ প্ৰতিবাদ সত্বেউ সম্মেলনৰ নাঙহানাত 'মণিপুরী' শব্দগোই থনা অ'ইল। সভাৰ প্ৰস্তাবাবলী লিখানিৰ সময়তৌ মাছুঘাটৰ কুঞ্জৰাম

পণ্ডিত গিরকে উপস্থিত সদস্য হাবিৰ মুঙে মণিপুরৰ চূড়াচান ৰাজ্যৰ (১৯০৭-৪১ ইংৰাজী) ৰাজপণ্ডিত আতোম্বাপু শৰ্মাই মণিপুরৰ ইতিহাস ইকৰতে ভাৰতীয় আৰ্য্য সমাজভুক্ত বিষ্ণুপ্ৰিয়াৰ ইতিহাসৰে বিকৃত কৰিয়া দেখুৱাছে বুলিয়া তীব্ৰ সমালোচনা কৰলো। উতাৰ পিছে সভাত মণিপুরৰ আৰ্য্য ইতিহাসৰে এসাদে বিকৃত কৰানিৰ বিৰুদ্ধে প্ৰতিবাদ জনেয়া প্ৰস্তাব (প্ৰস্তাব সংখ্যা-৬) আহান লনা অ'ইল এবং এ বিষয়ে যথোচিত পদক্ষেপ নেনাৰকা সরকারৰ প্ৰতি আবেদন জানানি অ'ইল।

উতাৰ পিছে 'মণিপুরী এতা যে Tribal নাগই, 'আৰ্য্য বৰ্ণ হিন্দু', উহান ঐতিহাসিক তথ্যলো পৰিষ্কাৰভাবে তুলিয়া ধৰানিৰকা আসমৰ গভৰ্নৰ গিৰকৰাঙ প্ৰতিনিধিদল আহান পেঠুৱানিৰ প্ৰস্তাব লনা অ'ইল। ঐ প্ৰতিনিধিদলে আছিলাতা- (১) মহেন্দ্ৰ কুমাৰ সিংহ, বিএ বিটি, (২) হেমচন্দ্ৰ জিৎ ৰাজকুমাৰ বিদ্যানিধি, (৩) ৰমণ সিংহ, বিএ বিটি বাৰো (৪) বিজয় সিংহ (লক্ষ্মীপুৰ)। উদিনকাৰ প্ৰস্তাবাবলীত যদিও হাবিয়ে স্বাক্ষৰ কৰলা, তথাপি উতা সরকারৰাঙ না ফৌঅ'ইলগা; কাৰণ ইতিমধ্যে মেইতেই গিৰিগিথানীয়ে সভা আহান কৰিয়া সিদ্ধান্ত নিলাগা যে ১২ জুনৰ প্ৰস্তাবাবলী পেঠুৱানি নাক। ফলে মেইতেই বাৰো বিষ্ণুপ্ৰিয়াৰ ভিতৰে বিবাদ আহানৰ সৃষ্টি অ'ইল; তবে দ্বয়োতায়ো তঙাল তঙাল কৰে সম্মেলন কৰিয়া ১২ জুনৰ প্ৰস্তাবৰ অনুসৰণে মণিপুরী এতাৰে বৰ্ণহিন্দু বুলিয়া ঘোষণা কৰানিৰ দাবী জনেইলা। ঐ বছৰৰ (১৯৩২ ইং) ২৫ ছেপ্টেম্বৰ বিষ্ণুপ্ৰিয়াৰ তৰফেঙ অম্বিকাপুৰে (সিঙ্গৰীত) 'সুৰমা ৱেলি মণিপুরী সম্মেলন' ডাহানি অ'ইল; উহানাত মেইতেইয়ে অংশগ্ৰহণ নাকৰলা। ঐ সভাত হেমচন্দ্ৰজিৎ ৰাজকুমাৰ বিদ্যানিধিৰ সভাপতিত্বত মণিপুরীৰে বৰ্ণহিন্দু হিসাবে ঘোষণা কৰানিৰ দাবীৰ লগে সরকারৰাঙ আৰতাউ দাবী জানানি অ'ইল যে— (১) আসাম লেজিস্লেটিভ কাউন্সিলে এ অনুন্নত মণিপুরী সম্প্ৰদায়েঙ সদস্য আগো নেনা অক, এবং (২) সরকারী নিয়োগে এ সম্প্ৰদায়ৰকা বিশেষ কোটা আগো থনা অ'ক।

ঐ সম্মেলনে মেইতেই যোগ নাদানিয়ে উপস্থিত বিষ্ণুপ্ৰিয়া সদস্যই সামাজিক দাবীদাৰা এতা যথায়থভাবে সরকারৰাঙ ফৌকৰে দেনাৰকা এবং সরকারৰ গজে চাপ সৃষ্টি কৰানিৰকা 'সুৰমা ৱেলি মণিপুরী এছোছিয়েশন' নাঙে সংস্থা আগো হঙকৰলা এবং লগে লগে উগো পঞ্জীভূত কৰলা।

মণিপুরী এছোছিয়েশনৰ দাবীৰ ফলে এবং এছোছিয়েশনে উপস্থাপিত কৰলা ঐতিহাসিক তথ্যলো সন্তুষ্ট অ'য়া সরকারে Assam Franchise Committee-ৰ বিজ্ঞপ্তি উহান প্ৰত্যাহাৰ কৰিয়া মণিপুরীৰে বৰ্ণহিন্দু হিসাবে ঘোষণা কৰলো। অতি সত্ৰৰ তানুৰ দাবী সফল অ'নাই বিষ্ণুপ্ৰিয়া সমাজে আনন্দৰ ঢেউ আহিল। উহানৰ প্ৰকাশ স্বৰূপে ১৯৩২ ইংৰাজীৰ শেষ ভাগে ভকতপুৰৰ কুঞ্জেশ্বৰ সিংহৰ ঘৰে বিৰাট সভা আহান কৰিয়া সুৰমা ৱেলি কমিশনাৰ Walker সাহেবৰে সম্বৰ্ধনা জানানি অ'ইল। ঐ সভাত সমাজৰ গণ্যমান্য হাবি গিৰিগিথানী উপস্থিত আছিল। উদিনকাৰ সভাত মহেন্দ্ৰ কুমাৰ সিংহ গিৰকে এলা এহান দেছিলতা— 'আৰতা কাৰে ডৰেইতাঙ, সরকার আমাৰ মিচ্চাঙ' ইত্যাদি। এ সভা এহান জনসভাহান; কুনো সংস্থাৰ তৰফেঙ কৰেছিহান নাগই।

উতাৰ পিছে ১৯৩৩ ইংৰাজীৰ ৩০ ছেপ্টেম্বৰ এবং ১ অক্টোবৰ পাথ্যৰকান্দিত দ্বিদিন

ব্যাপী সুরমা রেলি মণিপুরী এছোছিয়েশনর সম্মেলন আহান অ'ইল। ঔ সভাতৌ সরকাররে ধন্যবাদ জানানি অ'ইল। ইতিমধ্যেই পরিষ্কার অ'য়া হদেইল যে, এ এছোছিয়েশনে মেইতেইয়ে আর যোগ নাদতাই। ফলে এহান ইমে বিষ্ণুপ্রিয়ার সংস্থাহান রূপেই আত্মপ্রকাশ করলো। এ সংস্থা এহানেই বর্তমান নিখিল বিষ্ণুপ্রিয়া মণিপুরী মহাসভার আদিপর্বহান। তবে সংস্থা এহানর সঠিক নাঙহান লেপইতে অনেক বছর লালইল। পইলাদে ১৯৩৮ ইংরাজী পেয়া সংস্থা এহানরে 'নিখিল বিষ্ণুপ্রিয়া মণিপুরী সম্মিলনী/বা সম্মেলন/বা মহাসম্মিলনী' বুললা। ১৯৩৯ ইংরাজীত সংস্থা এহানরে 'নিখিল বিষ্ণুপ্রিয়া মণিপুরী মহাসভা' বুলিয়া উল্লেখ করানি অ'ছে। উতার কতো বছর পিছে সংস্থা এহানরে 'নিখিল পঞ্চ বিষ্ণুপ্রিয়া মণিপুরী মহাসভা' বুলিয়া মাতানি অ'করলা। তবে সাধারণতঃ এহানরে 'বিরাট সভা' বুলিয়াউ মাতলা। ১৯৬৪ ইংরাজীত 'পঞ্চ' শব্দ উগো বাদ দিয়া সংস্থা এহানরে 'নিখিল বিষ্ণুপ্রিয়া মণিপুরী মহাসভা' বুলিয়া মাতানি অ'করলা। উতার পিছে ১৯৬৫ ইংরাজীত এ নাঙেই সংস্থা এহানর পঞ্জীয়ন করানি অ'ইল। মহাসভার পঞ্জীয়নর ব্যাপারে অগ্রণী ভূমিকা নেছিলগাতা তৎকালীন মহাসভার সহকারী সম্পাদক বর্তমান লেখক এগো। মহাসভার পইলাকার সংবিধান হানৌ রচনা করেছিলতা তা ; বারো পঞ্জীয়ন করেদিলোতা তৎকালীন বিধায়ক শ্রী নন্দ কিশোর সিংহ গিরকে। বর্তমানে ইমে ঔ নাঙ উহানেই চলেছে।

১৯৫৫-৫৬ ইংরাজীর আগে মহাসভার মুখ্য কামহানেই অছিলতা রাধাকুণ্ডর শ্রীশ্রী রাধামাধব মন্দিরর পরিচালনা। সাধারণতঃ মহাসভা দ্বিদিন ব্যাপী অ'র। এ দ্বিযোদিনর ভিতরে প্রায় দেড়দিনই রাধামাধব মন্দিরর আলোচনালো গেলগাঃ মন্দিরর কিতা কিতা সমস্যা, কি কি কাম করানি লাগের, চাঁদা কিসাদে তুলানি, চাঁদার পরিমাণ কতি— এতাই আছিলতা রাধামাধব মন্দির সম্পর্কীয় আলোচনা। সভার শেষদিকে নিয়মমাফিকভাবে সমাজ সম্পর্কীয় প্রস্তাব কতোহান লনা অ'ইল। সময় এহানর ভিতরে অ'ইল মহাসভার সম্মেলন উতা সম্বন্ধে হারপাছি বিষয় খানি সংক্ষেপে আলোচনা করিক—

১৯৩৭ ইংরাজীত (১৩৪৪ বাংলা) বিরাট সভার ৮ম অধিবেশন অ'ছিল। উতার আগেকার সম্মেলন সম্বন্ধে আমি না জানি। ১৯৩৭-৩৮ ইংরাজীর হাদিত ধর্মনগরে ৯ম অধিবেশন অ'য়া গেছেগা। ১৯৩৮ ইংরাজীর ২৬-২৭ ডিছেম্বর ভকতপুরে এ সংস্থার ১০ম অধিবেশন অ'ছিল। ঔ সভাত অরুণ কুমার চন্দ বার এট লো, এম এল এ, বারো মুর্শিদাবাদর গঙ্গানারায়ণ চক্রবর্তীর বংশধর জ্ঞানদানন্দ চক্রবর্তী উপস্থিত আছিল। ঔ সম্মেলনে গোকুলানন্দ গীতিস্বামীয়ে বিষ্ণুপ্রিয়া মণিপুরী ভাষালো এলা দিলো (উতার আগেই গিরকরে 'গীতিস্বামী' উপাধি দেনা অ'ছিল)। ১৯৩৯ ইংরাজীর ১-২ ফেব্রুয়ারী ভানুগাছর ঘোড়ামারা গাঙে ১১শ সম্মেলন অনুষ্ঠিত অ'ছিল। ঔ সময়ত এ সম্মেলনর নাঙহানাত 'মহাসভা' শব্দগো পেয়ার।

ঘোড়ামারার সম্মেলনর পিছে ১৪-১৫ বছর ধরিয়া মহাসভা ইমে গতানুগতিকভাবে চলিয়া থাইল, অর্থাৎ রাধামাধব মন্দির পরিচালনার যারি দিতে দিতে লমইতেগা সামাজিক ব্যাপারে প্রস্তাব কতোহান লয়া বার্ষিক সম্মেলন তথা বার্ষিক কামকাজ লমকরানি উহানেই মহাসভার রীতিহান আছিল।

মহাসভাৰ আদ্যুগ সম্পৰ্কে জনমত

(১) নন্দকিশোৰ মুখাৰ্জি, চেংকুড়ি : ভকতপুৰৰ মহাসভাত মহেন্দ্ৰ প্ৰেছিডেণ্ট (School Inspector Manipur)। চূড়ান্তে গণয়া ঠাকুৰৰ মাণ্ডপে মাতেছিলতা— “তুমি বিষ্ণুপ্ৰিয়াৰে দূৰেই নাকৰিয়ো ; তানুৰকা তুমি মণিপুৰী নাঙ পাছোতা।”

বিষ্ণুপ্ৰিয়াত মহেন্দ্ৰ, বাৰো মেইতেইন্ত সোণামণি M.A.— দ্বিয়োগিৰে দিল্লীত Census অফিসে ডাহানি অ’ছিল। অটল বিহাৰী বাজপেয়ী (২০/২২ বছৰ বয়সে) Census এ আহেছিল ; সিঙ্গাৰীত মিটিঙো কৰেছিল।

ঔ সময়ত মহেন্দ্ৰই মাতলোতা— আমি অৰ্জুনৰ বংশ আৰ্য্য ; মেইতেই এহান আৰ্য্যেতৰ ভাষাহান-উহানাত সংস্কৃত নেই। ৰাজবাবুৱেউ পত্ৰিকাত এ কথা নিকাললো।

গণয়া ঠাকুৰৰ মাণ্ডপে Deputy Com. বাৰো Commissioner- গোর মুঙে মণিপুৰীয়ে কৃষ্টি দেহেইলা। মেইতেইয়ে লাইহাৰৌবা, বিষ্ণুপ্ৰিয়াই ৰাধাকৃষ্ণ নৃত্য, ঢোল বাৰো মাঙকাঙলো শয়ন দিলা মুহিৰ ঘৰে (ভকতপুৰৰ)। পইলাকাৰ মহাসভাৰ সভাপতি : কৃষ্ণমোহন উকিল, কৈলাসহৰ। Subject কমিটিৰ মিটিঙে, নৱধ্বজ চৌধুৰী (গিৰিধনৰ পুতোক) প্ৰেছিডেণ্টগো অ’ছিল।

পিছে কুঞ্জেশ্বৰৰ ঘৰে সভা অ’ইল। উহানাত G. D. Walker সাহেব আহেছিল। উদিন মহেন্দ্ৰ বাবুৱে এলা এহান দেছিলতা— “আৰতা কাৰে ডৰেইতাঙ সৰকাৰ আমাৰ মিচ্চাঙ” — ইত্যাদি।

(২) কৃষ্ণ সিংহ, গৌহাটী (১৯৯৫ ইং) : ১৯৩১ ইংৰাজীৰ Census -এ মণিপুৰীৰে Tribal-অৰ শ্ৰেণীভুক্ত কৰানি অ’ইল। উহানৰ প্ৰতিবাদে গণয়া ঠাকুৰৰ মাণ্ডপে মিটিং আহান অ’ইল। সভাপতি ফ্লেলেন্দ্ৰ মুখাৰ্জি, সুবেদাৰ। Reception Committee-ৰ President ফ্লেলেন্দ্ৰ বাৰো হেমচন্দ্ৰ ৰাজকুমাৰ।

ঔ সভাত মহেন্দ্ৰ সিংহ, কুঞ্জৰাজ পণ্ডিত (মাছুঘাট), মাণিক বাবু, কৃষ্ণকুমাৰ, গিৰীশ বাবু, এতা বিষ্ণুপ্ৰিয়াৰ তৰফেত্ত প্ৰতিনিধি আছিল ; মেইতেইৰ তৰফেত্ত প্ৰতিনিধিত্ব কৰলাতা ৰমণ সিং, জয়বিদ্যা সিং, ফ্লেলেন্দ্ৰ সুবেদাৰ, বিজয় সিং- এতা।

মিটিঙে ফ্লেলেন্দ্ৰই মেইতেইৰ মিটিঙহান বুলতে কুঞ্জৰাজ পণ্ডিতে আপত্তি কৰিয়া মেইতেই বিষ্ণুপ্ৰিয়াৰ মিটিং বুলানিৰকা প্ৰস্তাব দিলো। হুলুস্থূল আহান লাগিল। ৰমণ বাৰো মহেন্দ্ৰই থামানিৰ চেষ্টা কৰলা। কুঞ্জৰাজে জিদ্ ধৰিয়া নিজৰ মতে অবিচল থাইল। লমইতেগা মণিপুৰীৰ মিটিংহান বুলিয়া declare কৰলা।

ঔ মিটিঙে মণিপুরী এতা Caste Hindu বুলিয়া দাবী করলা। Resolution ঠিকঠাক করিয়া পাঠরানির দায়িত্ব বিজয় সিংহর গজে দেনা অ'ইল, কিন্তু কিত্তাউ নাকরলো। মহেন্দ্র বারো কৃষ্ণকুমারে খবর করিয়া কিত্তাউ নাপেইলা।

এর পিছে ১৯৩২ ইংরাজীর ২৫ ছেপ্টেম্বর তারিখে অম্বিকাপুরে বা-রো মণিপুরীর সভা আহান ডাহানি অ'ইল। উহানাত মেইতেই পক্ষ নাহিলা। তথাপি আগেকার মিটিঙর সাদে প্রস্তাব নেনা অ'ইল। ঔ সভাত সভাপতিত্ব করলোতা কাটাখালর হেমচন্দ্রজিৎ রাজকুমারে (যুমজাউসেনা)। এ সভাত বিষ্ণুপ্রিয়া এতা আৰ্য বুলিয়া ঘোষণা করলা এবং মেইতেইর ভিতরেউ বিষ্ণুপ্রিয়ার রক্ত আছে বুলিয়া তানুরেউ আৰ্য বুলিয়া স্বীকার করানি অ'ইল। মেইতেইয়ে এহানর প্রতিবাদ করলা। কুঞ্জরাজর প্রস্তাব নিয়া হাবিয়ে মেইতেইরে নিন্দা করলা। উদিন সুরমা ভেলি এছোছিয়েশন হঙকরানি অ'ইল; পিছে উহান যথারীতি রেজিষ্টার্ড অ'ইল। এছোছিয়েশন এহানর সভাপতিগো সমরজিৎ সিংহ, বি.এছ. ছি, বি.এল্। তার উদ্যোগে 'মণিপুরী' পত্রিকা নিকুলিল; উহানর মেনেজারগো রাজবাবু সিংহ।

দুধপুরর গিরীশচন্দ্র সিংহ সু.ভে.ম.এ.-র প্রথম কি দ্বিতীয় সভাপতিগো। পিছেদে ঔ এছোছিয়েশন উহানরেই 'অল আসাম মণিপুরী এছোছিয়েশন' নাঙ দেনা অ'ইল; উহানর সভাপতিগো আছিলতা গিরীশ চন্দ্র সিংহ।

অম্বিকাপুরর মিটিঙর পিছেকার বছরে পাথারকান্দ্রি বিষ্ণুপ্রিয়ার বিরাট সম্মেলন আহান অ'ইল। পরবর্তীকালে এহানেই মহাসভাত পরিণত অ'ইল।

ভকতপুরে Walker সাহেব আহেছিল মিটিঙ উহান বিষ্ণুপ্রিয়ার দাবীদারার মিটিংহান; উহান সু.ভে.ম.এ.- অরহান নাগই; মহাসভারহানৌ নাগই। মিটিং উহানর নাংহান আছিলতা 'মণিপুরী সম্মেলন'। ঔ সভাত উপস্থিত আছিল মানুর ভিতরে তঞ্জাউ সিংহ, কুঞ্জেশ্বর সিংহ, মুহি সিংহ, গোলোকচান সিংহ, মহেন্দ্র কুমার সিংহ ইত্যাদি।

গোকুলানন্দরে 'গীতিস্বামী' উপাধি দিলাতা কৃষ্ণকুমার গাছিয়ে।

(৩) সোনা সিংহ, সিঙ্গারী :

১। ১৯৩০ ইংরাজীর লোকগণনাত সেন্সাস অফিসারগোই মেইতেই বিষ্ণুপ্রিয়া দ্বিয়ো দলর ব্যাপারহান হারপানি মনেয়া সমাজর মুখ্য মুখ্য মানু উতারে ডাকলো। বিষ্ণুপ্রিয়াত - মহেন্দ্র, জগদানন্দ বেদান্তরত্ন, তনুবাবু, কৃষ্ণকুমার গাছিয়ে নেতৃত্ব দিলা। তানু মেইতেইরে খাই বুলিয়া তঙাল জাতহান বুললা।

২। মহাসভার পইলাকার সভাপতিগো রুদ্রসিং চৌধুরী পাউরি !

(৪) চন্দ্রমোহন রাজকুমার, রাজনগর (১৯৯৬ ইং) : ১৯৩২ ইংরাজীত India Franchise Committee- এ মণিপুরীরে পার্বতা জাতি বুলিয়া declare করেছিল। উবাকা

মেইতেই বিষ্ণুপ্রিয়া-দ্বিযোতায়ো আপত্তি করেছিল। উহানর প্রতিবাদে গিরীশ, মহেন্দ্র এতার নেতৃত্বত সু.ভে.এসো. হুইল। ও গোর মাধ্যমে প্রতিবাদ জানানি অ'ইল। কিন্তু নাওহানলো মেইতেই বারো বিষ্ণুপ্রিয়ার বিবাদ দেহাদিলো। মেইতেইয়ে মিয়াম উৎসাহী নাইলা। বিষ্ণুপ্রিয়াই fight করিয়া tribal উহান তুলেদিল। ১৯৩২ সনর ২৫ ছেপ্টেম্বর 'সু.ভে.ম.এসো.' গঠিত অ'ইল। মেইতেইয়ে 'সু.ভে.মেই. সম্মেলন' নাও দেনা মনাছিল, কিন্তু নুরারলা। নি.বি.ম. মহাসভা গঠিত অ'ইল ১৯৩৩ ইং অক্টোবর মাহাত-পাথারকান্দির সভাত।

১৯৩৬-৩৭ ইংরাজীত চূড়াচান মহারাজাই ফ্লেলেন্দ্র সুবেদারর ঘরে থায়া পইলা মেইতেই-বিষ্ণুপ্রিয়ার মিলনরকা বিশিষ্ট মানু কতোগোরেলো মিটিঙ আহান করলো। এ উদ্দেশ্যে গণয়া ঠাকুরর মাণ্ডপেউ মিটিঙ আহান অ'ইল। ও মিটিঙে সেনাগিরি গিরকৌ আছিল। কিন্তু এ মিটিঙে কুনো সুফল নাদলো। পিছে আরাক আকখুরুম আহেছিল উবাকা চূড়াচান মহারাজাই লক্ষ্মীপুরে থায়া ঘাগরার বামনগোরে ডাহিয়া নেছিলগা।

বিষ্ণুপ্রিয়া মণিপুরী মহাসভা – দ্বিতীয় পর্ব

১৯৫৬ ইংরাজীত মহাসভার চিন্তাধারা খানি তঙাল অ'না অ'করলো। ও বছর শিংলার আন্দুর গাঙে অনুষ্ঠিত মহাসভার সম্মেলনে বিষ্ণুপ্রিয়া শৌরে মাতৃভাষালো শিক্ষা দেনারকা সরকাররাও দাবী জানানি অ'ইল। কিন্তু তথাপি মহাসভার সম্মেলনে ভাষা-কৃষ্টি সাহিত্যর বিষয় অমাটিক গুরুত্ব নাপেইলো। ১৯৬২-৬৩ ইংরাজীত পুরি কিন্তু মহাসভাত মাতৃভাষা-সম্পর্কিত দাবীয়েই হাবিত্ত জিঙে গুরুত্ব পেইলো। ১৯৬৮-৬৯ ইংরাজীত অকরিয়া, মাততে গেলেগা, এ ভাষা সম্পর্কিত দাবীয়েই একমাত্র আলোচ্য বিষয়হান অ'য়া দেহা দিলো।

ইচুদিন সংবিধান ছাড়াই মহাসভার সংগঠন এবং কামকাজ চলিয়া গেলগা। মহাসভার কর্মধারা নুরা পথে চলানির লগে লগে এ সংস্থার সংবিধান আহানর দরকার পড়িল এবং এহানর পঞ্জীয়নরৌ প্রয়োজন আহান আহিল। উবাকা মহাসভার সহকারী সম্পাদক বর্তমান লেখকে ১৯৬৫ ইংরাজীর সিঙ্গরীর সম্মেলনে সংবিধান আহান উপস্থাপিত করলো; উহান ও সম্মেলনে সর্বসম্মতিক্রমে গৃহীত অ'ইল এবং ও সংবিধানর ভিত্তিত মহাসভার পঞ্জীয়নৌ-অইল তৎকালীন বিধায়ক শ্রী নন্দকিশোর সিংহর সহায়তালো।

✓ ১৯৭১ ইংরাজীর লোকগণনাত বিষ্ণুপ্রিয়ার মাতৃভাষার নাওহান কিহান দেনা— এ বিষয়ে আলোচনারকা ১৯৭০ ইংরাজীর ৬, ৭, ৮ জানুয়ারীত ত্রিপুরার নাকফুল কলোনিত মহাসভার অধিবেশন আহান ডাহানি অ'ইল। উবাকা মহাসভার সভাপতিগো চন্দ্রকান্ত সিংহ এবং সাধারণ সম্পাদকগো গৌরনিতাই সিংহ।

ও সভার Working Committee-র সভাত গৌরনিতাই সিংহ, তারাকান্ত সিংহ, জগৎ মোহন সিংহ, মণিকান্ত সিংহ ইত্যাদি গিরিগিথানীয়ে মাতৃভাষার নাওহান 'বিষ্ণুপ্রিয়া মণিপুরী' দেনা অ'ক বুলিয়া মত পোষণ করলা। অন্যবেদে 'বিষ্ণুপ্রিয়া মণিপুরী ভাষা পরিষদ'র সভাপতি গোপী মুখার্জি, সম্পাদক গোপীনাথ সিংহ, মহেন্দ্র মুখার্জি ইত্যাদি গিরিগিথানীয়ে

ভাষার নাঙহান হুঁদা ‘বিষ্ণুপ্রিয়া’ দেনা বুলিয়া মত পোষণ করলা। এ মতভেদ এহান প্রচণ্ড আকার ধারণ করানির ফলে সভাত কুনো প্রস্তাব নেনা সম্ভব নাইল।

প্রকাশ্য সভাত জগৎ মোহন গিরকে ‘বিষ্ণুপ্রিয়া মণিপুরী’ নাঙর সপক্ষে বক্তব্য থইলো, কিন্তু ত্রিপুরা বারো শিংলার ছি পি এম পন্থীয়ে (গোপী মুখার্জি, মহেন্দ্র মুখার্জি, গোপীনাথ সিংহ ইত্যাদিয়ে) হৈহোল্লর করিয়া সভাহান বানচাল করে দিলা। উতার গজে তানু কমলপুরে গিয়া মহাসভার প্রস্তাবাবলী বুলিয়া আহান ছাপানিত দেছিগা, যেহানাত মাতৃভাষার নাঙহান ‘বিষ্ণুপ্রিয়া’ অ’ক বুলিয়া প্রস্তাব দেছরানি অ’ছে। উহান হারপেয়া ‘বিষ্ণুপ্রিয়া মণিপুরী’ নাঙর মতাবলম্বী উতা কতোগোই গিয়া প্রেছর কাগজ বারো Composed Matter উতা হাবি নষ্ট করে দিলাগা।

উতার পিছে গোপী মুখার্জি, গোপীনাথ সিংহ ইত্যাদি কতোগো শিলচরে জগৎমোহন সিংহর ঘরে গিয়া তার সহায়তালো মহাসভার সাধারণ সম্পাদক গৌরনিতাই সিংহর নাঙে হালহালির মহাসভার দ্বিতীয় প্রস্তাবহান বুলিয়া “লোকগণনাত মাতৃভাষার নাঙহান ‘বিষ্ণুপ্রিয়া’ দেনা অ’ক” বুলিয়া বিজ্ঞপ্তি আহান নিকাললা।

১৯৭২ ইংরাজীর জুন মাহাত ভকতপুরে আরাক সম্মেলন আহানর আয়োজন করানি অ’ইল। ঐ সভাত সভাপতিত্ব করলোতা দুধপুরর কামেশ্বর সিংহ গিরকে। ঐ সভাত ৭১ ইংরাজীর লোকগণনাত মাতৃভাষার নাঙহান ‘বিষ্ণুপ্রিয়া মণিপুরী’ দেনা অ’ক বুলিয়া সিদ্ধান্ত নেনা অ’ইল। অধিকন্তু, এ সভাত নিংখৌজারে সেলাইর অন্তর্ভুক্ত বুলিয়া স্বীকার করানি অ’ইল। উতার লগে গৌরনিতাই সিংহরে সভাপতি বারো মনোরঞ্জন সিংহরে সাধারণ সম্পাদকগো করিয়া নুৱা কার্যকরী কমিটি আহান হঙকরানি অ’ইল।

✓ ১৯৭৫ ইংরাজীত রাজনগরর অধিবেশনে জগৎমোহন সিংহর প্রস্তাব অনুযায়ী নন্দ কিশোর সিংহরে সভাপতি বারো মনোরঞ্জন সিংহরে সাধারণ সম্পাদকগো করিয়া নুৱা কার্যকরী কমিটি আহান করানি অ’ইল। নন্দকিশোর সিংহরে সভাপতি নির্বাচন করানির বিরুদ্ধে প্রতিবাদ জানেয়া উদিন গোপীমোহন মুখার্জি, গোপীনাথ সিংহ, হেমকান্তি সিংহ, যোগেন্দ্র সিংহ, কুশধ্বজ সিংহ ইত্যাদি গিরকগাছিয়ে সভাত্যাগ করিয়া বেলেয়া গেলাগা।

এ সভাত মহাসভার সদস্যর বার্ষিক চান্দা ২৫ পইছার স্থলে ১ টাকা করানি অ’ইল এবং সদস্যভুক্তির দায়িত্ব প্রতিনিধি কতোগোরাঙ দেনা অ’ইল। কিন্তু বিক্রমপুর, যাত্রাপুর, মেহেরপুর বারো নরসিংপুরর বাহিরে কুনো ফামেস্তৌ সদস্যভুক্তি করানি না’ছে।

১৯৭৬ ইংরাজীর ২৮ নবেম্বর তৎকালীন রাষ্ট্রপতি ফকরউদ্দিন আলি আহমেদ শিলচরে আহেছিল উবাকা তারাঙ মেমোরেণ্ডাম আহান দেনারকা নন্দকিশোর গিরকে প্রচেষ্টা নিলোগা। উবাকা জগৎমোহন গিরকগাছিয়ে বিরোধিতা করলা যদিও, গোলাপ সিংহ, কামেশ্বর সিংহ, মণিকান্ত সিংহ ইত্যাদির সহায়তালো নন্দকিশোর গিরকে মেমোরেণ্ডাম উহন দিলো।

১৯৭৭ ইংৰাজীৰ জুন মাহত নৱসিংপুৰে মহাসভাৰ অধিবেশন আহান ডাহানি অ'ইল। ঐ সভাত জগৎমোহন গিৰকে হালহালিৰ মহাসভাত মাতৃভাষাৰ নাঙহান 'বিষ্ণুপ্ৰিয়া' অ'ক বুলিয়া প্ৰস্তাব নেনা অ'ছিল বুলিয়া মত প্ৰকাশ কৰিলে, কিন্তু অন্যান্য সদস্যৰ প্ৰতিবাদে ঐ মত উহান গ্ৰাহ্য নাইল। ১৯৭৮ ইংৰাজীত কৈলাসহৰৰ চৌধুৰী পাড়াত মহাসভাৰ ৩১তম অধিবেশন ডাহানি অ'ইল। ঐ সভাতো মাতৃভাষাৰ নাঙহান 'বিষ্ণুপ্ৰিয়া মণিপুৰী' বুলিয়াই প্ৰস্তাব নেনা অ'ইল।

১৯৭৮ ইংৰাজীৰ ১৮ জুন তাৰিখে নন্দকিশোৰ গিৰকৰ উদ্যোগে মহাসভাৰ সংশোধিত সংবিধান আহান নিকালানি অ'ইল। এ সংবিধানে নিৰ্দিষ্ট চান্দা আহান দেনাৰ মাধ্যমে মহাসভাৰ সদস্য অ'নাৰ কথা আছে। জগৎমোহন সিংহ বাৰো তাৰ অনুগামী কতোগোই এহানৰ প্ৰতিবাদ কৰিয়া মাতলা যে, চান্দাদেনাৰ মাধ্যমে মহাসভাৰ সদস্যভুক্ত কৰানি নাইতই, কাৰণ হাবি বিষ্ণুপ্ৰিয়াই জন্মাধিকাৰে মহাসভাৰ সদস্য। উতাৰ পিছে বিক্ৰমপুৰে মহাসভাৰ বিশেষ অধিবেশন আহান ডাহানি অ'ইল; উহানাত জগৎমোহন সিংহ বাৰো তাৰ অনুগামীয়ে চান্দাৰ মাধ্যমে সদস্যভুক্তিৰ প্ৰতিবাদে সভা ত্যাগ কৰিয়া গেলাগা।

১৯৭৮ ইংৰাজীৰ নৱেম্বৰ মাসে আসাম সৰকাৰ বাৰো আসামৰ ৰাজ্যপালৰাঙ deputation আহান দেনাৰকা সভাপতি নন্দকিশোৰ, সাধাৰণ সম্পাদক মনোৱঞ্জন, ভাষাপৰিষদৰ সভাপতি জগৎমোহন, সংস্কৃতি পৰিষদৰ সভাপতি গোলাপ সিংহ— এ গিৰকগাছিৰেলো দল আহান হঙকৰানি অ'ইল। এ উদ্দেশ্যে deputation অৱ ব্যবস্থা কৰানিৰকা নন্দকিশোৰ বাৰো গোলাপ সিংহ আগে গৌহাটী গেলাগা; গিয়া হাবি ব্যবস্থা কৰিয়া জগৎমোহন গিৰকৰাঙ টেলিগ্ৰাম কৰলা। কিন্তু জগৎমোহন বাৰো মনোৱঞ্জন— এ দ্বিয়োগি গৌহাটী নাগিয়া ঐ সময়ত সাতদফা দাবীৰ গজে আলোচনাৰকা Convention আহানৰ আয়োজন কৰলা। এবাৰে নন্দকিশোৰ গিৰক গাছিয়ে মুখ্যমন্ত্ৰী বাৰো ৰাজ্যপালৰাঙ deputation দিলা। উতাৰ পিছে তানু শিলচৰে আয়া deputation-অৱ ফলাফলৰ কথা মাততে জগৎমোহন গাছিয়ে উহান ভাওতাহান বুলিয়া অগ্ৰাহ্য কৰলা। উতাৰ লগে তানু ৭৯ ইংৰাজীৰ ১০-১১ নৱেম্বৰ মাসে পাতিয়ালাত মহাসভাৰ অধিবেশন আহানৰ আয়োজন কৰলা- ভকতপুৰৰ convention-অৱ সিদ্ধান্ত অনুযায়ী। ১৯৭৯ ইংৰাজীৰ ১০-১১ নৱেম্বৰ মনোৱঞ্জন গিৰকগাছিয়ে পাতিয়ালাত মহাসভাৰ অধিবেশনে গেছিগা। উবাকা ভকতপুৰৰ অভিবৰ্তন উহান মহাসভাৰ সভাপতিৰ অনুমতি নালয়া কৰানি অ'ছে এবং ঐ অভিবৰ্তনৰ সিদ্ধান্ত অনুযায়ী ডাহেছি পাতিয়ালাৰ অধিবেশন এহানো সভাপতিৰ অনুমতি নালয়া পাতানি অ'ছে— এ মৰ্মে সভাপতিৰ পক্ষত অধ্যাপক বিমল গিৰকে কৰিমগঞ্জ কোটেত injunction জাৰি কৰুৱেইলা। তথাপি মনোৱঞ্জন গাছিয়ে ঘৰ আগোত মিটিঙ কৰলা। এ সময়ত পুৰি বিমল, মণিকান্ত, গোলাপ, কামেশ্বৰ, ৮-াকান্ত— এ গিৰকগাছি নন্দকিশোৰ গিৰকৰ পক্ষে থাইলা এবং মনোৱঞ্জন, গোপীনাথ, কুশধ্বজ, যোগেন্দ্ৰ, গোপী মুখাৰ্জি, হেমকান্তি ইত্যাদি জগৎমোহনৰ পক্ষে থাইলা। দ্বিয়োতায়ো তঙাল তঙাল কৰে মিটিঙ কৰলা, তবে জগৎমোহনৰ পক্ষৰতাই ১৯৮৪ ইংৰাজীৰ আগে কুনো সভাপতি না হঙকৰেছি। নন্দকিশোৰৰ মহাসভাত সাধাৰণ সম্পাদকগো অ'ইলতা অধ্যাপক বীৰেন্দ্ৰ সিংহ। নন্দকিশোৰ

সভাপতি আছিল সময়ত ১৯৮০ ইংৰাজীৰ লোক গণনাৰ Code Structure ঠিক করানি অ'ইল।

✓ মহাসভাহান এসাদে দ্বিখণ্ডিত অ'ইল উবাকা দ্বিয়োদলৰ ভিতৰে মীমাংসা আহান করানিরকা ১৯৮০ ইংৰাজীৰ ১৬ ডিছেম্বৰ কৃষ্ণকুমার সিংহৰ আহানে তিনোখালৰ ভীমঠাকুরৰ মাণ্ডপে অভিবৰ্তন আহান ডাহানি অ'ইল। ঔ দিনকার সভাত মহাসভাৰ দ্বিয়ো দলৰ কমিটিও ভাগিয়া ৭গো মানুলো commission আহান গঠন করানি অ'ইল। তানুর প্রতিবেদন মতে ১৯৮১ ইংৰাজীৰ ৩১ মাৰ্চৰ ভিতৰে মহাসভাৰ মিলনৰ অধিবেশন ডাহানিৰ সিদ্ধান্ত নেনা অ'ইল। মনোৱঞ্জন গাছিয়ে কিন্তু এ সিদ্ধান্ত নাকরিয়া ১৫ ফেব্রুৱাৰীত পাথারকান্দিত ৩৩তম অধিবেশন ডাকলা।

নন্দকিশোৱৰ পক্ষযৌ উক্ত সিদ্ধান্ত নাকরিয়া ১৯৮০ ইংৰাজীৰ ২১-২২ ফেব্রুৱাৰী সিদ্ধাৰীত মহাসভাৰ অধিবেশন আহান ডাকলা। ঔ সময়ত জগৎমোহনৰ গোষ্ঠীয়ে নানা রকমে হুমকি দিলা আরো শান্তি ভঙ্গৰ আশঙ্কায় কাছাড়ৰ এছ পি গিরকৰে মাতিয়া security থনা অ'ইল। অধিবেশনৰ আগে জগৎমোহন গিরকৰ পক্ষই মাইকে অকথ্য ভাষালো গালিগালাজ করলা। ২২ তাৰিখে প্রকাশ্য সভাৰ সময়ত তানুর পক্ষৰ নিঙোল মুনি গুট আহানে মহাসভাৰ বিরুদ্ধে slogan দিয়া মিছিল করিয়া অধিবেশনৰ মাণ্ডপগোৱাৰ ভিতৰে হমেইলা। উতাৰ হাদিত্ত বদন বুলিয়া আগেই নন্দকিশোৱ গিরকৰ মেইথইহানাত গ্লাস আগে উড়া দিলো, উগো টিনহানাত লাগিয়া ফাটিল বাৰো কালিঞ্জৰৰ সুৱেন্দ্ৰ গিরকে নন্দকিশোৱ গিরকৰ খৌনাগেতে ধরানিৰ চেষ্টা করিয়া ব্যর্থ অ'ইল, অন্যতাই মাইকৰ তাৰ ছিড়ে দিলা বাৰো মাউথ পিছগো কাড়লয়া নিলাগা। ইতিমধ্যে এছপিগো security সমেত আয়া লাঠি চাৰ্জৰ অৰ্ডাৰ দিলো, কতোগো আহত অইলা, কতোগোই দাবদিয়া গিয়া হিল উড়ানি অ'করলা। এছ পিগোৰ উপস্থিতিত ত্বরা করে সভাহান লম করানি অ'ইল। উদিন অপরপক্ষই মণিকান্তৰে মারানিৰ হুমকি দিলা। মাধানে ভকতপুৰৰ মাণ্ডপে মিটিঙ করিয়া কতোগোই রাতি তাৰ ঘৰগোত আক্রমণ চালেয়া জানালাৰ কাচ ভাগে দিলা, বাৰো বিয়ানতো দল আহানে দা, হুজা, লাঠি ইত্যাদিলো তাৰে তালকরিয়া গেলাগা, কিন্তু মানু কতোগোই মধ্যস্থতা করানিয়ে তানু ফিরিয়া গেলাগা। ঔ অবস্থাত কতোদিন আৰ্ম পুলিশে গাঙহানাত টহল দিলা।

✓ ১৯৮২ ইংৰাজীত নৱসিংপুৰৰ অধিবেশনে নন্দকিশোৱ গিরকে ইস্তফা দিলো আরো কামেশ্বৰ গিরকৰে সভাপতি করানি অ'ইল ; সাধাৰণ সম্পাদক অইলতা মণিকান্ত সিংহ।

, ১৯৮৩ ইংৰাজীত মুখ্যমন্ত্ৰী হিতেশ্বৰ শইকিয়া শিলচৰে আহিল আরো মণিকান্ত গিরকে রেডিও প্রোগ্রামাৰ দাবীলো deputation আহান দেনাৰ চেষ্টা করলো, উবাকা জগৎমোহনৰ পক্ষৰতাই তাৰে মহাসভাৰ সম্পাদকগো নাগই বুলিয়া বিৰোধিতা করলা। কিন্তু শেষ পর্যন্ত মণিকান্ত গাছিয়ে deputation দিলা ; জগৎমোহনৰ পক্ষৰতাই deputation দেনা নুৱাৰিয়া ফিরিয়া গেলাগা।

মহাসভাৰ এ দ্বিয়ো দলৰ ভিতৰে ঐক্য আনানিরকা প্রতাপগড় বাৰো মেহেৰপুৰে

আৰাকৌ মিটিঙ কতোহান অ'ইল, কিন্তু কোনো ফল নাইল। উতার পিছে ১৯৮৪ ইংৰাজীৰ ১৬-১৭ জুন ভূপেন্দ্ৰ সিংহৰ সভাপতিত্বত গড়েৰবন্দে সভা আহান অ'ইল। ঐ সভাত দ্বিয়ো দলৰ মিলন ঘোষণা কৰিয়া কমিটি দ্বিয়োহানিও ভাগেদিয়া ভূপেন্দ্ৰ সিংহৰে সভাপতি বারো সুৰেন্দ্ৰ সিংহৰে উপসভাপতি কৰিয়া অস্থায়ী কমিটি আহান হঙকরানি অ'ইল। ঐ সভাৰ সিদ্ধান্ত অনুযায়ী ১৯৮৬ ইংৰাজীৰ ফেব্রুৱাৰী মাহাত শিংলাৰ আমৰখালে শিংলাৰ যুক্ত অধিবেশন আহান ডাহানি অ'ইল। ঐ সভাত নন্দকিশোৰৰ পক্ষত অধ্যাপক বিমল, মণিকান্ত, মুক্তা (ভকতপুৰ) — এ গিরকগাছি গেছিলাগা ; কিন্তু জগৎমোহনৰ পক্ষত অনেক সদস্য গেছিলাগা; তানু গোপী মুখার্জিৰে সভাপতি বারো মনোৱঞ্জনৰে সাধাৰণ সম্পাদক কৰিয়া কমিটিহান হঙকরলা। এবেদে নন্দকিশোৰৰ পক্ষৰ সদস্য উগিৰ গজে দৈহিক আক্ৰমণৰ চক্ৰান্ত আহান অ'ৰ বুলিয়া হুনিয়া তানু ধীৰে ধীৰে সভা ত্যাগ কৰিয়া গেলাগা। মহাসভাহান জগৎমোহন গিরকৰ গোষ্ঠীৰ আ'তে আহিল ; নন্দকিশোৰৰ গোষ্ঠীয়ে মহাসভাত নাথায় তঙাল কৰে বিষ্ণুপ্রিয়া মণিপুরী সাহিত্য সভা বুলিয়া আৰাক সংস্থা আগো হঙকরলা। ঐ সাহিত্য সভাৰ বিবৰণ তঙাল কৰে দিতাঙাই।

গোপী মুখার্জিৰ কমিটিহান ১৯৯২ ইং পেয়া থাইল। উতার পিছে মহাসভাৰ সভাপতিগো অ'ইলতা কালিঞ্জৰৰ সুৰেন্দ্ৰ সিংহ এবং সম্পাদকগো অ'ইলতা সিঙ্গাৰীৰ মঙ্গল বাবু সিংহ। কমিটি এহানে কাম কৰলাতা ১৯৯৬ ইং পেয়া। ১৯৯৬ ইংৰাজীত মহাসভাৰ সভাপতিগো অ'ইলতা মনোৱঞ্জন সিংহ এবং সাধাৰণ সম্পাদকগো অ'ইলতা মঙ্গলবাবু সিংহ। কমিটি এহানে কাম চালেইলাতা ১৯৯৯ ইং পর্যন্ত। ১৯৯৯ ইংৰাজীত সভাপতিগো অ'ইলতা ডাঃ দেবেন্দ্ৰ সিংহ এবং সম্পাদক পদে থাইলাতা উদয় সিংহ বারো কৃষ্ণবল্লভ সিংহ।

(খ) বিষ্ণুপ্রিয়া মণিপুরী সাহিত্যসভা

মহাসভাৰ ভিতৰে শ্ৰী নন্দকিশোৰ সিংহ বারো শ্ৰী জগৎমোহন সিংহ-এ গিরক দ্বিয়োগিৰ ভিতৰে মতভেদৰ দৰুণ দল দুহানৰ সৃষ্টি অ'ইল। মহাসভাৰ জেনাৰেল ছেক্রেটাৰী শ্ৰী মনোৱঞ্জন সিংহই জগৎমোহন সিংহ গিরকৰ মতানুসারে চলিয়া শ্ৰী নন্দকিশোৰ সিংহৰ নিৰ্দেশানুসারে নাচললো।

এ মতভেদ এহান দূৰেই কৰিয়া হাবিৰে মঞ্চ আগোত আনানিৰ উদ্দেশ্যে ১৯৮৪ ইংৰাজীত গড়েরবন্দে সভা আহানৰ আয়োজন কৰানি অ'ইল। ঐ সভাত মহাসভাৰ কাৰ্য্যকৰী সভা ভাগিয়া এড্‌হক কমিটি আহান কৰানি অ'ইল। ঐ এড্‌হক কমিটিৰ সভাপতি শ্ৰী ভূপেন্দ্ৰ কুমাৰ সিংহ, ৱাইছ প্ৰেছিডেণ্ট শ্ৰী সুৰেন্দ্ৰ কুমাৰ সিংহ, জেনাৰেল ছেক্রেটাৰী শ্ৰী বিমল সিংহ বারো কমলাকান্ত সিংহ। গড়েরবন্দৰ সভাত মহাসভাৰ Constitution অৱতাউ খানি পৰিবৰ্তন কৰানি অ'ইল।

এৰ পিছে ঐ বছৰেই (১৯৮৪ ইং) মহাসভাৰ স্থায়ী কাৰ্য্যকৰী কমিটিৰকা আমৰখালে সভা আহান ডাহানি অ'ইল। কিন্তু ঐ সভাত কাৰ্য্যকৰী কমিটি হঙকৰতেগা মনোৱঞ্জন গিরক গাছিয়ে ইমে তানুৰ আগেকাৰ নিজৰ মানু উতালো কমিটি হঙকৰানিৰ প্ৰচেষ্টা এবং নন্দকিশোৰ গিরকৰ দলৰ শ্ৰী ভূপেন্দ্ৰ সিংহ, বিমল সিংহ, মণিকান্ত সিংহ (সিদ্ধাৰী) ইত্যাদিৰে অপমান কৰানিৰ প্ৰচেষ্টা কৰলা বুলিয়া তানু গোপনে উপেইতো নিকুলিয়া গেলাগা।

উতাৰ পিছে ১৯৮৪ ইংৰাজীৰ ১৭ ফেব্ৰুৱাৰীত কৰিমগঞ্জত সভা আহানাত তিলয়া ভূপেন্দ্ৰ কুমাৰ সিংহ বারো তাৰ সঙ্গী উতা হাবিয়ে সিদ্ধান্ত নিলাগা যে, মহাসভাত যেসাদে দলাদলি আৰম্ভ অ'ছে, এ অবস্থাত মিলন আনানি সম্ভব নেই। গতিকে আৰাক সংস্থা আহান কৰানি ছাড়া অন্য পথ নেই।

ঐ সভাৰ সিদ্ধান্ত অনুসারে উদিন “বিষ্ণুপ্রিয়া মণিপুরী সাহিত্যসভা” নাঙৰ সংস্থা এহানৰ জৰম অ'ইল। ঐ সাহিত্যসভাত সভাপতিপদে নিৰ্বাচিত অ'ইলতা শ্ৰী গোকুলসেনা সিংহ এবং সাধাৰণ সম্পাদক পদে নিৰ্বাচিত অ'ইলতা শ্ৰী মণিকান্ত সিংহ (সিদ্ধাৰী)।

✓ ১৯৮৫/৮৬ ইংৰাজীত নৱসিংপুৰে সাহিত্যসভাৰ প্ৰথম অধিবেশন অ'ইল। উহানাত অশ্বিনী কুমাৰ সিংহৰে সম্বৰ্ধনা জানানি অ'ইল। ১৯৮৮ ইংৰাজীত কৰিমগঞ্জ অধিবেশনে গুৰু বিপিন সিংহ গিরকৰে সম্বৰ্ধনা জানেয়া ‘অজাৱত্ন’ উপাধি দেনা অ'ইল। উতা ছাড়া মদনমোহন মুখোপাধ্যায়, তনুকীৰ্তনী, গোকুলচান সিংহ এ গিৰিগিথানীৱেউ সম্বৰ্ধনা জানানি অ'ইল। ১৯৮৯ ইংৰাজীত শিলচৰৰ জিলা গ্ৰন্থাগাৰে সাহিত্য সভাৰ অধিবেশন অ'ইল। ঐ অধিবেশনে কবি ব্ৰজেন্দ্ৰ কুমাৰ সিংহ, দুৱাৰ হুনা সিংহ (কৈলাসহৰ) বারো ডাকুলা নীলমাধব মুখাৰ্জিৰে সম্বৰ্ধনা জানানি অ'ইল। সম্মেলনে সভাপতিত্ব কৰলোতা অধ্যক্ষ প্ৰসন্ন কুমাৰ

সিংহ গিরকে । ১৯৯০-৯২ ইংরাজীত কুনো বার্ষিক সম্মেলন নাছে ।

১৯৯৩ ইং	—	নরসিংপুরে সম্মেলন অ'ইল।
১৯৯৪ ইং	—	পঃ কৃষ্ণনগরে সম্মেলন অ'ইল।
✓ ১৯৯৫ ইং	—	সিঙ্গারীত সম্মেলন অ'ইল। এ সম্মেলনে সভাপতিত্ব করলোতা শ্রী মণীন্দ্র সিংহ গিরকে।

এ সম্মেলনে সম্বর্ধনা জানানি অ'ইলতা এতারে—

নীলো অজা	—	ইসালপা
গোলাপ অজা	—	দুরার
ইন্দ্রকুমার সিংহ	—	সাহিত্যিক
গোলাপ সিংহ	—	শিক্ষক

১৯৯৯/২০০০ ইংরাজীত সাহিত্যসভার ভিতারেউ দলাদলি আরম্ভ অ'ইল - (১) হিঙ্গারীর মণিকান্ত গাছির দল আহান, (২) গৌরকিশোর গাছির দল আহান । বা-রো (১) ভকতপুরর মণিকান্তর দলে ফাটল ধরলো । এসাদে টুকরা টুকরা অ'নাই বর্তমানে সাহিত্যসভা একরকম নেই বুল্লেউ চলের । -

(গ) বিষ্ণুপ্রিয়া মণিপুরী ষ্টুডেন্টছ্ যুনিয়ন

বিংশ শতকৰ ৬ষ্ঠ দশকে বিষ্ণুপ্রিয়া সমাজে নিজৰ ভাষাকৃষ্টি সম্পৰ্কে সচেতনতা আহান আহানিৰ ফলে ছাত্রসমাজেউ উহানৰ প্ৰভাব পড়ানি অ'করলো। ফলে ১৯৫৯ ইংৰাজীত শিলচৰ গুরুচরণ কলেজৰ ছাত্রৰ উদ্যোগে সিঙ্গারীৰ সভা আহানাত শিলচৰ বিষ্ণুপ্রিয়া মণিপুরী ষ্টুডেন্টছ্ যুনিয়ন'ৰ সৃষ্টি অ'ইল। বিষ্ণুপ্রিয়া মণিপুরী সাহিত্য বারো কৃষ্টিৰ উন্নতি বিধানেই এ সংস্থা এহানৰ প্ৰধান উদ্দেশ্যহান আছিল। এ যুনিয়নৰ প্ৰেছিডেন্টগো আছিলতা নামদেব সিংহ বারো ছেক্ৰেটারীগো আছিলতা বৰ্তমান লেখক এগো। এ যুনিয়নৰ উদ্যোগে ১৯৫৯ ইংৰাজীত 'মলয়া' নাঙে হস্তলিখিত পত্রিকা আহান নিকুলিল ; উহানৰ সম্পাদকগো আছিলতা কচুধরমৰ মণিধ্বজ সিংহ। ঔ বছৰ অর্থাৎ ১৯৫৯ ইংৰাজীত এ যুনিয়নৰ উদ্যোগে সিঙ্গারীৰ নেহেৰু স্কুলে বাৰ্ষিক সাহিত্য সংস্কৃতিৰ প্রতিযোগিতা বারো অনুষ্ঠান আহানৰ আয়োজন করানি অ'ইল। মনে অ'রতা, বিষ্ণুপ্রিয়া মণিপুরী সাহিত্য সংস্কৃতিৰ প্রতিযোগিতা বারো অনুষ্ঠানৰ ভিতরে এহানেই প্ৰথমহান। এ অনুষ্ঠানে কবিতা প্রতিযোগিতা, প্ৰবন্ধ প্রতিযোগিতা, আবৃত্তি প্রতিযোগিতা, এলা প্রতিযোগিতা বারো নৃত্য প্রতিযোগিতাৰ আয়োজন করানি অ'ছিল ; ঔ প্রতিযোগিতাত বরাক উপত্যকার প্রতি অঞ্চলেত্ত অসংখ্য ছাত্রছাত্রী যোগ দেছিল। উতার লগে প্ৰদর্শনী বিতৰ্ক আহানরৌ আয়োজন করানি অ'ছিল। উদিনৰ অনুষ্ঠানে এতো জনসমাগম অ'ছিল যে অৰ্ধেক মানু স্কুলঘরগোত হমা নুৱাৰিয়া নিরাশ মনে ফিরে ফিরে গেলাগা।

এতার পিছে যুনিয়নে প্রতি বছৰ বিভিন্ন লয়াত এসাদে বাৰ্ষিক অনুষ্ঠান আকেইহানৰ আয়োজন করলো। এ বাৰ্ষিক অনুষ্ঠান এহান আহিলেই বরাক উপত্যকার বিষ্ণুপ্রিয়া সমাজে বিৰাট সাড়া আহান পড়িল এবং প্রতি অঞ্চলে প্রতিযোগিতাৰ তালিমলো গমগম পরিবেশ আহানৰ সৃষ্টি অ'ইল। সিঙ্গারীৰ পিছে নরসিংপুর বারো ঝাপিরবন্দর সোনাপুরে এসাদে অনুষ্ঠান আকেইহানৰ আয়োজন করানি অ'ছিল।

কুনো কুনো গিরিগিথানীয়ে ইকরেছিতা— শিলচৰ বিষ্ণুপ্রিয়া মণিপুরী ষ্টুডেন্টছ্ যুনিয়ন'ৰ দৃষ্টান্তলৈ ১৯৬০ ইংৰাজীৰ ১৯ মাৰ্চ শিংলার কৃষ্ণনগরৰ মহাসভাত লছিল। ছাত্র উতাই 'বিষ্ণুপ্রিয়া মণিপুরী ষ্টুডেন্টছ্ যুনিয়ন, কাছাড়' নাঙে অস্থায়ী যুনিয়ন আগো হঙকরলা, কিন্তু কামকাজৰ দায়িত্ব 'শিলচৰ বিষ্ণুপ্রিয়া মণিপুরী ষ্টুডেন্টছ্ যুনিয়নৰ আ'তেই থাইল। আরতাউ মাতানি অ'ছে যে, ১৯৬১ ইংৰাজীৰ ২০ অক্টোবর শিংলার গোপীমোহন

মুখার্জিৰ সভাপতিত্বত স্থায়ী ষ্টুডেন্টছ যুনিয়ন আগো হওঁলৈ। আমি কিন্তু ‘বিষ্ণুপ্রিয়া মণিপুরী ষ্টুডেন্টছ যুনিয়ন, কাছাড়,’ এ নামৰ অস্থায়ী বা স্থায়ী কোনো সংস্থা হওঁছে বুলিয়া কোনো প্রমাণিক তথ্য নাপাছি।

আমি হারপাছিলাই, ‘শিলচৰ বিষ্ণুপ্রিয়া ষ্টুডেন্টছ যুনিয়ন’ উগোই ধীৰে ধীৰে সমগ্র বি.ম. সমাজৰ ‘ষ্টুডেন্টছ যুনিয়ন’ নাঙে আত্মপ্রকাশ কৰলো। ১৯৬৩-৬৪ ইংৰাজীত শিংলার গোপীনাথ সিংহৰ উদ্যোগে এ ষ্টুডেন্টছ যুনিয়নৰ নুৱা কমিটি আহান হওঁকৰানি অ’লৈ। এ কমিটিৰ মুখ্য কর্মকর্তা আছিলতাই যোগেন্দ্ৰ সিংহ এবং হেমকান্তি সিংহ, বারো তানুৰ মুখ্য পরামর্শদাতা আছিলতাই গোপীনাথ সিংহ।

এ নুৱা কমিটি হওঁনিৰ পিছে আগৰ সাদে সাহিত্য-সংস্কৃতি-বিষয়ক অনুষ্ঠানৰ আয়োজন না’ছে। অল্পদিনৰ ভিতৰে গোপীনাথ সিংহৰ পরামর্শে ষ্টুডেন্টছ যুনিয়ন ভাষা আন্দোলনৰ দিকে ঝুকিয়া পড়লো। ১৯৬৮ ইংৰাজীৰ পিছেত্ত আজি পেয়া ভাষা আন্দোলন এহানেই ষ্টুডেন্টছ যুনিয়নৰ একমাত্র উদ্দেশ্য হান। ষ্টুডেন্টছ যুনিয়নৰ এ সময়কার কার্যকলাপ ‘ভাষা আন্দোলন’ প্রবন্ধত পেইতাঙাই।

সমন্বয় কমিটি

মহাসভা বারো সাহিত্যসভা এ দ্বিযো দলৰ সৃষ্টি অ'নার পিছে স্টুডেন্টছ ইউনিয়নৰ ভিতৰেউ দল দুহান অ'ইলা (অনিল রাজকুমার/পরিমল সিংহ) এবং দ্বিযোদলে নিজ নিজ মতে তঙাল তঙাল অ'য়া চলানি অ'করলা। ভাষা আন্দোলন বা অন্যান্য যে কোনো ব্যাপারে হাবির ভিতরে মতৈক্য না থানিয়ে ২৪-৩-৯৬ ইংরাজীত সভা আহানাত বয়া সমাজর সাধারণ স্বার্থর ক্ষেত্রেত হাবির ভিতরে ঐকমত্য আনানিরকা বুলিয়া 'সমন্বয় কমিটি' আহান হঙকরানি অ'ইল। ১১-৮-৯৬ ইংরাজীত শিলচরর ভুবনেশ্বর সাধু ঠাকুরর মন্দিরে এ সমন্বয় কমিটির ডাকে বৃহত্তর সভা আহানর আয়োজন করানি অ'ইল। ঐ সভাত এ সমন্বয়র দৃষ্টিভঙ্গি এহান সমর্থন করিয়া স্টুডেন্টছ ইউনিয়নর যেতার মনে এ সমন্বয় সম্পর্কে দ্বিধা আছে, উতা হাবিরে ঐকমত্যত আনানিরকা কমিটি আহানর গজে দায়িত্ব দেনা অ'ইল।

ঐ কমিটির convenor মণিকান্ত সিংহ গিরকে (ভকতপুর) ভকতপুরর মাগুপে সভা আহানর আয়োজন করলো— ছাত্রর দল দ্বিযোহানরে মিলানিরকা বুলিয়া। কিন্তু ঐ সভাত অনিল রাজকুমারর ছাত্রদল উপস্থিত নাথানিয়ে ঐ মিলন উহান অমীমাংসিত থাইল।

শ্রীশ্রী রাধামাধব মন্দির, রাধাকুণ্ড

আগে বৃন্দাবনে বা রাধাকুণ্ডে বিষ্ণুপ্রিয়ার কোনো মন্দির বা যাত্রীনিবাস নেয়নি। বিষ্ণুপ্রিয়া তীর্থযাত্রীর তা নানান অসুবিধা ভোগ করানি লাগিল। এ তীর্থযাত্রী এতার সুবিধার্থে রাধাকুণ্ডের বর্তমান রাধামাধব মন্দির এগোর প্রতিষ্ঠা করেছিল তা পুণ্ডরীকাক্ষ শর্মা নাগুর পণ্ডিত-ভক্ত আগোই ১৮৪৩ খৃষ্টাব্দে অর্থাৎ ১২৫০ সালে। এ পুণ্ডরীকাক্ষ শর্মা এগো খালপারের বর্তমান সুভাষ শর্মার পিতৃদেব রামকৃষ্ণ শর্মার বপাক।

১৭৯৮ সন ১২০২ খ্রি

পুণ্ডরীকাক্ষ শর্মা খালপারে জন্ম অছিল তা আনুমানিক ১৭৯৫-১৮০৫ ইংরাজীতে। তার জন্মতিথিহান পৌষমাহার পূর্ণিমার দিন বৃহস্পতিবার ; কিন্তু তার জন্মের সঠিক সনহান আমি হার নাপাছি। গিরক এগো কনাকে ছিলেটর হাইস্কুল আগোত তামকরলো, কিন্তু এন্ট্রান্স পরীক্ষাত সফল অ'না নুরারানিয়ে তা নবদ্বীপে গিয়া সংস্কৃতর কাব্য বারো ব্যাকরণ তামকরলোগা। উতার পিছে কাশীতে গিয়া বেদান্ত তামকরলোগা।

প্রায় ৫০ বছর বয়সে পুণ্ডরীকাক্ষ শর্মা মাতৃপিতৃর অস্থিলো তীর্থ পরিক্রমাত নিকুলিল ; তার সঙ্গী আছিল তা খৈজাউবা মুখোপাধ্যায় (নীলেশ্বর মুখোপাধ্যায়র পিতৃদেব), বড়ঠাকুর ভট্টাচার্য্য (আগরতলার সার্বভৌম ভট্টাচার্য্যর পিতৃদেব) ইত্যাদি। নবদ্বীপ, পুরী, কাশী আদি তীর্থ ভ্রমণর পিছে পুণ্ডরীকাক্ষ শর্মা তার সঙ্গীসহ বৃন্দাবনে গেলগা। বৃন্দাবনে গিয়া তানু বিগ্রহ দর্শন করে করে পরিক্রমা করতারা, কিন্তু থানা বারো খানাপিনার অসুবিধালো মিয়াম হিনপেইতারা। বৃন্দাবনে মণিপুর সরকারর মণিপুরী মন্দির আগো আছে, কিন্তু উপেই 'কালিছা'র কোনো স্থান নেই। যদিও পুণ্ডরীকাক্ষ শর্মার কথাবার্তাত তারে পণ্ডিত বারো গুণীজনগো বুলিয়া হারপেয়া মন্দিরর ভারপ্রাপ্ত গিরকগাছিয়ে তারে ঐ মন্দিরে থানার সুযোগ দিলা, তথাপি তার সঙ্গী উতারে উপেই থানা নাদানিয়ে পুণ্ডরীকাক্ষ শর্মাউ উপেই নাথাইল। ফলে তানু মানুর ঘর মন্দির বা কুঞ্জর বারান্দাত কোনো রকম সময় কাটেয়া, মানুর গালিমাত হুনিয়া বারো অনিয়মিতভাবে যৎকিঞ্চিৎ খেয়া লাজে দুঃখে বারো লাঞ্ছনায় কোনো রকমে বৃন্দাবন পরিক্রমাহান সামকরে লম করলা। কিন্তু বৃন্দাবন পরিক্রমাত বিষ্ণুপ্রিয়া তীর্থযাত্রীর এ লাঞ্ছনা বারো তিক্ত অভিজ্ঞতাত মর্মাহত অ'য়া পুণ্ডরীকাক্ষ শর্মাই লেপকরলো যে, ব্রজত বিষ্ণুপ্রিয়া তীর্থযাত্রীর আশ্রয়স্থল আহানর বন্দোবস্ত না করিয়া তা দেশে না ফিরতই। তার সঙ্গী হাবিরে ঘরে ফিরাদিয়া পুণ্ডরীকাক্ষ শর্মা অনিশ্চিত ভবিষ্যৎ আহানর চিন্তাত ডুবিয়া দিশাহীনভাবে আটানি অ'করলো। আটতে আটতে গিরক রাধাকুণ্ডত ফৌজইলগা এবং আহা নদ্রাহীন দুর্বল দেহ উগোলো কোনো মতে রাধাকুণ্ড-শ্যামকুণ্ড পরিক্রমা করলো।

এসাদে বুলতে বুলতে আকদিন রাধাকুণ্ডর পূর্ব দিকে বর্তমান ললিতা কুণ্ডর পূর্বপারর জঙ্গল আহানাত বয়া পুণ্ডরীকাক্ষ শর্মাই মনপ্রাণ ডালিয়া ভগবানরাও প্রার্থনা করানি অ'করলো।

এসাদে দিনরাতি প্রার্থনা করতে করতে আকদিন রাতির শেষদিকে হপনেদে দেহেরতা বামন আগোই তারে মূরগোত মাঠিয়া দিয়া আশীর্বাদ করিয়া গেলগা। এহানরে ভগবানর আশীর্বাদহান নিঙকরিয়া পুণ্ডরীকাক্ষ শর্মাই বুঝে বুঝে কাদানি অ'করলো। চেইতে চেইতে বেলীহান নিকুলে আহের উবাকা রাধাকুণ্ডর তীরর জয়দেব ঠাকুর প্রতিষ্ঠিত মন্দির উগোর পূজারী বামন উগো মন্দিরে মঙ্গলারতিরকা যিতেগা পুণ্ডরীকাক্ষ শর্মার অবস্থা এহান দেখলো। পিছে জিজ্ঞাসাবাদর মাধ্যমে পুণ্ডরীকাক্ষ শর্মার হাবি কথা হুনিয়া তারে গুণী পুরুষগো বুলিয়া হারপেয়া তারে ভক্তি জানাইলো এবং তারে লগে করিয়া পূর্বোক্ত মন্দির উগোত নিয়া গেলগা।

দিন উহান দোল পূর্ণিমার দিনহান। বামন উগোই মন্দিরে গিয়া যথারীতি মঙ্গলারতি করানির পিছে পুণ্ডরীকাক্ষ শর্মারে মাতের, 'ভগবানে যখন তোরে আশীর্বাদ করেছে, তোর আশাহান অবশ্যই পূরণ অ'ইতই।' পিছে তা বর্ণনা করে গেলগা যে, তা পূজা করের রাধামাধব বিগ্রহ উগি মূলে জয়দেব ঠাকুরে প্রতিষ্ঠা করেছেগি। মুসলমান আমলে জয়দেব ঠাকুরে তার নিজর দেশে মুসলমানর অত্যাচারে থানা নুরারিয়া তার আরাধ্য রাধামাধবর বিগ্রহলো রাধাকুণ্ডত আয়া মন্দির এগো প্রতিষ্ঠা করেছেগো। জয়দেব ঠাকুরে দেহতাগর আগে তার শিষ্য আগোরাঙ বংশানুক্রমে ঔ রাধামাধবর সেবার দায়িত্ব দিয়া গেছেগা এবং তদনুসারে এ বামন পূজারী এগোই তার দায়িত্ব পালন করে যারগাতা। বামন উগোই আরতাউ মাতলো যে, জয়দেব ঠাকুরর ইচ্ছা আছিলতা যোগ্য ভক্ত আগো পেইলে মন্দির এগো জমি সহ ঔ ভক্ত উগোরাঙ হস্তান্তর করে দেনা। জয়দেব ঠাকুরর ঔ ইচ্ছানুসারে বামন পূজারী এগোই পুণ্ডরীকাক্ষ শর্মারে যোগ্য ভক্তগো জানিয়া তিনপুরা জমি সহ মন্দির উগো তারাঙ হস্তান্তর করানির ইচ্ছা প্রকাশ করলো। পুণ্ডরীকাক্ষ শর্মাই আনন্দ সহকারে বামন উগোর প্রস্তাব উহান স্বীকার করলো। উতার পিছে বামন উগোই মাতলো যে, মন্দির এগো হস্তান্তর করানিত সর্ত আহান আছে যে, রাধামাধবর নিত্যসেবার লগে জয়দেব ঠাকুররেউ নিত্য ধূপধূনালো সেবা করানি লাগতই। পুণ্ডরীকাক্ষ শর্মাই সর্ত এহান মানিয়া রাধামাধব সেবার দায়িত্বহান নিলোগা। এসাদে করে ১২৫০ সনর (১৮৪৩ ইংরাজীর) দোল পূর্ণিমার দিনে পুণ্ডরীকাক্ষ শর্মাই নুৰা করে রাধামাধব মন্দিরর প্রতিষ্ঠা করলো, যদিও জমি উহানর দলিলপত্র উবাকা করানি নাছে।

রাধামাধব মন্দিরর হস্তান্তর করতে আর্থিক লেনদেন অ'ছে, না নাছে— এ বিষয়ে মদভেদ আহানি আছে। এক মতে, পুণ্ডরীকাক্ষ গিরকে দানসূত্রে এ মন্দির বারো জমি এতা পাছেতা। অধিকতর শক্ত আরাক মত আহানে মাতেরতাই, পুণ্ডরীকাক্ষ শর্মাই এ মন্দির জমি এতা দানসূত্রে পাছেতা নাগই, তা অনেক কষ্টে অর্থ সংগ্রহ করিয়া এতা লছেতা।

এ মন্দির বারো জমি এতা বন্দোবস্ত করানির পিছে পুণ্ডরীকাক্ষ শর্মাই তার জিপ্ত, আত্মীয়স্বজন বারো বন্ধুবান্ধবরাঙ ডাঙর মন্দির আগো হঙকরানিরকা যথাসাধ্য আর্থিক সাহায্য দেনারকা আবেদন জানেইলো। খবরহান পানাই তার জেঠা পুতেক রাজেশ্বর শর্মা বারো লৌকালপা পণ্ডিত— এ দ্বিযোগিয়ে জনসাধারণরাঙতো অর্থ সংগ্রহ করিয়া রাধাকুণ্ডত গিয়া পুণ্ডরীকাক্ষ শর্মারাঙ রূপা উতা দিয়া আহিলাগা। বৃন্দাবনর অনেক ধনী গিরিগিথানিয়েউ পুণ্ডরীকাক্ষ শর্মার যারি উতা হুনিয়া তারে আর্থিক সাহায্য করলা। সংগৃহীত অর্থ উতালো তা

চূণ-চূরকী পাথরলো ডাঙর করে মন্দির আগো হঙকরলো।

উতার পিছে পুণ্ডরীকাক্ষ শর্মা প্রতাপগড়ে আয়া গাঙ ঘরেত্ত অর্থ সংগ্রহ করিয়া নিলোগা। ঔ অর্থলো মাণ্ডপ, ভাণ্ডারঘর, রসোইঘর ইত্যাদি হঙকরিয়া পিছে রাধামাধবর প্রমাণ আকারর বিগ্রহ স্থাপন করলো। ঔ বিগ্রহর লগে জয়দেব ঠাকুরর সেবিত একফুট পরিমাণর বিগ্রহ উঁগিও স্থাপন করলো। মন্দিরগোর খানি দূরেইত হুঁকাঙ করে জয়দেব ঠাকুরর মন্দিরশৌ আগোরৌ প্রতিষ্ঠা করানি অ'ইল। ১২৭২ সনর ২৪ ফাল্গুন দোল পূর্ণিমার দিনে এ মন্দির-মাণ্ডবর দ্বারোদ্ঘাটন করানি অ'ইল।

মন্দির-মাণ্ডপ প্রতিষ্ঠার পিছে পুণ্ডরীকাক্ষ শর্মাই রাধামাধবর নিত্যভোগ সেবার ব্যবস্থা বারো মন্দিরর উন্নতিসাধনর ভারহান সমাজর গজে দেনা মনেইলো এবং কামাদার আগোরাঙ মন্দিরগোর সাময়িক দায়িত্বহান দিয়া সমাজরাঙ প্রস্তাব এহান থনারকা সালইল। গিরকে ছিলেট, সুনামগঞ্জ, ত্রিপুরা, প্রতাপগড় ইত্যাদি বিভিন্ন অঞ্চল বুলিয়া অর্থ সংগ্রহ করলো। তদুপরি তা ঘরগোর লেহে ধান কাঠি আকেইহান বাৎসরিক চাদা লেপকরে দিলো এবং ঔ চাদা উতা তুলানিরকা ফামে ফামে প্রতিনিধি লেপ করেদিলো। উতার পিছে গিরকর চেষ্টায় শিংলা, ঝাপিরবন্দ, মেহেরপুর, যাত্রাপুর, বিক্রমপুর বারো নরসিংপুরেউ এ নিয়ম এহানির প্রবর্তন করানি অ'ইল। এ কামে প্রধানভাবে সাহায্য করলোতা ঘাগরার চাউবা এইগা। এ কামে প্রায় তিন বছর কাল সমাজর বুকুত থায়া পুণ্ডরীকাক্ষ শর্মা পুনরায় রাধাকুণ্ডত গেলগা। রাধাকুণ্ডত ফিরিয়া পুণ্ডরীকাক্ষ শর্মাই সমাজেত্ত সংগ্রহ করেছিল অর্থ উতালো যাত্রীনিবাস আগো হঙকরলো, বারো মন্দির-চত্বরর চারিয়বারাদে দেবাল তুলে দিলো। উতার পিছে অনেক বছর রাধামাধবর সেবা করিয়া পুণ্ডরীকাক্ষ শর্মা ১২৯৮ সনর ১২ই পৌষ একাদশীর দিনে শুক্রবারে প্রায় আটাত্তর বৎসর বয়সে দেহত্যাগ করলো। তার জীবৎকালে রাধাকুণ্ডত সাধু ঠাকুরর লগে তার দেহা অ'ছিল। পুণ্ডরীকাক্ষ শর্মার পিছে রাধামাধব মন্দিরগো চালানির পূর্ণ দায়িত্বহান ব্রজবাসী ব্রাহ্মণ আগোরাঙ আছিল বুলিয়া হুনিয়ার ; তবে ঔ ব্রাহ্মণ উগোর নাঙ পরিচয় হার নাপাছি।

প্রতাপগড়র তনুবাবু গিরকে সময় আহান রাধামাধব মন্দির পরিচালনার তাদারকি করলো এবং রাধামাধব মন্দিররকা গাঙে গাঙে বুলিয়া চান্দাউ তুললো। গিরক এগো পরবর্তিকালে নবদ্বীপর গোবিন্দবাড়ির সেবাইংগো অ'য়া আছিল, কিন্তু তা রাধামাধব মন্দিরর কামাদারর দায়িত্ব না নেছেগা।

সাধুঠাকুরর নিকটতম শিষ্য গোপালদাস বাবাজী কতো বছর রাধামাধব মন্দিরর কামাদারগো অ'য়া আছিল। গিরক উগো কামাদারগো অ'য়া আছিল সময়ত নাটমন্দিরগো হঙকরানি অ'ছিল। গোপালদাস বাবাজীর সময়ত রাধামাধব মন্দির ঋণে জর্জরি অ'নাই বিগ্রহ সহ মন্দিরর সম্পত্তি নিলামে যানার উপক্রম অ'ছিল। উবাকা গোপালদাস বাবাজীয়ে মুখ্যইত সাধনারত বিষ্ণুপ্রিয়া সাধু আগোরাঙ রাধামাধব মন্দিরগোরকা আর্থিক সাহায্য চেইতেগা সাধু উগোই গোপালদাস বাবাজীরে মাতলো যে, তা ভেক না লইলে তারে আর্থিক

সাহায্য দেনা নুৱাৰতই। গতিকে গোপালদাস বাবাজীয়ে বাধ্য অ'য়া ভেক লইলো এবং সাধু উগোয়ো সাময়িকভাবে আৰ্থিক সাহায্য দিয়া মন্দিৰগো চালনাত খানি সহায়তা কৰলো।

গোপালদাস বাবাজীৰ আমলে মন্দিৰগোৰ খৰচ চালানিৰকা বৰাবৰ দুকানেত্ত বাকী খৰচ আনানি লাগেছিল। আকখুৰুম বাবাজীয়ে মন্দিৰৰ পূজাৰী উগোৰ আ'তে মন্দিৰগোৰ ভাৱহান দিয়া বিষ্ণুপ্রিয়া সমাজেত্ত চান্দা তুলানিৰকা নিকুলেছিল এবং এ উদ্দেশ্যে ভানুগাছেত্ত শিলচৰ পেয়া বুললো। ঔ সময়ত মন্দিৰৰ পূজাৰী উগেই অৰ্থাভাবে দুকানেত্ত বাকী আনতেগা আনতেগা সময় আহানাত দুকানেত্ত বাকী দেনা নাকৰলা ; ফলে কতোদিন মন্দিৰৰ সেবাপূজা বন্ধ অ'য়া থাইল। এ অবস্থাত ৰাধাৰাণীয়ে গোপালদাস বাবাজীৰে স্বপ্নে দেহেইলো যে, তেই তিন দিন ধৰিয়া অনাহাৰে আছে। লগে লগে বাবাজীয়ে তুলেছিল চান্দাৰ ৰূপা উহানিলো ৰাধাকুণ্ডত গিয়া দুকান বাকী উতা দিয়া বা'ৰো মন্দিৰগো ৰীতিমতো চালানি অ'কৰলো। পিছেদে মন্দিৰ চালনাৰ ভাৱহান নিলেগা সাধনভজনে ব্যাঘাত পড়ৈৰ বুলিয়া গোপালদাস বাবাজীয়ে মন্দিৰৰ দায়িত্ব উহান এৰাদিলো।

উতাৰ পিছে শিংলাৰ দলিবিলাৰ কৃষ্ণকুমাৰ সিংহৰাঙ ৰাধামাধব মন্দিৰ পৰিচালনাৰ ভাৱহান পড়িল। এ গিৰক এগো উচ্চস্তৰৰ সাধক আগো আছিল। তা ৰাধাকুণ্ডত গোবৰ্ধন পৰিক্ৰমাকালে হপনেদে নাৱদ মুনিৰাঙতো বীণা আগো পাছিল এবং পিছেকাৰ বিয়ানে গোবৰ্ধনৰ যন্ত্ৰৰ দুকান আহানাত বহিতেগা দুকানৰ মালিক উগোয়ো আগেকাৰ ৰাতি স্বপ্নাদেশ পাছে বুলিয়া তাৰে বীণা আগো দান কৰেছিল। উবাকান্ত কৃষ্ণকুমাৰ গিৰক নাৱদ বাবা বুলিয়া পৰিচিত অ'ইল। পৰবৰ্তিকালে নাৱদবাবাই মন্দিৰৰ দায়িত্ব এৰেদিয়া গোবৰ্ধনে সাধনভজন কৰিয়া থাইলগা। এ সময়ত তা অতি সাধাৰণ মানুগোৰ সাদে থাইল অথচ তাৰ কামে কথায় তাৰ দিবা শক্তি আহানৰ প্ৰকাশ পেইলো। মানুৰে কুনো কিছু দান কৰলে তা প্ৰয়োজনৰ অতিৰিক্ত নানলোগা, বাৰো তাৰে কুনো আহাৰ্য্য বস্তু দিলে তা 'হেই কানহাইয়া! দো এৰে খা' বুলিয়া অতি সাধাৰণ ভাষালো বস্তু উতা গোপালৰাঙ কাত কৰলো।

নাৱদবাবাৰ পিছে যমুনাদাসী নাঙৰ গিথানক আগোই সাময়িকভাবে মন্দিৰগোৰ দায়িত্ব নিয়া চালেইলো।

যমুনাদাসীৰ পিছে লোৱাৰপুৱাৰ জগদীশ বাবা নিয়মমাফিক কামাদাৰগো অ'য়া মন্দিৰগো চালেইলো। তাৰ সময়ত পূৰ্বোক্ত তনুবাবু গিৰকে কুঞ্জবাসীৰকা ঘৰ কতোগো হঙকৰেদেছিল।

আনুমানিক এ সময়ত কালাধন সাধু নাঙৰ বৈষ্ণব গিৰক আগো ৰাধাকুণ্ডত আছিলগা। তা ৰাধামাধব মন্দিৰৰ কামাদাৰগো নাছিল যদিও, কামাদাৰ নেয়ইলা সময়ত তা সাময়িকভাবে মন্দিৰ পৰিচালনা কৰলো। সিংহাৰীৰ চৌবিতল নাঙৰ গিথানক আগোয়ৌ হাদি হাদিত মন্দিৰ পৰিচালনাত সাহায্য কৰলো।

*** সাধু উগো মূলতঃ** শিলচৰৰ কাদাৰ চেংকুড়ি গাঙৰগো বুলিয়া কুনো কুনোগেই মাতলা। সম্ভবতঃ তা তাকু বুলতাৰা উগোৰ বাপক।

১৯৫৪-৫৫ ইংরাজীত প্রতাপগড়র জামিরালার রাধারমণ গিরকে কামাদারর পদে থায়া মন্দির পরিচালনা করলো। এ সময়ত পাথারকান্দির ডাঃ রাজেন্দ্র সিংহই মন্দিরর জমির কাদা আগোদে ঘর আগো হঙকরিয়া থাইলগা।

জামিরালার রাধারমণর পিছে সিঙ্গরীর চৌবিতল দেবীয়ে কতোদিন মন্দির পরিচালনা করলো।

পিছে সিঙ্গরীর রাধারমণ সিংহই ১৯৭৩-৭৪ ইংরাজীত কামাদারর পদে নিযুক্ত অ'য়া মন্দিরর দায়িত্ব নিলোগা। তার সময়ত মন্দিরর জমিহানর দলিল করানি অ'ইল ; উতার আগে জমি উহানর দলিল নেয়ছিল। উতা ছাড়া ডাঃ রাজেন্দ্র সিংহই মন্দিরর জমিত যে কুঠিগো করিয়া আছিল, উগৌ রাধামাধব মন্দিরর নাঙে দলিল করানি অ'ইল। এ সময়ত মন্দিরর আসনহান নষ্ট অ'নাই কামাদার গিরকে রাধামাধব কমিটির পরামর্শে জয়পুরে গিয়া আসন আহানর অর্ডার দিয়া আছিলগা। কিন্তু আসন উহান আহানির আগেই রাধারমণ গিরকে কালাধন বাবারাঙ মন্দিরর দায়িত্বহান দিয়া ১৯৭৬ ইংরাজীত ঘরে ফিরিল। রাধারমণ গিরকে মন্দিরর দায়িত্ব এরেদেনার পিছে আসনহান আনানি অ'ছিল।

আসন এহান হঙকরানির ব্যাপারে য়ারি আহান আছে : আসনহান বাগে য়ারগা সময় উহানাত রাধামাধব মন্দিরর সাময়িক দায়িত্বত আছিলতা কালাধন বাবা। আকদিন গিরকরে রাধারানীয়ে স্বপ্নযোগে মাতলো যে, তেইর আসনহান বাগে য়ারগা ; ত্বরা করে নুৱা আসন আহান আনানি লাগতই এবং ঔ আসন উহানর রূপা তুলানি লাগতইতা বিষ্ণুপ্রিয়া সমাজেত্ত। কালাধন বাবা লগে লগে রাধাকুণ্ডত নিকুলিয়া কাছাড়ে আছিল। রাধারানীর আদেশর কথা হুনিয়া কাছাড়র গিরিগিথানীয়ে, বিশেষ করে তৎকালীন আসামর বিধায়ক নন্দকিশোর সিংহর উদ্যোগে অর্থসংগ্রহ করানি অ'করলা এবং অল্পদিনর ভিতরেই প্রায় ১৭ হাজার টাকা উঠিল। আসনহানর রূপা এতা বিশেষ করিয়া উঠিলতা শিলচরর মেহেরপুরেত্ত এবং আংশিকভাবে উঠিলতা নরসিংপুর বারো বিক্রমপুরেত্ত। এসাদে উঠিল রূপা উতালো মন্দিরে আসনহান আনানি অ'ইলতা ১৯৭৭-৭৮ ইংরাজীত।

সিঙ্গরীর রাধারমণ গিরকর পিছে রাধামাধব মন্দিরর কামাদার হিসাবে নিযুক্তি পেয়া গেলগাতা নরসিংপুরর মদন মোহন সিংহ গিরক। এ গিরকর কার্যকালে রাধামাধব মন্দিরর প্রভূত উন্নতি অ'ইল। এ সময়ত কাম অ'ইল উতার তালিকাহান তলে দেনা অ'ইল :—

১। নাটমন্দিরগোর মেজেহান শ্বেতপ্রস্তর লো বাধানি অ'ইল। কাম এহানর যাবতীয় খরচ বহন করলাতা প্রতাপগড়র আঞ্চলিক কমিটিয়ে।

২। যাত্রীনিবাসর গজর তালাত তিনগো যাত্রীনিবাস হঙকরানি অ'ইল। এতার খরচ বহন করলাতা— মেহেরপুরর আঞ্চলিক কমিটিয়ে বারো নরসিংপুরর আঞ্চলিক কমিটিয়ে। উতার গজে, ব্যক্তিগতভাবে আর্থিক সাহায্য দেছিতা প্রতাপগড়র প্যারীবাবুরে (৫০০০ টাকা) বারো কুঞ্জবাসিনী মাও দাসীয়ে (১০ হাজার টাকা)। পরলোকগত কুঞ্জবাসী

তুলসীদাস বাবাজীৰ জমা ৰূপান্তৰী ডাঙৰ অংশ আহান (১০ হাজাৰ টকা) এ কামে হমাছে।

৩। ছেনিটৱী লেট্ৰিন, টিউব-বেল ইত্যাদি হঙকৰানি অ'ইল। কাম এহানি অ'ইলতা নাগালেণ্ডে কৰ্মৰত গিৰিগিথানীৰ আৰ্থিক সাহায্যালো (প্ৰায় ১৯ হাজাৰ টকা)।

৪। মূল মন্দিৰগোৱাৰ পূৰ্ব সীমাগোন্ত ললিতাকুণ্ড পৰ্য্যন্ত লাগেয়া প্ৰায় ৩ কাঠা জমি লনা অ'ইল।

৫। কহাগোৱাৰ কাদাত, গজৰ তলাত বাৰো মন্দিৰগোৱাৰ ভিতৰে পানিৰ ট্যাঙ্ক বহানি অ'ইল।

৬। মন্দিৰগোৱাৰ পুৰাণা দেৱাল উগো উচকৰানি অ'ইল, বাৰো নুৰা জমি উহানাতে দেৱাল তুলিয়া সীমানিৰ্দেশ কৰানি অ'ইল।

৭। বিশ্ৰামঘৰ, ভাণ্ডাৰঘৰ, বসোইঘৰৰ গজৰ তলা, গজৰ তলাৰ পশ্চিমৰ কুঞ্জবাসী নিবাস ইত্যাদি প্লাষ্টাৰ কৰানি অ'ইল।

৮। ত্ৰিপুৱাৰ যাত্ৰীনিবাস আগো হঙকৰানি অ'ইল। উগোৰ ব্যয়ভাৰ (৩২,০০০ টকা) বহন কৰলোতা বনমালী সিংহ, আই এ এছ, আগৰতলা, গিৰকে।

মদনমোহন গিৰকৰ পিছে সিদ্ধৰীৰ ৰমণীমোহন সিংহই ৩/৪ মাস মন্দিৰগোৱাৰ পৰিচালনা কৰলো। তাৰ পিছে তীৰ্থবাসিনী প্ৰতাপগড়ৰ বাসন্তী নাঙৰ নিঙোল আগেই অল্প সময়ৰকা মন্দিৰগো চালানিৰ দায়িত্ব নোছিলীয়া।

উতাৰ পিছে ১৪০৩ সনৰ অগ্ৰহায়ণ মাহান্ত জিৰিবামৰ ৰামনাৰায়ণ গিৰকে কামাদাৰৰ পদে নিযুক্ত অ'য়া মন্দিৰ পৰিচালনা কৰে।

৭। বিষ্ণুপ্রিয়া মণিপুরীৰ জাতীয় চেতনা

মণিপুরেত আসাম-ত্রিপুরা-শ্রীহট্টত আহানিৰ পিছেউ বিষ্ণুপ্রিয়া মণিপুরীয়ে তানুৰ নিজৰ সমাজৰ ভিতৰে নিজৰ কৃষ্টি কীৰ্তন-রাস-আরতি ইত্যাদি যথাযথভাবে ধৰিয়া থছি—উহান সম্বন্ধে কোনো সন্দেহ নেই। সংস্কৃতিৰ কোনো দিক আহানাত এপেইৰ শিক্ষা অপূৰ্ণ অ'ইলে সমাজৰ শিক্ষার্থী শিল্পীয়ে বরাবৰ মণিপুরে গিয়া দক্ষতা অৰ্জন কৰিয়া আহিলাগা। ঔ সময়ত গাঙে গাঙে ইসালপা ডাকুলা বাসকুলী ইত্যাদি শিল্পীৰ অভাব নেয়'ছিল। ঊনবিংশ শতাব্দীৰ দ্বিতীয়ার্ধত বিংশ শতকৰ তৃতীয়-চতুর্থ দশক পেয়া বিষ্ণুপ্রিয়াৰ কৃষ্টিৰ ছবিহান এহান।

শিক্ষাৰ দিকে ঊনবিংশ শতকৰ চতুর্থ পাদত বিংশ শতকৰ তৃতীয়-চতুর্থ দশক পেয়া সংস্কৃত শিক্ষাই প্রধান শিক্ষাৰ বিষয়হান অ'ছিল। ঔ সময় প্রত্যেক অঞ্চলেই ৮-১০ গো সংস্কৃত পণ্ডিত আছিল। এবং তানুৰাঙ অনেক ছাত্র শিক্ষা কৰেছিল। তবে কোনো নিঙোলপী সংস্কৃত শিক্ষা কৰেছিল। বুলিয়া কিন্তু আমি নাজানি।

বিংশ শতকৰ তৃতীয় দশকেত পুরি আধুনিক শিক্ষা খানি খালি প্রচলিত অ'না অ'করলো এবং ষষ্ঠ দশকেত পুরি আধুনিক শিক্ষা প্রায় সর্বসাধারণৰ ভিতরে প্রবিষ্ট অ'য়া হুদেইল। আধুনিক শিক্ষাৰ লগে লগে নিজৰ ভাষা কৃষ্টিলো গৌরব বোধ করানি এবং বহির্বিশ্বে নিজৰ ভাষাকৃষ্টি তুলিয়া ধরানিৰ মানসিকতা আহান আহানি উহান স্বাভাবিকহান। কিন্তু বিষ্ণুপ্রিয়া সমাজে দেহিয়ারতাই উহানৰ উল্টাহান। শিক্ষিত বিষ্ণুপ্রিয়াৰ সাধারণ চরিত্রহান দেহিয়ারতাই নিজৰ ভাষা, পুষাক, রীতি উতার প্রতি অনাদর বা উতারে লাজপানিৰ বস্তু বুলিয়া নিঙকরানি। আধুনিক শিক্ষাৰ নিত্য সঙ্গী আরাক বস্তু আহান অইলতাই দেশপ্ৰীতি। এ বস্তু এহানৌ বিষ্ণুপ্রিয়াৰ ভিতরে দেহা নাদেছে বুললেউ যাকরের। উহানে ভারতৰ দীর্ঘদিনৰ স্বাধীনতা সংগ্রামৰ ইতিহাসে বিষ্ণুপ্রিয়াৰ ভূমিকা নেই বুললেউ চলের। তবে বাংলাদেশে এ দেশপ্ৰীতি এহান বিংশ শতকৰ চতুর্থ দশকেই স্পষ্টভাবে দেহিয়ার। উহানে দেহিয়ার—বৈকুণ্ঠ শর্মা, লীলাবতী শর্মা, গিরীন্দ্র সিংহ ইত্যাদি গিরিগিথানীয়ে স্বাধীনতা সংগ্রামে ব্যাপিয়া পড়েছিল।

যেতাউ অ'ক, এ অবস্থাতৌ বিংশ শতাব্দীৰ তৃতীয় দশকেত অ'করিয়া বিষ্ণুপ্রিয়া সমাজে নিজৰ সত্তা সম্বন্ধে চেতনা আহান জাগানি অ'করলো, যদিও ভাষাসাহিত্য সম্বন্ধে উবাকাউ চিন্তাভাবনা যথাযথভাবে নাহেছে; নিজৰ কৃষ্টিৰে উজ্জ্বল কৰিয়া পৃথিবীৰ মুঙে পালনিৰ মানসিকতাউ উবাকা নাহেছে।

নিজৰ সত্তা সম্বন্ধে চেতনা জাগ্রত অ'নাই ১৯২৫ ইংরাজীৰ ছিলটৰ মুরারীচাঁদ কলেজৰ বিষ্ণুপ্রিয়া ছাত্র কতোগোই মাছিমপুরেত 'জাগরণ' নাম্ৰ পত্রিকা আহান নিকাললা। উতার পিছেদে নিজৰে বর্ণ হিন্দু বুলিয়া পরিচয় দেনার প্রচেষ্টালো প্রতাপগড়ৰ তনুৰাবু সিংহ, মহেন্দ্র কুমার সিংহ, কাটাখালৰ ফাল্গুনী সিংহ, মাছুঘাটৰ কমলকুমার সিংহ, রাজবাবু সিংহ

ইত্যাদি গিরিগিথানীয়ে সমাজে ঢেউ আগো তুললা, যার ফলে ১৯৩২-৩৩ ইংৰাজীত নিখিল বিষ্ণুপ্রিয়া মণিপুরী সম্মেলনৰ (মহাসভা) সৃষ্টি অ'ইল এবং নিজৰ জাতৰ পরিচয় দেনাৰ এবং সমাজৰ সুরক্ষা বিধানৰ প্ৰবৃত্তি আহান আহিল। ১৯৩২ ইংৰাজীৰ ২৫ ছেপ্টেম্বৰ 'সুৰমা বেলি মণিপুরী সম্মেলন'—ৰ অস্থিকাপুৰে অনুষ্ঠিত সভাত আসাম লেডিসেলেটিভ কাউন্সিলে অনুমত মণিপুরী সম্প্ৰদায়েত সদস্য আগো নেনা অ'ক বুলিয়া যে দাবী উঠেছিল, উহানৰে আৱতাউ শক্ত কৰিয়া ১৯৩৯ ইংৰাজীৰ ২৫ ডিছেম্বৰ কাছাড়ৰ বেৰাবাকে অনুষ্ঠিত 'কাছাড় জিলা মণিপুরী কন্ফাৰেনছ' আহানাত উক্ত সদস্য পদ উহান মণিপুরীৰকা ৰিজাৰ্ড থনাৰকা পুনৰায় দাবী জানানি অ'ইল।

এসাদে কৰে তৃতীয়-চতুৰ্থ দশকৰ এ নবজাগরণ এহানাত এ জাতৰতা নিজৰ সত্তা সম্পৰ্কে সচেতনতা আহান যদিও আহিল, নিজৰ ভাষাকৃষ্টিৰ প্ৰতি যথার্থ শ্ৰদ্ধা ও সময় পেয়া জাগ্ৰত নাহে। উহানে ও সময়ত 'জাগরণ', 'মণিপুরী', 'মেখলী' বারো 'ক্ষত্ৰিয় জ্যোতি' নাঙে যেতা পত্ৰিকা নিকুলিল, উতা হাবি প্ৰধানতঃ বাংলাভাষাৰ মাধ্যমে। ছদা উহান নাগই, আমাৰ মাতৃভাষাহান কুংহান, উহান সম্বন্ধেই এ জাতৰ স্পষ্ট ধাৰণা নেয়ছিল, বা সন্দেহ আহিল। এমন কি, এসাদে প্ৰশ্ন উঠেছিল যে, জাত এহান বাঙালিৰ ভিতৰে হ'মানি উচিত, না মেইতেইৰ ভিতৰে ? ও সময়ত মহেন্দ্ৰ কুমাৰ সিংহ গিৰকে জাগরণ পত্ৰিকাত দীৰ্ঘ আলোচনা আহান কৰিয়া সিদ্ধান্ত দুহান দেছিল : (১) বাঙালী সমাজভুক্ত অ'না উহান বিষ্ণুপ্ৰিয়াৰতা উচিত নেই, (২) বিষ্ণুপ্ৰিয়া ভাষা এহান কৈৰেঙকুল্লাকপাই অল্প কিছুদিন আগে ৰাঙামটিঙ আনেছেহান : এহান আমাৰ মাতৃভাষাহান অ'না নুৱাৰেৰ ; বুনীয়দি মণিপুরী ভাষাহানতে মেইতেই এহান। কিন্তু এ সময়ত অৰ্থাৎ চতুৰ্থ দশকৰ পইলাদে বি.ম. ভাষালো লিখা গোকুলানন্দ গীতি স্বামীৰ সমাজ জাগরণী এলা বারো নাটক, লেইখোমসেনা গিৰকৰ 'মণিপুর পতন' নাটক, শনিছড়ার এইগা— মদন মোহন শৰ্মাৰ পৌৰাণিক পালাকীৰ্তন, চিপৰসাদ্ধনৰ আমুসেনাৰ ৰামায়ণ গীতিকা ইত্যাদি প্ৰচাৰৰ ফলে ও সন্ধিদ্ধ যুগ উহানৰ ক্ৰমশঃ অবসান অ'ইল। উতাৰ পিছে সিদ্ধান্ত অ'ইল যে, বিষ্ণুপ্ৰিয়া ভাষা এহানেই আমাৰ মাতৃভাষাহান। কিন্তু তথাপি নিজৰ ভাষাকৃষ্টিৰ প্ৰতি যথার্থ শ্ৰদ্ধা বিষ্ণুপ্ৰিয়াৰতা নাহিল। নিজৰ ভাষাকৃষ্টি বেলেয়া অন্যৰ ভাষাকৃষ্টি অনুকৰণ কৰানিৰ মানসিকতা এহান ইমে জাত এহানৰ ৰক্ত মাংসত জড় ধৰিয়া থাইল।

ভাৰতৰ স্বাধীনতা লাভৰ পিছে বিষ্ণুপ্ৰিয়া ভাষালো সাহিত্য চৰ্চা আৰম্ভ অ'ইল। উতাৰ পিছেই ১৯৫১ ইংৰাজীত পুৰি সরকাররাঙতো এ ভাষাৰ স্বীকৃতি দেনাৰ এবং এ জাতৰ শৌৰে মাতৃভাষালো শিক্ষাদেনাৰ ব্যবস্থা কৰানিৰ দাবী উঠানি অ'করলো, যে দাবীহান ১৯৫৬ ইংৰাজীত আন্দুৰগাঙে অনুষ্ঠিত মহাসভাত স্পষ্ট আকাৰ নিলোগা। ও সম্মেলনে মহাসভাৰ সাংগঠনিক কাঠামৰ ভিতৰে সাহিত্য পরিষদ, ভাষা পরিষদ বারো সংস্কৃতি পরিষদ গঠন কৰানি অ'ইল এবং সাহিত্য পরিষদ বারো ভাষা পরিষদৰ গজে ভাষা দাবীৰ ভাৱহান নাস্ত কৰানি অ'ইল।

উতাৰ পিছে ১৯৬০ ইংৰাজীত ১৯৬১ ইংৰাজীৰ লোকগণনাত বিষ্ণুপ্ৰিয়া

ভাষাভাষীৰে মেইতেইত্ত তঙাল কৰে দেহুৱানিৰ দাবী উঠিল এবং ১৯৬১ ইংৰাজীৰ জুলাই মাহত অ'কৰিয়া সরকারৰাঙ বিষ্ণুপ্রিয়া ভাষাৰ স্বীকৃতি, বিষ্ণুপ্রিয়া ভাষালো শৌৰ প্ৰাথমিক শিক্ষালাভ, বেতাৰ কেন্দ্ৰত বিষ্ণুপ্রিয়া ভাষালো সংস্কৃতি প্ৰচাৰ ইত্যাদি দাবী জানেয়া আহিতাৰা। পইলাদে দাবী এতা প্ৰধানতঃ উঠিলতা মহাসভাৰ তৰফেত্ত। পৰবৰ্তীকালে ১৯৬৮ ইংৰাজীত অ'কৰিয়া ছাত্ৰসমাজৌ এ আন্দোলনে যোগ দিলা। বৰ্তমানে মহাসভা এবং সাহিত্য সভাই যদিও ভাষাৰ দাবী হাদিহাদিত তুলতাৰা, মুখ্যতঃ দাবী বাৰো আন্দোলন কৰতাৰাতাই বিষ্ণুপ্রিয়া মণিপুরী ষ্টুডেন্টছ যুনিয়নে।

সংস্কৃতিৰ বাৰাদে দৃষ্টি দিলে দেহিয়ার— বিষ্ণুপ্ৰিয়াৰতা নিজৰ কৃষ্টিৰ প্ৰতি যথার্থ শ্ৰদ্ধা নেয়নিযে এ শতকৰ ৬ষ্ঠ দশক হমেইতে হমেইতে এ জাতৰ কৃষ্টিৰ অধিকাংশই আমি হাৰেইলাঙ। ভাষা সচেতনতা আহনিৰ লগে লগে সংস্কৃতি সচেতনতা আহানৌ এ জাতৰ ভিতৰে— বিশেষ কৰে শিক্ষক গোষ্ঠীৰ ভিতৰে দেহাদিলো। শিক্ষক গোষ্ঠীৰ অনেকে মৃদঙ্গশিল্প এবং কীৰ্তন কলাৰ অনুসৰণ কৰানি অ'কৰলা। এ সময়ত অ'কৰিয়া কীৰ্তন-ৰাস এতা মাতৃভাষালৌ উপস্থাপিত কৰানিৰ প্ৰচেষ্টা আহান আহিল। কিন্তু যথার্থ ভক্তিমান, ৰসজ্ঞ এবং সাহিত্যতত্ত্বজ্ঞ লেখকৰ অভাবে এবাকাউ এ ৰাসকীৰ্তন এতা যথাযথ ৰুচি অনুযায়ী হঙকৰানি নুৱাৰেছি ; উতা যথাযথভাবে হঙকৰানিৰ প্ৰচেষ্টা চলেৰ।

জাতীয় চেতনাৰ কথা আলোচনা কৰতে গিয়া আৰাক বিষয় আহান অবশ্যই মাতানি লাগেৰ ; উহান অ'ইলতাই বিষ্ণুপ্রিয়া স্ত্ৰীপুৰুষ নিৰ্বিশেষে হাবিৰতা আমাৰ নিঙোলপীৰ জাতীয় পুষাকৰ প্ৰতি হেয়দৃষ্টি এহান। নিঙোলপীয়েউ চেইতাৰাতা মিয়াঙৰ পুষাক পিদিয়া মিয়াঙ মালনি এহান, বাৰো নিঙোলৰ ইমা-বাবা বেইবুলি বা স্বামী-শ্বশুৰ-শাশুড়ীয়েউ চেইতাৰাতা নিজৰ নিঙোলগো বা বহকগো বা গৃহিণীগোই মিয়াঙৰ পুষাক পিদিয়া আত্মগোপন কৰিয়া চলানি এহান। নিজৰ জাতীয় পুষাক পিদলে নিঙোলপী উতা নিজে এবং নিঙোলৰ ইমা-বাবা বা স্বামী গিৰক গাছিয়েউ নিজৰে হুকাঙ নিঙকৰতাৰা বা লাজ পেইতাৰা। এহান জাত এহানৰ জাতীয় চেতনাৰ অভাবহান, মেরুদণ্ডহীনতাৰ লক্ষণহান। পৃথিৱীত এহানেই হয়তো একমাত্ৰ জাতহান, যেতাই নিজৰ পুষাক পিদিয়া নিকুলতে লাজপেইতাৰা। এ সম্বন্ধে আমি বহু মাতেছি, কিন্তু এ জাতৰ চৰিত্ৰ এহানৰ সংশোধন কৰে নুৱাৰলাঙ।

৮। ভানুবিলর কৃষক আন্দোলন

ভানুবিলর বিষ্ণুপ্রিয়ার কৃষক আন্দোলন জাত এহানর ইতিহাসে চিরস্মরণীয় অ'য়া থাইতই। এ আন্দোলন এহান পইলাদে তৎকালীন জমিদারর জোরজুলুম বারো অত্যাচারর বিরুদ্ধে গড়িয়া উঠেছিল যদিও, পরবর্তীকালে এহান ভারতর স্বাধীনতা আন্দোলনর লগে মিলিয়া গেলগা। এ সম্বন্ধে আমি যতটুকু জানেছি, উতা আমি 'বিষ্ণুপ্রিয়া মণিপুরীর দিকপাল' গ্রন্থত 'বিপ্লবী বৈকুণ্ঠনাথ শর্মা বারো বিপ্লবিনী লীলাবতী শর্মা' শীর্ষক জীবনী প্রবন্ধত আলোচনা করেছি। এ প্রবন্ধত ঐতিহাসিক দৃষ্টিকোণে সঙ্ক্ষেপে খানি আলোচনা করিক।

বাংলাদেশর কমলগঞ্জ উপজিলাত ভানুবিল, তেতই গাঁও, মাঝের গাঁও, চিতলী বারো ছনগাঁও— এ পাচোহান গাঙলো ভানুবিল লয়াগো বুলতারা। ঐ সময়ত ভানুবিল এহান হাবি জমিদারর অধীনে আছিল। তানুর ভিটাবাড়ী বা ক্ষেতির জমির গজে তানুর সত্ত্বাধিকার নেয়ছিল। তানুর জমিদারগো আছিলতা আলী আমজদ খাঁ ; তবে তারো গজে সর্বাধিপতিগো আছিলতা পৃথিম পাশা। আলী আমজদ খাঁই ব্রিটিশ সরকারর নির্দেশে প্রতি বছর জোর জবরদস্তি খাজানা আদায় করিয়া নেরগা, ভানুবিলর বিষ্ণুপ্রিয়া এতায়ৌ খাজানা দিয়া যিতারাগা। আমজদ খাঁর নায়েব রাসবিহারী দাসে যথারীতি তানুরাঙতো খাজানা নেরগা, কিন্তু খাজানা উতার রসিদ নাদের ; বিষ্ণুপ্রিয়া এতায়ৌ সরল বিশ্বাসে রসিদ দাবী নাকরতারা। ১৯৩০ ইংরাজীত হঠাৎ করে রাসবিহারী দাসে ভানুবিলর মানু এতাই খাজানা নাদতারা বুলিয়া খাজানারকা জুলুম করানি অ'করলো এবং কতোগোর বিরুদ্ধে খাজানা নাদেছি বুলিয়া মোকদ্দমা লাগাদিলো। এহানর প্রতিবাদে ভানু গাছর বিষ্ণুপ্রিয়া হাবিয়ে 'আর খাজানা নাদতাঙাই' বুলিয়া ঘোষণা করলা। উতার পিছে ১৯৩১ ইংরাজীত ব্রিটিশ সরকারর নির্দেশ বারো সহায়তালো জমিদারর সিপাহীয়ে আন্তিলো ভানু বিলর ঘর বাগেদেনা অ'করলা এবং ৫০ গোর চুরা ঘর বাগিয়া হদেইলা। ভানুবিলর বিষ্ণুপ্রিয়া বৈকুণ্ঠ শর্মার নেতৃত্বত ভুজালি, খন্টি ইত্যাদিলো সংগ্রামে উবা'য়া অনেক আন্তি জখম করলা এবং রাস বিহারীরে টুকরা টুকরা করিয়া কাপিয়া বেললা। আপাততঃ সংগ্রামহান এপেই লমইল।

আলী আমজদ খাঁর পিছে তার পুতোক আলী হায়দর খাঁ জমিদারগো অ'ইল ; তার নায়েবগো অ'ইলতা প্রমোদ ধর। প্রমোদ ধরে চলাকিলো খাজানার পরিমাণ বাড়েয়া জোর জবরদস্তিলো খাজানা আদায় করানি অ'করলো। উতার গজে তা বিষ্ণুপ্রিয়ার দৈনন্দির জীবনেউ নানা বিধিনিষেধ আরোপ করে দিলো, যার ফলে তানুরতা পাকা ঘর হঙকরানি, পহরী খুলানি, গাছ কাপানি— এতা হাবি নিষিদ্ধ অ'ইল। উতার প্রতিবাদে বা'রো ১৯৩২ ইংরাজীত ভানু বিলর বিদ্রোহ আরম্ভ অ'ইল।

ঐ সময়ত গান্ধীজীর নেতৃত্বত ভারতর স্বাধীনতা আন্দোলন পুরাদমে চলেছে সময়হান। এ স্বাধীনতা আন্দোলনর ব্যাপারে ১৯৩১ ইংরাজীত মৌলবী বাজারে শ্রীহট্ট সুরমা ভেলী যুব

সম্মেলন আহানাত কংগ্রেস বারো কমিউনিষ্টর বিশেষ নেতাই ভাষণ দিতারা সময় উহানাত ভানু বিলর বিদ্রোহী দল আহানে আন্দোলনর স্লোগান দিয়া দিয়া সভাস্থলীত হমেইলাগা। ঔ বিদ্রোহী দলর পুরোভাগে আছিলাতা বিপ্লবী বৈকুণ্ঠনাথ শর্মা, গিরীন্দ্র মোহন শর্মা, রূপনাথ সিংহ, কৃষ্ণমণি শর্মা, সাবিত্রী সিংহ এবং বৈকুণ্ঠ শর্মার চতুর্দশ বর্ষীয়া কন্যা লীলাবতী শর্মা। ঔ যুব সম্মেলনে ভানুবিলাক বিদ্রোহীরে সাহায্য করানির প্রস্তাব দেনা অ'ইল। ভানুবিলাক বিদ্রোহীয়েউ গান্ধীজীর অনুসরণে অহিংসানীতিলো সংগ্রাম করানির সংকল্প নিলাগা। লগে লগে মৌলবী বাজারর জিলা কংগ্রেছেউ আন্দোলন এহানরে সমর্থন জানেইলা। ভানুবিলাক আন্দোলন জাতীয় কংগ্রেছর আন্দোলনর লগে মিলিয়া এক অ'ইল। বৈকুণ্ঠ শর্মা ভানুবিলাক কংগ্রেছ কমিটির সভাপতিগো নির্বাচিত অ'ইল এবং ভানুবিলাক বারো নিকটবর্তী বিষ্ণুপ্রিয়া অধ্যুষিত এলাকাত শক্তিশালী সংগঠন আহান হংকরিয়া কংগ্রেছর আইন অমান্য আন্দোলনে যোগ দিলো। তার এ আন্দোলনে প্রধান সঙ্গিনীগো— তার জিলক লীলাবতী। তানুর এ আন্দোলনরে যথাযথভাবে পরিচালনা করানিরকা আগ বাড়িয়া আহিলাত জিলা কংগ্রেছর সভাপতি পূর্ণেন্দু কিশোর সেনগুপ্ত বারো স্বাধীনতা সংগ্রামী দুর্গেশ দেব, নিকুঞ্জ গোস্বামী ইত্যাদি গিরিগিথানী।

এসাদে কংগ্রেছর সহযোগিতায় ভানুবিলাক মানুরে আন্দোলন করে যিতারাগা, বারো সরকারী অত্যাচার প্রতিরোধ করতারা উহান দেহিয়া সরকারে ১৯৩১ ইংরাজীত কংগ্রেছ নেতা পূর্ণেন্দু কিশোর সেনগুপ্ত, গিরীন্দ্র মোহন সিংহ, বৈকুণ্ঠনাথ শর্মা, লীলাবতী শর্মা ইত্যাদি নেতৃবৃন্দরে গ্রেফতার করিয়া নাম মাত্র বিচারে হাবিরে কারাগারে দিলো। এ সময়ত ঘটনা আহান ঘটেছিলতা এসাদে—

১৯৩১ ইংরাজীত শেষভাগে বৈকুণ্ঠ শর্মা'ই ভানুবিলাক নারায়ণ মাগুপে (কৃষ্ণচন্দ্র শর্মার মাগুপে), কারো কারো মতে ভানুবিলাক পূর্ব মাঠে— ব্রিটিশ সরকার বিরোধী সভা আহানর আয়োজন করলো। ঔ সভাত জেলা কংগ্রেছর পূর্ণেন্দু শেখর সেনগুপ্ত, আশুতোষ ভট্টাচার্য্য, সরলাবালা দে, গিরীন্দ্র মোহন সিংহ ইত্যাদি নেতৃবৃন্দ যোগ দেছিল। তানু হাবিয়ে ভানুবিলাক মানুরে ভারতর স্বাধীনতা সংগ্রামে যোগ দেনারকা, বারো জমিদারর বিরুদ্ধে অহিংস নীতিলো সংগ্রাম করানিরকা আহান করলো। সভা উহান চলানির সময়ত মৌলবী বাজারর মহকুমা শাসকে সশস্ত্র বাহিনীলো আয়া পুলছি জনতার গজে নৃশংস আক্রমণ চালেহলো। ঔ আক্রমণে নেতৃস্থানীয় গিরিগিথানী উতা প্রায় হাবি আহত অ'নাই জনতা হাবি বিক্ষিপ্ত অ'য়া ইতস্ততঃ ছুটানি অ'করলো। ঔ সময়ত বৈকুণ্ঠ শর্মার কণাক জিলক লীলাবতীয়ে দিয়ো আতে কংগ্রেছ পতাকাহান ধরিয়া 'বন্দে মাতরম্' বুলিয়া উচ্চ কণ্ঠে ধ্বনি দিলো। লগে লগে হাজার মানুরে ধ্বনি দিলা 'বন্দে মাতরম্'। পুলিশ বাহিনীয়ে ক্ষণকাললরকা হতভম্ব অ'ইলেউ পরক্ষণে বারো জনতার গজে আক্রমণ চালেইলা। ভানুবিলাক সভাস্থলী অসহায় নরনরীর রক্ত লা রক্তাক্ত অ'ইল। ব্রিটিশ সরকারর নির্দেশে বৈকুণ্ঠ শর্মা, লীলাবতী শর্মা, গিরীন্দ্র মোহন সিংহ, পূর্ণেন্দু কিশোর সেনগুপ্ত, সরলাবালা দে, চারুবালা দে ইত্যাদি নেতৃবৃন্দরে বন্দী করিয়া কারাগারে দেনা অ'ইল। বৈকুণ্ঠ শর্মারে কারাগারে দেনা অ'ইলতা দিবছররকা, লীলাবতীরে

এগারো মাসৰকা বারো গিৰীন্দ্র মোহন সিংহৰে বৎসরাধিক কালৰকা ।
 এবেদে জমিদাৰ আলী হায়দৰ খাঁই ভানুবিলাৰ প্ৰজাৰাওতো অধিক হাৰে খাজানা আদায়
 কৰানিৰ চেষ্টা কৰলো, কিন্তু ভানুবিলাৰ কুনোগোই খাজানা নাদলো । ঔ কাৰণে এবং ভাৰতৰ
 জাতীয় কংগ্ৰেছে সামিল অ'নাৰ দৰুণ সরকারে ভানুবিলাৰ অধিবাসীৰ গজে জুলুম কৰানি
 অ'কৰলো । তানুৰ গজে ঘৰ উচ্ছেদৰ নোটিশ দেনা অ'ইল, তানুৰ ঘৰ বাগে দেনাৰকা সশস্ত্ৰ
 সৈন্য নিয়োগ কৰানি অ'ইল এবং প্ৰজাৰ গজে পিটুনিৰ ধাৰ্য্য কৰিয়া নৱী-পুৰুষ নিৰ্বিশেষে
 হাবিৰ গজে অত্যাচাৰ চালানি অ'ইল । বিষ্ণুপ্ৰিয়াৰ ভিতৰে নাঙ কৰা দাৰোগা চৌধুৰী সিঙৰ
 নেতৃত্বত ১৯৩২ ইংৰাজীৰ আঘ্ৰণ মাহত প্ৰায় আড়াই হাজাৰ সিপাহীয়ে দশগো আন্তিলো
 আয়া ভানুবিলাৰ ঘৰ বাগানি অ'কৰলো । মাণ্ডপ বারো মন্দিৰৌ বাগে দিলো । উতাৰ পিছে
 পাচোহান গাঙে প্ৰায় সাড়ে তিনশো ঘৰ বাগেদেনা অ'ইল । এসাদে আন্তিলো ঘৰ
 বাগেদেনাৰকা সিপাহী আহিতাৰা উবাকা ভানুবিলাৰ মানুৰে শঙ্খ, কৰতাল বারো ডাক
 বাৰেইলাকো পুৰি আন্তি উতা খাঙ লাগিয়া দাবদিতাৰা । বিষ্ণুপ্ৰিয়াৰ এ সংগ্ৰাম এহানাত
 জিলা কংগ্ৰেচৰ কৰ্মীয়ে দলে দলে গিয়া ভানুবিলাৰ মানুৰে খাদ্য-দ্রব্য, নিত্যপ্ৰয়োজনীয় দ্রব্য
 বারো অৰ্থ সাহায্য দিলাগা । ঔ সময়ত শিবপুৰ ইঞ্জিনিয়াৰিঙ কলেজৰ সাতগো বিপ্লবী জেলা
 কংগ্ৰেছৰ নিৰ্দেশে গিয়া ভানুবিলাৰ আন্দোলনে যোগ দিলাগা এবং সরকারী অত্যাচাৰৰ
 প্ৰতিৰোধ কৰানিত সাহায্য কৰলো । উতাৰ গজে, সরকারে যে আন্তিলো ভানুবিলাৰ প্ৰজাৰ
 ঘৰ বাগে দিলো বারো জনতাৰ গজে নৃশংস অত্যাচাৰ কৰলো, উতা হাবি তানু ফটো তুলিয়া
 থইলা । উতাৰ গজে জেলা কংগ্ৰেছৰ সাহায্যলো ভানুবিলাৰ মানুৰে নিজ নিজ ভিটাত অস্থায়ী
 ঘৰ হঙকৰিয়া থাইলা ।

বৈকুণ্ঠ শৰ্মা বারো অন্যান্য নেতৃবৃন্দ কাৰাবাসেত্ত মুক্তি পানোৰ পিছে ১৯৩৩ ইংৰাজীত
 মৌলবীবাজাৰ শহৰে সভা আহানাত হাবি তিলইলা । ঔ সভাত ভানুবিলাৰ কৃষকৰ অধিকাৰৰ
 প্ৰতিষ্ঠা না'ছে পেয়া আন্দোলন চালেয়া যানোৰ সংকল্প নেনা অ'ইল । সরকারে লগে লগে
 তানুৰে বন্দী কৰলো এবং বিচাৰে বৈকুণ্ঠ শৰ্মাৰে চাৰি বছৰ এবং নিকুঞ্জ গোস্বামীৰে চাৰি
 বছৰ কাৰাবাসৰ নিৰ্দেশ দেনা অ'ইল ।

১৯৩৪ ইংৰাজীত কেন্দ্ৰীয় আইন সভাত কংগ্ৰেছে যোগ দেনাৰ পিছে আইন সভাৰ
 বঙ্গীয় কংগ্ৰেছ নেতা কে. ছি. নিয়োগীয়ে কেন্দ্ৰীয় আইন সভাত ভানুবিলাৰ মানুৰ গজে
 সরকারৰ অমানুষিক অত্যাচাৰৰ কাহিনী বিশদভাবে বৰ্ণনা কৰলো । এ বৰ্ণনা হুনিয়া দেশবাসী
 স্তব্ধ অ'ইলা । তদুপৰি কংগ্ৰেছে তৎকালে ইংল্যাণ্ডে আছিল বি.কে. কৃষ্ণমেননৰাঙ ভানুবিলাৰ
 মানুৰ গজে সরকারৰ অত্যাচাৰৰ নিদৰ্শন স্বৰূপ তুলিয়া থছিলো ফটো উতাৰ ফটো বারো
 সংশ্লিষ্ট ঘটনাবলীৰ পূৰ্ণবিবৰণ পেঠুৱাদিলা । কৃষ্ণ মেনন গিৰকে তৎকালীন লেবাৰপাৰ্টীৰ
 সদস্যা মিছ উইলকিনছন গিথানকৰাঙ ভানুবিলাৰ বৰ্ণনা এতা হাবি দিয়া এ ব্যাপাৰে সৰজমিনে
 তদন্ত কৰানিৰকা তেইৰেলো ভাৰতে আহিল । তানু দ্বিযোগীয়ে আন্তিত চড়িয়া ভানুবিলা
 পৰিদৰ্শন কৰলো । সৰজমিনে হাবিতা তদন্ত কৰানিৰ পিছে মিছ উইলকিনছন গিথানকে
 ইংল্যাণ্ডে ফিৰিয়া গিয়া ব্ৰিটিশ পাৰ্লামেণ্টে ভানুবিলাৰ প্ৰজাৰ গজে ভাৰত প্ৰশাসনৰ নিৰ্মম
 কাহিনী বৰ্ণনা কৰলো । ফলে বিভিন্ন পত্ৰপত্ৰিকাত ভানুবিলাৰ কৃষক আন্দোলনৰ বিবৰণ

প্রকাশিত অ'ইল।

আন্দোলন চলতে থাইল। ফলে ১৯৩৫ ইংরাজীত সরকারে 'ভানুবিলা কৃষক প্রজাসত্ত্ব আইন'— নাঙুর আইন আহান প্রবর্তন করিয়া ভানুবিলর কৃষকরে জমির মালিকানা দিলো এবং 'রাজনৈতিক বন্দী মুক্তি আইন'— নাঙুর আইন আহান করিয়া বন্দী হাবিরে মুক্তি দিলো।

কারাগারেত্ত মুক্তি দেনার পিছে লীলাবতী গিথানকে আরতাউ নিষ্ঠা সহকারে স্বাধীনতা আন্দোলনে যোগ দিলো। তেই মহাত্মা গান্ধীর অনুসরণে বারো পিতৃদেব বৈকুণ্ঠ শর্মার নির্দেশনাত চরকা সংঘ আগোর প্রতিষ্ঠা করলো। ১৯৩৭ ইংরাজীত কংগ্রেছ সভাপতি জওহরলাল নেহেরুরে শ্রীহট্ট ভ্রমণ করলো সময়ত ভানুবিল পরিদর্শনে গেছিলগা। উবাকা লীলাবতীয়ে চরকা প্রদর্শনী আহানর আয়োজন করেছিলী ; উহানাত শতাধিক বিষ্ণুপ্রিয়া নিঙোলপীয়ে অংশগ্রহণ করেছিল।

৯। বিষ্ণুপ্ৰিয়া মণিপুৰী ভাষা আন্দোলন

বিষ্ণুপ্ৰিয়া মণিপুৰীৰ সৰ্বাঙ্গীণ উন্নতি সাধনৰকা ১৯৩৩ ইংৰাজীত নিখিল বিষ্ণুপ্ৰিয়া মণিপুৰী সন্মেলনৰ গঠন অ'ইল— যেহানে পৰবৰ্তীকালে বিৰাট সভা নাঙে পৰিচিত অ'ইল। আৱতাউ পৰবৰ্তীকালে (খুব সম্ভবতঃ ১৯৪৫ সনৰ কাদাকাদি উহান 'নিখিল পঞ্চ বিষ্ণুপ্ৰিয়া মণিপুৰী মহাসভা' নাঙ পেইলো এবং পৰিশেষে উহান ১৯৬৩-৬৪ ইংৰাজীত নিখিল বিষ্ণুপ্ৰিয়া মণিপুৰী মহাসভা' নাঙে সৰ্বজনগৃহীত অ'ইল।

এ মহাসভাত ক্ৰমে ভাষা সাহিত্য বিকাশৰ বাৱাদে দৃষ্টি দেনা অ'ইল এবং ১৯৫১ ইংৰাজীত মাতৃভাষাৰে সরকারৰ তৰফে স্বীকৃতি দেনা লাগেৰ, বাৰো এ জাতৰ শৌৰে মাতৃভাষাৰ মাধ্যমে প্ৰাথমিক শিক্ষা দেনা লাগেৰ বুলিয়া দাবী আহান উঠিল। ১৯৫৬ ইংৰাজীত শিংলাৰ আন্দুৰ গাঙে অনুষ্ঠিত মহাসভাৰ সন্মেলনে এ দাবী এহান প্ৰকট অ'য়া উঠিল এবং বিষ্ণুপ্ৰিয়া শৌৰে মাতৃভাষালো শিক্ষা দেনাৰকা সরকারৰাঙ formally দাবী জানানি অ'ইল। ঔ সন্মেলনে মহাসভাৰ সাংগঠনিক কাঠামৰ ভিতৰে— সাহিত্য পৰিষদ, ভাষা পৰিষদ বাৰো সংস্কৃতি পৰিষদৰ গঠন কৰানি অ'ইল এবং সাহিত্য পৰিষদ বাৰো ভাষা পৰিষদৰ গজে ভাষা-দাবীৰ ভাৱহান ন্যস্ত কৰানি অ'ইল।

১৯৬০ ইংৰাজীৰ ২ৱা জানুৱাৰীত শিলচৰে অনুষ্ঠিত জৰুৰী বৈঠক আহানাত ভাষা পৰিষদে ১৯৬১ ইংৰাজীৰ লোকগণনাত ভাষাগত সংখ্যালঘুৰ সভা ৰক্ষার্থে মণিপুৰী জাতৰে মেইতেই বাৰো বিষ্ণুপ্ৰিয়া এ ভাষা দ্বিয়োহানিৰ ভিত্তিত পৃথকভাবে গণনা কৰানিৰকা সরকারৰাঙ আবেদন জানানি অ'ইল। উতাৰ লগে লগে ১৯৬১ ইংৰাজীতেই মাতৃভাষালো বিষ্ণুপ্ৰিয়া শৌৰে প্ৰাথমিক শিক্ষা দেনাৰ দাবীলো মহাসভাৰ প্ৰতিনিধিদল আহানে তৎকালীন আসামৰ মুখ্যমন্ত্ৰীৰ লগে দেখা কৰলা। ঔ প্ৰতিনিধিদলৰ নেতৃত্ব দিলাতা মহাসভাৰ সভাপতি সমৰেন্দ্ৰ সিংহ বাৰো সাহিত্য পৰিষদৰ সহ সম্পাদক মদন মোহন মুখোপাধ্যায়ে। মুখ্যমন্ত্ৰীয়ে প্ৰতিনিধিদল উহানৰে ভাৰতীয় সংবিধানৰ ভিত্তিত তানুৰ দাবী বিবেচনা কৰানিৰ আশ্বাস দিলো। মহাসভাৰ এ দাবীৰে শক্তিশালী কৰানিৰকা ১৯৬১ ইংৰাজীৰ ২ জুলাই ভাষা পৰিষদৰ উদ্যোগে ভাষা দাবী দিবস পালন কৰানি অ'ইল। ঔ সময়ত পুৰি প্ৰতি বছৰ ২ জুলাই তাৰিখ উহানৰে দাবী দিবসহান হিসাবে পালন কৰানি অ'ৰ। ঔ বছৰেই ভাষা পৰিষদৰ প্ৰতিনিধিয়েউ শিলঙে আসাম সরকারৰ লগে বয়া বিষ্ণুপ্ৰিয়াৰ দাবীদাৰা নিয়া আলোচনা কৰলা এবং সরকারেউ তানুৰে তানুৰ দাবী পূৰণ কৰানিৰ আশ্বাস দিলো।

১৯৬৩ ইংৰাজীত ভাষা দাবী দিবসৰ দাবীৰ প্ৰত্যুত্তৰে আসামৰ মুখ্যমন্ত্ৰীৰ ছেক্ৰেটাৰিয়েটেত্ত পত্ৰ যোগে (Vide CMS, 18/63, dated 25.7.63) বিষ্ণুপ্ৰিয়া মণিপুৰীৰ দাবী উহান আসাম সরকারৰ শিক্ষাবিভাগৰ বিবেচনাৰকা পেঠুৱানি অ'ছে বুলিয়া জানানি অ'ইল। ভাৰত সরকারৰ ভাষিক সংখ্যালঘুৰ কমিশনাৰ D. N. Bajpai গিৰকেউ

১৯৬৩ ইংৰাজীৰ দাবী দিবসৰ দাবীৰ উত্তৰে বিষ্ণুপ্রিয়া মণিপুরীৰ দাবী এতা ভাৰত সরকারৰ বিবেচনাধীন বুলিয়া এবং এ বিষয়ে তা আসামৰ ডি.পি.আই গিৰকরাঙা লিখেছে বুলিয়া জানেইলো।

ঔ বছৰেই, অৰ্থাৎ ১৯৬৩ ইংৰাজীতেই ভাৰতৰ ভাষিক সংখ্যালঘু সম্প্ৰদায়ৰ Asstt. Commissioner গিৰকে তা শিলচৰে আহিতই উবাকা তার লগে দেহা করানিরকা বিষ্ণুপ্রিয়া মণিপুরীৰ প্রতিনিধিৰে আহান করলো আরো ঔ বছৰৰ ১১ অক্টোবৰে শিলচৰে সাহিত্য পরিষদ বারো ভাষা পরিষদে তার লগে সাক্ষাৎ করিয়া তানুর দাবীৰ যৌক্তিকতা ব্যাখ্যা করলা। Asstt. Commissioner গিৰকে বিষ্ণুপ্রিয়া মণিপুরীৰ শৌৰে মাতৃভাষালো শিক্ষাদানরকা শৌৰ অভিভাবকৰে ব্যক্তিগতভাবে সরকারৰাঙ আবেদন জানানিরকা পরামর্শ দিলো। ঔ পরামর্শ অনুযায়ী ভাষা পরিষদে হাবি অভিভাবকৰে ব্যক্তিগতভাবে সরকারৰাঙ আবেদন করানির নির্দেশ দিলো এবং যথারীতি আবেদনৌ জানানি অ'ইল, কিন্তু তথাপি সরকার নীরব থাইল।

১৯৬৪ ইংৰাজীৰ ২২ জুলাইন্ত পুরি এক সপ্তাহ ব্যাপী 'দাবী সপ্তাহ' পালন করানি অ'ইল। ঔ দাবী সপ্তাহত বিভিন্ন স্থানে জনসমাবেশ এবং মিছিল করানি অ'ইল। ঔ দাবীৰ উত্তৰে আসাম সরকারে পত্ৰৰ মাধ্যমে (CMS 162/64 dated 28th July, 64) ভাষা পরিষদৰে জানেইলো যে, বিষয় এহান রাজনৈতিক বিভাগৰ বিবেচনাধীন আছে।

১৯৬৫ ইংৰাজীত ২ জুলাইন্ত পুরি ১২ জুলাই পর্যন্ত ব্যাপকভাবে গণ আন্দোলনৰ ভিত্তিত দাবী দিবস পালন করিয়া সরকারৰাঙ চূড়ান্ত সিদ্ধান্ত জানানিরকা চূড়ান্ত আবেদনপত্ৰ দাখিল করানি অ'ইল। উতার উত্তৰে আসামৰ মুখ্যমন্ত্ৰীৰ Principal Private Secretary গিৰকে ভাষা পরিষদৰে জানেইলো যে, বিষয় এহান Political Department-এ পেঠুরানি অ'ছে। ভাৰতৰ ভাষিক সংখ্যালঘু সম্প্ৰদায়ৰ Commissioner গিৰকেউ পত্ৰযোগে (Vide 17/1/65/150, dated 12.7.65) বিষ্ণুপ্রিয়া মণিপুরী ভাষাৰে প্রাথমিক শিক্ষান্তৰে মাধ্যম হিসাবে চালু করানির বিষয়ে আসাম সরকারৰ অভিমত চেয়া চিঠি দেছে বুলিয়া জানেইলো। আসাম সরকার কিন্তু নিষ্ক্ৰিয় থাইল।

১৯৬৬ ইংৰাজীত ভাষিক সংখ্যালঘুৰ কমিশনার বাজপেয়ী গিৰকৰ আমন্ত্ৰণে সাহিত্য পরিষদ বারো ভাষা পরিষদৰ প্রতিনিধিয়ে ৬মে তারিখে শিলচৰৰ ছাৰকুইট হাউছে তার লগে দেখা করলা এবং আসাম সরকারৰ নিষ্ক্ৰিয় ভূমিকার সমালোচনা করলা। প্রতিনিধিদল উহানে গৌহাটীৰ আকাশবাণীত বিষ্ণুপ্রিয়া ভাষাকৃষ্টি প্রচারৰ দাবী করলে বাজপেয়ী গিৰকে মাতলো যে, ১৯৬১ ইংৰাজীৰ লোকগণনা মতে বিষ্ণুপ্রিয়াৰ জনসংখ্যা মাত্র ১৫২০৬ ; এসাদে কম সংখ্যক ভাষাগোষ্ঠী আহানৰে আকাশবাণীত অনুষ্ঠান প্রচারৰ সুযোগ দেনা সম্ভব নেই। এ বক্তব্যৰ উত্তৰে আমাৰ প্রতিনিধিয়ে লোকগণনাৰ তথ্য এহান ভুলহান বুলিয়া প্রতিবাদ জানেইলা। উতার পিছে ঔ কমিশনার গিৰকৰ পরামর্শলো ঔ বছৰৰ (১৯৬৬ ইং) ১৯মে ভাষা পরিষদৰ প্রতিনিধিয়ে আসাম রাজ্যিক প্রাথমিক শিক্ষা বোর্ডৰ সম্পাদকৰ লগে শিলঙে আলোচনাত বহিলা। ঔ সাক্ষাৎকারৰ ফলশ্রুতি হিসাবে প্রাথমিক শিক্ষা বোর্ডৰ ছেক্রেটারীয়ে

১৯৬৭ ইংৰাজীভূ পুৰি কাছাড় জিলাৰ ৬৫গো প্ৰাথমিক বিদ্যালয়ত বিষ্ণুপ্ৰিয়া ভাষাৰে শিক্ষাৰ মাধ্যম কৰানি অ'ইতই বুলিয়া ঘোষণা কৰলো। ঐ সময়ত ভাষিক সংখ্যালঘু সম্প্ৰদায়ৰ Asstt. কমিশনাৰ গিৰক শিলঙৰ গেণ্ট হাউছে আছিল ; তাৰ লগেউ বিষ্ণুপ্ৰিয়া প্ৰতিনিধিদলে দেখা কৰলো। উত্তাৰ পিছে ১৯৬৬ ইংৰাজীৰ ১৯ অক্টোবৰ তাৰিখে ১৯৬১ ইংৰাজীৰ লোকগণনাত বিষ্ণুপ্ৰিয়া মণিপুৰী জনসংখ্যাৰ ভুল তথ্য দেনা অ'ছে উহানৰ বিৰুদ্ধে প্ৰতিবাদ জানেয়া সংখ্যা উহান সংশোধনৰকা ভাৰতৰ প্ৰধানমন্ত্ৰী, কেন্দ্ৰীয় শিক্ষামন্ত্ৰী, ছেনছাছ কমিশনাৰ বাৰো ভাষিক সংখ্যালঘু সম্প্ৰদায়ৰ Asstt. Commissioner বাজপেয়ী গিৰকৰাঙ টেলিগ্ৰাম যোগে দাবী জানানি অ'ইল। এ দাবীৰ প্ৰত্যুত্তৰে বাজপেয়ী গিৰকে ৬৬ ইংৰাজীৰ ১৭ নৱেম্বৰ তাৰিখে মহাসভাৰে জানাইলো যে, তা দাবী উহান ছেনছাছৰ Registrar General গিৰকৰাঙ forward কৰেদেছে।

আসাম সৰকাৰে ১৯৬৭ ইংৰাজীভূ বিষ্ণুপ্ৰিয়া মণিপুৰী ভাষা প্ৰাথমিক শিক্ষান্তৰে চালু কৰানিৰ ঘোষণা কৰানি সত্ত্বেও, ঐ ঘোষণা অনুযায়ী পদক্ষেপ নানানিয়ে ১৯৬৭ ইংৰাজীৰ ভাষা দিবস ২ জুলাইভূ পুৰি ১৩ জুলাই পৰ্য্যন্ত, গণবিক্ষোভ হিসাবে পালন কৰিয়া সৰকাৰৰাঙ ভাষা চালুৰ ব্যাপাৰে চৰমপত্ৰ দেনা অ'ইল। এ গণবিক্ষোভৰ সময়ত হাজাৰ হাজাৰ আন্দোলনকাৰীৰে কাৰাবৰণ কৰেছিল।

এবেদে ১৯৬১ ইংৰাজীৰ লোকগণনাত বিষ্ণুপ্ৰিয়াৰ জনসংখ্যা সম্বন্ধে ভুলতথ্য দেনা অ'ছে উহান প্ৰমাণ কৰানিৰকা ভাষাপৰিষদে স্বপৰিচালিত লোকগণনা আহান অকৰলো। মহাসভাৰ ভাষা আন্দোলন এহানৰে আসাম সৰকাৰে বানচাল কৰে দেনাত উবা অ'ছেহান দেহিয়া ১৯৬৮ ইংৰাজীৰ ২৪শে ফেব্ৰুৱাৰী তাৰিখে পাথারকান্দিৰ ছাত্ৰ যুৱ সম্মেলন আহনাত সমবেত অ'ছিল। ছাত্ৰ-যুৱকে এ আন্দোলনে যোগ দেনাৰকা কৰ্মধাৰা আহান লেপ কৰলো এবং উদিনৰ সিদ্ধান্ত অনুযায়ী পৰবৰ্তী ২৬ ফেব্ৰুৱাৰী তাৰিখে সিদ্ধাৰীত আৰাক ছাত্ৰযুৱ সম্মেলন আহন কৰিয়া ঐ কৰ্মধাৰা উত্তাৰ বাস্তৱ ৰূপায়ণৰকা 'আন্দোলন পৰিষদ' আহন গঠন কৰলো। উত্তাৰ পিছেকাৰ দিনে অৰ্থাৎ ২৭ ফেব্ৰুৱাৰী তাৰিখে পাথারকান্দিত অনুষ্ঠিত নিখিল বিষ্ণুপ্ৰিয়া মণিপুৰী ষ্টুডেন্টছ যুনিয়নৰ সাধাৰণ সভা আহনাতৌ সৰকাৰে ভাষাৰ দাবী পূৰণ নাকৰলে ষ্টুডেন্টছ যুনিয়ন আন্দোলনে লমতই বুলিয়া সিদ্ধান্ত নেনা অ'ইল।

এবেদে ঐ ২৭ ফেব্ৰুৱাৰী তাৰিখেই ভাষা পৰিষদ বাৰো সাহিত্য পৰিষদৰ প্ৰতিনিধিবৃন্দই শিলঙে মুখ্যমন্ত্ৰী বিমলাপ্ৰসাদ চালিহাৰ অনুপস্থিতিতে আসামৰ শিক্ষামন্ত্ৰীৰ লগে আলোচনাত বহিল। ঐ আলোচনাত ভাৰত সৰকাৰৰ ১৯৬১ ইংৰাজীৰ লোকগণনাত কাছাড়ৰ বিষ্ণুপ্ৰিয়া মণিপুৰীৰ জনসংখ্যাৰ ভুল তথ্য পৰিবেশন কৰানি অ'ছে উহানৰ বিৰুদ্ধে প্ৰতিবাদ জানেয়া ভাষা পৰিষদৰ দ্বাৰা সংগৃহীত গণনাতথ্য উপস্থাপিত কৰানি অ'ইল। ঐ গণনা অনুযায়ী বিষ্ণুপ্ৰিয়াৰ জনসংখ্যা এসাদে : শিলচৰ - ১৯৭১৪, হাইলাকান্দি - ১৬৯০ এবং কৰিমগঞ্জ : ৪৫২১৯। জনসংখ্যাৰ নিজস্ব তথ্য পৰিবেশনৰ লগে আৰাক তিনহান দাবী উপস্থাপিত কৰানি অ'ইল : (১) পাঠ্যপুস্তক উপস্থাপিত কৰানিৰকা প্ৰাথমিক শিক্ষাবোৰ্ডৰ ঘোষণা, (২) সাহিত্য পৰিষদৰে সৰকাৰী অৰ্থ সাহায্য দেনা, বাৰো (৩) আকাশবাণীত

বিষ্ণুপ্রিয়া ভাষাকৃষ্টিৰ প্ৰচাৰ কৰানি। এতা হাবি দাবী সম্পৰ্কে আলোচনাৰ প্ৰসঙ্গত শিক্ষামন্ত্ৰী গিৰকে এ ভাষাৰ স্বতন্ত্ৰসত্তা বারো এ ভাষাগোষ্ঠীৰ জনসংখ্যা সম্বন্ধে প্ৰশ্ন তুলিলো। প্ৰশ্নৰ প্ৰত্যুত্তৰে প্ৰতিনিধিদলে যথাযথ তথ্য তুলিয়া ধৰানিয়ে শিক্ষামন্ত্ৰী গিৰকে সন্তুষ্ট অ'য়া তানুৰ দাবী পূৰণ কৰানিৰ আশ্বাস দিলো।

উতাৰ পিছে ওঁ ১৯৬৮ ইংৰাজীৰেই মে মাহৰ ১ তাৰিখে সিঙ্গাৰীৰ জনসভা আহানাত সমৰেন্দ্ৰ সিংহৰ সভাপতিত্বত ভাষা আন্দোলনৰ লগে আৱতাউ দাবী সংযোজিত কৰিয়া ৬ দফা দাবী খাড়া কৰানি অ'ইল। ওঁ ৬ দফা দাবী অ'ইলতাই এতা—

- ১। প্ৰাথমিক শিক্ষাস্তৰে মাতৃভাষাৰে শিক্ষাৰ মাধ্যম কৰানি।
- ২। সাহিত্য পৰিষদৰে আৰ্থিক সাহায্য দেনা।
- ৩। গৌহাটী দূৰদৰ্শনে বি.ম.ভাষাকৃষ্টিৰ অনুষ্ঠান প্ৰচাৰ কৰানি।
- ৪। বিধানসভা বারো লোকসভাত বি.ম. প্ৰতিনিধি আকেইগো নে'না।
- ৫। সৰ্বস্ত্ৰৰ বি.ম. ছাত্ৰছাত্ৰীৰে আৰ্থিক সাহায্য দেনা।
- ৬। ১৯৬১ ইংৰাজীৰ লোকগণনাত বি.ম. জনসংখ্যাৰ সংশোধন কৰানি।

এতাৰ ভিতৰে প্ৰধান দাবীহানি অ'ইল তাই ১ নং, ৩ নং বারো ৬ নং দাবী উহানি। নবগঠিত আন্দোলন পৰিষদে ছয় দফা দাবীৰ ভিত্তিত আসাম সৰকাৰৰাঙ চৰম পত্ৰ আহান দিয়া মাতলো যে, ১৯৬৮ ইংৰাজীৰ ৩০ মেৰ ভিতৰে দাবীৰ যথাযথ উত্তৰ নাপেইলে ৩১ মেৰ্ত পুৰি প্ৰতীক ধৰ্মঘট কৰানি অ'ইতই। মহাসভায়ো আন্দোলন পৰিষদৰ সমৰ্থনে সৰকাৰৰাঙ দাবী জানেইলো। এ সময়েত্ত ষ্টুডেণ্টছ যুনিয়নো আন্দোলনে যোগ দিলা।

সৰকাৰে প্ৰত্যাশিত উত্তৰ নাদানিয়ে আন্দোলন পৰিষদে ৩১ মেৰ্ত জিলাব্যাপী প্ৰতীক ধৰ্মঘট পালন কৰলো। উহানাত কয়েক হাজাৰ যুবক-নিঙোল, বয়স্ক মানুৰে 'আমাৰ দাবী দেনা লাগতই' ধ্বনি দিয়া মিছিল কৰলা।

৬৮ ইংৰাজীৰ ৯ জুন সিঙ্গাৰীৰ শ্ৰীনন্দ কিশোৰ সিংহৰ সভাপতিত্বত আন্দোলন পৰিষদৰ ছয় দফা দাবীৰ গজে বিস্তৃত আলোচনা অ'ইল এবং হাবি জনগণে উতাৰ অনুমোদন কৰলা। ২২ জুন তাৰিখেউ পাথারকান্দিত অনুষ্ঠিত কাৰ্য্যকৰী কমিটিৰ সভাত আন্দোলন পৰিষদৰ প্ৰতি হাবি জনগণে সমৰ্থন জানেইলা।

প্ৰথম দফাৰ আন্দোলনৰ পিছে আন্দোলন পৰিষদে আসাম সৰকাৰৰাঙ আৰাক চৰম পত্ৰ আহানদিয়া ৬৮ ইংৰাজীৰ ১ জুলাইত্ত দ্বিতীয় দফাৰ আন্দোলন চালানিৰ হুমকি দিলো। সৰকাৰে উতাৰ জবাব নাদানিয়ে আন্দোলন পৰিষদৰ উদ্যোগে বন্যাপীড়িত অবস্থাতো কয়েক হাজাৰ মানু শহৰে মিছিল কৰিয়া বারো বিভিন্ন ফামে সভা সমিতি কৰিয়া দাবী জানেইলা

এবং লমইতেগা ১৯৬১ ইংৰাজীৰ ছেনছাছৰ প্ৰতিকৃতি আহান দাহ কৰলা।

এ দ্বিতীয় দফাৰ আন্দোলনৰ পিছে ২৫ জুলাই, ৬৮ ইং, আসামৰ শিক্ষামন্ত্ৰী J.B. Hagzer গিৰকে চিঠিলৈ জানেইলৈ যে, বিষ্ণুপ্রিয়া মণিপুরীৰে সরকারে OBC-ৰ ভিতৰে গ্ৰহণ কৰিয়া তানুৰ ছাত্ৰছাত্ৰীৰে Scholarship দেৱ; উতাৰ গজে বি.ম. আন্দোলন পৰিষদৰ দাবী উতা সরকারে সহানুভূতিলৈ বিবেচনা কৰেৱ। উতা বুলিয়া মন্ত্ৰী গিৰকে আন্দোলন প্ৰত্যাহাৰ কৰানিৰ অনুরোধ জানেইলৈ।

এতাৰ পিছেই সরকারে কুনো পদক্ষেপ না লইলৈ আৰো মহাসভাই শান্তিপূৰ্ণ আলোচনাৰকা ২৫ আগষ্ট, ৬৮ ইং, শিলঙে গিয়া মুখ্যমন্ত্ৰী বাৰো শিক্ষামন্ত্ৰীৰাঙ স্মাৰক পত্ৰ আহান দিলৈ। মন্ত্ৰী গিৰক গাছিয়ে মহাসভাৰে আশ্বাস দিলা যে, তানুৰ দাবী উতা সরকারে Active Consideration-এ থাছে।

৩০ আগষ্ট, ৬৮ ইং, কাছাড়, হাইলাকান্দি বাৰো কৰিমগঞ্জৰ বাঙালী, হিন্দীভাষী, মেইতেই ইত্যাদি বিভিন্ন সমাজৰ নেতৃবৃন্দই বি.ম.দাবীৰ সমৰ্থনে আসাম সরকারৰাঙ স্মাৰক পত্ৰ আহান দিলা।

১৯৬৮ ইংৰাজীৰ ডিছেম্বৰ মাহাত ভাৰতৰ ভাষিক সংখ্যালঘুৰ কমিশনাৰ G.N. Dike গিৰক ভাষিক সংখ্যালঘু জনগোষ্ঠী হাবিৰ সমস্যাদি নিৰীক্ষণ কৰানিৰকা কাছাড়ে আহেছিল উবাকা ১৪ ডিছেম্বৰ শিলচৰ মহকুমা পৰিষদহলে অন্যান্য ভাষাগোষ্ঠীৰ সাদে বি.ম.-ৰ তৰফেতৌ মহাসভাই নিজৰ বক্তব্য থইলৈ। Dike গিৰকে বক্তব্য হুনাৰ পিছে শিলচৰ আবৰ্ত ভবনে বি.ম.-ৰ লগে পৃথকভাবে বৈঠক আহানৰ বাবস্থা কৰলৈ। ঔ বৈঠকে মহাসভাৰ পক্ষত দীৰ্ঘ বক্তব্য থনা অ'ইল এবং সাহিত্য পৰিষদৰ পক্ষত স্মাৰকপত্ৰ আহান দেনা অ'ইল। উতাৰ পিছে Dike গিৰকে প্ৰোগ্ৰাম কৰিয়া ১৫ ডিছেম্বৰ সিদ্ধাৰীৰ জনসভা আহানাত যোগ দিলৈ। ঔ সভাত শিলচৰৰ বিভিন্ন ৰাজনৈতিক এবং সামাজিক নেতাউ উপস্থিত আছিল। ঔ সভাত ভাষা পৰিষদৰ পক্ষতৌ স্মাৰক পত্ৰ আহান দেনা অ'ইল। Dike গিৰকে মাতলৈ যে, এ ভাষালঘু সম্প্ৰদায়ৰ স্বাৰ্থক্ষাৰকা তা যথাযথ আধিকাৰিকৰাঙ তাৰ প্ৰতিবেদন দাখিল কৰতই। উতাৰ পিছে Dike গিৰকে বিক্ৰমপুৰ, নৱসিংপুৰ, ঝাপিৰবন্দ, কৰিমগঞ্জ, দুৰ্লভছড়া, পাথারকান্দি-এ অঞ্চল এতা পৰিভ্ৰমণ কৰলৈ। হাবি অঞ্চলেতৌ তাৰাঙ স্মাৰকপত্ৰ দেনা অ'ইল। এ ভ্ৰমণকালে পাথারকান্দি দত ১৯৬১ ইংৰাজীৰ লোকগণনাত এ অঞ্চলে আকগৈ মাত্ৰ বি.ম. বুলিয়া দেহানি অ'ছে উহানৰ বিৰুদ্ধে প্ৰতিবাদ জানানি অ'ইল। উত্তৰে Dike গিৰকে মাতলৈ যে, ঔ লোকগণনা যে ভুল উহানাত তা সম্পূৰ্ণ বিশ্বস্ত।

২৩ ডিছেম্বৰ শিলচৰেঙ Dike গিৰকে মিষ্টিভোজ আহান দেনা অ'ইল। উদিন Dike গিৰকে মাতলৈ যে, এ সংখ্যালঘু জাত এহানৰকা তা যথাসাধ্য সাহায্য কৰতই।

১৯৬৯ ইংৰাজীৰ ২৩-২৫ জানুৱাৰী তিনোখালে অনুষ্ঠিত মহাসভাত সরকারৰ সমালোচনা কৰিয়া ঠিক কৰানি অ'ইল যে, গণশোভাযাত্ৰাৰ মাধ্যমে কাছাড় বাৰো ত্ৰিপুৱাৰ

হাবি ডেপুটি কমিশনার বারো সাব-ডিভিশনেল অফিসাররাও Memorandum দেনা অ'ইতই— ৩১শে মার্চ ১৯৬৯ ইংরাজীর ভিতরে দিয়ো রাজ্যর মুখ্যমন্ত্রীরাও উতা ফৌকরে দেনারকা।

ইতিমধ্যে Dike গিরকর ১০ জানুয়ারী, ১৯৬৯ তারিখে লিখা চিঠি আহান সাহিত্য পরষদে পেইলা— যেহানাত তা মাতেছে যে, বিষ্ণুপ্রিয়া মণিপুরীর দাবী সম্পর্কে তা রাজা সরকাররাও তার বক্তব্য পেশ করেছে। Dike গিরকর আশ্বাস পানাই তার প্রতি সম্মান প্রদর্শনরকা গণ শোভাযাত্রা জুনর ২০ তারিখ পর্যন্ত স্থগিত থনা অ'ইল।

২৯ তারিখ মে, ১৯৬৯ ইংরাজীত সিঙ্গরীত মহাসভার কার্য্যকরী কমিটির বৈঠক আহানাত ভাষা ব্যাপারে সরকারর উদাসীনতার তীব্র সমালোচনা করিয়া প্রস্তাব নেনা অ'ইল। উতার প্রতিলিপি ত্রিপুরা বারো আসামর মুখ্যমন্ত্রীরাও, বারো অন্যান্য সংশ্লিষ্ট অধিকারিকরাও দেনার সিদ্ধান্ত নেনা অ'ইল। এ প্রস্তাবে মাতানি অ'ইল যে, প্রস্তাবিত গণ শোভাযাত্রা ২০ জুন ১৯৬৯ ইংরাজীত অনুষ্ঠিত অ'ইতই। উদিন কাছাড়-ত্রিপুরার হাবি D.C., S.D.O.-রাও Memorandum দেনা অ'ইতই। এ প্রস্তাবর প্রতিলিপি পাঠরানি অ'ইলতা ৯ জুন, ১৯৬৯ ইংরাজীত।

১৬ই জুন, ১৯৬৯ ইংরাজীত, হাবি বারাদে হাবি জাত বারো রাজনৈতিক নেতারাও পত্র বিলি করানি অ'ইল— ২০ জুনর শোভাযাত্রাত সহযোগিতা বিছারেয়া।

২০ জুন, ১৯৬৯ ইংরাজীর বিশেষ দিন আহান। উদিন কাছাড়-ত্রিপুরার বিষ্ণুপ্রিয়া অঞ্চল উত্তাল। হাজার হাজার নরনারী-নিঙোল-যুবক শোভাযাত্রাত সামিল অয়া নিজ নিজ অঞ্চলে D.C., S.D.O., S.D.C.-রাও মেমোরেণ্ডাম দিলা-আসাম-ত্রিপুরার C.M.-রাও পাঠরাদেনারকা। কেন্দ্রীয় কমিটিও সোজাসুজিও মেমোরেণ্ডাম দেনা অ'ইল— C.M., Education Minister, Registrar General, Census, Commissioner for Linguistic Minorities ইত্যাদিরাও।

এ মেমোরেণ্ডামে আগর ছয় দফা দাবীর লগে আরাক দফা আহান লাগেয়া ৭ দফা দাবী জানানি অ'ইল। এ নুরা দাবী এহান অ'ইলতাই রাজ্যিক, স্থানীয় সরকার এবং কেন্দ্রীয় সরকারর চাকরীত বিষ্ণুপ্রিয়া মণিপুরীর Special Quota থনা।

২২ সেপ্টেম্বর, ১৯৬৯ ইংরাজীত ইন্দিরা গান্ধী আগরতলাত আহেছিলি উপেই মহাসভাত ডেপুটেশন আহান দেনা অ'ইল। গিথানকে এ ব্যাপারে এহান Home Ministry-ত দিয়া এহানর যথোপযুক্ত বিধান করানির নির্দেশ দিতই বুলিয়া মাতলো।

২৯ সেপ্টেম্বর Assistant Commissioner for Linguistic Minorities, D. N. Bajpai, গিরকে চিঠি আহানলো মহাসভারে মাতলো যে ১৪ জুন ১৯৬৯ ইংরাজীর ডেপুটেশনর জবাবে Ministry of Information & Broadcasting-এও মাতানি আছে যে, গৌহাটী বেতার কেন্দ্রত বিষ্ণুপ্রিয়া মণিপুরী অনুষ্ঠান আগেতই চলিয়া আছে, উহানর

বৃদ্ধি করানি সম্ভব নেই। প্রাথমিক শিক্ষাত ভাষা চালু সম্পর্কে মাতলো যে, উহান আসাম সরকারর Active Consideration-এ আছে।

ইতিমধ্যে আন্দোলন পরিষদে ৩য় স্তরের আন্দোলনর প্রস্তুতি নিলোগা— ১৭ অক্টোবর ১৯৬৯ ইংরাজীত। মহাসভাই আন্দোলন পরিষদরে তৃতীয় স্তরের আন্দোলন স্থগিত থনারকা অনুরোধ করলো। ২১শে অক্টোবর ১৯৬৯ ইংরাজীত সিদ্ধারীত অনুষ্ঠিত ভাষা পরিষদর emergent meeting- এউ D. N. Bajpai-র ২৯ সেপ্টেম্বর তারিখর চিঠির উল্লেখ করিয়া ৩য় স্তরের আন্দোলন পিছুরানিরকা অনুরোধ করলো। কিন্তু আন্দোলন পরিষদর ২২শে অক্টোবর ১৯৬৯ ইংরেজীর মিটিঙে ও অনুরোধ নাকরিয়া ৩য় স্তরের আন্দোলনর সিদ্ধান্ত নিলোগা।

তৃতীয় স্তরের আন্দোলনে মহাসভার প্রতিবাদ সত্ত্বেউ ১৫-২২ অক্টোবর, ১৯৬৯ ইংরাজীত, রক্তস্বাক্ষর অভিযান করানি অ'ইল। উবাকান্ত পুরি আন্দোলন পরিষদর লগে মহাসভার মতভেদ আহান দেহা দিলো। ২৩ অক্টোবরেও ৩১শে অক্টোবর পেয়া বিভিন্ন স্থানে পিকেটিং করানি অ'ইল এবং অঞ্চলে অঞ্চলে মিছিল করানি অ'ইল। উতারে দমন করানিরকা পুলিশে অসংখ্য যুবক নিঙোলরে জেলে বরেইলা বা অনেক দূরেই ফামে নিয়া এরা দিলাগা। উতার পিছে ১-৫ নবেম্বর তিন জেলার ডি.ছি. অফিসে চেয়ার দখল করিয়া পিকেটিং অ'ইল। এ আন্দোলনর ফলে সমাজে যে উত্তাল তরঙ্গ আগোর সৃষ্টি অ'ইল, উহান উল্লেখ করিয়া মহাসভার সভাপতিয়ে ৫ নবেম্বর, ১৯৬৯ ইংরাজীত প্রধানমন্ত্রী, কেন্দ্রীয় শিক্ষা মন্ত্রী, আসাম বারো ত্রিপুরার মুখ্যমন্ত্রীরাও বিষ্ণুপ্রিয়ার দাবী পূরণরকা memorandum আহান দিলো। এ মেমোরেণ্ডামর copy সংশ্লিষ্ট হাবি আধিকারিকরাও পেঠরানি অ'ইল।

এ আন্দোলনে কাছাড়র শাসনযন্ত্র প্রায় অকেজো অ'য়া পড়িল। উবাকা কাছাড়র ডি.ছিয়ে আন্দোলনকারীরে বৈঠক আহানাত ডাকলো এবং আন্দোলন তুলানিরকা অনুরোধ করলো। ৭ নবেম্বর ১৯৬৯ ইংরাজীত শিলচরে আহেছিল D.P.I.-র মুঙে ডি.ছি.-র লগে আন্দোলনকারীর আলোচনা অ'ইল এবং D.C.-এ শিক্ষামন্ত্রী Hagjer অর লগে telephone-এ আলোচনা করিয়া সমস্যা এহান সমাধানরকা অনুরোধ করলো। শিক্ষামন্ত্রীর পরামর্শ অনুযায়ী ৮ নবেম্বর ১৯৬৯ ইংরাজীত তার লগে আলোচনারকা জাতর নেতৃবৃন্দ শিলঙে রওনা দিলা। কিন্তু শিক্ষামন্ত্রীয়ে কুনো আশ্বাস নাদানিয়ে আন্দোলনকারী নিরাশ অ'য়া ফিরলা এবং পুনরায় আন্দোলন অ'করলা। D.C.-এ ১৪৪ ধারা সারা কাছাড়ে প্রয়োগ করলো কিন্তু অসংখ্য যুবক নিঙোল ১৪৪ ধারা লঙ্ঘন করিয়া arrest বরণ করলা। ২৩ নবেম্বর, ১৯৬৯ ইংরাজীত জনসভার মাধ্যমে এ আন্দোলনর সমাপ্তি অ'ইল।

মহাসভার সাধারণ সম্পাদকে Census অর Registrar General-এও ১৯৭১ ইংরাজীর সেনসাসে বিষ্ণুপ্রিয়া মণিপুরীর যথাযথ গণনারকা অনুরোধ করলো।

৩০ নবেম্বর, ১৯৬৯ ইংরাজীত, জরুরী সভা আহান ডাহিয়া ভাষা আন্দোলনর কর্মধারা নির্ণয় করানিরকা আলোচনা করলা। মহাসভাই সরকাররে জানেইলো যে, অতি

সত্ৰৰ বিষ্ণুপ্ৰিয়া মণিপুৰীৰ দাবী পূৰণ নাকৰলে মহাসভাই প্ৰতীক গণঅনশন ধৰ্মঘট কৰতই- ৮ জানুৱাৰী ১৯৭০ ইংৰাজীত-কাছাড় বাৰো ত্ৰিপুৱাত। ঔ প্ৰস্তাবৰ copy প্ৰধানমন্ত্ৰী, গৃহমন্ত্ৰী, আসাম-ত্ৰিপুৱাৰ মুখ্যমন্ত্ৰী, Linguistic Ministry-ৰ Commissioner-বাৰো কাছাড়ৰ D.C.ৰাঙ দেনা অ'ইল।

৮ জানুৱাৰী, ১৯৭০ ইংৰাজীৰ গণ অনশনৰ ব্যাপাৰে কিন্তু মহাসভাৰ সাধাৰণ অধিবেশনৰ সিদ্ধান্ত নানাই উহান মহাসভাৰ অধিবেশনৰ সিদ্ধান্তৰ অপেক্ষাত স্থগিত কৰানি অ'ইল। ২২-২৪ জানুৱাৰী, ১৯৭০ ইংৰাজীত, বেতুবাৰীৰ মহাসভাত সিদ্ধান্ত অ'ইল যে, ১৩ মাৰ্চ, ১৯৭০ ইংৰাজীত গণ অনশন কৰানি অক। কিন্তু ইতিমধ্যে Deputy Commissioner for Linguistic Minorities, L. B. Thanga গিৱক ১৯ মাৰ্চ ১৯৭০ ইংৰাজীত কাছাড়ে আহেৰ বুলিয়া চিঠি পানাই ঔ অনশন আন্দোলন পিছুৱানি অ'ইল। তবে ১৯ মাৰ্চেই গণসভা আহানৰ বন্দোবস্ত কৰানি অ'ইল। ঔ সভাত অন্যান্য সমাজৰ অনেকেই বিষ্ণুপ্ৰিয়া মণিপুৰীৰ দাবী সমৰ্থন কৰলা। উতাৰ পিছে ঔ জনগণৰ তৰফে Thanga গিৱকৰাঙ Memorandum দেনা অ'ইল -কৰিমগঞ্জ বাৰো শিলচৰে।

উতাৰ পিছে ৫ এপ্ৰিল, ১৯৭০ ইংৰাজীত মহাসভাৰ সাধাৰণ সভাত সৰ্বসন্মতিক্ৰমে ২৯ এপ্ৰিল, ১৯৭০ ইংৰাজীত গণ অনশন কৰানিৰ প্ৰস্তাব নেনা অ'ইল।

২৯ এপ্ৰিল, ১৯৭০ ইংৰাজীত, বিয়ান ১০ টাত ৩০ এপ্ৰিল বিয়ান ১০ টা পেয়া আসাম বাৰো ত্ৰিপুৱাত অনশন কৰানি অ'ইল। শিলঙেউ কতোগোই বিধান সভাৰ মুঙে অনশন কৰেছিল। ২৯ তাৰিখে শিলঙ বিধানসভাত এ বিষয়ে বিশ্বনাথ উপাধ্যায়ে Calling Attention Motion আহান আনলো উহান অনেক M.L.A.-ই সমৰ্থন কৰলা। শিক্ষামন্ত্ৰী হাগজাৱৰ আশ্বাসে শিলঙৰ অনশনকাৰীয়ে অনশন বাগলা।

এবেদে মহাসভাই বি.ম. ভাষাভাষীৰ সঠিক সংখ্যা নিৰ্ণয় কৰানিৰকা ভাৰত সৰকাৰ বাৰো লোকগণনা বিভাগৰাঙ লোক গণনাৰ সময়ত 'বিষ্ণুপ্ৰিয়া' শব্দৰ লগে 'মণিপুৰী' শব্দ লাগানিৰকা ক্ৰমাগত আবেদন জানেয়া আহেৰ। ভাষিক সংখ্যালঘুৰ কমিশনাৰ গিৱকৰাঙো এ বিষয়ে সৰকাৰ বাৰো লোকগণনা বিভাগৰাঙ এ দাবীৰ অনুকূলে প্ৰতিবেদন দেনাৰকা অনুরোধ জানানি অ'ইল। কিন্তু লোকগণনা বিভাগে ১৯৭১ ইংৰাজীৰ লোকগণনাতো Code Structure হান 'বিষ্ণুপ্ৰিয়া মণিপুৰী' বুলিয়া নাদলা এবং লোকগণনাত যেতাই 'বিষ্ণুপ্ৰিয়া মণিপুৰী' বুলিয়া পৰিচয় দিলা, উতাৰেউ Manipuri/Meitei-ৰ ভিতৰে গণ্য কৰলা।

এ পৰিস্থিতিত ১৯৭১ ইংৰাজীৰ লোক গণনাত বিষ্ণুপ্ৰিয়াৰ মাতৃভাষাৰ নাঙহান 'বিষ্ণুপ্ৰিয়া মণিপুৰী' দেনা, না হুন্দা 'বিষ্ণুপ্ৰিয়া' দেনা, এ সম্বন্ধে মতভেদ হো দিলো। এ ব্যাপাৰে আলোচনাৰকা ত্ৰিপুৱাৰ নাকফুল কলোনি ১৯৭০ ইংৰাজীৰ ৬-৮ জানুৱাৰীত মহাসভাৰ অধিবেশন আহান ডাহানি অ'ইল, কিন্তু এ ব্যাপাৰে কোনো সিদ্ধান্ত নাইল। ১৯৭২ ইংৰাজীৰ জুন মাহাত কাছাড়ৰ ভকতপুৰে আৰাক অধিবেশন আহানৰ আয়োজন কৰানি অ'ইল, উহানাত 'বিষ্ণুপ্ৰিয়া মণিপুৰী' - নাঙৰ সপক্ষে সিদ্ধান্ত অ'ইল এবং ভাষাহানৰ স্বীকৃতি

‘বিষ্ণুপ্রিয়া মণিপুরী’ নাঙেই দেনা লাগতই বুলিয়া দাবী জানানি অ’ইল।

মহাসভাই প্রাথমিক শিক্ষাস্তরে বিষ্ণুপ্রিয়া মণিপুরী ভাষাৰ চালু কৰানিৰ দাবীৰ লগে বেতাৰ কেন্দ্ৰত বি.ম. কাৰ্য্যক্রমৰ অন্তৰ্ভুক্তিকৰকাউ দাবী কৰে আহেৰ। ঔ দাবীৰ উত্তৰে ভাৰত সরকারৰ Ministry of Information and Broadcasting বিভাগেত্ত পত্ৰযোগে (১৯.৬.৭৫) নিৰ্দেশ জানানি অ’ইল যে, শিলচৰ বেতাৰকেন্দ্ৰত মণিপুরীৰকা ৪৫ মিনিটৰ কাৰ্য্যক্রম অনুমোদিত অ’ইল ; উতাৰ ভিতৰে মেইতেইৰকা ৩০ মিনিট এবং বিষ্ণুপ্ৰিয়াৰকা ১৫ মিনিট। কিন্তু ঔ নিৰ্দেশে মেইতেইৰে ‘মণিপুরী’ বারো বিষ্ণুপ্ৰিয়াৰে হুদা ‘বিষ্ণুপ্ৰিয়া’ বুলিয়া উল্লেখ কৰানিয়ে মহাসভাই আপত্তি জানেয়া ঔ কাৰ্য্যক্রম গ্ৰহণ না কৰলো। এ বিষয়ে মহাসভাই ভাৰত সরকারৰাঙ প্ৰতিবাদ জানেইলো আরো সংশ্লিষ্ট মন্ত্ৰী I. K. Gujral-এ জানেইলো যে, মণিপুর বিধান সভাৰ অধ্যক্ষ চন্দ্ৰমণি সিং বারো তোম্বি সিঙে ‘বিষ্ণুপ্ৰিয়া’ শব্দৰ লগে ‘মণিপুরী’ শব্দ লাগানিত আপত্তি জানানিয়ে ‘বিষ্ণুপ্ৰিয়া’ শব্দৰ লগে ‘মণিপুরী’-শব্দ দেনা না’ছেতা। ১৯৭৭ ইংৰাজীতৌ আসাম সরকারে বৰাক উপত্যকাৰ ২৫ গো প্রাথমিক বিদ্যালয়ত বি.ম. ভাষালো শিক্ষা দেনাৰ অনুমতি দিলো (২৯.১.১৯৭৭), কিন্তু নাঙহানৰ লগে ‘মণিপুরী’-শব্দ নাদানিয়ে মহাসভাই উহান গ্ৰহণ নাকৰলো।

মহাসভা বারো আন্দোলন পৰিষদে মাতৃভাষাৰে ‘বিষ্ণুপ্ৰিয়া মণিপুরী’ হিসাবে স্বীকৃতি দেনাৰকা ১৯৭৬ ইংৰাজীত ধৰ্ণা, মিছিল, অনশন ধৰ্মঘট ইত্যাদিৰ মাধ্যমে আন্দোলন চালেয়া গেলাগা। ঔ বছৰ ২৮ নৱেম্বৰ তৎকালীন ৰাষ্ট্ৰপতি ফকৰ উদ্দিন আলি আহমেদ শিলচৰে আহেছিল উৰাকা মহাসভাৰ সভাপতি নন্দকিশোৰ সিংহৰ নেতৃত্বত তাৰাঙ ডেপুটেশন আহানৌ দেনা অ’ইল, কিন্তু তথাপি বেতাৰকেন্দ্ৰত ‘বিষ্ণুপ্ৰিয়া মণিপুরী’ নাঙে কাৰ্য্যক্রম চালু না’ইল ; প্রাথমিক শিক্ষাতৌ ‘বিষ্ণুপ্ৰিয়া মণিপুরী’ নাঙে ভাষা চালু নাইল। উহানে মহাসভা বারো আন্দোলন পৰিষদ- এ দ্বিযো সংস্থায়ৌ নিৰ্দেশ উহানি গ্ৰহণ নাকৰলা।

১৯৭৭ ইংৰাজীত জনতা সরকার আহিল আরো নৱসিংপুৰৰ মহাসভা-সম্মেলনৰ সিদ্ধান্ত অনুযায়ী সভাপতি নন্দকিশোৰ সিংহ বারো মণিকান্ত সিংহৰ নেতৃত্বত আসামৰ শিক্ষা মন্ত্ৰী লক্ষ্যধৰ চৌধুৰী বারো ৰাজ্যপাল L. P. Singh-অৰাঙ ১৯৭৮ ইংৰাজীৰ নৱেম্বৰ মাহাত ডেপুটেশন আহান দেনা অ’ইল। এ ডেপুটেশনৰে কেন্দ্ৰ কৰিয়া মহাসভাৰ বিভাজন আহান আৰম্ভ অ’ইল; গোপী মুখাৰ্জি, মনোৱঞ্জন সিংহ ইত্যাদি মহাসভাৰ দল আহানে অংশ গ্ৰহণ নাকৰলা।

যেতাউ অ’ক, মহাসভাই ভাষিক সংখ্যালঘু সম্প্ৰদায়ৰ কমিশনাৰ গিৰকৰাঙ এ ভাষাৰে ‘বিষ্ণুপ্ৰিয়া মণিপুরী’ নাঙে স্বীকৃতি দেনাৰ ব্যাপাৰে আসাম বারো ভাৰত সরকারৰে প্ৰতিবেদিত কৰানিৰকা আবেদন জানেইলো, এবং কমিশনাৰ গিৰকেউ যথারী আবেদন উহান ৱিকেনেঙ কৰিয়া পেঠুৱেইলো। এসাদে বিভিন্ন প্ৰচেষ্টাৰ ফলে ভাৰত সরকারৰ লোকগণনা বিভাগে ভাষা এহানৰে ‘বিষ্ণুপ্ৰিয়া মণিপুরী’ বুলিয়া স্বীকৃতি দিলো এবং ৱেজিষ্টাৰ জেনাৰেল গিৰকেউ ১৯৮১ ইংৰাজীৰ লোকগণনাত ‘বিষ্ণুপ্ৰিয়া মণিপুরী’ ভাষাৰে পৃথক ভাষা আহান বুলিয়া এ নাঙে Code Structure দেনাৰ সিদ্ধান্ত দিলো।

উত্তৰ পিছে ১৯৮৩ ইংৰাজীত আসাম সৰকাৰে ভাষা এহানৰে 'বিষ্ণুপ্ৰিয়া মণিপুৰী' নাঙে কাছাড় জিলাত শিক্ষাৰ প্ৰাথমিক স্তৰে চালু কৰানিৰ ঘোষণা কৰলো (১৪-১১-১৯৮৩ ইং), কিন্তু অল্লদিন পিছে ওঁ নিৰ্দেশ উহান স্থগিত কৰানি অ'ইল— খুব সম্ভৱতঃ মেইতেই বেইবুনিৰ চাপে।

এ পৰিস্থিতিত ১৯৮৪ ইংৰাজীত মহাসভাৰ ভিতৰে মতভেদ দেহা দেনাই বি.ম. সাহিত্য সভাৰ সৃষ্টি অ'ইল। সাহিত্য সভাই নুৱা কৰে আসাম সৰকাৰৰ লগে যোগাযোগ কৰিয়া পূৰ্বোক্ত স্থগিতাদেশ উহান উঠেয়া বি.ম. ভাষাৰে প্ৰাথমিক স্তৰে চালু কৰানিৰ চেষ্টা অ'কৰলো। মহাসভা বাৰো সাহিত্যসভাৰ প্ৰচেষ্টায় আসাম সৰকাৰে ১৯৮৯ ইংৰাজীত (২১.৭.৮৯) পূৰ্বোক্ত স্থগিতাদেশ উহান তুললো। কিন্তু মেইতেই বেইবুনি এবং মণিপুৰ সৰকাৰৰ প্ৰতিবাদে অসম সৰকাৰে পুনৰায় বি.ম. ভাষা চালু কৰানিৰ আদেশ উহান স্থগিত কৰিয়া থইলো (৯-১১-৮৯)।

ইতিমধ্যে ১৯৮২ ইংৰাজীত বি.ম. স্টুডেণ্টছ যুনিয়ন ভাষা-আন্দোলনৰ ব্যাপাৰে সক্ৰিয় অ'য়া উঠিল, তবে পইলাদে তা আন্দোলনৰ নেতৃত্ব দেনা নুৱাৰেছে। ১৯৮৫ ইংৰাজীৰ ২ জুলাই স্টুডেণ্টছ যুনিয়নে দাবী দিবস পালন কৰলো এবং ১৯৮৯ ইংৰাজীৰ ৬ ফেব্ৰুৱাৰী পইলাকাৰকা ১৫ ঘণ্টাৰ ৰেল-অবৰোধ আন্দোলন কৰলো।

১৯৯২ ইংৰাজীৰ জানুৱাৰী মাহত ৰাজনগৰৰ অধিবেশনে ছাত্ৰৰ নুৱা কমিটি আহান হুঙ্কৰানি অ'ইল। ওঁ কমিটিৰ সভাপতিগো অনিল ৰাজকুমাৰ বাৰো সম্পাদকগো সূৰচন্দ্ৰ সিংহ। এ কমিটিয়ে নুৱা উদ্যমলো ভাষা আন্দোলন কৰানি অ'কৰলো এবং ক্ৰমে এ আন্দোলনৰ নেতৃত্ব দেনা অ'কৰলো। ছাত্ৰ সংস্থাৰ আন্দোলনৰ সংক্ষিপ্ত বিৱৰণহানি এহানি—

১। ১৯৯২ ইংৰাজীৰ আগষ্ট মাহত বৰাক উপত্যকাৰ তিনিও জিলাৰ DI অফিছে ২৪ ঘণ্টাৰ অনশন ধৰ্মঘট কৰলো।

২। ১৯৯২ ইংৰাজীৰ ২১ ছেপ্টেম্বৰ সৰকাৰৰাঙ 'চৰম পত্ৰ' আহান দিয়া ১৫ দিনৰ ভিতৰে ভাষা চালুৰ সিদ্ধান্ত জানানিৰকা দাবী কৰলো।

৩। চৰম পত্ৰ দেনাৰ পিছেউ সৰকাৰ চুপ থানাই বৃহত্তৰ আন্দোলনৰ পদক্ষেপ নেনা অ'ইল। ১৯৯২ ইংৰাজীৰ ২১ অক্টোবৰ বিয়ান ৬ বাজিত বৰাক উপত্যকাৰ বিভিন্ন কেন্দ্ৰস্থলে ২৪ ঘণ্টাৰকা জাতীয় সড়ক অবৰোধ কৰানি অ'ইল।

৪। ১৯৯২ ইংৰাজীৰ ১ নৱেম্বৰ কালিঞ্জৰে মহাসভা, সাহিত্যসভা, সমাজ সংস্থা বাৰো ছাত্ৰ সংস্থাৰ অভিবৰ্তন (convention) আহান ডাহানি অ'ইল। উহানাত ছাত্ৰ সংস্থাৰ আন্দোলনৰে হাবিয়ে সমৰ্থন জানেইলা।

৫। ছাত্ৰ আন্দোলনৰ পৰিপ্ৰেক্ষিতে তৎকালীন আসামৰ মুখ্যমন্ত্ৰী হিতেশ্বৰ শইকিয়াই

৩ ডিছেম্বৰ গৌহাটীত বৈঠক আহান ডাহেছিল। উবাকা আন্দোলন স্থগিত কৰিয়া ছাত্ৰ সংস্থাই বৈঠকে যোগ দিছিল। বি.ম. ভাষা চালুৰ ব্যাপাৰে হাবি দিক বিবেচনাৰকা উদিন মুখ্যমন্ত্ৰী গিৰকে ২ মাস সময় চেইলো।

৬। ১৯৯২ ইংৰাজীৰ ২৭ ছেপ্টেম্বৰ ছাত্ৰ সংস্থাৰ উদ্যোগে 'বি.ম. গণসংগ্ৰাম পৰিষৎ' আগো গঠন কৰানি অ'ইল। ঔ পৰিষদৰ চেয়াৰমেনগো অ'ইলতা ৰবিশঙ্কৰ সিংহ, বারো সম্পাদকগো অ'ইলতা কুলচন্দ্ৰ সিংহ।

৭। ১৯৯২ ইংৰাজীৰ ৩ ডিছেম্বৰৰ মুখ্যমন্ত্ৰীৰ বৈঠকৰ সিদ্ধান্ত অনুসারে সৰকাৰে কাম নাকৰানিয়ে ১৯৯৩ ইংৰাজীৰ ৮ ফেব্ৰুৱাৰী বিয়ান ৬ বাজিত ৪৮ ঘণ্টাৰকা সড়ক অবৰোধ কৰানি অ'ইল।

৮। আসাম বিধানসভা চলানিৰ সময়ত বিধায়ক হাবিৰ দৃষ্টি আকৰ্ষণ কৰানিৰকা ১৯৯৩ ইংৰাজীৰ ২২ মাৰ্চেত দিশপুৰে ৩৬ ঘণ্টাৰ অনশন ধৰ্মঘট পালন কৰানি অ'ইল।

৯। ১৯৯৩ ইংৰাজীৰ ২৭ এপ্ৰিল বিয়ান ৬ বাজিত বুরুঙ্গা, কাটাখাল বারো পাথারকান্দি ১০১ ঘণ্টাৰ ৰেল-অবৰোধ আন্দোলন কৰানি অ'ইল। এ আন্দোলনে অনেক সত্যাগ্ৰহী গ্ৰেফতাৰ অ'ছিল।

১০। ১৯৯৩ ইংৰাজীৰ ১০মে কাছাড়, কৰিমগঞ্জ বারো হাইলাকান্দিৰ DI অফিসে ১২ ঘণ্টাৰকা অনশন ধৰ্মঘট কৰানি অ'ইল।

১১। ১৯৯৩ ইংৰাজীৰ ২০ ডিছেম্বৰেত বৰাক উপত্যকাৰ বিভিন্ন ফামে ৭২ ঘণ্টাৰ সড়ক অবৰোধ আন্দোলন অ'ইল।

১২। ১৯৯৪ ইংৰাজীৰ ২১ জুনেত ১০১ ঘণ্টাৰ সড়ক অবৰোধৰ ডাক দেনা অ'ইল। উবাকা আসামৰ মুখ্যমন্ত্ৰীয়ে আন্দোলন বন্ধ কৰানিৰ অনুরোধ কৰিয়া ১৭ জুলাই দিশপুৰে বৈঠক আহানাত ডাকলো। ছাত্ৰ সংস্থাই আন্দোলন স্থগিত থয়া বৈঠকে যোগ দিলোগা।

১৩। উক্ত বৈঠকে আসাম সৰকাৰে ত্ৰিপুৰা ৰাজ্যত বি.ম. ভাষা চালুৰ ব্যাপাৰে তথ্যপাতি চেইলো আরো ছাত্ৰ সংস্থাই উতা যথারীতি সমজেইলো। উতাৰ পিছেউ সৰকাৰে কুনো সিদ্ধান্ত নানানিয়ে ১৯৯৫ ইংৰাজীৰ ২৭ জানুয়াৰীত ১০১ ঘণ্টাৰ সড়ক অবৰোধৰ ডান দেনা অ'ইল। উবাকা সৰকাৰে বারো ৭.৩.৯৫ ইংৰাজীত বৈঠকৰকা ছাত্ৰ সংস্থারে আহান কৰলো। ছাত্ৰ সংস্থাই এ বৈঠকেউ যোগ দিলো। ঔ বৈঠকে সিদ্ধান্ত নেনা অ'ইল যে, বি.ম. ভাষা চালুৰ ব্যাপাৰে সমাধানসূত্ৰ নিকালানিৰকা দিল্লীত ত্ৰিপাক্ষিক বৈঠক আহানৰ দৰকাৰ। উতাৰ গজে OBC-ত বি.ম.ৰেউ অন্তৰ্ভুক্ত কৰানিৰকা Assam Backward Classes Commission-এ প্ৰয়োজনীয় তথ্যপাতি দাখিল কৰানি অ'ক বুলিয়া সিদ্ধান্ত নেনা অ'ইল।

১৪। পূৰ্বোক্ত বৈঠকৰ সিদ্ধান্ত অনুযায়ী সময়মতো ত্ৰিপাক্ষিক বৈঠক না ডাহানিয়ে

ছাত্র সংস্থাই ২০১ ঘণ্টার রেল বারো সড়ক অবরোধর ডাক দিলো। উবাকা দিল্লীর স্বরাষ্ট্র দপ্তরেও প্রস্তাবিত বৈঠক উহান অক্টোবরে ডাহানি অ'ইতই বুলিয়া জানানিয়ে আন্দোলনহান স্থগিত থনা অ'ইল।

১৫। অক্টোবর মাহাত ত্রিপাক্ষিক বৈঠক না ডাহানিয়ে ১৯৯৫ ইংরাজীর ২১ নবেম্বরত বুরুঙ্গা বারো পাথারকান্দিত ৩০১ ঘণ্টার রেল অবরোধ আন্দোলন অ'ইল।

১৬। নবেম্বরর (১৯৯৫) ২৬ তারিখ দিল্লীত খবর আহিল যে, ত্রিপাক্ষিক বৈঠক উহান ২৮ নবেম্বর সেন্কা ৫ বাজিত অ'ইতই-দিল্লীত। ও বৈঠকে যোগ দেনারকা ছাত্র-সংস্থার সভাপতি অনিল রাজকুমার, গণ সংগ্রাম পরিষদর রবিশঙ্কর সিংহ এবং নির্মল সিংহ, সুরচন্দ্র সিংহ, গোপীদাস সিংহ— এ গিরকগাছি দিল্লীত গেছিলাগা। বৈঠকহান স্বরাষ্ট্র দপ্তরে অ'ইল। ও বৈঠকে সিদ্ধান্ত অ'ইল যে, কেন্দ্র সরকারে বি.ম. ভাষা চালুর ব্যাপারে বিভিন্ন দিক আলোচনা করিয়া ৩ মাসর ভিতরে রাজ্য সরকাররাও স্পষ্টীকরণ দিতই।

১৭। ত্রিপাক্ষিক বৈঠকর পিছেউ যেবাকা সরকারে বি.ম. ভাষার ব্যাপারে কোনো সঠিক সিদ্ধান্ত নানলোগা, উবাকা ১৯৯৬ ইংরাজী ১৬ মার্চেত অ'করিয়া ৫০১ ঘণ্টার রেল-অবরোধ-আন্দোলনর ডাক দেনা অ'ইল। ও পরিপ্রেক্ষিতে ১৫ মার্চ অনিলকৃষ্ণ রাজকুমার, সুরচন্দ্র সিংহ, রবিশঙ্কর সিংহ বারো সমীর সিংহ, সুবল সিংহ বারো বিজয় কুমার সিংহরে পুলিশে গ্রেফতার করিয়া কারাগারে থইলা। ১৬ মার্চ বুরুঙ্গা বারো কলকলিঘাটে রেল অবরোধ করানি অ'ইল। উদিন দিনে প্রায় ১টার সময়ত কলকলিঘাটে সত্যাগ্রহীরে সেচানি নুরারিয়া পুলিশে গুলি চালেইলা। পুলিশর গুলিত প্রদীপ সিংহ, অরুণ সিংহ, রত্না সিংহ, নমিতা সিংহ, কমলাকান্ত সিংহ, শ্যামল সিংহ, প্রমোদিনী সিংহ, দীপঙ্কর সিংহ বারো বিকাশ সিংহ— এ নয়োগো সত্যাগ্রহী জখম অ'ইলা, বারো সুদেষ্ঠা সিংহ প্রাণত্যাগ করিয়া শহীদ অ'ইল।

এসাদে হুলুস্থুল লাগিল সময়ত আসামর মুখ্যমন্ত্রী হিতেশ্বর শইকিয়াই ১৮ মার্চ স্পেশিয়েল কেবিনেট মিটিং ডাহিয়া বিষ্ণুপ্রিয়া মণিপুরীরে OBC-র তালিকাত অন্তর্ভুক্ত করিয়া নোটিফিকেশন জারি করলো। OBC-ত বি.ম. -রে অন্তর্ভুক্ত করানি এহানৌ ছাত্র সংস্থার দাবী আহান আছিল। এ দাবী আহান পুরেয়া সরকারে যে ঘোষণাহান করলো, উহানর কাগজপত্র উতা কারাগারে আছিল নেতৃবৃন্দরাও ফৌকরেদেনার পিছে ৫০১ ঘণ্টার রেল-অবরোধর আন্দোলনহান তুলানি অ'ইল।

১৮। ১৯৯৬ ইংরাজীর ২১ ডিসেম্বরেও ১০০১ ঘণ্টার রেল বারো সড়ক অবরোধর আন্দোলন আরম্ভ অ'ইল। উবাকা তৎকালীন মুখ্যমন্ত্রী প্রফুল্ল কুমার মহন্তই ১৯৯৭ ইংরাজীর ২ জানুয়ারী ছাত্র সংস্থারে বৈঠক আহানাত ডাকলো। ও বৈঠকর পরিপ্রেক্ষিতে আন্দোলন স্থগিত থনা অ'ইল।

১৯। কিন্তু এ বৈঠকর সিদ্ধান্ত মতে সরকারে কাম নাকরানিয়ে ১৯৯৭ ইংরাজীত

২১ এপ্রিলেত্ত বা-রো ১০০১ ঘণ্টাৰ রেল-অবরোধৰ ডাক দেনা অ'ইল। উবাকা মুখ্যমন্ত্ৰীয়ে ১৯৯৭ ইংৰাজীৰ ২মে ছাত্ৰ সংস্থারে বৈঠক আহনাত আমন্ত্ৰণ জানেইলো। মুখ্যমন্ত্ৰী মহন্তৰ নিৰ্দেশে ৫ মে রাজ্যৰ শিক্ষা সচিবে ছাত্ৰ সংস্থার লগে বৈঠকে বহিল। ঔ বৈঠকে যে যে প্ৰাথমিক স্কুলে ৫১% বা তদতৰিক্ত বি.ম. ছাত্ৰছাত্ৰী আছি, উতার তালিকা আহান হঙ্করানিৰ সিদ্ধান্ত অ'ইল।

২০। বৈঠকৰ সিদ্ধান্তমতে সরকারে স্কুলৰ তালিকা হঙ্করলো, কিন্তু ভাষা চালু করানিৰ সিদ্ধান্ত ঘোষণা নাকরিয়া থইলো। উহানে ২১ ডিছেম্বরেত্ত বা-রো ১০০১ ঘণ্টাৰ রেল-অবরোধৰ ডাক দেনা অ'ইল। উবাকা বরাক উপত্যকার M.L.A. হাবিৰ অনুরোধে শিক্ষামন্ত্ৰী থানেশ্বৰ বড়েই ১৯৯৭ ইংৰাজীৰ ৩১ ডিছেম্বৰ বরাক উপত্যকার M.L.A. সহ ছাত্ৰ সংস্থার লগে বৈঠক বহানিৰ ব্যবস্থা করলো। ঔ পরিপ্ৰেক্ষিতে আন্দোলন স্থগিত থনা অ'ইল।

২১। ছাত্ৰ সংস্থা বারো গণ সংগ্রাম পরিষদৰ পরামর্শে অবসরপ্ৰাপ্ত সৈনিক সংস্থা বারো মহিলা সংস্থাই ১৯৯৮ ইংৰাজীৰ ১০ জুলাইত্ত পুৰি শিলচৰ ডি.ছি. অফিসে ৩৬ ঘণ্টাৰ অনশন ধর্মঘট করলা। ঔ সময়ত মেইতেই যুবক কতোগোই আয়া সত্যাগ্রহীৰ গজে আক্রমণ চালাছিল, কিন্তু বিশেষ কিত্তাউ নাইল।

২২। ১৯৯৮ ইংৰাজীৰ ২৮ অক্টোবরেত্ত বা-রো ১০০১ ঘণ্টাৰ রেল অবরোধৰ ডান দেনা অ'ইল। এ পরিপ্ৰেক্ষিতে ২৪ অক্টোবৰ সেন্ধাত মশাল-মিছিল আহানৌ করানি অ'ইল।

২৮ অক্টোবৰ কাটাখাল, শ্ৰীকোণা, তিনোখাল, কলকলিঘাট, বুরুঙ্গা বারো রাতাবাড়ীত রেল-অবরোধ করানি অ'ইল। উবাকা বরাক উপত্যকার M.L.A. বারো M.P. হাবিৰ অনুরোধে ৩১ অক্টোবৰ আন্দোলনহান স্থগিত করানি অ'ইল।

২৩। ইতিমধ্যে আসামৰ মুখ্যমন্ত্ৰীয়ে ৯-১২-৯৮ ইংৰাজীত ছাত্ৰ সংস্থারে বৈঠক আহনাত আমন্ত্ৰণ জানেইলো, কিন্তু ছাত্ৰ সংস্থাই আমন্ত্ৰণ উহান স্বীকার না করিয়া সঠিক এবং শেষ সিদ্ধান্তৰ দাবী জানেয়া ১ ডিছেম্বৰ বিয়ান ৬ বাজিত্ত বা-রো ১০০১ ঘণ্টাৰ রেল-অবরোধ আরম্ভ করলো। আন্দোলনৰ ৭ম দিনে কালানিত পুলিশে সত্যাগ্রহীৰ গজে আক্রমণ করলা এবং অনেক সত্যাগ্রহীৰে গ্ৰেফতার করিয়া কারাগারে থইলা।

২৪। ১৯৯৯ ইংৰাজীৰ ২১-২৫ জানুৱাৰী দিশপুৰে অনশন ধর্মঘট করানি অ'ছিল এবং রাজ্যৰ বাজেট-অধিবেশন চলাকালেউ ২১-২২ মাৰ্চ অনশন ধর্মঘট করানি অ'ইল। তথাপি সরকারে ভাষা চালু করানি সম্পর্কে সিদ্ধান্ত নালনিযে বা-রো আন্দোলনৰ ঘোষণা করানি অ'ইল।

২৫। ঔ পরিপ্ৰেক্ষিতে আসামৰ শিক্ষামন্ত্ৰীয়ে ২৬-৪-৯৯ ইংৰাজীত বৈঠক আহান ডাকলো। কিন্তু ঔ বৈঠকে মহাসভাউ হমানি মনেয়া সরকারৰাঙ অনুরোধ করানিয়ে ছাত্ৰসংস্থার অনুরোধে বৈঠকহান স্থগিত করিয়া বি.ম. সমাজৰ হাবি সংস্থারে যুক্ত করিয়া ২ জুন তারিখে

বা-রো বৈঠক ডাহানি অ'ইল। ও বৈঠকে মহাসভা ছাড়া হাবি সংস্থার সদস্য যোগ দিলা।

যেতাউ অ'ক, দীর্ঘদিন আন্দোলনর পিছে ১৯৯৯ ইংরাজীর ২ জুনর বৈঠকে জনতা ভবনে শিক্ষামন্ত্রীয়ে উপস্থিত হাবির মুঙে ভাষা চালু করানির সিদ্ধান্ত ঘোষণা করিয়া আন্দোলনকারীর আ'তে প্রয়োজনীয় কাগজপত্র সমজাদিলো। লগে Memorandum of Settlement আহানৌ সরকারে গ্রহণ করলো।

এহানর লগে লগে ছাত্র সংস্থা বারো গণসংগ্রাম পরিষদে আন্দোলনর সমাপ্তি ঘোষণা করলা। এ প্রসঙ্গে উল্লেখ করানি লাগতই যে, যদিও আন্দোলন এহান আরম্ভ করেছিলতা মহাসভাই, তথাপি পরবর্তী নেতৃমণ্ডলীর দৃষ্টিভঙ্গীর ভিন্নতার ফলে শেষ পর্যায়র প্রায় ২০ বছর মহাসভা এ আন্দোলনেত্তু বিছিন্ন অ'য়া আছিল।

বিষ্ণুপ্রিয়া মণিপুরী সমাজে শিক্ষা

(ক) প্রাচীন (সংস্কৃত) শিক্ষা : বর্তমানে শিক্ষা বুলতে যে ইংরাজীভিত্তিক বা পাশ্চাত্য বিজ্ঞানভিত্তিক শিক্ষারে হারপেয়ার, ঐ শিক্ষা উহান বিষ্ণুপ্রিয়া সমাজে আহেছেতা বিংশ শতকৰ পঞ্চম দশকে পুৰি। অবশ্যই, এতার আগে এ সমাজে বর্তমান শিক্ষা একেবারে নেয়ছিল উহান নাগই ; বিংশ শতকৰ পইলাদেত্ত পুৰি আধুনিক শিক্ষা এ সমাজে প্রবেশ করানি অ'করেছে ; তবে এ শতকৰ তৃতীয় দশক পর্য্যন্ত এ শিক্ষা এহান অল্প সংখ্যক পরিবারেই সীমিত আছিল। এ শিক্ষার প্রতি জনগণৰ দৃষ্টি পড়ানি অ'করলতা চতুর্থ দশকে পুৰি এবং এ শিক্ষা এহান নিতান্ত দরকারীহান বুলিয়া জনগণে মানিয়া নিলাগাতা পঞ্চম দশকে পুৰি। নারী সমাজে এ শিক্ষার প্রচলন অ'না অ'করলতা আরাকো দশক আহান পরে অর্থাৎ ষষ্ঠ দশকে। আধুনিক শিক্ষা প্রচলনর আগে সমাজে শিক্ষা বুলিয়া গণ্য করলাতা সংস্কৃত শিক্ষারে। তবে সংস্কৃত শিক্ষা বরাবরই অনুধাবন করলাতা সীমিত সংখ্যক শিক্ষার্থীয়ে ; এ শিক্ষা কুনোদিনই বর্তমান শিক্ষার সাদে সার্বজনীন শিক্ষাহান বুলিয়া পরিগণিত নাছে। তবে বিষ্ণুপ্রিয়ার জনসংখ্যার তুলনাত সংস্কৃত শিক্ষার প্রচলন এ সমাজে অন্য সমাজেত্ত অনেক মিয়াম জনপ্রিয়। আধুনিক শিক্ষা প্রচলনর আগে বিষ্ণুপ্রিয়ার ভিতরে এমন কুনো অঞ্চল আগো নেয়ছিল যে অঞ্চলে শাস্ত্রজ্ঞ পণ্ডিত দুগো তিনগো নেয়ছিল। এ পণ্ডিত এতার ভিতরে অনেকগো শিক্ষালাভ করেছিলাতা নবদ্বীপে গিয়া, কুনো কুনোগো বারাণসীত গিয়া। ভারতর পূর্বাঞ্চলে অসমীয়া বাদ দিলে বাকী সমাজর কুনো সমাজেউ সংস্কৃত শিক্ষার এসাদে প্রচলন নাছিল। বরাক উপত্যকাত তৎকালে যেতা সংস্কৃত তামকরলা উতা হয় বাঙালী ব্রাহ্মণ, নাহয় বিষ্ণুপ্রিয়া (ব্রাহ্মণ বা ক্ষত্রিয়)। বিষ্ণুপ্রিয়ার ভিতরে বিংশ শতাব্দীর আগে যেতা যেতা সংস্কৃত পণ্ডিত আছিল, উতার নাঙ-পরিচয় হাবি সমাজর স্মৃতিত্ত একরকম মাঙয়া গেছেগা। অবশ্যই, বর্তমানে যে যে পণ্ডিতর নাঙ পেয়ার, উতার ভিতরে উনবিংশ শতকৰ দ্বিতীয়ার্ধত্ত বিংশ শতকৰ প্রথমার্ধ পেয়া জীবিত আছিল। অনেক পণ্ডিত আছি। বিংশ শতাব্দীত যে যে পণ্ডিত গিরক গাছি আছিল, উতার ভিতরে বিখ্যাত বিখ্যাত পণ্ডিত উতার অঞ্চল ভিত্তিক তালিকা আহান তলে দিলাঙ।

অঞ্চল

নরসিংপুর

নরসিংপুর

মেহেরপুর

বিক্রমপুর

শিঙা

প্রতাপগড়

পণ্ডিতর নাঙ

বাগীন্দ্র বিদ্যালঙ্কার

ধনো পণ্ডিত

জগদানন্দ বেদান্ততীর্থ

ভুবনেশ্বর সাধুঠাকুর

সেবাদাস কাব্যসিন্ধু

ধনাই পণ্ডিত

পুণ্ডরীকাক্ষ শর্মা

আনুমানিক সময়

১৯১০ খ্রীষ্টাব্দর আগে

১৯২৫ খ্রীষ্টাব্দর আগে

বিংশ শতকৰ প্রথমার্ধত

বিংশ শতকৰ প্রথম পাদ

বিংশ শতকৰ প্রথম পাদ

?

বিংশ শতকৰ প্রথম পাদ

	গোবিন্দ পণ্ডিত	বিংশ শতকর প্রথম পাদ
	যোগেশ্বর পণ্ডিত	বিংশ শতকর প্রথম পাদ
ত্রিপুরা	মীনেশ্বর সার্বভৌম	বিংশ শতকর প্রথম পাদ
	লালবাবু পণ্ডিত	বিংশ শতকর তৃতীয় পাদ
বাংলাদেশ	নিংথেম কাবাভীর্থ	?
	চৌবিতল পণ্ডিত	?

এতার বাহিরে অনেক পণ্ডিত গিরিগিনানির নাঙ আছে, কিন্তু তানুর বিদ্যা বারো খ্যাতির মূল্যায়ন করে নুরারানিয়ে তানুর নাঙ উতা উল্লেখ করানি নামনেইলাঙ।

(খ) আধুনিক শিক্ষা : আধুনিক শিক্ষা বিষ্ণুপ্রিয়া সমাজে জনপ্রিয় অ'না অ'করলোতা বিংশ শতকর ষষ্ঠ দশকেত্ত অ'করিয়া, এবং সার্বজনীনভাবে গৃহীত অ'ইলতা এ' শতাব্দীর অষ্টম দশকেত্ত অ'করিয়া।

আধুনিক শিক্ষার কুন কুন বিষয়ে কুংগো কুংগো সফল শিক্ষার্থী নিকুলেছিলা, উতার তালিকা আহান এপেই দিলাঙ। উতার লগে ১৯৬৪-৬৭ ইংরাজীত গবেষণা করানির সময়ত এ লেখকে বিষ্ণুপ্রিয়া সমাজর উচ্চশিক্ষিত বারো উচ্চশিক্ষার্থীর তালিকা আহান হঙকরেছিল। উহানৌ সংযোজিত করলাঙ। এ তালিকা দ্বিযোহানিত্ত এ সমাজর আধুনিক শিক্ষার ইতিহাস সম্বন্ধে ধারণা আহানি পেইতাঙাই। বর্তমানে আধুনিক শিক্ষা এহান সার্বজনীনহান অ'য়া উঠানিয়ে বর্তমান কালর এসাদে তালিকা আহান করানির প্রয়োজন বোধ নাকরলাঙ, বারো এসাদে তালিকা করানি এহান বর্তমানে ব্যাপক অনুসন্ধান সাপেক্ষহান অ'নাই ওঁ কামে আ'ত নাদলাঙ।

শিক্ষার বিভিন্ন দিকে প্রথম সফল শিক্ষার্থী বারো বৃত্তিধারীর তালিকা :—

প্রথম বি.এ. : তনু বাবু সিংহ (মাছিমপুর, আদিনিবাস, পাথারকান্দি), ১৯০২ ইং, কলিকাতা বিশ্ববিদ্যালয়ে সংস্কৃত অনাৰ্ছে প্রথম স্থানাধিকারী। (প্রসঙ্গতঃ, দ্বিতীয় বি.এ. মহেন্দ্র কুমার সিংহ, পাথারকান্দি)

প্রথম বি.এ., বি.এল.	:	(উকিল) অর্জুন সিংহ, পাথারকান্দি (১৮৯৪-৯৫ ইং জন্ম)।
প্রথম এম.এ.	:	রণধীর সিংহ (বড়কলেই গাঙর চৌধুরী দারোগার পুতোক), ১৯৪১ ইং, দর্শনশাস্ত্রত।
প্রথম এম.এ.বি.এল.	:	বীরেন্দ্র কিশোর সিংহ।
প্রথম অধ্যাপক/অধ্যাপিকা	:	ইন্দিরা রাজকুমারী (মাছুঘাট), সংস্কৃত, ১৯৫২-৫৩ ইং, গোলাঘাট কলেজ।

- প্রথম ইঞ্জিনিয়ার : অমর সিংহ (বিলবাড়ী) ১৯২৬-২৭ ইং
জন্ম।
- প্রথম এম.এল.পি. : ডঃ কৃষ্ণপ্রসাদ সিংহ, চিপরসাজন,
১৯৩২ ইং।
- প্রথম এম.বি.বি.এছ. ডাক্তার : হরিপ্রসাদ সিংহ (চিপরসাজন) ১৯৫৭
ইং।
- প্রথম এম.এছ. : ডঃ বিনয় সিংহ, পাতিয়ালা, করিমগঞ্জ।
- প্রথম মহিলা মেট্রিকুলেট : পদ্মাদেবী (তনুবাবু গিরকর জিলক),
১৯৩৩ ইং।
- প্রথম মহিলা বি.এ.বি.এ.বি.টি : সুখজ্যোতি সিংহ, পাথারকান্দি, ১৯৫০
ডাবল এম.এ. ইং।
- প্রথম মহিলা এম্.এ.বি.এল : কুঙ্গুম সিংহ (গৌহাটি কৃষ্ণসিংহ বারো
সুখজ্যোতি সিংহর জিলক)
- প্রথম Ph. D. : কালীপ্রসাদ সিংহ (১৯৬৮ ইং)
- প্রথম D. Lit : কালীপ্রসাদ সিংহ (১৯৮২ ইং)
- প্রথম বিশ্ববিদ্যালয় অধ্যাপক : কালীপ্রসাদ সিংহ (১৯৭৪ ইং)
- প্রথম বিদেশ ভ্রমণকারী অধ্যাপক: কালীপ্রসাদ সিংহ (১৯৮৭ ইং)
- প্রথম মহিলা Ph. D. : শ্রীমতী সুনন্দা সিংহ, গৌহাটি (বর্তমানে
আমেরিকা), ইংরাজী বিভাগে, ১৯৮৮
ইং(?)

১১। বিষ্ণুপ্রিয়া মণিপুরী পত্রিকার ইতিহাস

বিংশ শতকের তৃতীয় দশকেও অ'করিয়া বিষ্ণুপ্রিয়া মণিপুরী সমাজে নিজের সত্তা সম্বন্ধে চেতনা আহান জাগানি অ'করলো, যদিও ভাষা সাহিত্য সম্বন্ধে উবাকাউ চিন্তাভাবনা যথাযথভাবে নাহেছে; নিজের কৃষ্টিরে অন্য সমাজের মুণ্ডে তুলিয়া ধরানির মানসিকতাউ না জাগেছে।

নিজের সত্তা সম্বন্ধে চেতনা জাগ্রত অ'নার ফলস্বরূপে আমি দেহিয়ারতা ১৯২৫ ইংরাজীত বি.ম. সমাজেও পইলাকার পত্রিকা আহান নিকুলিল, যেহানর নাঙ 'জাগরণ'। পত্রিকা এহান নিকাললাতা ছিলেটর মুরারিচাঁদ কলেজর প্রাক্তন ছাত্র কতোগেই, মাছিমপুরেও। তানুর পশ্চাতে সাহায্য বারো উদ্দীপনা যুগেইলোতা তৎকালীন মৌলবী বাজার গড়্‌ট হাই স্কুলর সহকারী প্রধান শিক্ষক শ্রী মহেন্দ্র কুমার সিংহ। যেতার উদ্যোগে পত্রিকা এহান নিকুলিল, তানু অ'ইলাতাই নীলমণি সিংহ, বি.এ. (নরসিংপুর), নিতাইচান সিংহ, বি.এ. (ধর্মনগর), বাবুচান সিংহ বি.এ.বি.এল. (কৈলাসহর), নবদ্বীপ সিংহ বি.এ. (কৈলাসহর), হরিদাস সিংহ বি.এ. (), অর্জুন সিংহ, বি.এ.বি.এল. (), পারিজাত সিংহ (), রামকৃষ্ণ সিংহ () ইত্যাদি। জাগরণ পত্রিকার সম্পাদকগো আছিলতা, অর্জুন সিংহ, বি.এ.বি.এল এবং সহকারী সম্পাদকর পদে আছিলতা পারিজাত সিংহ বারো রামকৃষ্ণ সিংহ।

জাগরণ পত্রিকা আছিলতা মূলতঃ বাংলা ভাষার পত্রিকাহান, তবে হাদিহাদিত বি.ম. ভাষার প্রবন্ধ বারো কবিতা আহান দুহানৌ প্রকাশ পেইলো। বছর দুহান পূর্ণ অ'ইতে না'ইতে অর্থাভাবে পত্রিকা এহান বন্ধ অ'ইল।

জাগরণ পত্রিকার সময়ত বিষ্ণুপ্রিয়ারতা মাতৃভাষা সম্বন্ধে পরিষ্কার কোনো ধারণা নেয়ছিল; এ জাতর মাতৃভাষাহান কুংহান— এ সম্বন্ধেই মানুর সংশয় আছিল। এমন কি, এসাদে প্রশ্নী উঠেছিল যে, জাত এহান বাঙালীর ভিতরে হমানি উচিত, না মেইতেইর ভিতরে। এ প্রসঙ্গে শ্রী মহেন্দ্র কুমার সিংহই জাগরণ পত্রিকাত আলোচনামূলক দীর্ঘ প্রবন্ধ আহান প্রকাশ করেছিল। আলোচনা করিয়া গিরকে দেছে সিদ্ধান্তহানি এহানি— (১) বাঙালী সমাজভুক্ত অ'না বিষ্ণুপ্রিয়ারতা উচিত নেই; (২) বিষ্ণুপ্রিয়া ভাষা এহান কৈরেঙ-খুল্লকপাই অল্প দিন আগে মণিপুরে আনেছেহান; এহান আসল মণিপুরী ভাষাহান নাগই; বুনিয়াদী মণিপুরী ভাষাহানতে মেইতেই এহান।

জাগরণ উঠে যানার ৫/৬ বছর িছে শিলচর শহরেত 'মণিপুরী' নাঙে পত্রিকা আহান নিকুলিল। এ পত্রিকার সম্পাদক আছিলতা দুগো--- সমরজিৎ সিংহ, বি.এছ.ছি.বি.এল. এবং ডাঃ লৈরেঙ সিংহ এল্ এম্ পি; সহ সম্পাদকগো আছিলতা বলাই চাঁদ সিংহ; বারো মেনেজারগো আছিলতা রাজবাবুসিংহ। পত্রিকা এহানরাউ মুখ্য ভাষাহান আছিলতা বাংলা, তবে হাদি হাদিত বি.ম. ভাষার প্রবন্ধ বারো কবিতা খানিও

প্রকাশ পেইলো। পত্রিকা এহান চলিয়া আছিলতা ৮/৯ বছর।

মণিপুরী পত্রিকা নিকুলিলতা ১৯৩৩ ইংরাজীত, যে বছর বিষ্ণুপ্রিয়া মণিপুরী সম্মেলনর (মহাসভার) সৃষ্টি অ'ইল। এ পত্রিকার মূল সুরগো অ'ইলতাই— সমাজচেতনা জাগানি, জাতর ইতিহাসভিত্তিক পরিচয় আবিষ্কার করানি, সমাজর দোষত্রুটির সমালোচনা করিয়া অগ্রগতির পথ দেহানি বারো সমাজসেবা, সমাজে শিক্ষার প্রসার, কুটীর শিল্পর মাধ্যমে আর্থিক উন্নতি সাধন ইত্যাদির দিকে মানুর দৃষ্টি আকর্ষণ করানি : দীননাথ সিংহই (তিলকপুর ভানু গাছ) ‘সমাজ চায় কি ?’— প্রবন্ধত যুব সমাজরে সমাজ সেবারকা, জাতীয় অর্থ-তহবিল হঙকরানিরকা, শিক্ষার প্রসার করানিরকা বারো বস্ত্রশিল্পর উন্নতিসাধনরকা আহ্বান করেছে (১ম বর্ষ, দ্বিতীয় সংখ্যা)। মানিক সিংহই (নরসিংপুর) ‘যুগধর্মর মাতুং ইলনি’ প্রবন্ধত ভগবৎ সেবার অঙ্গ হিসাবে সমাজ সেবা করানির আহ্বান করেছে (ঐ)। মহেন্দ্র কুমার সিংহই ‘মণিপুর ভ্রমণ’ প্রবন্ধত তার মণিপুর ভ্রমণর অভিজ্ঞতা বর্ণনা করিয়া জনৈক প্রমোদ বাবুর মণিপুরী সম্পর্কে বিরূপ সমালোচনার প্রতিবাদ করেছে (ঐ)। কৃষ্ণকুমার সিংহই মণিপুরীর বিভিন্ন গোষ্ঠী সম্পর্কে আলোচনা করেছে (ঐ)। মহেন্দ্র কুমার সিংহই ‘মহাভারতের মণিপুর’ নাঙর দীর্ঘ প্রবন্ধ আহানাত বর্তমান মণিপুর এহানেই মহাভারতর মণিপুর বুলিয়া প্রতিপাদন করানির চেষ্টা করেছে (২য় বর্ষ, ১-৪ সংখ্যা, ৩য়-৪র্থ বর্ষ, ৩-৪ সংখ্যা ইত্যাদি)। কৃষ্ণকুমার সিংহই বিষ্ণুপ্রিয়া বারো মেইতেই সম্পর্কে য়েংখোম কমল সিংহর মত কতোহানর প্রতিবাদ করেছে (২য় বর্ষ, ১-৪ সংখ্যা)। মানিক সিংহই ‘সমাজ’ নাঙর প্রবন্ধত পত্রিকা প্রকাশ করানি, জাতীয় সমিতি হঙকরানি, ছাত্র সমাজ জাগৃতির প্রয়োজনীয়তা ইত্যাদি বিষয়ে ইকরেছে (৩য়-৪র্থ বর্ষ, ৩-৪ সংখ্যা)। যামিনী দেবী গিথানকে (শিংলার নিশিকান্ত সিংহ ডি এছ পি-র গৃহিণী) নারী জাগরণর আবেদন জানাছে (ঐ)। শ্রীপুরর সুশীলা বালা দেবীয়ে ‘স্ত্রী শিক্ষা সম্বন্ধে যৎকিঞ্চিৎ’ প্রবন্ধত স্ত্রী শিক্ষার গজে গুরুত্ব আরোপ করেছে (৫ম বর্ষ, ১২শ সংখ্যা)। বালীগাওর নীলেশ্বর মুখার্জীয়ে ‘সমাজের ইতিকর্তব্যতা’ প্রবন্ধত সমাজর করণীয় বিষয় কতোহান সম্বন্ধে মাতেছে। নরসিংপুরর বেণিমাধব সিংহই ‘গুণে ব্রাহ্মণ’ নাঙর প্রবন্ধত ব্রাহ্মণ সম্প্রদায়র গুণাভাবর গজে কটাক্ষ করেছে। এতার বাহিরে সমাজর প্রয়োজনীয় বা জ্ঞাতব্য বিষয়ে অনেক প্রবন্ধ আছে ; যেমন, শ্রী ভুবনেশ্বর দেববর্মার ‘হরিনাম-মঙ্গল’ (৫ম বর্ষ, ৯ম-১০-৬ষ্ঠ বর্ষ, ৪র্থ সংখ্যা) লালবাবু সিংহর ‘কিশোরী ভজন’ (৬ষ্ঠ বর্ষ, ৪র্থ সংখ্যা) ইত্যাদি।

উপরোক্ত প্রবন্ধ উতা হবি লিখানি অছেতা বাংলাভাষালো। এতার হাদি হাদিত বিষ্ণুপ্রিয়া ভাষালো লিখা কবিতা বারো এলা খানি পেয়ার, যেমন— লক্ষ্মীপুরর রাধারানী দেবী বারো শ্রীধরপুরর গোবিন্দবল্লভ মুখোপাধ্যায়র এলা (১ম বর্ষ, ২য় সংখ্যা)। অন্যান্য লেখার ভিতরে ডাঃ জগচন্দ্র সিংহর ‘পঞ্চ পাণ্ডব ও দ্রোপদীর অজ্ঞা’র স মুক্তি, শ্রীমতী ইন্দুবালা সিংহর ‘ছেলের প্রতি মায়ের উপদেশ’, লালবাবু সিংহ বিদ্যাভূষণর ‘একতা’ (১ম বর্ষ, ৯-১২ সংখ্যা), ধ্বজরাজ সিংহর ‘ব্যর্থ-আবেগ’ (৫ম বর্ষ, ৬ সংখ্যা), কৃষ্ণধন সিংহর (ঝাপিরবন্দ) ‘জ্ঞানী ও অজ্ঞান’ (৬ষ্ঠ বর্ষ, ৮-৯ সংখ্যা), গোলাপ সিংহর (বীজগাও) ‘সমাজ’- নাঙর এলা ইত্যাদি উল্লেখযোগ্য।

এতা ছাড়া 'মণিপুরী' পত্রিকাত সমাজর অবশ্য জ্ঞাতব্য সমাচারখানি পেয়ারতা এতা—

(ক) ১৯৩২ ইংরাজীর ১২ জুন তারিখে অম্বিকাপুরর সিঙ্গারীত অনুষ্ঠিত সভা আহানর বিবরণী আছে (১ম বর্ষ, ২ সংখ্যা)। এ সভার বিবরণী এহানান্ত নিখিল বিষ্ণুপ্রিয়া মণিপুরী মহাসভার উৎপত্তির পৃষ্ঠভূমি সম্পর্কে ধারণা পেয়ার।

(খ) রাজবাবু সিংহর মৃত্যু অ'ছেতা ১৩৪৫ বাংলার ৩০ আষাঢ় (৫ম বর্ষ, ১২ সংখ্যা)।

(গ) বিভিন্ন সংখ্যাত প্রকাশিত সম্পাদকীয় আবেদনেত্ত হারপেয়ার যে, সীমিত সংখ্যক গ্রাহক কতোগো ছাড়া সাধারণ পাঠকে পত্রিকার মূল্য নাদানি এহান বিষ্ণুপ্রিয়ার চিরাচরিত স্বভাবহান।

(ঘ) রাধাকুণ্ডর রাধামাধব মন্দিরর পরিচালনা সম্পর্কে বিবরণ পেয়ার (১ম বর্ষ, ৯-১২ সংখ্যা)।

(ঙ) এ পত্রিকার ৩য়-৪র্থ বর্ষর ৫-৮ সংখ্যা প্রকাশ করানিরকা ডি এছ পি নিশিকান্ত সিংহর গৃহিণী যামিনী দেবীয়ে অর্থ সাহায্য করেছে।

(চ) বর্তমান বাংলাদেশর ভানুবিলে পণ্ডিত জহরলাল নেহেরু আহেছিল এবং মণিপুরী সম্পর্কে তা মিয়াম প্রশংসা করেছিল (৫ম বর্ষ, অগ্রহায়ণ সংখ্যা)।

(ছ) ১৩৪৫-৪৬ বাংলাত নীলেশ্বর মুখার্জি শান্তিনিকেতনে আছিল (৬ষ্ঠ বর্ষ, ৮-৯ সংখ্যা)।

১৩৪৭ (জ) ১৩৪৬ বাংলাতৌ বিষ্ণুপ্রিয়া জাতীয় সমিতির নাঙহান 'নিখিল বিষ্ণুপ্রিয়া মণিপুরী সম্মিলনী' আছিল ; ঔ বছর ভকতপুরে ১০ম অধিবেশন অ'ছিল (৬ষ্ঠ বর্ষ, ১১ সংখ্যা)।

(ঝ) বিপিন সিংহই মণিপুরী নৃত্যলো ভারতর বিভিন্ন ফামে খ্যাতি অর্জন করেছে (৬ষ্ঠ বর্ষ, ১১ সংখ্যা)।

(ঞ) মণিপুরর মহারাজা (চূড়াচান মহারাজা ?) কাছাড়ে আয়া খেলেন্দ্র চন্দ্র মুখোপাধ্যায়র ঘরে সাপ্তা আহান আছিল এবং শিলচর বারো কাটলিছড়ার প্রায় ২০০০ মালাকার সম্প্রদায়র মানুরে দীক্ষা দেছিল।

১৯৩৭ ইংরাজীত মণিপুরী পত্রিকার পরিচালকর ভিতরে বা সমাজর শিক্ষিত মানুর ভিতরে মতভেদ দেহা দেনাই মণিপুরী পত্রিকা থানা সত্ত্বেউ শিলচরেত্ত 'মেখলী' নাঙে আরাক পত্রিকা আহান নিকুলিল। এ পত্রিকাতৌ বাংলা ভাষারেই প্রাধান্য, যদিও হাদি হাদিত বি.ম. ভাষার সামাজিক বারো ঐতিহাসিক প্রবন্ধ বারো কবিতা প্রকাশ পেইলো। এ পত্রিকার

সম্পাদকগো অ'ছিলতা ফাল্গুনী সিংহ সাহিত্য ভূষণ বারো সহ-সম্পাদক আছিলতা উপেন্দ্ৰ সিংহ বি এ। পত্রিকা এহানৌ পাঁচ বছর চুৰা চলিয়া বন্ধ অ'ইল।

মেখলী পত্রিকার প্রধান সুরগৌ সমাজ গঠন, সমাজৰ সত্তা নিৰ্ণয় বারো সমাজ চেতনাৰ জাগরণ। এ পত্রিকাত প্রকাশ পাছে বিশেষভাবে উল্লেখযোগ্য লেখা অ'ইলতাই— মহেন্দ্ৰ কুমার সিংহৰ 'মণিপুরেৰ বিভিন্ন নাম ও প্রাচীন পারিপার্শ্বিকতা' (১ম বর্ষ বর্ষা সংখ্যা, ২য়-৩য় বর্ষ, ৬-১ সংখ্যা), কুঞ্জেশ্বর সিংহৰ 'সমাজ সম্বন্ধে যৎকিঞ্চিৎ' (১ম বর্ষ, ৩ সংখ্যা), গোসাই সিংহৰ 'বিষ্ণুপ্রিয়া সমাজ বিপ্লব', মহেন্দ্ৰ কুমার সিংহৰ 'মণিপুরী গৃহাদিতে আৰ্য্যত্ব' (৩য়-৪র্থ বর্ষ, ৩ সংখ্যা, ৫ম-৬ষ্ঠ বর্ষ, ১ সংখ্যা), মানিক সিংহৰ 'মণিপুরী নৃত্য' (৩য়-৪র্থ বর্ষ, ৫, ৬, ১ সংখ্যা) ইত্যাদি। এতার বাহিৰে অন্যান্য উল্লেখযোগ্য লেখা অ'ইলতাই সেনা সিংহৰ 'হরিণাম কীর্তন', কামেশ্বর বৰ্মা বিদ্যাবিশারদৰ (নালীবাড়ী) 'নিবেদন', কৃষ্ণদাস বাবাজীৰ (রাধাকুণ্ড) 'আত্মতত্ত্ব প্রকাশ' এবং 'বৈষ্ণববতন্ত্ব প্রকাশ', গোলাপ সিংহৰ 'একটি কথা', মানিক সিংহৰ 'মণিপুরী রাসনৃত্য' ইত্যাদি প্রবন্ধ। মেখলী পত্রিকাত প্রকাশিত অ'ছে বি.ম. এলা বারো কবিতা অ'ইলতাই এতা-সেনা সিংহৰ (পোষ্টমাষ্টার, নরসিংপুর) 'এলা আহান', বসন্ত কুমার সিংহৰ (সিঙ্গারী) 'ফুল', নিশিকান্ত সিংহৰ (কলিকাতা) 'প্রার্থনা' ইত্যাদি।

মেখলী পত্রিকার উল্লেখযোগ্য দিক আহান অ'ইলতাই— সমাজ বারো বহির্বিষয় সম্পর্কে সংবাদ পরিবেশন। এ পত্রিকাত আমি পেয়ারতা 'নিখিল বি.ম. সম্মিলনীৰ ৮ম অধিবেশনৰ সভাপতি রাজেশ্বর মুখোপাধ্যায়ৰ অভিভাষণ' (১ম বর্ষ, বর্ষা সংখ্যা), মণিপুরী নৃত্য প্রদর্শনী, বেরাবাকে অনুষ্ঠিত জনসভাৰ বিবরণী, নিখিল বি.ম. সম্মিলনীৰ ৮ম অধিবেশনৰ অভিভাষণ সমিতিৰ সভাপতি মণীন্দ্র সিংহৰ অভিভাষণ (১ম বর্ষ, ৩ সংখ্যা), ৩৯ ইং রাজীৰ নিখিল বি.ম. এছোছিয়েশনৰ সংবাদ (২য়-৩য় বর্ষ, ৬-১ সংখ্যা), ৩৯ ইংরাজীৰ ডিছেশ্বরে অনুষ্ঠিত কাছাড় জিলা মণিপুরী কনফারেনছৰ বিবরণ (৩য় বর্ষ, ৪ সংখ্যা), ১৩৪৪ বাংলাত দুধপুৰে অনুষ্ঠিত নিখিল বিষ্ণুপ্রিয়া মহাসভাৰ ১০ অধিবেশনৰ বিবরণ (৩য় বর্ষ, ৪ সংখ্যা), বিপিন বিহারী সিংহৰ দক্ষিণ ভারতে নৃত্য প্রদর্শন (৪র্থ বর্ষ, ২ সংখ্যা) ইত্যাদি।

এতার পিছে সমাজৰ গিরিগিথানীৰ পরামর্শে মণিপুরী বারো মেখলী দ্বিযোহানিয়ো বন্ধ করিয়া 'ক্ষত্রিয়জ্যোতি' নাঙৰ পত্রিকা আহান নিকালানি অ'ইল। এ পত্রিকার সম্পাদকগো অ'ইলতা ফাল্গুনী সিংহ সাহিত্যভূষণ। এ সময়ত নিজৰ মাতৃভাষা সম্বন্ধে সচেতনতা আহান আহানি অ'করলো, যার ফলে পত্রিকা এহানাত বি.ম. ভাষাৰ প্রবন্ধ বারো কবিতা মিয়াম সংখ্যায় নিকুলানি অ'করলো। পত্রিকা এহানৌ অর্থাভাবে দীর্ঘস্থায়ী না'ইল ; ২/৩ বছর পিছে এহানৌ লুপ্ত অ'ইল।

'ক্ষত্রিয়জ্যোতি'-ত খবর পেয়ারতা এতা : (১) চূড়ান মহারাজৰ শ্রাদ্ধৰ দিনে ১৮ নৱেম্বৰ নিখিল মণিপুরী যুব সংঘৰ ছেক্রেটারী নন্দ কিশোর সিংহৰ টেলিগ্রাম পেয়া গভর্নৰে

ছুটি ঘোষণা করেছিল (নরেন্দ্রের প্রথম দিকে তার মৃত্যু)। (২) ঔ শ্রদ্ধার বিবরণীও পেয়ার (৫ম বর্ষ, ১ম-২য় সংখ্যা)। (৩) ৫ অক্টোবর, ১৯৪১ ইং তারাপুরে 'সুরমাভেলি মেইতেই-বিষ্ণুপ্রিয়া সন্মিলনী' অনুষ্ঠিত অ'ছে : সভাপতি-রাজার গাওর কৈরেঙ-সেনা রাজকুমার; অভ্যর্থনা কমিটির ছেক্রেটারী-নন্দকিশোর সিংহ। ঔ সভার বিবরণীও আছে। ঔ সভাত নন্দকিশোর সিংহ গিরকে মেইতেই বারো বিষ্ণুপ্রিয়া দ্বিতীয়ো পরম্পরের বিরুদ্ধে যেতা যেতা মন্তব্য করেছি, উতা হাবি প্রত্যাহার করিয়া দ্বিত্যো সম্প্রদায়ে আকসাতে সংঘবদ্ধভাবে কাম করোকা বুলিয়া প্রস্তাব আনেছে। (৩) মাছিমপুরর পরমেশ সিংহর বি.ম. ভাষালো লিখা 'গীতাভিসারিকা' কবিতা। (৪) রাধাকুণ্ডর রাধামাধব মন্দিরর আয়ব্যয়র হিসাব। ক্ষত্রিয়জ্যোতির পিছে কতো বছররকা পত্রিকা বন্ধ অ'য়া আছিল। পিছে নিখিল বিষ্ণুপ্রিয়া মণিপুরী মহাসভার চাপে পড়িয়া ১৯৫৬ ইংরাজীত প্রতাপগড় বাসীর উদ্যোগে 'বিষ্ণুপ্রিয়া-নাঙে মাসিক পত্রিকা আহান নিকুলিল। এহানর সম্পাদকগো আছিলতা মহেন্দ্র কুমার সিংহ, বি.এ.বি.টি., বারো সহ-সম্পাদকগো আছিলতা মদন মোহন মুখার্জি। এহানেই পইলাকার বিষ্ণুপ্রিয়া মণিপুরী ভাষার পত্রিকাহান। এ পত্রিকাত বিভিন্ন লেখকর বিষ্ণুপ্রিয়া ভাষালো লিখা প্রবন্ধ, ইতিহাস, কবিতা, ছোটগল্প ইত্যাদি প্রকাশ পেইলো। পত্রিকা এহান মাত্র তিন বছরর চুঁরা জিংতা অ'য়া আছিল। এ পত্রিকাত প্রকাশিত লেখার মাজে হাবিত উল্লেখযোগ্যহান অ'ইলতাই মহেন্দ্র কুমার সিংহর 'বিষ্ণুপ্রিয়া মণিপুরীর ইতিহাস'।

এহানর পিছে 'নুঁরা বেলী' নাঙর পত্রিকা আহান পাথারকান্দিও নিকুলিল। এহানাতেী সমাজ জাগরণর বিষয়েই মিয়াম গুরুত্ব দেনা অ'ইল। অল্প কয়েকবার প্রকাশিত অ'নার পিছে 'নুঁরা বেলী'ও বন্ধ অ'ইল।

১৯৫৩-৫৭

প্রায় কাদাকাদি সময়ত 'আর্য্য' নাঙে পত্রিকা আহান নিকুলিল। উহানর সম্পাদকগো সেনা সিংহ সাহিত্যভূষণ, বারো সহ-সম্পাদকগো মদন চাঁদ সিংহ। এ পত্রিকার বিশেষ রচনা আহান সেনা সিংহর 'বিষ্ণুপ্রিয়া জাত বারো বিষ্ণুপ্রিয়া ভাষা'।

✓ ১৯৬০ ইংরাজীর ফেব্রুয়ারী মাহাত মদন মোহন রাজবংশীর সম্পাদনাত দুর্লভছড়াও 'ফাগু' নাঙর মাসিক পত্রিকা আহান নিকুলিল। পত্রিকা এহান ১৯৬৭ ইংরাজী পেয়া চলিয়া পিছে বন্ধ অ'ইল। পত্রিকা এহানর মাধ্যমে কবিতা, গল্প, প্রবন্ধ, ঐতিহাসিক রচনা, ভাষাতাত্ত্বিক রচনা ইত্যাদি অনেক ধরণর রচনা প্রকাশ পেইলো। মাততে গেলেগা, এ পত্রিকার মাধ্যমে সমাজর লেখক গোষ্ঠী হাবি আত্মপ্রকাশ করলা।

ফাগু নিকুলিল সময় এহানর ভিতরে বিভিন্ন ফামেত্তে বিভিন্ন নাঙে পত্রিকা নিকুলিল। ১৯৬৩ ইংরাজীত নিখিল বিষ্ণুপ্রিয়া মণিপুরী স্টুডেন্টছ ইউনিয়নর পক্ষত মণিকান্ত সিংহর সম্পাদনাত 'মলয়া'- নাঙর পত্রিকা আহান নিকুলিল। উহানা উন্নতমানর ঐতিহাসিক বারো ভাষাতাত্ত্বিক প্রবন্ধ প্রকাশ পাছিল।

হাইলাকান্দিও অধ্যাপক ব্রজেন্দ্র কুমার সিংহর সম্পাদনাত 'প্রতিশ্রুতি'- নাঙর পত্রিকা

আহান নিকুলিল। এহানাত নিকুলিল কবিতা, ছোটগল্প, ভাষাতাত্ত্বিক প্ৰবন্ধ ইত্যাদি ৰচনা উতা অতি উচ্চ মানৱতা। আজি পৰ্য্যন্ত নিকুলেছে পত্ৰিকাৰ ভিতৰে এহানেই উচ্চ মানৱ দিকেত প্ৰথমহান। পত্ৰিকা এহান নয়হান সংখ্যা নিকুলানিৰ পিছে বন্ধ অ'ইল।

প্ৰায় কাদাকাতি সময়ত শিলঙেত্ত কৃষ্ণকান্ত সিংহৰ সম্পাদনায় 'চিনো এগো কুংগো' নাঙৰ পত্ৰিকা আহান নিকুলিল। উতাৰ পিছেদে শিলঙৰ মণিপুৰী এছোছিয়েশ্যনৰ তৰফেত্ত লক্ষ্মীকান্ত সিংহৰ সম্পাদনায় ১৯৬৯ ইংৰাজীত 'পাঞ্চজন্য আজুনি' নাঙৰ বাৎসৰিক পত্ৰিকা আহান নিকুলিল।

১৯৭০ ইংৰাজীৰ পিছে আগৰতলাত্ত নীলকান্ত ৰাজনৰ সম্পাদনায় 'আমাৰ পৌ' নাঙৰ পত্ৰিকা আহান নিকুলিল। এহানাত বিশেষ কৰিয়া ঐতিহাসিক বাৰো সমালোচনামূলক অনেক প্ৰবন্ধ নিকুলিল। আট-নয় বছৰ চলানিৰ পিছে পত্ৰিকা এহান বন্ধ অ'ইল। উতাৰ পিছে ইমে আগৰতলাত্তই 'ত্ৰিপুৰা চে' নাঙৰ পত্ৰিকা আহান নিকুলিল।

✓ ১৯৮২ ইংৰাজীত ৰাজেন্দ্ৰ কুমাৰ সিংহৰ সম্পাদনায় 'নুয়া এলা' নাঙে দ্বিমাসিক সাহিত্য পত্ৰিকা আহান নিকুলিল। পত্ৰিকা উহান বৰ্তমান পেয়া চলিয়া আছে। বিষ্ণুপ্ৰিয়া মণিপুৰী পত্ৰিকাৰ ভিতৰে এহানেই হাবিত্ত দীৰ্ঘজীৱী পত্ৰিকাহান। এ পত্ৰিকাৰ দান প্ৰচুৰ। এ পত্ৰিকাত বলিষ্ঠ লেখকৰ অনেক কবিতা, প্ৰবন্ধ, সমালোচনা বাৰো ছোটগল্প নিকুলেৰ, যেতাই আমাৰ সাহিত্যৰ মানদণ্ডে অনেক গজে কাকৰেদেছে।

১৯৯০ ইংৰাজীৰ ফেব্ৰুৱাৰী মাহত শান্তিকুমাৰ সিংহৰ প্ৰচেষ্টায় এবং অঞ্জনা সিংহ গিথানকৰ সম্পাদনায় গৌহাটীত 'নুৱাদৃষ্টি' নাঙৰ পত্ৰিকা আহান নিকুলিল। উহানউ বৰ্তমান পেয়া চলিয়া আছে। এহান মূলতঃ সংবাদ পত্ৰহান। মাততে গেলেগা, বৰ্তমানে ৰীতিমত চলিয়া আছে সংবাদ পত্ৰহান একমাত্ৰ এহান। পত্ৰিকা এহান সংবাদপত্ৰহান অ'ইলেউ এহানাত নানাধৰণৰ সামাজিক প্ৰবন্ধ প্ৰকাশ পাৰ। অন্যান্য প্ৰবন্ধৰ ভিতৰে কুমকুম সিংহৰ 'সোভিয়েত দেশে মি' নাঙৰ প্ৰবন্ধ বিশেষভাবে উল্লেখনীয়। এতাৰ বাহিৰে অন্যান্য পত্ৰিকা :—

গোধূলি	:	
সাচাক	:	
নুমিউস (শিংলা)	:	
ফলাল	:	
পঞ্চশ্ৰী	:	সু. কুমাৰ সিংহৰ সম্পাদনাত এহান শিলচৰেত্ত নিকুলিল। ৫-৬ হান সংখ্যা নিকুলানিৰ পিছে এহান বন্ধ অ'ইল।
চিত্ৰাঙ্গদা	:	

লোকতাক :

চিন্তা (নরসিংহপুৰ) : সম্পাদক - নিশিকান্ত সিংহ

কৈফৎ :

প্ৰতাপ :

উত্তৰা :

কাকেই (ধৰ্মনগৰ) : অনিতা সিংহ

বাংলাদেশে এ পর্যন্ত এ ভাষায় প্রকাশিত পত্র-পত্রিকার তালিকা :—

- (১) ত্ৰৈমাসিক খংচেল, সম্পাদক - কৃষ্ণকুমাৰ সিংহ, ১৩৮৩ বাংলা
- (২) মাসিক ইমারথার, সম্পাদক - ৰাজকান্ত সিংহ, ১৯৮০-৮১ ইং
- (৩) মাসিক মণিপুরী সাহিত্য, সম্পাদক - জয় মোহন সিংহ, ১৯৮৬ ইং
- (৪) মাসিক মিঙাল, সম্পাদক - নন্দেশ্বৰ সিংহ, ১৯৮১ ইং
- (৫) মাসিক সত্যম, সম্পাদক - ৰণজিৎ সিংহ, ১৯৮৭ ইং
- (৬) অনিয়মিত 'পৌৰি', সম্পাদক - উত্তম কুমাৰ সিংহ, ১৯৮৯ইং
- (৭) অনিয়মিত 'জাগরণ', সম্পাদক - ধীৰেন্দ্ৰ কুমাৰ সিংহ, ১৯৮৮ ইং

১২। বিষ্ণুপ্রিয়া মণিপুরী সংস্কৃতি

উনবিংশ শতকর ৭ম/৮ম দশকেও বিংশ শতকর পঞ্চম দশক পর্যন্ত সময় এহানাত বিষ্ণুপ্রিয়া কৃষ্টি চরম শিখরে কাছিলগা। ইসালপা, ডাকুলা, রাসধারী, বাসকুলী ইত্যাদি কৃষ্টিসেবী বিষ্ণুপ্রিয়ার প্রতি অঞ্চলে, এমনকি প্রতি গাঙে আছিল বুললেউ চলের। ঘনঘন ইসালপা-ডাকুলা বারো বাসকুলীর ফাংনালো গাঙঘর আনন্দে মুখরিত অ'য়া আছিল। আসলে ও সময়ত শিক্ষা বুলতে সংস্কৃত শিক্ষার লগে লগে এ সংস্কৃতি শিক্ষা এহানৌ গণ্য অ'ইল; উহানে, ও সময়ত এ বিদ্যা তালকরলা উতা অজালকেইর ঘরে গিয়া অজালোকর পরিবারভুক্ত অ'য়া বহুবছর শিক্ষা করিয়া থাইলাগা। এ বিদ্যা তালকরলা উতা এমন গুরুভক্তি এবং একাগ্রতা বা নিষ্ঠালো শিক্ষা করলা যে উতার ভিতরে অনেক দেবতুল্য এবং দিব্যজ্ঞানসম্পন্ন অজালোকর উদ্ভব অ'ছিল।

উপরোক্ত বিদ্যা এতার ভিতরে হাবিত জনপ্রিয় অ'ছিলতা এলা, ডাক বারো বাসকর বিদ্যা এহান। রাসর বিদ্যাহান মিয়াম জনপ্রিয় অ'ইলতা বিংশ শতকর প্রথম দশকেও। দুরারর বিদ্যা এহান কিন্তু মিয়াম মানুরে না তাম করলা। যে দুগো আগো তাম করলা উতাউ গভীরভাবে বিদ্যার্জন করে নুরারেছি। বিংশ শতকর পঞ্চম দশকেও পুরি উল্লেখযোগ্য দুরার কতোগো নিকুললা, কিন্তু তানুর সংখ্যা নিতান্ত সীমিত। রামায়ণ গীতির কৃষ্টি এহান বিষ্ণুপ্রিয়া সমাজর নিজস্ব কৃষ্টিহান। এহান বাদে অন্যান্য হাবি আহেছেতা মণিপুরেও। রামায়ণ গীতির সংস্কৃতি এহান কিন্তু মণিপুরেও আহেছেহান লাগই; এহানর সৃষ্টি অ'ছেতা মণিপুরর বাহিরে—বরাক উপত্যকাত-বিংশ শতকর তৃতীয় দশকে এবং এহানর স্রষ্টাগো অ'ইলতাই শিংলার ধনসেনা অজা। তার পিছে যে যে গিরিগিথানিয়ে এ বিদ্যা এহান প্রচার করলা, তানু হাবির উৎসগো এ ধনসেনা অজা।

বিষ্ণুপ্রিয়া সমাজে আরাক সাংস্কৃতিক অনুষ্ঠান আকতা আছিল। উতা আসলে নাট্যাভিনয়, কিন্তু ধর্মীয় পরিবেশে উতার অনুষ্ঠান করানিয়ে উতারে অনেকে 'রাস' বুলিয়া মাততারা, যদিও নাঙ উহান যথার্থহান নাগই। ত্রিপুরা বারো বাংলাদেশে এতারে 'লীলা' বুলিয়া মাততারা, যেহান অনুষ্ঠানর উপযোগী নাঙহান। এ অনুষ্ঠানর ভিতরে আহেরতাই লঙ্কাকাণ্ড, কুরুক্ষেত্র, কলঙ্কভঞ্জন, বসুহরণ, কালীয়দমন ইত্যাদি।

আমার বিভিন্ন সংস্কৃতির সেবা করলা গিরিগিথানী উতার ভিতরে বিশেষভাবে উল্লেখনীয় অজালোক কতোগোর জীবনী আমি 'বিষ্ণুপ্রিয়া মণিপুরীর দিকপাল' গ্রন্থত আলোচনা করেছি। উতার বাহিরে যে যে অজালোক আছিল, উতার তালিকা আকেইহান আমি তলে দিলাঙ। উতার ভিতরে বিশেষ অজা আকেইগোর সম্বন্ধে দুহান-আহান কথা মাতানিরতা থাইলে আমি যথাস্থানে মাততাঙাই।

(ক) বাসকুলীর ভিতরে বিশিষ্ট গিথানকগি এগি—

- ১। কাপকনু দেবী, ভানুগাছ
- ২। কামিনী দেবী, বিক্রমপুর
- ৩। দিনপতি দেবী, মাছুঘাট
- ৪। মায়ো বাসকী, গড়েরবন্দ
- ৫। চন্দ্রিকা, গড়েরবন্দ
- ৬। রূপবতী শর্মা, রূপার গাঙ, শিংলা
- ৭। মাইগুলি ক্ষেত্রাবী, কীর্তনতলি, ত্রিপুরা
- ৮। মেকুরী বাসকী, কৈলাসহর

এ বাসকুলী এতা হাবি প্রায় সমসাময়িক। তানুর উদ্ভব অ'ছিলতা ঊনবিংশ শতকর ৮ম দশকেও পুরি বিংশ শতকর ৪র্থ দশক পেয়া। তানুর খানি পিছে নিকুলেছিল বাসকুলী অ'ইলাতাই এতা—

- ৯। ত্রিবেণী টিপেরা, দামছড়া
- ১০। ডাকুলী, প্রতাপগড়
- ১১। কলা, পশ্চিম কৃষ্ণনগর
- ১২। মুহী, ফেতিপাত
- ১৩। মালতী, রাতাছড়া
- ১৪। ধনোবাসকী, শিংলা, পিছে কমলপুর
- ১৫। মুক্তারেই, ভানুগাছ

বর্তমানে বাসকুলী আমার সমাজে নেই বুল্লেউ চলের। যে সীমিত সংখ্যক বাসকুলী আছি, উতা অ'ইলাতাই এতা—

- ১৬। পঞ্চমী টিপেরা, প্রতাপগড়
- ১৭। , মুন্সিয়ালার গিথানক আগো
- ১৮। রাণী দেবী, কাটাবাড়ী

গোকুলানন্দ গীতি স্বামীয়ে বিষ্ণুপ্রিয়া মণিপুরী ভাষালো বাসক প্রবর্তন করানির পিছে তার জিলক রোহিনী দেবী গিথানকে ও বাসক উতা দিলো। চেংকুড়ির শ্রীরাধা গিথানকে ও রোহিনী দেবীরাঙতো হিকিয়া কতো বছর বাসক দিলো।

বর্তমানে ৭ লেখকের রচিত বাসক দিরাঁতা তার মানস কন্যা কৈলা সহর দেবযানী সিংহ গিথানকে।

(খ) বাসধারীর ভিতরে নরোত্তম (বাংলাদেশ, পিছে কমলপুর), সেনারিক রাজকুমার (কালিঞ্জর) বারো নিংথেম (ত্রিপুরা)-এ তিনোগির নাঙেই পইলা আহের। উতার পিছে

আহেরতাই সিঙ্গারীর (শিলচর) বিজয় শর্মা বারো কচুধরমর ধনঞ্জয় অজার নাঙ।

(গ) রামায়ণ কীর্তন এহানর প্রতিষ্ঠা করেছেগো শিংলার ধনসেনা অজা। তার বিষয়ে আমি ‘বিষ্ণুপ্রিয়া মণিপুরীর দিকপাল’ গ্রন্থত আলোচনা করেছি। পিছেকার রামায়ণ কীর্তনী উতা হাবি অজা ধনসেনার শিষ্য। তানুর নাঙ—

- ১। মণি, নরসিংপুর
 - ২। নীলমণি, প্রতাপগড়
 - ৩। কালিদাস, প্রতাপগড়
 - ৪। রতনমণি, অ’রুয়া, ধর্মনগর
 - ৫। বুলন, বাগরসান্নন (বর্তমানে জীবিত)
 - ৬। কৃষ্ণকুমার, গুরামাঞ্জি, ধনসেনা অজার পুতোক (বর্তমানে জীবিত)
- উতার ভিতরে রতনমণির নাঙহান সমধিক প্রসিদ্ধ।

(ঘ) ইসালপার ভিতরে পেঙার অজা সম্বন্ধে আমি পূর্বোক্ত গ্রন্থত আলোচনা করেছি। বস্তুতঃ পেঙার অজার জীবনী আমি আলোচনা করেছি তা শ্রেষ্ঠ অজাগো হিসাবে নাগই ; নব্য যুগর প্রবর্তক আগো হিসাবে। আসলে তারাংতৌ জিঙে বিখ্যাত এবং গুণবান ইসালপা সমাজে আছিল। উতার মাজে উল্লেখযোগ্য অ’ইলাতাই— (১) প্রতাপগড়র দঙ্গ অজা, (২) নরসিংপুরর কালিদাস অজা এবং (৩) মশাউলির নীলেশ্বর মুখার্জি। এ গিরক এগি সম্বন্ধে দুহান আহান কথা মাতিক।

(১) দঙ্গ অজা : দঙ্গ অজার দিব্যশক্তি আহান আছিল বুলিয়া হুনলাঙ। গিরকে প্রতাপগড়র গুরুকীর্তন আহান লমকরিয়া শিংলার কীর্তন আহানাত হমানিরকা টেঙারা ফারি দিয়া যিতেগা ডিলইলহান দেহিয়া রুকের মুড়া আগোর গজে কায়া ‘মি আহৌরিয়ে’ বুলেছে উহান শিংলার থৌপু উতাই হুনিয়া গিয়া টেঙারার জাঙেত্ত তারে গুজকরিয়া আনেছিগা। ও কীর্তনে এলা দিতেউ কাকলেল আগো তার নেম্পালহানাত কায়া আছিল।

(২) কালিদাস অজা : নরসিংপুরর কালিদাস অজা তৎকালে বিষ্ণুপ্রিয়া মণিপুরী সমাজে শ্রেষ্ঠ অজাগো। এ অজা গিরকর নিজস্ব সুরর ঢঙ আহান আছিল। বর্তমানেউ কোনো কোনো ইসালপার সুর হুনলে বুজনে ‘এতাতে কালিদাস অজার সুরনা’ বুলতারা।

(৩) নীলেশ্বর মুখার্জি : নীলেশ্বর মুখার্জি গিরক জরম অছিল তা বর্তমান বাংলাদেশর বালিগাঁওত। ভারত বিভাগর পিছে গিরক ত্রিপুরাত আয়া মশাউলিত স্থায়ীভাবে বসতি করলো। নীলেশ্বর গিরকে পইলা ডা’ক তাম করলো। পিছেদে তা এলার বিদ্যাদে বুলনদিলা এবং মণিপুরে গিয়া কতো বছর থায়াউ এলা হিকলোগা। পিছেতে তা বিখ্যাত ইসালপাগো অ’য়া আত্মপ্রকাশ করলো। অষ্টকালর হাবি অঙ্গর হাবি এলা তার কণ্ঠস্থ আছিল। রাগো বারো রাতির নিতির রাসর পরিবেশনে তার সমতুল নেয়োছিল। দিনর নীতির মিলনর পিছেকার জলকেলি, পাশাখেলা, বংশীশিক্ষা ইত্যাদির পরিবেশনেউ গিরকর বিরাট কৃতিত্ব

আছিল।

নীলেশ্বৰ মুখার্জি গিৰকে বাৰো বাগাদিলো ; বাৰো নৃত্যবিদ্যাতো তা পাৰদৰ্শী আছিল। গিৰকৰ ৪৬/৪৭ বছৰ বয়সে কবিগুৰুৰ নিমন্ত্ৰণে তা শান্তিনিকেতনে গিয়া মণিপুৰী নৃত্য শিক্ষা দিলোৱা। ঔ সসময়ত ইন্দিৰা গান্ধী গিথানক তাৰ ছাত্ৰীগো আছিলী। তৰে তা শান্তিনিকেতনে মিয়াম দিন না থাছিল ; তা আছিলতা মাত্ৰ দেড় বছৰৰ চুৰা।

(ঙ) ডাকুলাৰ ভিতৰে শিৰোমণিগো দেবসিং অজা। তাৰ লগে লগে বিখ্যাত ডাকুলাৰ নাঙ আহেৰতাই— (১) চেংকুড়িৰ নিংথৌ অজা, (২) ফেতিপাতৰ বদন অজা, (৩) বাংলাদেশৰ চেংপুড়া অজা, বাৰো শিংলাৰ সেনাৰিক অজা। অজা এতা সম্বন্ধে বিস্তৃত খবৰ আমি নাপাছি। অজা এতা সম্বন্ধে আমি যৎসামান্য হুনেছি উহানি এহানি - নিংথৌ অজাৰ ডাকৰ ৰৌহান বিখ্যাত। হুনলাঙতা— গিৰকে শিংলাত ডাক বাৰেইলে প্ৰতাপগড়ৰ টেঙাৰাৰ হাদিত্ত ৰৌহান হুনলা উনি। সেনাৰিক অজাৰ চলন বিখ্যাত। তা মাণ্ডপে হমেইলে ‘লাইট তুলো’ বুলিয়া মাতলা। উহানলো তাৰে ‘হনুমান অজা’উ বুললা।

গিৰকে আন্দুৰ গাঙৰ শিবমন্দিৰ আগোৰ সাক্ষাত ডাক বাৰেইতে মাণ্ডপৰ মানু হাবি বাহুল অ’য়া নাছেছিল।

(চ) **দুৱাৰ :** দুৱাৰৰ বিদ্যা এহান আগে আমাৰ সমাজে মিয়াম কমছিল। আগে যেতা দুৱাৰ বুলিয়া আছিল, উতাই কল্পাপি নাছাত অমাটিক পাৰদৰ্শী নাছিল ; পালাহানৰ তালহান ধনিয়া থনা উহানেই তানুৰ প্ৰধান কামহান আছিল।

দুৱাৰৰ বিদ্যা এহান পইলা যথাযথভাবে হিকেছিলতা নৱসিংপুৰৰ বৰ্জ (ব্ৰজ) গিৰকে। তা মণিপুৰৰ মুক্তাসিং অজাৰে ঘৰে থয়া বিদ্যা এহান হিকলো ; তৰে তা মণিপুৰে না গেছেগা। ঝাপিৰবনৰ খুনৌৰ ঝুলন গিৰকেউ পইলা মুক্তাসিং অজাৰাঙতো দুৱাৰি হিকলো ; পিছে মণিপুৰে গিয়াউ হিকলোগা।

এতাৰ পিছেকাৰ দুৱাৰৰ ভিতৰে নাঙ কৰলাতাই— নৱসিংপুৰৰ মদানাচান বাৰো দুধপুৰৰ দেৱান। দেৱানৰ অজাগো ঝুলন, বাৰো মদানাচানৰ অজাগো বাৰোমুনিৰ বৰ্জ অজা। বৰ্তমানৰ দুৱাৰৰ মাজে প্ৰথম স্থানে আহেৰতাই সিঙ্গাৰীৰ গোলাপ সিংহ। উতাৰ পিছে আহেৰতাই কচুধৰমৰ বকসল (অমূল্য) সিংহ। আধুনিক কালে শিংলাৰ অজিত সিংহ এ বিদ্যা এহানাদে খানি আগ বাড়েছে।

১৩। বহির্বিশ্বে মণিপুরী নৃত্য

রাজর্ষি ভাগ্যচন্দ্রই ১৮শ শতকর চতুর্থ পাদত মণিপুরে রাস-কীর্তন প্রবর্তন করানির পিছে প্রায় ত্রিশ-পঁয়ত্রিশ বছরর ভিতরেই এ কৃষ্টির প্রতি বহির্দেশর দৃষ্টি পড়ানি অ'করলো। পইলা মণিপুরর নিকটতম রাজ্য কাছাড়র রাজপরিবারর দৃষ্টি আকৃষ্ট অ'ইল। কাছাড়র রাজা গোবিন্দচন্দ্রর লগে মণিপুরর ভাগ্যচন্দ্র মহারাজার পুতোক মধুচন্দ্র রাজার জিলক ইন্দুপ্রভার বিবাহ অ'ছিল। ঔ ইন্দুপ্রভা মহারানীয়ে ১৮১৪ খৃষ্টাব্দত কাছাড়ে রাসলীলার অনুষ্ঠান করুৱাছিলি।

ত্রিপুরা রাজপরিবারর লগে মণিপুর রাজপরিবারর মিত্রতা সম্বন্ধ বহুদিনর। ত্রিপুরার রাজপরিবার বরাবরই মণিপুরী কৃষ্টির প্রতি আকৃষ্ট। স্মরণীয় কালে মণিপুরী কৃষ্টির প্রতি ত্রিপুরা রাজ পরিবারর আকৃষ্ট অ'নার পইলা নিদর্শন স্বরূপে দেহিয়ারতা— ত্রিপুরার মহারানীয়ে রাজমহলে ১৮৬৮ ইংরাজীত রাস অনুষ্ঠান আহান করুৱাছিলি। বিংশ শতাব্দীর প্রথম পাদত মণিপুরী নৃত্যর পরিসর আরাকৌ বৃদ্ধি পেইলো। ১৯১৭ ইংরাজীত কবিগুরু রবীন্দ্রনাথে ছিলটর মাছিমপুরে ‘ইমাগো’— নাঙর রাসধারী গিথনক আগোই শিক্ষা দেছে রাস আহান দেহিয়া মণিপুরী নৃত্যর প্রতি আকৃষ্ট অ'ছিল। প্রায় একই সময়ে (১৯১৯) ত্রিপুরার মহারাজ বীরেন্দ্র কিশোরর অন্দরমহলে কবি গিরকে মণিপুরী রাস, কীর্তন, মৃদঙ্গ নৃত্য ইত্যাদি মণিপুরী নৃত্যর বিভিন্ন অঙ্গ দেখলো। ১৯১৯ ইংরাজীর নরেন্দ্রর মাহাত কবি রবীন্দ্রনাথ শ্রীহট্ট ভ্রমণে আহেছিল সময়তো মাছিমপুরর বিষ্ণুপ্রিয়াই তারে নিমন্ত্ৰণ করিয়া রাখুৱাল আহান দেহুৱাছিল। ফলে মণিপুরী নৃত্যর প্রতি তা আরতাউ আকৃষ্ট অ'ইল। লগে লগে তা ত্রিপুরা রাজার পরামর্শে ত্রিপুরারেই রাজকুমার বুদ্ধিমন্ত সিংহরে মণিপুরী নৃত্য প্রদর্শনরকা শান্তিনিকেতনে নিয়া গেলগা— ১৯১৯ ইংরাজীর ডিছেস্বর মাহাত। তা মাত্র ৬ মাহা থায়া ফিরিয়া আহানিয়ে সাময়িকভাবে মণিপুরী নৃত্যর অনুশীলন বন্ধ থাইল। ১৯২৫ ইংরাজীত রবীন্দ্রনাথ পূর্ববঙ্গত আহেছিল উবাঁকা ত্রিপুরার রাজাই তারে নিমন্ত্ৰণ করিয়া রাসলীলা আহান দেহুৱাছিল। উতার পিছে ত্রিপুরা রাজার পরামর্শে ১৯২৬ ইংরাজীত ত্রিপুরারেই নবকুমার সিংহ নাঙর নৃত্যশিল্পী আগোরে শান্তিনিকেতনে নিয়া তার মাধ্যমে মণিপুরী নৃত্যরে শান্তিনিকেতনর শিক্ষার পাঠ্যক্রমে অন্তর্গত করানি অ'ইল। নবকুমার সিংহর পরিচালনাত মণিপুরী নৃত্যভঙ্গিলো ‘নটীর পূজা’ বারো ‘ঋতুরঙ্গ নৃত্যনাট্য’ পইলা অনুষ্ঠিত অ'ইলতা শান্তিনিকেতনে। ইতিমধ্যে পশ্চিমবঙ্গত মণিপুরী নৃত্য খ্যাতিলাভ করানিয়ে ১৯২১ ইংরাজীত কলিকাতাত ইংলণ্ডর Prince of Wales— অর মুঙে মণিপুরী নৃত্য প্রদর্শন করানি অ'ছিল। পশ্চিম বঙ্গর পিছে গুজরাট বারো বোম্বাইতো অজা নবকুমার গিরকে মণিপুরী নৃত্য প্রদর্শন করলো— কবিগুরুর মাধ্যমে। উতার পিছে নবকুমার গুজরাটর খ্যাতনামা ব্যবসায়ী আশ্বালাল সারভাইর নিঙোল দুগোরে মণিপুরী নৃত্য শিক্ষা দেনারকা গেলগা। খানি পিছেতা মুম্বাইত মণিপুরী নৃত্য শিক্ষক রূপে গেলগা। নবকুমারর পিছে পরপর মণিপুরেত্ত দুগো নৃত্যশিক্ষক নেনা অ'ইল ; কিন্তু তানু বাংলাভাষালো

শিক্ষা দেনা নুরারানিয়ে অল্লদিন পিছেই ফিরিয়া গেলাগা। খুব সম্ভবতঃ এতার পিছে ত্রিপুরারেই রাজকুমার চন্দ্রজিৎ সিংহ শান্তিনিকেতনে নৃত্যশিক্ষক হিসাবে যোগ দিলো। তার পিছে শান্তিনিকেতনে নৃত্য শিক্ষক হিসাবে যোগ দেছিলাতা সেনারিক রাজকুমার (কালিঞ্জর, শিলচর), মহিমচন্দ্র সিংহ (ঙেইখোঙ, শিলচর), কুলবধু সিংহ, নীলেশ্বর মুখার্জি (ভানুগাছ, ১৯৩৬-৩৮ ইং), আতোম্বা সিংহ (মণিপুর, ১৯৩৯ ইং) ইত্যাদি। ১৯৩০ ইংরাজীত কবিগুরুরে ছিলটে সেনারিক রাজকুমার গিরকর রাস আহান দেহিয়া তার নৃত্য শিক্ষাত সম্ভষ্ট অয়া তারে শান্তিনিকেতনে যোগ দেনারকা নিমন্ত্ৰণ করলো। সেনারিক গিরকে ১৯৩১ ইংরাজীত শান্তিনিকেতনে মণিপুরী নৃত্য শিক্ষক হিসাবে যোগ দিলো। ঔ সময়ত ১৯৫৫ ইংরাজী পেয়া সেনারিক গিরক শান্তিনিকেতনে আছিল, তবে হাদি হাদিত তা অবসরে আছিল উবাকা অন্যান্য গিরিগিথানীয়ে শিক্ষকতা করলাগা।

পইলা সেনারিক গিরক শান্তিনিকেতনে যোগ দিলো সময়ত তার লগে মৃদঙ্গবাদক হিসাবে গেছিলগাতা মাছুঘাটর মুহি সিংহ। ইতিমধ্যে রবীন্দ্রনাথে ১৯৩৫-৩৬ ইংরাজীত মণিপুরী রাস-রাখুরাল চানা মনেনা শ্রীহট্টত আহেছিল ; আয়া তা চালিবন্দর ছাত্রনিবাসে আছিল। ঔ সময়ত ভানুগাছর নীলেশ্বর মুখার্জীয়ে ছিলেটর মাছিমপুরে রাখুরাল আহানে রাস আহানে পরিবেশন করানির সময়ত তার লগে কবিগুরুর পরিচয় অ'ইল। সেনারিক গিরকে নীলেশ্বর মুখার্জি গিরকরে শাস্ত্রজ্ঞ নৃত্যবিদগো বুলিয়া পরিচয় দেনাই কবিগুরুরে তারাংতো মণিপুরী নৃত্য সম্পর্কে হারপানিরকা তারে ১৯৩৬ ইংরাজীত শান্তিনিকেতনে নিয়া গেলগা। তার লগে নরোত্তম নাঙর রাসধারী আগো বারো মৃদঙ্গ শিল্পী আগৌ গেছিলগা। অল্লদিন পিছে পারিবারিক কারণে নরোত্তম গিরক ঘরে ফিরানিয়ে কামিনী কুমার নাঙর আরাক মৃদঙ্গ বাদক বারো নৃত্যশিল্পী আগো নীলেশ্বর মুখার্জির লগে গেলগা। নীলেশ্বর মুখার্জীয়ে কবিগুরুর কোনো কোনো এলার নৃত্য রচনা করানির সময়ত নরোত্তম বারো কামিনী গিরকেউ তারে সাহায্য করেছিল। ঔ সময়ত ১৯৩৬ ইংরেজীত 'চিত্রাঙ্গদা' গীতিনাট্য পরিবেশনে নীলেশ্বর মুখার্জীয়ে অর্জুনর ভূমিকাত অভিনয় করেছিল। নীলেশ্বর মুখার্জি কিন্তু মাত্র দেড়-দুই বছরর চুৰা থায়া ১৯৩৮ ইংরাজীত ঘরে ফিরিল। তা শান্তিনিকেতনে থানার সময়ত হেমামালিনী, সাইরাভানু, ইন্দিরা গান্ধী - ইত্যাদি স্মরণীয় মানুরে নৃত্য শিক্ষা দেছিল।

নীলেশ্বর মুখার্জি ঘরে ফিরানির পিছে ১৯৩৯ ইংরাজীত মণিপুরর নৃত্যগুরু আতোম্বা সিংহরে শান্তিনিকেতনে নেনা অ'ছিল। ঔ সময়ত কামিনী সিংহই মাদ্রাজে গিয়া মণিপুরী নৃত্য শিক্ষা দিলোগা।

সেনারিক রাজকুমার মেরাকে অবসর নিয়া থাইল উবাকা তার পরামর্শে বেহারী সিংহ বারো বসন্ত সিংহই শান্তিনিকেতনে নৃত্য শিক্ষা দিলাগা। সেনারিক রাজকুমার গিরকে শান্তিনিকেতনে চারি বছরর মণিপুরী নৃত্যর পাঠ্যক্রম নতুন করে সাজেয়া হঙ করলো, কবিগুরুর অনেক এলার গজে নৃত্য রচনা করলো এবং অনেকহান নৃত্যনাট্য রচনা করলো। তার নির্দেশনায় কলিকাতার ছায়া ছিনেমা হলে পইলা চিত্রাঙ্গদা নৃত্যনাট্য মঞ্চস্থ অ'ছিল এবং সাধনা বসু বারো অন্যান্য অনেক শিল্পীয়ে তারাংতো নৃত্যশিক্ষা করিয়া ছায়াছবির নৃত্য প্রদর্শন

করলা। ইন্দিরা গান্ধীয়েউ ও সময়ত সেনারিক গিরকরাঙ নৃত্য শিক্ষা করেছিল।

দ্বিতীয় বিশ্বযুদ্ধর সময়ত অর্থাৎ ১৯৩৯-৪৫ ইংরাজীত সেনারিক গিরকে ভারতর শিলং, ময়মনসিং, খুলনা, পাটনা, এলাহাবাদ, লখনৌ, দিল্লী, মিরাত, আহমেদাবাদ, নাগপুর ইত্যাদি এবং ব্রহ্মদেশ, সিংহল ইত্যাদি বিভিন্ন স্থানে নৃত্য প্রদর্শন করলো। ঐ সময়ত তার প্রধান সহায়িকা আছিলাতা তার গৃহিণী পান্হুই দেবী বারো সেনাতস্মি দেবী— এ দ্বিয়োগো।

শান্তিনিকেতনে মণিপুরী নৃত্য প্রচলিত অ'নার লগে লগে নৃত্য এহান ভারতর বিভিন্ন দিকে প্রচারিত অ'না অ'করল। উতার লগে বহির্বিশ্বেউ এ নৃত্যর প্রচার আরম্ভ অ'ইল।

বিংশ শতাব্দীর পঞ্চম দশকে সিঙ্গারীর গুরু বিপিন সিংহর প্রচেষ্টাত মণিপুরী নৃত্য নুরা রূপ আহান পেইলো। বিভিন্ন শাস্ত্রাধ্যয়ন বারো সূক্ষ্ম গবেষণালো গিরকে মণিপুরী নৃত্যর লগে শাস্ত্রীয় নৃত্যর সামঞ্জস্য দেখুবাদিলো এবং ভারতীয় নৃত্যশাস্ত্রর লগে এ নৃত্যর যোগসূত্র নিকাল দিলো।

১৯৫৮ ইংরাজীত অ'করিয়া গুরু বিপিনে বোম্বাই, দিল্লী, আসাম, কলিকাতা ইত্যাদি বিভিন্ন ফামে মণিপুরী নৃত্যর গজে ভাষণ বারো নৃত্য প্রদর্শনী দিয়া বুললো। মণিপুরী নৃত্যত তার নৃত্যর নূতনত্ব, বৈচিত্র্য বারো নাটকীয়তাই ক্রমে মানুর দৃষ্টি আকর্ষণ করলো। বিশেষতঃ গুরু বিপিন বারো মণিপুরর পণ্ডিত আতোস্বাপু শর্মার প্রচেষ্টালো মণিপুরী নৃত্য ক্লাছিকেল ড্যান্স হিসাবে স্বীকৃতি পেইলো। ১৯৬৫ ইংরাজীত তা মণিপুরী নৃত্যশিল্পী হিসাবে ভারতর তৎকালীন প্রধানমন্ত্রী শ্রীমতী ইন্দিরা গান্ধীরাতো 'সঙ্গীত নাটক একাডেমি' পুরস্কার পাছিল। গিরকে অনেক নৃত্যনাট্য রচনা করেছে। ১৯৭৫ ইংরাজীত তার নির্দেশনাত কলিকাতাত মঞ্চস্থ অ'ছিল 'ভানু সিংহের পদাবলী' নৃত্যনাট্যই কলিকাতার বিদগ্ধ সমাজরে মুগ্ধ করেছিল। ১৯৭৭ ইংরাজীতো তার নির্দেশনাত বোম্বাই দূরদর্শন কেন্দ্রত মণিপুরী নৃত্যর অনুষ্ঠান প্রচারিত অ'ছিল।

ভারতর বাহিরেউ গুরু বিপিনে ইংল্যান্ড, আমেরিকা, পশ্চিম জার্মানি, ফ্রান্স, ইটালী, সুইজারল্যান্ড, রাশিয়া, জাপান, মালয়, থাইল্যান্ড, ব্রহ্মদেশ, নেপাল, সিংহল ইত্যাদি বিভিন্ন দেশে শিল্পীদললো নৃত্য প্রদর্শন করিয়া বুলেছে।

বর্তমানে চীন, ফ্রান্স, ইটালী, রাশিয়া, শ্রীলঙ্কা, মালয়, আমেরিকা, জাপান ইত্যাদি দেশে অনেক মণিপুরী নৃত্যর শিক্ষাকেন্দ্র স্থাপিত অ'ছে এবং ঐ ঐ দেশেঅনেক মণিপুরী নৃত্যশিল্পীর উদ্ভব অ'ছে। ইউরোপর বিভিন্ন দেশে অনুষ্ঠিত অ'র সাংস্কৃতিক অনুষ্ঠানে মণিপুরী নৃত্যউ স্থান পার। ১৯৭৫ ইংরাজীত ২৩ দেশর সাংস্কৃতিক প্রতিযোগিতাত মণিপুরী নৃত্যশিল্পী আগোরে প্রথম পুরস্কার দেনা অ'ছিল।

ভারতর বিভিন্ন স্থানে বারো বিদেশে মণিপুরী নৃত্য চর্চা করিয়া বা শিক্ষা দিয়া আছিল। উতার তালিকা আহান তলে দেনা অ'ইল—

শিলং :	হৰিচৰণ সিংহ (গুৰু সেনাৱিকৰ শিষ্য)
গৌহাটী :	শশীকুমাৰ সিংহ (গুৰু বিপিনৰ শিষ্য)
শিলচৰ :	আদিত্য ৰাজকুমাৰ (গুৰু বিপিনৰ শিষ্য) মুকুন্দ ভট্টাচাৰ্য্য (গুৰু বিপিনৰ শিষ্য) মিনু সিংহ (এবাক মৃত) (গুৰু বিপিনৰ শিষ্য)
কলিকাতা :	গুৰু বিপিন সিংহ বাৰো তাৰ গৃহিণী কলাবতী সিংহ উপেন্দ্ৰ সিংহ (গুৰু সেনাৱিকৰ শিষ্য) সুধীৰ সিংহ (গুৰু সেনাৱিকৰ শিষ্য) ফ্ৰেলেন্দ্ৰ মুখাৰ্জী (গুৰু সেনাৱিকৰ শিষ্য)
লখনৌ :	গুৰু বনমালী সিংহ (গুৰু সেনাৱিকৰ শিষ্য)
দিল্লী :	সিংহজিৎ চিন্তামণি সিংহ চন্দ্ৰকান্ত সিংহ (বৰ্তমানে মৃত)
পাটনা :	বিনোদিনী (গুৰু বিপিনৰ শিষ্য) ননী গোপাল চাট্ৰাৰ্জী
চণ্ডীগড় :	ধনেশ্বৰ
বোম্বাই :	দৰ্শনা ঝাৰেৰি (গুৰু বিপিনৰ শিষ্য) দেবেন্দ্ৰ সিংহ (গুৰু বিপিনৰ শিষ্য)
সিংহল :	জয়ন্তী (গুৰু সেনাৱিকৰ শিষ্য)
বাংলাদেশ :	বুলবুল চৌধুৰী (গুৰু সেনাৱিকৰ শিষ্য) বুলবুল একাডেমিৰ পৰিচালক তমন্না বেগম (গুৰু বিপিনৰ শিষ্য)
হংকং :	লাইলী (গুৰু সেনাৱিকৰ শিষ্য)
জাপান :	সাকাকি বাৰা (গুৰু সেনাৱিকৰ শিষ্য)
ৱাশিংটন :	নবঘন সিংহ (নৱ সিংপুৰৰ মেইতেইগো)

১৪। বিষ্ণুপ্রিয়া মণিপুরী মঞ্চ সঙ্গীত

বিষ্ণুপ্রিয়া মণিপুরী সমাজে বিংশ শতাব্দীর দ্বিতীয় দশক পর্যন্ত সংস্কৃতিহীন আছিল। রাসকীর্তন ভিত্তিক। উবাকা পর্যন্ত এ সমাজে মঞ্চ সঙ্গীতের প্রবর্তন না'ছে। বিংশ শতকের তৃতীয় দশকেও পুরি সিঙ্গারীর লেইখোমসেনা সিংহ গোকুলানন্দ গীতিস্বামী ইত্যাদি গিরকগাছিয়ে আহান দুহান আধুনিক মঞ্চ সঙ্গীতের প্রবর্তন করানি অ'করলা, কিন্তু ওঁ এলা উতাত আমার চিরাচরিত কীর্তনের সুরর প্রাধান্য থানাই এলা উতারে যথার্থ আধুনিক মঞ্চ সঙ্গীতের স্তরে লেহানি নুরারিয়ার। বিষ্ণুপ্রিয়ার যথার্থ আধুনিক মঞ্চ সঙ্গীতের সূচনা অ'না অ'করলোতা ১৯৫০ ইংরাজীর পিছে এবং উতার যথার্থ বিকাশ অ'না অ'করলোতা ১৯৬০ ইংরাজীর পিছেন্ত।

১৯৫০ ইংরাজীর কাছাকাছি সময়ত ভকতপুরর বিখ্যাত সঙ্গীতজ্ঞ অজা মতিলাল গিরক লখনৌত সঙ্গীত তামকরিয়া আছিল সময় উহানাত বিষ্ণুপ্রিয়া ভাষার এলা খানি চর্চা করলো। ওঁ এলা উতার ভিতরে অনেকহান জগৎমোহন সিংহ গিরকর রচনা, অনেকহান মতিলাল গিরকর নিজর রচনা। এ সঙ্গীত এতাত আমার চিরাচরিত রাসকীর্তনের সুর থাইলেউ উতাত শাস্ত্রীয় সঙ্গীতের সুরর প্রভাবখানি থানাই এতারে আধুনিক মঞ্চ সঙ্গীতের স্তরে ধরানি যাকরের। মতিলাল গিরকে ১৯৫১ ইংরাজীত ১৯৫৭ ইংরাজী পেয়া এলা এতা গৌহাটীর বেতার কেন্দ্রত প্রচার করলো। ১৯৫৯-৬০ ইংরাজীত 'বিষ্ণুপ্রিয়া মণিপুরী স্টুডেন্টছ যুনিয়ন'র সম্মেলন করানির সময়ত দেখলাও যে, সমাজর বিভিন্ন অঞ্চলেও বিষ্ণুপ্রিয়া ভাষার সঙ্গীত মঞ্চস্থ করলা। তথাপি বিষ্ণুপ্রিয়া মঞ্চ সঙ্গীতের উল্লেখযোগ্য বিকাশ অ'না অ'করলোতা ১৯৬০ ইংরাজীর পিছেন্ত। এ সময়ত মদন মোহন মুখোপাধ্যায়, সেনারূপ সিংহ ইত্যাদি অনেক গীতিকারে আধুনিক মঞ্চর উপযোগী এলা ইকরানি অ'করলা বারো উতাত সুর দিয়া গায়ক গায়িকাই মঞ্চস্থ করানি অ'করলা। এ সময়ত এলাত সুর দিলাতা অধিকাংশ ক্ষেত্রত গীতিকার নিজে, অনেক ক্ষেত্রত গায়কে। এ সময়র সুরকার এতা হাবির ভিতরে শ্রেষ্ঠ স্থান অধিকার করেছেগো অজা মতিলাল গিরক। বস্তুতঃ আধুনিক মঞ্চ সঙ্গীতের যুগ এহানর প্রবর্তকগো অ'ইলতাই এ মতিলাল সিংহ গিরক। হুদা প্রবর্তকগো নাগই, এ পর্যন্ত যে যে আধুনিক মঞ্চ সঙ্গীতের সুর প্রচলিত আছে, এতার ভিতরে মতিলাল গিরকর সুরেই হারিত্ত উল্লেখযোগ্য। এ সুরর তুল্য সুর এভাষার এলাত আর নেই বুল্লেউ চলের। গিরকে সুর দেছেতা মদন মোহন মুখোপাধ্যায় বারো ব্রজেন্দ্র কুমার সিংহর কতোহান এলাত এবং বর্তমান লেখকর বহু এলাত। এ লেখকর 'এলার মালা' গ্রন্থর এলাত সুর বারো স্বরগ্রাম দেছেতা এ মতিলাল গিরকে। উহানে এ মতিলাল গিরক বস্তুতঃ আধুনিক মঞ্চ সঙ্গীতের জনক বারো সপ্রমাট। বর্তমানে শিলচরে যে যে গিরিগিথানী সঙ্গীত চর্চা করতারা, উতার অধিকাংশই মতিলাল গিরকর শিষ্যশিষ্যা।

মতিলাল গিরকর লগে লগে আহেরতা তারেই শিষ্য সুরনাথ গিরকর নাঙ। তার

এলার সুর সমাজে বিশেষভাবে সমাদর পাচ্ছে। এ গিরকে তার নিজের এবং তার বেয়ক জগৎমোহন সিংহর রচিত এলার গজেই বেশীরভাগ সুর দিলো। এতার পিছে অনেক মঞ্চ সঙ্গীতর সৃষ্টি অ'ইল এবং উতার গায়কৌ অনেক নিকুললা। কিন্তু হাদি হাদিত আহান দুহান ছাড়া অধিকাংশ এলাতেই ভাষাগত এবং রসগত দোষ থানাই আমার মঞ্চ সঙ্গীত এবাকাউ শ্রীয গৌরবে প্রতিষ্ঠিত অ'না নুবারলো। কৈলাসহরর কমলাকান্ত গিরকে অনেক এলা রচনা করেছে, কিন্তু এলা উতার ভাষাগত এবং রসগত মান অনেক নীচস্তরে আছে। কমলপুর লয়ার অল্পবয়স্ক সুশান্ত সিংহর ভজন এলা উতার ভিতরে পূর্বোক্ত দোষ উতার পরিমাণহান অনেক কম ; উহানে এ মঞ্চ সঙ্গীতর ইতিহাসে তার নাঙহান অবশাই লনা লাগতই। এতার বাহিরে হাদি হাদিত হবা হবা এলা আহান দুহান কানে পড়ের, কিন্তু উতাতেই হাদি হাদিত রসহানিকর শব্দ থানাই, এবং গীতিকার উতার রচিত এলা অতি অল্প সংখ্যক অ'নাই তানুর নাঙ উতা উল্লেখ করানি খানি হিনপেয়ার।

বর্তমান লেখকর বিভিন্ন ধরণর শতাধিক এলা তার পরিবর্ধিত 'এলার মালা'ত প্রকাশ পাচ্ছে ; এলা উতা কৈলাসহরর তার মানস কন্যা দেবযানীয়ে প্রচার করিঁ। এতার মূল্যায়ন ভাবী সমালোচকর আতে এরেদিলাঙ। কারণ বর্তমান সমাজে সাহিত্য বিচারর বৈজ্ঞানিক ধারার প্রবর্তন এবাকাউ নাছে— এবাকাউ তথাকথিত সমালোচকে ছন্দবিচার, রসবিচার, শব্দ শক্তি বিচারর দিকেতে দৃষ্টি নাদিয়া 'বাংলা মিয়াম হমাছে', এতাতে আমার শব্দথাঙ।' ইত্যাদি কথালাে অবুজ কনাকশৌর সাদে সাহিত্য সমালোচনা করতারা। আরাক ২০/২৫ বছর পিছে যেবাকা কাব্য সমালোচনার যথার্থ বৈজ্ঞানিক ধারা সমাজে আহিতই, উবাকা হয়তো এ লেখক না থাইতই, তথাপি তার অনুগামী উতাই এলা এতার সমালোচনা বা মূল্যায়ন উতা হুনিয়া তার প্রতিনিধিরূপে আনন্দ উপভোগ করাতাই - তৃপ্তি পেইতাই।

বিষ্ণুপ্ৰিয়া মণিপুরী সমাজে নাট্যাভিনয়

বি.ম. সমাজে নাট্যাভিনয়ৰ কৃষ্টিৰ উদ্ভব অ'ছেতা বিংশ-শতকৰ দ্বিতীয়-তৃতীয় দশকেত। একুষ্টি গড়িয়া উঠেছেতা প্রধানভাবে নরসিংপুৰ, মেহেৰপুৰ, শিংলা বারো প্রতাপগড় -এ চাৰিহান ফামে। এতার বাহিৰে অন্যান্য ফামেউ ছোট ছোট নাট্যাভিনয়ৰ নিদৰ্শন আছে, কিন্তু উতার মূল্য অতি কম। তলে আমি অঞ্চলভিত্তিক নাট্যাভিনয় সংস্কৃতিৰ বৰ্ণনা আহানি দিলাঙ -

(ক) নরসিংপুৰৰ নাট্যাভিনয়

নরসিংপুৰৰ নাট্যাভিনয়ৰ সূচনা অ'ছেতা ১৯১৬ খ্রীষ্টাব্দত। বারোপুৰাত (ভুবনেশ্বৰ নগরে) জন্ম অ'ছে শ্রীগোকুলদাস সিংহ ('কৌৰা অজা' নাঙে পরিচিত) গিরক ঔ সময়ত বারোমুনিৰ রাহালটিলাত আয়া স্থায়ীভাবে বসতি করলো। ঔ গিরকৰ প্রচেষ্টায় মহাভারতৰ কুরুক্ষেত্র লীলা মণিপুরী ঢঙে নাট্যাকারে পইলা মঞ্চস্থ করানি অ'ছিল। উহানে নরসিংপুৰৰ মানুৰ গজে বিরাট প্রভাব আহান বিস্তার করেছিল। উতার পিছে আনুমানিক ১৯৩২ ইংরাজীত লক্ষাকাণ্ড নাটকৰ অভিনয় অ'ছিল।

১৯৩৬ ইংরাজীত ধলাই হাইস্কুলৰ শিক্ষক গোলাপ সিংহৰ প্রচেষ্টায় বারো মানিক সিংহ কাব্যরত্ন গিরকৰ সহায়তায় থিয়েটার আহানৰ অভিনয় করানি অ'ছিল। উতার পিছে প্রচলিত যাত্রার ধারালো পইলা অভিনীত অ'ইলতা অখোর চন্দ্রৰ 'পুত্র-পরিচয়' নাটক। উতার পিছে অভিনীত অ'ইলতা 'হরিশ্চন্দ্র' বারো 'পাথবিজয়' বা বজ্রবাহন নাটক। এ নাট্যদল এহানে কাছাড়ৰ বিভিন্ন ফামে, মিকিৰ হিলে বারো গৌহাটী -শিলঙে যাত্রা পরিবেশন করলা। ক্রমে যাত্রাদল এহানৰ নাঙ দেনা অ'ইলতা 'তরুণোদয় কলাভারতী'। দল এহানে বহুবছর অভিনয়ৰ পিছেদে বি.ম. ভাষালো নাটক মঞ্চস্থ করানি অ'করলা। মঞ্চস্থ অ'ইল নাটক উতার মাজে আছেতা ইন্দ্রকুমারৰ 'দোষী', অশ্বিনীকুমারৰ 'সাবিত্রী' বারো 'হরিশ্চন্দ্র'। 'হরিশ্চন্দ্র' নাটক এহান ১৯৬৭ ইংরাজীত শিলচরে অনুষ্ঠিত 'আসাম সঙ্ঘীত নাটক একাডেমি'ত মঞ্চস্থ অ'য়া পুরস্কৃত অ'ছিল। বর্তমানে বিশেষতঃ ইন্দ্রকুমার বারো দেবদত্ত গিরকৰ নাটক অভিনয় করতারা কনাক গোষ্ঠী আহানে।

নরসিংপুৰৰ নাট্যাভিনয়ত শ্রেষ্ঠ অভিনেতাগো আছিলতা 'মুরুলি' গিরক। গিরকৰ অভিনয় উতা এবাকাউ আহিত ভাহিয়া উঠলে তার প্রতি শ্রদ্ধাভক্তি বারো প্রীতি জাগিয়া উঠেৰ। তার পিছে আহেৰতা গোলাপ সিংহ, অশ্বিনী সিংহ, নবদীপ মিশ্র ইত্যাদিৰ নাঙ।

মেহেরপুরর নাট্যাভিনয়

মেহেরপুরর ভকতপুর গাঙর প্রেমসিঙ গিরকে ‘ভকতপুর নেশনেল যাত্রা পাটি’ নাঙর যাত্রাদল আহান হঙকরেছিল। উহানাত শ্রী বিপিন সিংহ, অজা মতিলালর জেঠা বেয়ক সঙ্গীতজ্ঞ কুঞ্জলাল সিংহ, বিখ্যাত সঙ্গীতজ্ঞ নীলমাধব সিংহ, নৃত্যশিল্পী বিহারী সিংহ ইত্যাদি নৃত্যগীতর ভূমিকাত আছিল। এ যাত্রাদল এহান লোকমুখে ‘প্রেম সিঙর যাত্রাদল’ নাঙে পরিচিত অ’ছিল। এ যাত্রাদলে রীতিমতো ব্যবসায়ী দৃষ্টিলো নাট্যাভিনয়ে লামেছিল। তবে ঔ যাত্রা উতা হাবি অ’ইলতা বাংলাভাষার মাধ্যমে।

গুরু বিপিন সিঙর পিতৃদেব শ্রী লেইখোমসেনা গিরকেউ বিংশ-শতকর ২য়-৪র্থ দশকে যাত্রাদল আহান করেছিল; ঔ দল উহানে বি.ম. ভাষার নাটক অভিনয় করলা। ঔ নাটক উতার ভিতরে আহান আছিলতা, লেইখোম সেনা গিরকরেই লিখা ‘মণিপুর-পতন’। এ নাটক এহান ১৩৪৫ সনে (১৯৩৮ইং) শিংলার পাতিয়ালাৰ জনসভা আহানাত অভিনীত অ’ছিল।

১৯৫০-৫১ ইংরাজীত চেংকুড়ির গোলাপসেনা সিংহ গিরকে ‘মণিপুর-বিজয়’, ‘পুত্র-পরিচয়’ ইত্যাদি বি.ম. ভাষার নাটক কতোহান ইকরিয়া উতা দল আহানর মাধ্যমে অভিনয় করলো। এ নাটকর প্রধান বৈশিষ্ট্যহান অ’ছিলতাই হাস্যরসর পরিবেশন।

(গ) শিংলার নাট্যাভিনয়

বি.ম. নাট্যমঞ্চর ইতিহাসে শিংলার ডাঙর ভূমিকা আহান আছে।

এ প্রসঙ্গে পইলা আহেরতা কেহুর গাঙর মানোবাবু গিরকর নাঙ। এ গিরকে এ শতাব্দীর ৫ম দশকে ‘হরিশ্চন্দ্র’ বারো ‘ভরত মিলন’ নাঙর নাটক দুহান ইকরিয়া অভিনয় কররেইলো। এ অভিনয়ে তৎকালর দর্শকরে প্রচুর আনন্দ যুগাছিল।

বাস্কাল টিলার সুধন্বা সিংহই ‘ফাগিরাম’ নাঙর নাট্য দল আহান হঙকরিয়া দল উহানলো তার লিখা নাটক উতা অভিনয় করে করে বু’ললো। তার নাটকাভিনয় উতা হাস্যরসর অফুরন্ত উৎস।

এ নাটকে অংশগ্রহণ করলা উতাই অতি সাধারণ বেশভূষালো যেসাদে তানু নিঙোল বারো বয়স্ক মানুর ভূমিকা নিখুতভাবে করে গেলাগা উহান মাততে গেলেগা অবাক অ’নির বিষয়হান।

শিংলার নাট্যাভিনয় সম্বন্ধে সংগৃহীত তথ্য

(সৌজন্য - খাইচৌবা সিংহ, পাতিয়ালা, ৩।১২।৯৫ইং)

- ১। ফুনেই পণ্ডিতৰ (জন্ম ১৮৭০-৭৫ইং, পাতিয়ালা) ‘কংসবধ’, ‘অভিমন্যু বধ’, ‘বজ্রবাহন’, ‘লক্ষ্যভেদ’ - এ নাটক এতা অভিনয় করানি অ’ছিল। নাকু অজাই নাটক এতাত অভিনয় কৰলো, বে’লাউ বেইলো। ফুনেই পণ্ডিতৰ অন্যান্য সঙ্গী আছিলাতা সেনাতল, লালমোহন, বাবান, কামিনী, খাইচৌবা বারো বিহাৰী। খাইচৌবা বারো বিহাৰী এবাকাউ জীবিত।
- ২। ফুনেই পণ্ডিত মরানির পিছে কামিনী, খাইচৌবা, বিহাৰী ইত্যাদিয়ে ‘বজ্রবাহন’ বারো ‘লক্ষ্যভেদ’ অভিনয় করলা। তানুর অন্যান্য সঙ্গী আছিলাতা রাজকুমার, নরেন্দ্র ইত্যাদি। পরবর্তী কালে এতা হাবির সহযোগে ‘চাঁদের মেয়ে’, ‘পণমুক্তি’, ‘বাঁশের বাঁশী’ ইত্যাদি নাটক অভিনয় করানি অ’ছিল।
- ৩। কেহুর গাঙর মনোবাবুরে ললিতর সহযোগে ‘হরিশ্চন্দ্র’ নাটক ইকরিয়া অভিনয় করেছিল। পরবর্তীকালে বাম্বালটিলার সুধন্বাই উহান সংক্ষিপ্ত আকারে ইকরিয়া অভিনয় করলো।
- ৪। সুধন্বার ‘ফাগিৰামে’ তার সঙ্গী অভিনেতা আছিলাতা-মদন, সুকুমার (ডুফা), নানু ইত্যাদি।
- ৫। বনর গাঙর নব অজাই বাংলা রামায়ণ লিখিয়া অভিনয় করলো। পঃ কৃষ্ণনগরর বাবাগোই নবর রামায়ণ পালা উতা মাতৃভাষালো অনুবাদ করেছিল।

(ঘ) প্রতাপগড়র নাট্যাভিনয়

স্মরণীয় কালে প্রতাপগড়ে নাট্যাচৰ্চা আরম্ভ অছেতা দুৰ্গাচরণ সিংহ গিরকরাঙতো। গিরক এগো জরম অ’ছিলতা ১৯০৫-১০ ইংরাজীৰ ভিতরে। তার রচিত একাঙ্ক নাটক ‘বজ্রবাহন’ অভিনীত অ’ছেতা ১৯৫৯-৬০ ইংরাজীত।

প্রায় ৫০-৬০ বছর আগেত্ত প্রতাপগড়ে বাংলা নাটক অভিনয়র প্রচলন আহান আছিল। ভারতর স্বাধীনতা লাভর আগে এপেই Jolly Opera বুলিয়া বাংলা নাট্যসংস্থা আহান হঙ করানি অ’ছিল। উহানর পরিচালনা করলাতা কনুংজাউ সিংহ (তিনোখালর বীরেন্দ্র সিংহর পিতাজী), কৃষ্ণকুমার সিংহ বারো মকরধ্বজ সিংহ এ তিনোগিয়ে। ঔ সময়ত অভিনয় করলা নাটক উতা অ’ছিলতাই ‘দাতা কণ’, ‘বঙ্গবীর’, ‘দেবতার গ্রাস’, ‘অপরাজিতা’, ‘নরপিশাচ’, ‘জিঘাংসা’, ‘রক্ততিলক’ ইত্যাদি। ঔ সময়ত বীরেন্দ্র সিংহ তার ২৬-২৭ বছর বয়সে নৃত্যশিল্পী হিসাবে ঔ নাটকে অংশগ্রহণ করলো। উতার গজেতা পেইন্টারগো হিসাবেউ যুক্ত আছিল।

দুর্গাচরণ গিরকর পিছে বি.ম. নাটকর ক্ষেত্রত আহিলতা তিনোখালর বীরেন্দ্র সিংহ । গিরক এগো জরম অ'ছিলতা ১৯৩৩-৩৪ ইংরাজীত । তা কনাকতেই তার পিতৃদেব কনুংজাউর লগে বাংলা নাটকে নৃত্যশিল্পী হিসাবে অংশগ্রহণ করলো । তা প্রায় ৩০ বছর বয়সেত্ত অর্থাৎ ১৯৫৮ ইংরাজীত্ত বি.ম. ভাষালো নাটক ইকরানি অ'করলো এবং ১৯৬২ ইংরাজীত্ত নাট্যসংস্থা আহান হঙকরিয়া অভিনয় করানি অ'করলো । তার নাটকর ভিতরে আছেতা 'কালান্তিক ডাকাত', 'কংসর মরণ', 'মানুর কথায় ঘর না ভাগিয়ো', 'নিমাই সন্যাস' ইত্যাদি । কালান্তিক ডাকাত অভিনীত অ'ছেতা প্রায় ৬০ বার, মানুর কথায় ঘর না ভাগিয়ো প্রায় ৫০ বার এবং নিমাই সন্যাস ৪ বার । এতার বাহিরে গিরকর সাবিত্রী-সত্যবান, পাংকটবুরণ ইত্যাদি নাটকৌ অভিনীত অ'ছিল । প্রায় হাবি নাটকেউ মুখ্য ভূমিকাত আহিলতা বীরেন্দ্র সিংহ নিজে ।

গিরকে নাটক এতা অভিনয়রকা নাটা সংস্থা আহান হঙকরিয়া উহানর নাঙ দেছিলতা 'বিষ্ণুপ্রিয়া মণিপুরী গারনী খুত্তা' । উহানাত বেঙ পাটি সহ মানু আছিলাতা প্রায় ৬০ গো ।

বিষ্ণুপ্রিয়া মণিপুরীর শহীদ

সৈন্য বাহিনীত যোগ দিয়া দেশরকা যুদ্ধ করতে যে যে গিরক গাছিয়ে জীবন দান করেছি, উসাদে শহীদ বিষ্ণুপ্রিয়ার ভিতরে অনেক আছি; কিন্তু উতার বিবরণ আমরাঙ নেই । তবে সমাজ বা দেশর জনগণর স্বার্থে আন্দোলন করতে গিয়া জীবন দান করেছি শহীদ তিনগোর কথা আমি বিশেষভাবে উল্লেখ করে পারিয়ার ।

১। ১৯৪৯ ইংরাজীর ২৩ ছেপ্টেম্বর পাথারকান্দিত কৃষক-আন্দোলনর মিছিল আহান নিকুলেছিল। উনামর পথগোত্ত পাথারকান্দির প্রধান সড়কগোত মিছিলহান কা'নার উপেই'ত মিছিল উহানরে ছুঁভুঁ করানিরকা পুলিশে গুলি চালনা করলো । ঐ গুলিচালনাত মানবাবু সিংহ নাঙর বিষ্ণুপ্রিয়া কৃষক নেতা আগো ঔ স্থানেই প্রাণত্যাগ করলো । স্মরণীয় কালে এ গিরক এগোই প্রথম শহীদগো ।

২। বাংলাদেশর স্বাধীনতা সংগ্রামর সময়ত গিরীন্দ্র সিংহ নাঙর বিষ্ণুপ্রিয়া সমাজর বীর নেতা আগো পাকিস্তান সরকারর সৈন্যবাহিনীর আ'তে নির্মমভাবে নিহত অ'য়া শহীদ অ'ইল ।

৩। ১৯৯৬ ইংরাজীর ১৬ মার্চ বি.ম. ভাষার দাবীর অঙ্গ হিসাবে প্রতাপ গড়র বিলবাড়ীত ১০০১ ঘন্টা রেল অবরোধর সময়ত পুলিশর গুলিচালনাত কুমারী সুদেষ্ণা সিংহ নাঙর নিঙোল আগো প্রাণ হারেয়া শহীদ অ'ইলী । এ সুদেষ্ণা গিথানকর জীবনীহান আমি তঙাল করে প্রকাশ করেছি ।

এতার বাহিরে আরাক দুগো-আগোরেউ শহীদ বুলিয়া কুনো-কুনোগোই দাবী করতারা; কিন্তু এসাদে দাবীর অনুকূলে আমরাঙ কুনো তথ্য নাথানিয়ে উতারে আমি শহীদর তালিকাত অন্তর্ভুক্ত করে নুরারলাঙ ।

পৰিশিষ্ট

(গ্ৰন্থহানৰ ভূমিকাত মাতেছু উহানৰ পুনৰাবৃত্তি কৰিয়া পাঠক গিৰি গিথানীৰে মাতুৰিতা-ভবিষ্যতৰ প্ৰজন্মই গবেষণা কৰবাতা বুলিয়া লোকমুখেত সংগ্ৰহ কৰেছু বিষয় এতা 'কালীপ্ৰসাদে মাতেছেতা' বুলিয়া বা-ৰো সমাজে জ্বি না লাগাদিবাঙ। গবেষণা হাৰনাপাছি গিৰিগিথানীয়ে এ বিষয়ে টু-শব্দ নাকৰানিয়ে বালা।)

(ক) বংশ-কথা

(১) তাম্ফা সিংহ, কচুধৰম (১৯৬৫)ইং

৭। মণিপুৰৰ প্ৰাচীন সাতহান বংশ মেইতেইৰ লগে তিলইলা; বিষ্ণুপ্ৰিয়াত পাচহান বংশ হমাছি।

(২) সোনা সিংহ : সিঙ্গাৰী (ডিছেম্বৰ, ১৯৬৫ইং)

১। আদিত মণিপুৰে বিষ্ণুপ্ৰিয়া নেয়'ছিল।

২। খুমোল, আঙোম, লুৰাঙ বাৰো মোইরাঙ এতা আদি বিষ্ণুপ্ৰিয়া . এতাৰ গজে রাঙামাটীত বৈয়াঘ্ৰ গোত্ৰীয় মানু আয়া আমাৰাঙ হমাছি। নিংখৌচা, চিংলেই, খাবাঙানবা এতা মেইতেই।

(৩) চূড়া সিং : কচুধৰম

১। মণিপুৰে পইলা আহেছিতা খুমোল, তানুৰ পিছে মোইরাঙ, মোইরাঙৰ পিছে মেইতেই।

২। বিষ্ণুপ্ৰিয়াৰ ভিতৰে খুমোল, মোইরাঙ, আঙোম বাৰো লুৰাঙ - এ চাৰি বংশ আছি; খাবাঙানবা, সারাংথেম বাৰো নিঙখৌজা এতা বিষ্ণুপ্ৰিয়াত নেই।

(৪) বাবু সিংহ : সিঙ্গাৰী (৫-৬-৬৬ইং)

১। পাহাঙপা বা বজ্জবাহনৰ ৭ গো জিপুতেঙ সেলাই তাৰেং অ'ছেতা; উতাৰ ভিতৰে খুমোলে জেঠাগো।

২। খুমোল, মোইরাঙ, লুৰাঙ, আঙোম, খাবা-ঙানবা, নিংখৌচা বাৰো সারাঙথেম - এ সাতহান বংশ মেইতেই বাৰো বিষ্ণুপ্ৰিয়া - এ দ্বিয়োতাতৌ আছি।

(খ) দৌ-দুকৰ কথা

তাম্ফা সিংহ, কচুধৰম (১৯৬৫ইং)

(ক) মহাদেব বাৰো পাহাংপা দ্বিয়োগি বেইবুনি।

(খ) পাহাঙপা নানা ফামে নানা ৰূপে থাৰ : চুৰিতলে সাইজিললাই, ফুংকাত ফুঙগা লাই,

উঠানে সোমলাই, বিলে পাতলাই, বারণে সেনামাহি ।

(গ) লামর দৌ মুনিয়ে অ'না পারতারা ; জেলেয়ো অ'না পারতারা ; জেলাগো অ'ইলে লাম-লেইমা বুলতারা ।

(গ) ভাষা-সম্পর্কে জনশ্রুতি

- ১। সেজমালা দেবী, কলকালিয়া (১-১১-৬৬ইং), আগেকার বুজনে খাই ঠার এহানেই মিয়াম দিলা ; তবে আমার ঠার এহানৌ দিলা ।
- ২। পণ্ডিত মোহন সিংহ, কলকালিয়া ৯১-১১-৬৬ইং)
 - লালপাতা গিরির বাপকে রাঙামাটিঙ আয়া আমার ঠার এহান নিকালাছেহান ।
- ৩। মধু সিংহ, গোপীনগর (১-১১-৬৬ইং)
 - লালপাতা গিরির বাপকে রাঙামাটিঙ আয়া ঠার এহান লিকালাছেহান ।
- ৪। মানিক সিংহ নরসিংপুর (২১-৫-৬৬ইং)
 - (ক) বিষ্ণুপ্রিয়া এতা মণিপুরর আদিম অধিবাসী; মণিপুর্ তানুর ভাষাহানৌ আছিল । মোইরাঙর ভাষা এহানৌ পুরাণা ভাষাহান । লাইহারৌবার ভাষা উহান মোইরাঙর ভাষাহান ।
 - (খ) বিষ্ণুপ্রিয়া এতা মণিপুরর আদিম অধিবাসী । মেইতেই এতা প্রায় ৪০০ বছর আগে মণিপুর্ আহেছিতা ব্রহ্মদেশেঙ । তানুর ঠারহানৌ উবাকা আছিল । মোইরাঙ এতা কিন্তু মণিপুরর প্রাচীন জাতহান ।
- ৫। নীলেশ্বর মুখার্জি, মশাডীলি (১৯৬৬ইং)
 - আমার বিষ্ণুপ্রিয়া ভাষা এহান মণিপুরর আদি ভাষাহান বুলিয়া হুনলাঙ ।
- ৬। নীলমণি সিংহ : নরসিংপুর (২-৬-৬৬ইং)
 - ১। বিষ্ণুপ্রিয়া ভাষা এহান কৈরেঙ খুল্লাকপাই রাঙামাটিঙ আনেছেহান; উতার আগে মণিপুর্ বিষ্ণুপ্রিয়া ভাষা নেয়ছিল । কতো বছর আগেউ বুজনে 'কৈরেঙখুল্লাকপাই কুরাঙতো ঠার আহান আনেদিয়া --' বুলিয়া গুজুরতে হুনলাঙ । বিষ্ণুপ্রিয়া ভাষা অ'নার আগে মেইতেই ভাষাই আমার মাতৃভাষা আছিল ।
- ৭। গোসাই সিংহ : হাতিখিরা (৪-৬-৬৬ইং)
 - ১। আমার ঠার এহান কৈরেঙ খুল্লাকপাই আনেছেহান বুলিয়া বুজনে মাতলা ।
- ৮। মাধব সিংহ : কচুধরম (৪-৬-৬৬ইং)
 - ১। মণিপুরর আগেকার ঠারহালতে খাইঠার এহান ।
- ৯। বাবু সিংহ : সিঙ্গারী (৫-৬-৬৬ইং)
 - ব্রহ্মবাহনর লগে তিন-চারিশ মানু হস্তিনাঙ মণিপুর্ আহেছিলা । উবাকা মণিপুর্ গন্ধর্ব ঠার অর্থাৎ মেইতেই ঠার এহান আছিল । গন্ধর্ব এতা হাবির হাদিত হমেয়া ও হস্তিনার মানু উতাই নিজর ঠারহান ক্রমশঃ পাহরলা । পিছেদে রাঙামাটিঙ মণিপুর্ আহিলা উতাই বা-রো ঠার এহান আনলাতা । আমার আপাবপা উতাই আমার ঠার এহান শুপৌ হার নাপেইলা ।

১০। নবদ্বীপ সিংহ, আগরতলা (১৯৬৬ইং)

- (ক) মেইতেইর ভিতরে লাইস্রাম বারো অন্য আরতাউ আছি, যেতা মূলতঃ আমার বিষ্ণুপ্রিয়া ।
- (খ) মেইতেইর ভিতরে নোঙপোক হারাম (পূর্ব দেশাগত) বারো নোংচুপহারাম (পশ্চিমদেশাগত) বুলিয়া দল দুহান আছি; উতার মাজে নোংচুম হারাম উতা আমার বিষ্ণুপ্রিয়া পাউরি । চৌদ খৃষ্টাব্দও পুরি, মেইতেইয়ে পাহারেত্ত লামিয়া বিষ্ণুপ্রিয়ারে পদানত করলাতা । উতার আগে মণিপুরে বিষ্ণুপ্রিয়া ঠরহান আছিল । মেইতেইয়ে আমার রেকর্ড উতা হাবি ছালাদেনাই এবাকা উতার কুনো নিদর্শন নপেয়ার । ১৯৩১-৩২ ইংরাজীতৌ আমি মণিপুরে গেছিলাঙগা উবাকা বুজন-ইমা-ইন্দোলে- যেতা কুনোদিন মণিপুরর বাহিরে নাহেছি-উতাই আমার ঠারহান হারপেইলা; মাতেউ পারলা ।

১১। রাজকুমারী থাম্বাল আপোস্বী (৬০ বছর বয়স) বারো বীর মঙ্গল সিং (৬০ বছর বয়সঃনিংথৌখোঙ (১৯৬৫ইং)

- ১। এপেই বরণ ডাকতে কুনোদিন বরণ ডাহানির এলা উহান নাহনেছু ।
- ২। আগেকার বুড়াবুড়িয়েতে ‘সরালেলতে রাজারো লেইপাক পুঙৌ কইলো’ বুলিয়া এলা আহান দেছি উনি ।
- ৩। ধানর বীজ বেলানির সময়ত, বরণ ডাহানির সময়ত বারো লাইহারৌবাতেৌ এলা এহান দেছি বুলিয়া বুজনরাঙতো হুনলাঙ ।
- ৪। ‘খুমোল কাঙরেই লোন’ লেইরিক উহানাত এলা এহান আছে ।
- ৫। আমার বাবা গাছিয়েউ ঠার এহান হার নাপেইলা ।
- ৬। চূড়াচান রাজার আমলে বরণ ডাহানির এলা এহান দেনা নিষেধ করেছিল ।

(ঘ) লকেইর কথা

১। সোনা সিংহ (১৯৬৫ইং)

- ১। অলকগো লকেই এতা লুরাঙ; এতা আহেছিতা বর্মাত্ত
- ২। থাংচাপা লকেই এতা মূলতঃ কামার, নট বা পুংটিংপা ।

✓ ২। শচীনন্দন মিশ্র, কালিঞ্জর

- ৩। লেঙথঙা লকেই এতাই কৈরেঙখুল্লাকপারে রাঙমাটন্ত বয়া আনেছিতা ।
- ৪। লেম্পা লকেই এতা আহেছিতা নাগাত্ত ।
- ৫। লেইঙাঙপা লকেই এতা আহেছিতা খাইত্ত ।

৩। মাণিক সিংহ কাব্যরত্ন, নরসিংপুর (১৯৬৬ইং)

- ৬। লেইস্রাকপা লকেই এতা আহেছিতা খাইত্ত ।
- ৭। থাংচাপা এতা মূলতঃ কামার আছিলাতা ।
- ৮। লৌরাঙপা লকেই এতা মূলতঃ জমি মৌরানির কাম করলাতা ।
- ৯। কেইসাংপা লকেই এতা রাজার ভাণ্ডার-রক্ষক আছিলাতা ।

৪। আমরচান্দ সিংহ, নিত্যানন্দপুর (১৯৬৬ইং)

১০। লেঙথঙা লকেই এতা কৈরেঙখুল্লাকপারে দলেইত বয়া আনেছিতা; তানুরে
এবাকাউ ‘দলেই বকুরা’ বুলিয়া গালেইতারা।

১১। পারৌগো বারো যাংপা লকেই এতা কৈরেঙখুল্লাকপার লগে আহেছিতা।

১২। থাঙচাপা লকেই এতা মূলতঃ কামার।

১৩। থানাআটিয়া লকেই এতা মূলতঃ নাপিত।

১৪। রাজা লকেইর ভিতরে ৭হান মারল আছি - পূজারী, লেইমাঙা, লৌরংপা,
কেইসাঙপা (রাজার বারণ রাহালি), মিয়াঙ-আচালপা, মেলেইপি বারো
পাচালপা।

৫। বেণিমাধব সিংহ, নরসিংপুর (১৯৬৬ইং)

১৫। কুম্ভংগো লকেই এতা উত্তরপ্রদেশর ‘কুম্ভ’ বংশভ আহেছিতা।

১৬। পারৌগো লকেই এতা পারৌ বেছেছিতা।

১৭। বারৈগো লকেই এতা পানা বেছেছিতা।

১৮। আটুলিগো লকেই এতা আহেছিতা তাখেনেত্ত; তানু ব্যবসা-বাণিজ্য করলাতা।

৬। নীলমণি সিংহ, নরসিংপুর

১৯। মেইচিগো লকেই এতা মূলতঃ মুচি।

৭। হেমন্ত রাজকুমার, নরসিংপুর (১৯৬৬ইং)

২০। থাংচাপা লকেই এতা কামার।

২১। যাংপা লকেই (মেইতেই - হিয়াংপা) এতা নৌবানাত হেইনা আছিলাতা।

২২। মেইচিগো লকেই এতা মেইপা।

২৩। শাকাপ্লা লকেই এতা পশু কাপলাতা।

২৪। লাংতেইগো লকেই এতা পুতি রঙ করলাতা।

২৫। (ক) নুরা রাজাতে গম্ভীর সিং এগো; তার বংশ উতা নুরা রাজালকেই।

(খ) কেই সাংপা এতা রাজার বারণ রাখলাতা।

(গ) মেলেইপিগো লকেই এতা ‘মেলেই’ নাঙর রাণী আগোর লগরতা।

২৬। বারৈগো লকেই এতার মূল পূর্বপুরুষ উগোর বারোগো জিপুত আছিল আরো
নাঙ এহান থছিতা।

২৭। লেইমাগো লকেই এতা দলেই বইলাতা।

২৮। পাংসিগো লকেই এতা মরার পাঙ বা খাটি বইলাতা।

২৯। আটুলিগো লকেই এতা ব্যবসায়ী; তানু আহেছিতা তাখেনেত্ত।

৩০। পুরিতগো লকেই এতা মূলতঃ অসমীয়া।

লালবাবু পণ্ডিত, কমলপুর (১৯৬৬ইং)

৩১। লেঙথঙা লকেই এতা নেম্পালে মরা বহেছিতা।

৩২। লাঙতেইগো লকেই এতা পুতি সিলাই করলাতা।

৩৩। পুরিতগো লকেই এতা মূলতঃ অসমীয়া।

৩৪। চিরুবা লকেই এতা রুক চিরেইলাতা।

৩৪। খোঙচাঙপা লকেই এতা রাজ্যৰ জাঙ ধইলাতা।

৩৬। লাংতেইগো লকেই এতাৰে আগে 'হাউ' বুললা।

শনৎ কুমার সিংহ, নিংথৌখোঙ (১৯৬৫ইং)

৩৭। লেইরাঙথেম বুলিয়া লকেই আহানে (যেতা আকৃতি প্রকৃতিত পরিষ্কারভাবে বিষ্ণুপ্রিয়া) খাম্বাথোইবীর বংশধর বুলিয়া নিজৰে পরিচয় দিতারা। তানুরাঙ থোইবীর পুতিফালি আছে; উতা অন্যতাই থইলে নুরারা অ'ইতারা।

(ঙ) বেষভূষা সম্পর্কে জনশ্রুতি

১। নীরমণি সিংহ, নরসিংপুর (২-৬-৬৬ইং)

আগে মুনিয়ে জুড়া বাধলা; আমিও দেখলাঙ।

২। সেজমালা দেবী, কলকলিয়া (১-১১-৬৬ইং)

(ক) আগে রাস করতে পলেই নাপেইলে তলপুতিত উপারিলো দলা-রাঙা ছাপা দিয়া নাছলাঙ।

(খ) আগে বরগোরতা পিঠিত কঙ্কেই জুড়া আগো বাধিয়া উগোত ইনাফি আহান দিলা।

(গ) ইমাইন্দোলর পুষাকহান আগেউ ইমে এহান আছিল।

৩। নীলেশ্বর মুখার্জি, মশাউলি (১৯-১০-৬৬ইং)

(ক) আমার ইমাইন্দোলর পুষাক এহান আগেতৌ আছেহান। তবে আমার পলেই এহানাত অনুমান করিয়ারতা - ঘাগরার সাদে পুষাক আহান আছিল পাউরি।

(খ) ইমাইন্দোলে আগেদে মুঙেদেত্ত পিঠিয়েদে মূরর পুতি দিলা, কানে বারো আঙঠি আগেত আৰাক আঙঠি আগো লামকরলা।

৪। হেমন্ত রাজকুমার, নরসিংপুর (১৪-১০-৬৬ইং)

(ক) আগে আমার মুনিয়ে মোগর মাদে গুঞ্জা নাদিয়া আঠুর গজে পুতি পিদলা। উতার আগে লেংটির সাদে হুকাঙ পুতি আকেইহান পিদলা।

(খ) ইমা ইন্দোলর চাকশাবি এতা আগে হুদা উচ্চ পরিবারে আছিল।

৫। নরধ্বজ সিংহ, খোরাই (২৮-১০-৬৬ইং)

আমার ইমাইন্দোলর পুষাক এহান আদি পুষাকহান।

৬। সোনা সিংহ, সিঙ্গারী (১৯৬৫ইং)

(ক) তলপুতির চক্রগোর বুকুর বিন্দু উগো আতিয়া গুরু বা নিরাকার পরব্রহ্মর রূপকগো, বৃত্তশৌ উগো আতিয়াকোক বা মহাব্যোমর বিষ্ণু; চক্রগোর চারিভাগে মহাদেবর ত্রিশূলগোর চিনহান।

(খ) পুন্ড্র বারো লিকসাই এ দ্বিয়োগি খাম্বাই খোইবীৰে উপহার দেছিল, বারো থোইবীয়ে কবোত খেয়া জিংতা অ'ছিলি ফল দ্বিয়োগির প্রতীকগি।

(গ) আগে আমার নিঙালপীর পুষাক এহান ঘাগরার সাদে আছিল উনি।

(ঘ) আমার সমাজে তন্তুর প্রভাব থানাই সিন্দূরর ব্যবহার নেইতা।

(ঙ) থাপাক (থা = চন্দ্র) এহানে চন্দ্র বংশর সূচনা করের ।

(চ) তলপুতির রঙ সেলাইভেদে আলাদা : খুমোলরতা কালা, আঙোমরতা রাঙা, লুরাঙরতা আসাংপা, বারো খাবঙানবারতা নাপু ।

৭। আমরচান্দ সিংহ, নিত্যানন্দপুর (৯-৩-৬৬ইং)

(ক) বহু আগে আমার ইমাইন্দোলে যাত না কাকরিয়া পুতি পিদেরিলা ।

(খ) ফেইচমর প্রচলন করেছেতা কৈরেঙখুল্লাকপাই ।

৯। সেজমালা দেবী, কলকলিয়া (১-১১-৬৬ইং)

আগে আমার মানু এতা মুসলমানর লগে আকতা অ'য়া আছিলি বুলিয়াউ হুনলাঙ ।

(চ) খাদ্য সম্পর্কে জনশ্রুতি

১। মানিক সিংহ, নরসিংপুর (২১-৫-৬ইং)

আগে মণিপুরর মানুরে হুকন চাবলা; উতার পরিবর্তে তাম্বুল ব্যবহারর প্রচলন করলোতা কৈরেঙ খুল্লাকপাই ।

২। নীলমণি সিংহ, নরসিংপুর (২-৬-৬৬ইং)

আগে আমার মানুরে আত্তির জাঙলো চিঞ্চু খেইলা উনি; ঘোরার বুহর বারো নৌফাঙ খেইলা বুলিয়াউ হুনলাঙ ; বারো হুকনলো মুখশোধন করলা ।

৩। সেজমালা দেবী, কলকলিয়া, ত্রিপুরা (১-১১-৬৬ইং)

আগে আমার মানুরে ছাগল, কুরাকি (মুরগ), বারো মইষ খেইলা উনি । চেরৌ পুড়িয়া খেইলা; ভাতর গজে দিয়াউ খেইলা উনি ।

৪। পণ্ডিত মোহন সিংহ, কলকলিয়া, ত্রিপুরা (১-১১-৬৬ইং)

আগে আমার মানুরে অ'রিঙ, মইষ, ছাগল বারো চঞ্চরা খেইলা উনি ।

৫। নরধ্বজ সিংহ, খোরাই (২৮-১০-৬৬ইং)

আগে আমার মানুরে চেরৌ ভাতর গজে দিয়া খেইলা ।

৬। মুক্তা সিং, রাঙাপানি (৬-১১-৬৬ইং)

আগে চঞ্চরার ঠেঙলো দাত ধারেইলা বুলিয়া হুনলাঙ ।

৭। ধনঞ্জয় সিংহ, নিত্যানন্দপুর (৯-৩-৬৬ইং)

আগে আমার মানুরে মাংস খাছি ।

৮। আমরচান্দ সিংহ, নিত্যানন্দপুর (৯-৩-৬৬ইং)

(ক) আমার মানুরে আগে মাংস খাছি ।

(খ) আগে মণিপুরে হুকনলো মুখশোধন করেছি ; কৈরেঙখুল্লাকপাই তাম্বুলর প্রচলন করেছেতা ।

(ছ) জাতর নাঙ সম্পর্কে জনশ্রুতি

১। লালবাবু সিংহ, কমলপুর (২৬-১০৬৬ইং)

বাংলাদেশেত্ত মানু আকতা আয়া আমরাঙ হমাছি বুলিয়া বাঙাল বুলতারাতা ।

২। নরধ্বজ সিংহ, খোরাই (১৮-১০-৬৬ইং)

বারো

৩। নীলেশ্বর মুখার্জি, মশাউলি (১৯-১০-৬৬ইং)

আমার ভাষাহান বাংলার লগে মিল বুলিয়া আমারে বাঙাল বুলতারাতা ।

বাংলাদেশর অন্তর্গত ভাষাহান বুলিয়াউ বাঙাল বুললাতা ।

৪। অমরচান সিংহ, নিত্যানন্দপুর (৯-৩-৬৬ইং)

বাংলাত্ত অনেক মানু আয়া বিষ্ণুপ্রিয়াত হমাছি আরো তানুরে বাঙাল বুললাতা ।

৫। নীলকান্ত সিংহ, খোরাই (২৮-১০-৬৬ইং)

বাঙালী দল আহান আমারাঙ হমাছি বুলিয়া আমারে বাঙাল বুলতারাতা ।

৬। নীলমণি সিংহ, নরসিংপুর (২-৬-৬৬ইং)

বিষ্ণুপ্রিয়া এতা বাংলাত্ত আহেছি বুলিয়া তানুরে বাঙাল বুলতারাতা ।

(ii) কালিছা

১। গোষ্ঠবিহারী সিংহ : গৌহাটী, (১৯৭৬ইং)

মণিপুরে ইংরেজ যুদ্ধর সময়ত পাঞ্জাবর খালিসা বা খালসা সৈন্য আহেছিল।
উতার অনেকগো মণিপুরে স্থায়ী বাস করিয়া থাইলা । উতা বিষ্ণুপ্রিয়ারাঙ
হমাছি; উহানলো বিষ্ণুপ্রিয়ারে কালিছা বুলতারাতা ।

২। অজ্ঞাতনামা লেখকর করপেখেত্ত

(ক) “চট্টগ্রাম হইতে আগত চাকমা, মথ ইত্যাদি কৈরেঙখুল্লাকপার সঙ্গে আসিয়া
কালী নাগা পর্বতে বাস করিতে থাকে । তারপর তারা মহারাজ ভাগ্যচন্দ্রের
অধীনতা স্বীকার করে । কালী নাগা পর্বতে বাস করিত বলিয়া তাহাদেরকে
কালিছা বলা হইত” ।

(খ) “কেহ কেহ বলেন - মণিপুর রাজকুমারী ইন্দুমতীর যখন কাছারী রাজার সঙ্গে
বিবাহ হয়, তখন অনেক বিষ্ণুপ্রিয়া ইন্দুমতীর সঙ্গে কাছারী রাজার সমীপে আসে
। কাছারী রাজা কালী উপাসক ছিলেন । তিনি কালীমাতার নিকট প্রত্যহ ছাগবলি
দিতেন । সেই ছাগমাংস সকলে প্রসাদী করিত । এই কালীমাতার কাছে উৎসর্গ
করা ‘ছা’ অর্থাৎ মাংস খাইয়াছিল বলিয়া বিষ্ণুপ্রিয়াদেরকে ‘কালিছা’ বলা হইত ।

৩। লালবাবু সিংহ, কমলপুর (২৬-১০-৬৬ইং)

কালীপূজা করেছিলো বুলিয়া বিষ্ণুপ্রিয়ারে কালিছা বুলতারাতা ।

৪। নরধ্বজ সিংহ, খোরাই (২৮-১০-৬৬ইং)

কালীপূজা করলা বুলিয়া বিষ্ণুপ্রিয়ারে কালিছা বুললাতা । কালী বুলিয়াউ কালিছা
বুললা পাউরি ।

৫। অমরচান সিংহ, নিত্যানন্দপুর (৯-৩-৬৬ইং)

বিষ্ণুপ্রিয়া আকতাই কালী সাধন করেছিল। আরো তানুরে কালিছা বুললাতা ।

৬। তাম্ফা সিংহ, বাবাই সেনা সিংহ : কচুধরম (ডিছেম্বর, ১৯৬৫ইং)

- ১। কালীপূজাত বলি দেছি পাঠার মূরগো খাইয়ে খাছিল। বুলিয়া তানুরে আকোকসা বুলতারা, বারো বিষ্ণুপ্রিয়াই গারিগো খাছিল। বুলিয়া তানুরে কালিছা বুলতারা।
- ৭। বেণিমাধব সিংহ, নরসিংপুর (১৯৬৬ইং)
রাঙামাটিতে মণিপুরে আছে উতার ভিতরে অনেক কালীসাধক আছিল; উতারে কালিছা বুললা। ঘাঘরার বামনগোর আদিপুরুষে তানুরে মণিপুরী সমাজে তুললো। এহানরে ঘাগরাই ‘কাল। নুকুন ধলা করেছে’ বুলিয়া মাততারা।
- ৮। ধনঞ্জয় সিংহ) নিত্যানন্দপুর (৯-৩-৬৬ইং)
১। খাইয়ে কালীপূজা করিয়া কাল। ছাগী লাবা আগো বলি দেছিল; উগোর মূরগো খাইয়ে খেইলা বুলিয়া তানুরে আমি আকোকসা বা মাকোকসা বুলিয়ার; বিষ্ণুপ্রিয়াই বারো গারিগো খাছিল। বুলিয়া তানুরে খাইয়ে কালিছা বুলতারা।
- ৯। মাণিক সিংহ কাব্যরত্ন, নরসিংপুর (১৯৬৬ইং)
১৮৩০ খৃষ্টাব্দর পরে কাছারী রাজা কৃষ্ণচন্দ্রই মণিপুরর মধুচন্দ্র রাজার জিলক ইন্দুপ্রভারে বিয়া করলো। ইন্দুপ্রভারে কৃষ্ণচন্দ্রাও খিলকরানির সময়ত ইন্দুপ্রভাই বিজাতীয় মানুর লগে তেইরতা থানা অসুবিধা অ’ইতই বুলিয়া মাতলো আরো মধুচন্দ্র রাজাই তেইর লগে মেইতেই গাঙ কতোহান বারো বিষ্ণুপ্রিয়া গাঙ কতোহান দিলো। অল্প বয়সে কৃষ্ণচন্দ্র মরানিয়ে তার খুলা বেয়ক গোবিন্দচন্দ্রই ইন্দুপ্রভারে বিয়া করলো। গোবিন্দ চন্দ্র কালীর পূজকগো আছিল। খাসপুরে তা পূজা করলো কালী উগোর নাঙ কাচাকান্তি; উপেই নরবলি পর্যন্ত অ’ইল। উপেই পাথাকান্দির বিষ্ণুপ্রিয়া আগোরে বলিরকা নেছিলগা; কিন্তু পূজারী আগোর গুপ্ত পরামর্শে তা নিজর আঙুলি আগো কামাড়েয়া ছিড়িয়া তার গারিগোত খুত আহান নিকাললো আরো তারে বলি নাদল। ও মানু উগোর লকেই উহানরে বলিগো লকেই বুললা। কৃষ্ণচন্দ্র বারো গোবিন্দচন্দ্রর আমলে ইন্দু প্রভার লগে গেছিলগা বিষ্ণুপ্রিয়া উতাই গোবিন্দ চন্দ্রর আনুকরণে কালীপূজা করলা বুলিয়া তানুরে কালিছা বুললা। ও কালিছা উতার অনেকগো মণিপুরে ফিরিয়া গেলাগা, অনেকগো অন্যান্য ফামে গেলাগা। এরে বিক্রমপুরেউ ‘কালিছা’ বুলিয়া ঘর কতোগো আছিল।

(iii) মোগলাই

- ১। নবদ্বীপ সিংহ : আগরতলা (৩১-১০-৬৬ইং)
আমারে মোগলাই বুলতারা এহান ‘মেখলী’ শব্দত আছেহান পাউরি।
ত্রিপুরাততে মিয়াঙে আমারে ‘মেকলি’ বুলতারা।
- ২। সোনা সিংহ, সিঙ্গারী
মুঘল সৈন্য আকতা মণিপুরে যুদ্ধত আয়া উপেই বাস করিয়া আছিল; উতা বিষ্ণুপ্রিয়ার ভিতরে হমাছিল। বুলিয়া বিষ্ণুপ্রিয়ারে মোগলাই বুলতারা।

(জ) পঞ্চ বিষ্ণুপ্রিয়া সম্পর্কে জনশ্রুতি

- ১। সোনা সিংহ : সিঙ্গারী - খুমোল, আঙোম, লুৰাঙ, মেইতেই বারো চিংলেই এতা পঞ্চ বিষ্ণুপ্রিয়া।
- ২। হেমন্ত রাজকুমার : নরসিংপুর - খুমোল, আঙোম, মোইরাঙ বারো লুৰাঙ এতার লগে নুৱা করে কৈরেঙখুল্লাকপা আয়া হমেইলা; এতা পঞ্চ বিষ্ণুপ্রিয়া।
- ৩। গোলাপ বাবু সিংহ : আভাঙ্গা (১৯৬৬ইং)
পঞ্চ বিষ্ণুপ্রিয়া মানে খুমোল, আঙোম, মাঙাঙ, মোইরাঙ বারো লুৰাঙ।
- ৪। হুনাবাপু সিংহ : নুৱাগাঙ (১৯৯৭ইং)
বাবাই এগাই মাতালোতা পঞ্চ বিষ্ণুপ্রিয়া বুলতে বুজারতা - বিষ্ণুপ্রিয়া, আসামী, কাছাড়ী, বাঙালী বারো মেইতেই।

(ঝ) কৈরেঙখুল্লাকপা সম্পর্কে জনশ্রুতি

- ১। মানিক সিংহ, নরসিংপুর (১৯৬৬ইং)
কৈরেঙখুল্লাকপা গোষ্ঠী এতা রাঙামাটিঙ আছেছি বাঙ্গালী। তানু মণিপুরে আহেছিতা ভাগ্যচন্দ্র মহারাজার খানি আগে। তানুর নেতা উগো ধনপতি রাজকুমার। তা মণিপুরে আয়া কৈরেঙ নাঙর নাগা আকতার পুঞ্জীত সদরগো (খুল্লাকপা) অ'য়া আছিল বুলিয়া তাৰে কৈরেঙখুল্লাকপা বুলতারাতি। তা পিছে মণিপুরর রাজদরবারে অনেক সুনাম অর্জন করেছিল। কৈরেঙখুল্লাকপা এতা বৈয়াঘ্র গোত্রীয়।
- ২। গোলাপ বাবু সিংহ, আভাঙ্গা (১৯৬৬ইং)
কৈরেঙখুল্লাকপা বারো যুগলহরি দ্বিবেইবুনি। তানু রাঙামাটিঙ মালী ঢুলী বারো অন্যান্য জাতর মানু লগে নিয়া মণিপুরে হমেইলাগা উবাকা খুমোল রাজা দামু; গরীব নোৱাজ রাজাধিরাজ। গরীব নোৱাজর সত্ত্বত কৈরেঙখুল্লাকপা থাইলা; তানু রাজার গাঙ। গরীব নোৱাজর স্ত্রীর সত্ত্বত যুগলহরিগাছি থাইলা; তানু মাদ ইগাঙ।
- ৩। শচীনন্দন মিশ্র, কালিঞ্জর (১৯৬৫ইং)
মহারাজ ভাগ্যচন্দ্রর আমলে কৈরেঙখুল্লাকপাই ঝুম খেতির বদলে বুৱা খেতির প্রচলন করলো। ফেইচোম পিদানির প্রবর্তন করলোতাউ কৈরেঙখুল্লাকপাই।
- ৪। ধনঞ্জয় সিংহ, নিত্যানন্দপুর (৯-৩-৬৬ইং)
বৈয়াঘ্র গোত্রীয় ৬৪ লকেই মানু রাঙামাটিঙ মণিপুরে আহেছি। তানুর নেতা আছিলাতা দ্বি বেইবুনি-জেঠা উগো কেইফাখুল্লাকপা, খুলা উগো কৈরেঙখুল্লাকপা। তানুরে রাজাই জাতে তুলানি নাদেছে উপেই বিষ্ণুপ্রিয়াই তানুরে তুলতে গিয়া মেইতেইয়ে তানুরে তা'র সমাজে হমানি নিষেধ করেছি।
- ৫। লালবাবু সিংহ, কমলপুর (১৯৬৬ইং)
(ক) কৈরেঙখুল্লাকপাই বিষ্ণুপ্রিয়ার ভিতরে হমানির প্রস্তাব দিতে পইলা সর্বানন্দ ঠাকুরে তানুরে আশ্রয় দিলো বুলিয়া কৈরেঙখুল্লাকপাই তাৰে গদি দিয়া সম্মান দিলো।
(খ) কৈরেঙখুল্লাকপার লগে অনেক নিম্নস্তরর জাত মণিপুরে আহেছিল। উতার

লগে উচ্চ বংশর বিবাহাদি নিষিদ্ধ করানিরকা কৈরেঙখুল্লাকপাই হাবিরে সগোত্র
বুলিয়া ঘোষণা করলো ।

(ঞ) রাজার গাঙ - মাদই-গাঙ সম্পর্কে জনশ্রুতি

- ১। হেমন্ত রাজকুমার, নরসিংপুর (১৯৬৬ইং)
কাছারী রাজা আগোর জিপুত দুগো আছিল। জেঠা উগোই ভাগ্যচন্দ্র মহারাজার জিলক
না বনকরে বিয়া করানির প্রস্তাব দিলো আরো ভাগ্যচন্দ্র মহারাজাই যাকরলো, কিন্তু
নিঙোল উগোই ধর্ম বারো ভাষা তঙাল অনার দরুণ আপত্তি করলো । উহানলো
ভাগ্যচন্দ্রই তেইর লগে ৫০ হান পরিবার দিলো, বারো জাঙাকরকা ৬০ হান পরিবার
দিলো । এ দ্বিয়োতাই লেইমানাই বারো রাজার গাঙ বুলিয়া পরিচিত । এহান ঔরার
বাগানর আগে অ'ছিলহান । পিছে কতো পরিবার মণিপুর্কে ফিরিয়া গিয়া থৌবালে
থাইলা ।
- ২। লাল বাবু সিংহ, কমলপুর (২৬-১০-৬৬ইং)
মণিপুর্কর রাণী আগোই রাজারগাঙ নিজর অংশ আহান চেইলো আরো খাঙাবোকর
অঞ্চল উগো দিয়াদিলো । উপেইর মানু উতা মাদইর গাঙ ; মাদই মানে রাণী ।
- ৩। নরধ্বজ সিংহ, খোরাই (৬৬ইং)
রাণীর অনুগামী উতা মাদই গাঙ; রাজার অনুগামী উতা রাজার গাঙ ।
- ৪। সোনা সিংহ, সিঙ্গারী (১৯৬৬ইং)
(ক) মণিপুর্কর রাজা আগোই তেখাউ রাজার নিঙোল আগো বিয়া করেছিলতা । ঔ
তেখাউ নিঙোল উগোরে সঙ্গ দেনারকা রাজাই তেখাউ দল আহান দিয়াপেঠাছিল ।
উতারে মণিপুর্কে তঙাল করে বসবাস করানিরকা দেনা অ'ইল । এতা মাদই বা
রাণীর লগে আহেছিলতা বুলিয়া তানুরে 'মাদই গাঙ' বুলিয়া মাতলা; বাকী উতা
রাজার গোষ্ঠীর মানু বুলিয়া তানুরে রাজার গাঙ বুললা ।
(খ) মণিপুর্কর কঙতেকচা রাজার সময়ত (৮ম-৯ম শতকে) অনেক কামরূপী মানু
মণিপুর্কে গিয়া বসবাস করলাগা । ১৩শ-১৪শ শতকেউ অনেক কামরূপী
মণিপুর্কে গেছিলগা । এতাই মাদই গাঙ । 'মাদই' শব্দ এগো অসমীয়াগো ।
- ৫। মানিক সিংহ, নরসিংপুর (১৯৬৬ইং)
রাজার পক্ষর উতারে রাজার গাঙ বারো রাণীর পক্ষর উতারে মাদই গাঙ বুললাতা ।
- ৬। আ'উর বারো হালহালি-লুংমাত্ত সংগৃহীত কথা
মণিপুর্কে মাদই গাঙর মানুরে পুরাণাতা । পিছে ছিলটেত্ত দল হান মানু মণিপুর্কে
গেলাগা উতারে রাজাই বিষ্ণুপ্রিয়ার ফাম উতাত তানুর লগে থানারকা দিলো;
কিন্তু মাদই গাঙর মানুরে তানুর লগে তিল'নি নাকরলা । রাজাই দিয়োতারে তিল'নির
পরামর্শ দিলো, কিন্তু রাণীয়ে মাদই গাঙর পক্ষে অ'য়া মিলানি নাদলো । মাদই গাঙে রক্তর
মিশ্রণ কম ; রাজার গাঙে নানান রক্তর মিশ্রণ আছে । মাদই গাঙর মানুরে নিজরে
বাঙাল নাবুলতারা, কিন্তু রাজার গাঙর মানুরে বাঙাল বুলতারা ।

মণিপুৰীৰ মাণ্ডপ এতা মূলে অসমীয়াৰাঙতো আহেছেতা উনি । আগে অসমীয়া বাৰো বিষ্ণুপ্ৰিয়াই মাণ্ডপ এতাত ঢাক-ঢোলৰ ফাঙনা দিলা উনি ।

(ট) মাদই-গাঙৰ বিশেষ আচাৰ বাৰো কিংবদন্তী

- ১। বিধবা বিবাহ না চলৈৰ
- ২। ‘ঘৰৰ গিথানী’ বুলিয়া দেবী আগো প্ৰত্যেক ঘৰে পূজা কৰতারা - ধূপ থমেই দিয়া । মাটিহান উচকৰিয়া বেদি (গিথানী পুঙ) আগো কৰিয়া উগোৰ গজে যে কোনো পাত্ৰ আগোত পানি থইতারা । প্ৰতি বৃহস্পতিবাৰে উগো ধয়া উগোত শুদ্ধ পানি থইতারা । য়াৰি জেলেই বাৰো বিয়া দেছি নিঙোলে ঔ পাত্ৰ উগোত ছকয়া পূজা কৰানি নাকৰেৰ; একমাত্ৰ কুমাৰী নিঙোলে পাত্ৰ উগো ছকনি পাৰতারা । ধূপ থমেইতে যোগোযৌ দেনা য়াকৰেৰ । গিথানীপুঙউগো গোবৰলো লেপানি নাকৰেৰ ।
- ৩। এ ঘৰৰ গিথানী এগো পাহাঙপাৰ বনক হাবিৰ খুলীগো বুলতারা । কোনো কোনোগোই উগোৱে মহামায়াদুৰ্গা বুলতারা; শিব অ’ইলতাই সেনামাহি ।
- ৪। তেখাউ বাৰো মাদই গাঙৰ ভাষা দিয়োহান মূলে আকহান বুলিয়া আগেকাৰ গিৰিথানীয়ে মাতলা ।
- ৫। মাদই গাঙে অসমীয়া এতাৰে নিজৰতা বুলিয়া নিঙকৰতারা ।

(ঠ) মণিপুৰে হমাছি মানু

- ১। সোনা সিংহ : সিঙ্গাৰী (১৯৬৫ইং)
- (ক) ১। বিষ্ণুপুৰে বসতিকাৰী প্ৰাক্তন পাঠান যুদ্ধবন্দী উতাৰে বিষ্ণুপুৰিয়া বুলিয়া বিজয় পাচালীত মাতেছি ।
- ২। দক্ষিণ ভাৰতৰ কৃষ্ণা গোদাবৰী অঞ্চলেত্ত আসামে আহেছি দ্ৰাবিড় উতা কালা ক্ষত্ৰিয় বুলিয়া পৰিচিত । উতা কলিতা বা কালিছা (কালা ক্ষেত্ৰি কলিতা বা কালিছা)
- ৩। ভাগ্যচন্দ্ৰ মহাৰাজাৰ সময়ত ১২০ ঘৰ শাস্তিপুৰী হিন্দু মণিপুৰে হমাছি ।
- ৪। বল্লাল সেনৰ আমলে অনেক কায়স্থ ব্ৰাহ্মণ বাৰো সৈন্য বাহিনীৰ প্ৰায় ২০০ পৰিবাৰ মণিপুৰে আহেছি ।
- ৫। ভাগ্যচন্দ্ৰৰ আমলে ৪০০০ আহোম সৈন্য মণিপুৰে আহেছিল। ভাগ্যচন্দ্ৰে তাৰ ৰাজ্যোদ্ধাৰে সাহায্য কৰাত । উতাৰ অনেকগো মণিপুৰে থাইলা ।
- ৬। পামহেইবাৰ আমলে ২০০০ বাঙালী সৈন্য বন্দী অ’ছিল; উতা বিষ্ণুপুৰে থাইলা ।
- ৭। কঙতেকচা ৰাজাৰ সময়ত (৮ম - ৯ম শতকে) অনেক কামৰূপী মানু মণিপুৰে আহেছিল ।
- ৮। ১৩শ শতকেত্ত ১৮শ শতকৰ ভিতৰেউ অনেক কামৰূপী মানু মণিপুৰে আছেছি; উতা মাদই গাঙে হমাছি । ‘মাদই’ শব্দ এগো অসমীয়াগো ।
- (খ) থকচম বা লেম্পা লকেই এতা ৫০০ বছৰৰ ভিতৰে মণিপুৰী অ’ছিতা । তানু মূলে দক্ষিণ ভাৰতৰতা । তানু উপৈইতো পইলা মগধে আয়া, পিছে উপৈইতো

বারো ত্রিপুরা রাজারাও আশ্রয় নিলাগা । ত্রিপুরা রাজাই তানুর নায়ক ছত্রসিঙের রাজ্যশৌ আহান দিলো । হাইলাকান্দির ছত্রচূড়া বা ছাতাচূড়া পাহাড় উগেই তানুর মূল ঘাটিগো আছিল । ছত্রসিঙের পুতোক প্রতাপ সিংহই লুসাই আক্রমণেত্ত আত্মরক্ষা করানিরকা টেঙারার হাদিত দুর্গ আগো করিয়া আছিল । ও ফাম উহানর নাঙ প্রতাপগড় ।

রাতি লুসেয়ে কাপিয়া লমকরেছিল গাঙ উহান কাটাবাড়ী ।

লুসেয়ে মানু মারিয়া মানুর মুরলো বুজাছিল ফাম উহান মুণ্ডমালা ।

(ড) কীর্তনা বারো বংদেশ নাছা সম্পর্কে জনশ্রুতি

১। গুরু বিপিন সিংহ, ইম্ফল (১৯৬৫ইং)

বংদেশ নাছা এহান পইলা মণিপুরে আহেছেতা চোরাইরোংবা-গরীব নোবাজর আমলে । নাছা এহান মূলে আহেছেতা বঙ্গদেশেত্ত, কিন্তু আসামর মাধ্যমে আহানিয়ে এহানাত অসমীয়ার উপাদান খানি হমাছেতা ।

২। হেমন্ত রাজকুমার : বেকিরপার (১৪-১০-৬৬)

বংদেশ = আগেকার কীর্তনর নমুনা আহান । জাঙ আকেইহান তুলে তুলে ফালদিয়া নাছানি । কীর্তনর অ'করাগোত বংদেশী চলন - বংদেশী এলা দেনা লাগের । 'হরি হরয়ে' এলা এহানর নাছা উহান বংদেশী নাছাহান । কীর্তনে দইর টুপি ফুটানি এহানো বংদেশী আচারহান । এহানেই আমার নাছার আদি নমুনাহান । কীর্তানা বুলিয়া আছি জাত উহান কীর্তনর মালিক ।

৩। নীলেশ্বর মুখার্জি (১৯৬৬ইং)

কীর্তানা এতাই পইলা মণিপুরে কীর্তনর প্রচার করেছিতা । 'প্রলয় পয়োধি জলে' এ'লা এহানাত বঙদেশী তাল আছে-এহান কীর্তনাই আনেছিহান । 'কীর্তনীয়া' শব্দত্ত 'কীর্তানা' শব্দ আহেছেতা ।

(ঢ) বিবিধ

(১) শচীনন্দন মিশ্র : কালিঞ্জর (ডিছেম্বর, ৬৫ইং)

১। ভাগ্যচন্দ্র মহারাজার জিলক লাইরৈবী সিজাই গোবিন্দজীর মুঙে নাচলো, পূজা দিলো । ও সময়ত্ত রাসর উৎপত্তি ।

২। ভাগ্যচন্দ্র মহারাজার সময়ত রামনারায়ণ শিরোমুণিয়ে মণিপুরে বৈষ্ণব ধর্ম প্রচার করলো । উতা ছাড়া গঙ্গানারায়ণ চক্রবর্তী ইত্যাদি অনেক বৈষ্ণব ধর্ম প্রচারক আহেছিলো ।

(২) শ্রীজ্ঞানাতনামা লেখকর করপেখেত্ত

"গৌরাঙ্গদেব সনাতনের উপর মণিপুর উদ্ধারের ভার ন্যস্ত করেন । কিন্তু তিনি বার্ষিকাবশতঃ অক্ষম হওয়ায় লোকনাথ গোস্বামীর উপর ভার দেন । তিনিও নানা কারণে অক্ষম হওয়ায় নরোত্তম ঠাকুরের কাছে ভার ন্যস্ত করেন । নরোত্তম তৎশিষ্য শান্তদাস গোস্বামীকে মণিপুরে পাঠান । তিনি মণিপুরে বৈষ্ণব ধর্ম প্রচার করেন ।"

(৩) সোনা সিংহ : সিঙ্গারী

আগে মণিপুরে বৌদ্ধ, শৈব, রামানন্দী-এ ধর্ম এতা আছিল। ভাগ্যচন্দ্রর আমলে মণিপুরর হাবি মানু বৈষ্ণব অ'নার ফলে ধর্ম এতা হাবি মণিপুরে নেয়ইলাতা।

(৪) গুরু বিপিন সিংহ, ইম্ফল (১৯৬৫ইং)

১। রাস এহানাত মথুরা-বৃন্দাবনর প্রভাবেই মিয়ম, বাংলা বারো আসামর প্রভাব নেই বুল্লেউ যাকরের।

২। রাসে লাই হারৌবার প্রভাব বিন্দু আহানৌ নেই।

৩। (ক)রাসর পুষাক এহান মথুরা-বৃন্দাবনেত্ত আহেছেহান। পলেই এহান আহেছেতা ঘাগরাত্ত। পশ্চিমর নিঙোলপীয়ে মূরর গজে জুড়া বাধতারা; উহানাত্ত গোপীর মুকুটগো আহেছেতা। চমকি লাগানি এহানৌ পশ্চিমার রীতিহান।

(খ) ভাগ্যচন্দ্র মহারাজাই পইলা রাস কররাছিলতা চাকসাবীলো, উতার পিছে ঘাগরালো।

৪। কৈয়ৎ বাধানি এহান মণিপুরে প্রাচীন কালেত্তৌ প্রচলিত আছিল। উবাকা প্রত্যেক বংশর তঙাল তঙাল কৈয়ৎ আছিল।

৫। মহারাজা ভাগ্যচন্দ্রই পইলা করেছিল রাস উহানাত অংশ গ্রহণ করেছিলাতা :

রাস ধারী	=	কাবোক খুশ্বেশ্বা
মৃদঙ্গবাদক	=	মহারাজ ভাগ্যচন্দ্র
দুরার	=	হরিমতী
শ্রীকৃষ্ণ	=	গোবিন্দ বিগ্রহ
শ্রীরাধা	=	রাজকুমারী বিশ্বাবতী মঞ্জুরী

(৫) অঙ্কাতনামা লেখকর করপেখেত্ত

সঙ্কীর্তনে অংশ গ্রহণকারীর স্বরূপ -

ইসালপা	=	শ্রীবাস	=	মন
ডাকুলা	=	অদ্বৈত	=	বুদ্ধি
কীর্তনমাপু	=	নিত্যানন্দ	=	চিত্ত
খলপাঙর দুরার	=	মুরারি	=	ইন্দ্রিয়
দুরার	=	মুকুন্দ	=	প্রাণ

(৬) বিজয় মুখার্জি, সিঙ্গারী, ১৯৯৭ইং

১। নিতাই ধুমেল এহানাত ১২ হান সঞ্চার আছে।

২। (ক) মুনির রাগোগো = তা আই রিতো নাতো না আ, আ আ আ আ, রিতো না আ, আ আ আ আ ইত্যাদি।

(খ) নিঙোলপীর রাগোগো = তা আই রি ই নাতো না আ আ, নানানা আ আ, তথা নানা -- ইত্যাদি



